

Kalaallit Nunaanni eqqartuussisarnermik inatsit

UAGUT MARGRETHE AAPPAAT, Guutip saammaanneranik Danmarkip Dronningia, imaaliorpugut:

Folketingip akueraa aamma Uagut akuersinitsigut inatsit manna aalajangersarppaa:

Immikkoortoq I

Eqqartuussisut il.il.

Kapitali 1

Eqqartuussisut aaqqissugaanerat il.il.

Aaqqissugaaneq

Eqqartuussiviit

§ 1. Eqqartuussiviit nalinginnaasut tassaapput najukkani eqqartuussiviit, Kalaallit Nunaanni Eqqartuussivik, Kalaallit Nunaata Eqqartuussisuuneqarfia aamma Eqqartuussiviit Qullersaat.

§ 2. Kalaallit Nunaat eqqartuussisoqarfinnut 18-inut aggornilersugaassaaq.

Imm. 2. Eqqartuussisoqarfiit annertussusaat inatsiseqarnermut ministerip aalajangersassavai, taannalu taakkunanga allangortitsisinnaavoq, allangortitsinerup eqqartuussisoqarfimmik pilersitsineq atorunnaarsitsinerluunniit nassatarissanngippagu.

Imm. 3. Inatsiseqarnermut ministereqarfik saqqummiussisassaaq eqqartuussisoqarfiit nalunaarsorneqarfiannik, eqqartuussisoqarfiit annertussusaat ilanngullugu oqaatigalugu.

§ 3. Najukkani eqqartuussiviit tamarmik ataatsimik arlalinnilluunniit eqqartuussisoqassapput, Eqqartuussisut Siunnersuisoqatigiit inassuteqaateqarnerisigut Domstolsstyrelsimit toqqarneqartussanik, tak. § 12. Inuk ataaseq najukkani eqqartuussivinni arlalinni eqqartuussisussatut toqqarneqarsinnaavoq. Tamatuminnga aalajangiinermi suliassat amerlassusaasa saniasigut annertuumik pingaartinneqartassaaq taamatut aaqqiinissaq eqqartuussisoqarfiit immikkuullarissusaannut aamma angallannikkut pissutsinut isumannaatsuunersoq.

Imm. 2. Najukkani eqqartuussivik eqqartuussisumik ataatsimik arlalinnilluunniit aalajangersimasumik utaqqiisaagallartumilluunniit sulisoqarpat Kalaallit Nunaanni Eqqartuussivimmi eqqartuussisup, eqqartuussisunik pineqartunik isumaqatiginninniaqateqareernerup kingorna, aalajangiiffigisassavaa suliassat taakkua akornanni qanoq agguataarneqassasut.

§ 4. Najukkani eqqartuussiviit eqqartuussisarfigisassaat Domstolsstyrelsimit aalajangersarneqassaaq.

Imm. 2. Najukkani eqqartuussiviit ataasiakkaat allaffiisa ammasarfissai ammasarfiisalu sivissusisassaat Kalaallit Nunaanni Eqqartuussiviup eqqartuussisuata aalajangiiffigisassavai.

Imm. 3. Najukkani eqqartuussiviup aalajangersinnaavaa eqqartuussivik nalinginnaasumik eqqartuussisarfigisami avataatigut eqqartuussitinneqassasoq.

§ 5. Kalaallit Nunaanni Eqqartuussivik ataatsimik eqqartuussisoqassaaq, kunngimit toqqarneqarsimasumik, tak. § 13.

Imm. 2. Kalaallit Nunaanni Eqqartuussivimmi sulisorineqassapput fuldmægtigit aalajangersimasumik amerlassusillit, tak. § 15.

Imm. 3. Fuldmægtigi suliassanik, Kalaallit Nunaanni Eqqartuussiviup suliassanik, suliassaqsinnaavoq eqqartuussisup aalajangiineratut annertussusilimmik.

§ 6. Kalaallit Nunaanni Eqqartuussivik Nuummi eqqartuussisarfeqarpoq, kisianni pisariaqartitsineq naapertorlugu najukkani eqqartuussiviit eqqartuussisarfiini aamma sulisinneqartassaaq.

Imm. 2. Kalaallit Nunaanni Eqqartuussivik aalajangiisinnaavoq eqqartuussivik nalinginnaasumik eqqartuussisarfiit avataanni sulisinneqassasoq.

Imm. 3. Eqqartuussutissamik aalajangiiniarnerit sumiiffimmi, uppersaatinik saqqummiussinissaq eqqarsaatigalugu, tulluarnepaami ingerlanneqartassapput.

Imm. 4. Imm. 3 malillugu aalajangiisoqartinnagu illuatungeriit oqaaseqarnissaminut periarfissinneqartassapput.

§ 7. Kalaallit Nunaata Eqqartuussisuuneqarfia ataatsimik nunap eqqartuussisuuneqassaaq, kunngimit toqqarneqarsimasumik, tak. § 13.

Imm. 2. Suliassat, Kalaallit Nunaanni Eqqartuussiviup suliarinneqqaarfiusutut aalajangiiffigisimasai, Nunatta Eqqartuussisuuneqarfiani eqqartuussisutigineqarneranni eqqartuussisuunernik marlunnik allanik Danmarkimeersunik peqataasoqartassaaq, tak. § 14. Nunatta Eqqartuussisuuneqarfiani eqqartuussisuuneq, eqqartuussisunut siulittaasusooq, aalajangiisinnaavoq eqqartuussutissap isumaqatigiinniutigineqarnerata avataatigutaaq nunatta eqqartuussisuuneqarfia eqqartuussisuunernit marlunnit peqataaffigineqassasoq.

Imm. 3. Kalaallit Nunaata Eqqartuussisuuneqarfiani sulisorineqassapput fuldmægtigit aalajangersimasumik amerlassusillit, tak. § 15.

Imm. 4. Fuldmægtigi suliassanik, Kalaallit Nunaata Eqqartuussisuuneqarfiata suliassanik, suliassaqsinnaavoq eqqartuussisup aalajangiineratut annertussusilimmik.

§ 8. Kalaallit Nunaata Eqqartuussisuuneqarfia Nuummi eqqartuussisarfeqarpoq, kisianni pisariaqartitsineq naapertorlugu najukkani eqqartuussiviit eqqartuussisarfiini aamma sulisinneqarsinnaavoq.

Imm. 2. § 6, imm. 2, 3 aamma 4 nunatta eqqartuussisuuneqarfianut taamatulli atortuutinneqassapput.

§ 9. Najukkani eqqartuussivinni aamma Kalaallit Nunaanni Eqqartuussivimmi allatsit suliassaqsinnaatitaapput akiligassanik naammassinninniaasartut suliannik, uppersaasiisartut suliannik, suliassanik pigisanik agguassinermut nalunaarsuinemullu tunngasunik kiisalu ataataarsuunernik suliassanik. Najukkani eqqartuussivinni allatsit aalajangiisinnaatitaanngillat, akerliliissutinik imaluunniit illuatungiusumiit piumasaqaammik saqqummiussisoqartillugu. Taamaattorli §§ 603, 604, imm. 4 aamma 5, kiisalu 618, imm. 2, malillugit aalajangiinissaminut piginnaatinneqarsinnaapput.

Imm. 2. Imm. 1 malillugu piginnaatitaaneq najukkani eqqartuussivinni eqqartuussisumit susassaqtumit aamma Kalaallit Nunaanni Eqqartuussivimmi eqqartuussisumit nalunaarutigineqartassaaq.

Eqqartuussisut Siunnersuisoqatigiit

§ 10. Eqqartuussisunik Siunnersuisoqatigiiliortoqassaaq,

1) piukkussanik eqqartuussisutut atorfinnut atorfinitsitsinissaq pillugu aalajangiisartussanik, tak. § 12, imm. 2,

2) najukkani eqqartuussisutut atorfinitsitassanik Domstolsstyrelsimut innersuussuteqartartussanik, tak. § 12,

3) najukkani eqqartuussisut atorfirmik saniatigut inuussutissarsiuteqarsinnaaneritut akuersissuteqarnissaq pillugu aalajangiisartussanik, tak. § 25, aamma

4) §§ 26-32-mi maleruagassat naapertorlugit suliffigisamik allanngiueq qinnuteqaatiginngisaq, maleruagassanik unioqqutitsinermit malersuisarneq, atorfirmiit peersitaagallartarneq soraarsitsisarnerlu pillugit suliaassanik najukkami eqqartuussisunut tunngassuteqartunik suliaasaqartartussanik eqqartuussivittullu aalajangiisartussanik,

Imm. 2. Imm. 1, nr. 2 malillugu innersuussutit tunngavilersorneqarsimassapput. Atorfirmut inuttaqanngitsumut ataatsimut qinnuteqartoq ataasiinnaq innersuussutigineqarsinnaavoq. Innersuussut pillugu isumaqatigiinngittoqarsimappat tamanna innersuussummi allanneqassaaq, soorluttaaq ilaasortat ataasiakkaat isummernerat ersersinneqassasoq.

§ 11. Eqqartuussisut Siunnersuisoqatigiit § 10, imm. 1, nr. 1-imi aamma 2-mi taaneqartutut pisoqartil-lugu tallimanik ilaasortaqaartassapput, tassaasunik Kalaallit Nunaata Eqqartuussisuuneqarfiani nunap eqqartuussisuunera (siulittaasoq), Kalaallit Nunaanni Eqqartuussivimmi eqqartuussisoq, najukkami eqqartuussisoq ataaseq aamma innuttaasut sinniisuutitaat marluk.

Imm. 2. Eqqartuussisut Siunnersuisoqatigiit § 10, imm. 1, nr. 3-mi aamma 4-mi taaneqartutut pisoqartil-lugu pingasunik ilaasortaqaartassapput, tassaasunik Kalaallit Nunaata Eqqartuussisuuneqarfiani nunap eqqartuussisuunera (siulittaasoq), Kalaallit Nunaanni Eqqartuussivimmi eqqartuussisoq aamma najukkami eqqartuussisoq ataaseq.

Imm. 3. Najukkami eqqartuussisoq, Folketingemi, Kalaallit Nunaata Inatsisartuini imaluunniit kommunalbestyrelsimi ilaasortaassanngitsoq, Eqqartuussisut Peqatigiiffiata innersuussutaa malillugu inatsiseqarnermut ministerimit ukiuni sisamani eqqartuussisussatut ivertinneqartassaaq. Ivertitseqqiiso-qarsinnaanngilaq.

Imm. 4. Eqqartuussisumut sinniisussamik ivertitsisoqartassaaq. Sinniisussamik ivertitsinermit imm. 3-mi, oqaaseqatigiit siulliit taamatulli atortuutinneqassapput.

Imm. 5. Innuttaasunut sinniisuutitat taakkualu sinniisussaata tassaassapput § 13, imm. 3-7 naapertor-lugu Danmarkimi Dommerudnævnelserådimut ivertinneqarsimasut taakkorpiat.

Eqqartuussisut il.il.

§ 12. Najukkani eqqartuussisut tusaamasaanerlugaassanngillat aamma kommunalbestyrelsimut qini-gaasinnaatitaanermut piumasaqaatinik naammassinnissimassapput.

Imm. 2. Najukkami eqqartuussisutut aatsaat atorfinitsitsivittoqarsinnaavoq, pineqartoq eqqartuussisu-tut atorfirmut piukkunneqartutut atorfeqarenermit kingorna eqqartuussisunut immikkut ittumik ilin-niartitaaneq naammassereerpagu. Domstolsstyrelse ilinniartitaaneq, Kalaallit Nunaanni Eqqartuus-sivimmi eqqartuussisumit isumagineqartussa, pillugu erseqqinnerusunik maleruagassiussaaq.

Imm. 3. Domstolsstyrelsip inuk imm. 2 naapertorlugu ilinniartitaanissamik piumasaqaateqarnermut pissutsini immikkut ittuni ilaannakortumik tamakkiisumilluunniit pisussaajunnaarsissinnaavaa.

Imm. 4. Najukkami eqqartuussisutut atorfinnut piukkussanik atorfinitsitsinermit aamma eqqartuussis-unik toqqaanerni inuttut suliaasatigullu piginnaasaqarnerit saniasigut pingartinneqartassaaq pineqartoq eqqartuussisoqarfimmi najugaqarfigisamini pissutsinik ilisimasaqartuunersoq.

§ 13. Kalaallit Nunaanni Eqqartuussivimmi eqqartuussisoq aamma Kalaallit Nunaata Eqqartuus-sisuuneqarfiani nunap eqqartuussisuunera inatsisilerituutut soraarummeernermit angusaqarsimasuussap-put.

Imm. 2. Kalaallit Nunaanni Eqqartuussivimmi eqqartuussisutut aamma Kalaallit Nunaata Eqqartuussisuuneqarfiani nunap eqqartuussisuuneratut toqqaaneq pisassaaq danskit eqqartuussisarner-mik inatsisaanni malittarisassat §§ 42-43 d-miittut malillugit, taamaattoq tak. imm. 3-7.

Imm. 3. Kalaallit Nunaanni Eqqartuussivimmi eqqartuussisutut imaluunniit Kalaallit Nunaata Eqqartuussisuuneqarfiani nunap eqqartuussisuuneratut atorfiup inuttalernerqarnissaata suliarineqarnerani peqataatinneqassapput Dommerudnævnelsesrådet, eqqartuussissuserisoq Kalaallit Nunaanni najugalik, eqqartuussissuserisumut Danmarkimi najugalimmut taarsiullugu, aamma inuiaqatigiit danskit sinniisuutitaannut taarsiullugit inuiaqatigiit kalaallit sinniisuutitaat marluk.

Imm. 4. Inuiaqatigiit kalaallit sinniisuutitaat Kalaallit Nunaanni Naalakkersuisunit aamma Kanukokamit (Kalaallit Nunaanni Kommuneqarfiit Kattuffiat) innersuussuteqarnerup kingorna Inatsiseqarnermut ministereqarfimmit ivertinneqartassapput.

Imm. 5. Folketingimi, Kalaallit Nunaata Inatsisartuini aamma kommunalbestyrelsini ilaasortat Dommerudnævnelsesrådet ilaasortaasinnaangillat.

Imm. 6. Inuiaqatigiinnut sinniisuutit ukiunut sisamanut ivertinneqartassapput. Ivertitseqqiisoqarsinnaangilaq.

Imm. 7. Inuiaqatigiit sinniisuutitaat tamarmik immikkut sinniisulerneqartassapput. Sinniisussaliinermi imm. 4-5-imi aamma imm. 6-imi, oqaaseqatigiit siulliit taamatulli atortuutinneqassapput.

§ 14. Nunap eqqartuussisuuneri, § 7, imm. 2 malillugu Kalaallit Nunaata Eqqartuussisuuneqarfiani suleqataasussat, Danmarkimi nunap eqqartuussisuunerisut toqqarneqarsimasuussapput.

Imm. 2. Østre aamma Vestre Landsretip præsidentii qinnuteqaateqarneq naapertorlugu tamarmik immikkut ivertitsissapput nunap eqqartuussisuunerinik imm. 1-imi taaneqartunik naleqquttumik amerlassusilinnik. Eqqartuussisuunertut ivertinneqarsimasut aamma Kalaallit Nunaata Eqqartuussisuuneqarfiani eqqartuussisuuneq isumaqatiginninniarfigereerlugit landsretit præsidentiisa suliasat akunnerminni agguataarneqarnissaat aalajangersaavigissavaat.

§ 15. Kalaallit Nunaanni Eqqartuussivimmi aamma Kalaallit Nunaata Eqqartuussisuuneqarfiani fuldmægtigit inatsisilerituutut soraarummeernerminni angusisimasuussapput.

Imm. 2. Fuldmægtigit Domstolsstyrelsimit atorfinitsinneqartassapput, naalagaaffiup eqqartuussivii atorfeqarfigissallugit.

Imm. 3. Domstolsstyrelsip fuldmægtigit ilinniartitaanissaannut maleruagassat aalajangersassavai.

Eqqartuussisutut ivertitsigallarneq

§ 16. Eqqartuussisutut ivertitsigallartoqarnera Kalaallit Nunaanni Eqqartuussivimmi eqqartuussisumit §§ 17-19 malillugu nalunaarutigineqarsinnaavoq.

Imm. 2. Najukkami eqqartuussisuugallartussatut ivertinneqarsinnaavoq eqqartuussisutut toqqarneqarsimasuq imaluunniit Kalaallit Nunaanni Eqqartuussivimmi fuldmægtigi.

Imm. 3. Najukkami eqqartuussisuugallartussatut aamma ivertinneqarsinnaavoq eqqartuussisussatut piukkussat ilaat, pineqartup taassuma ilinniartitaanerup ilaa tunngaviusoq § 12, imm. 2-mi taaneqartoq naammassereersimappagu imaluunniit ilinniagaqarnissamut tamatumunnga § 12, imm. 3 malillugu pissussaajunnaarsinneqarsimappat. Najukkami eqqartuussisutut atorfimmu piukkussa ilinniarnermi nalaani qaqugumiit eqqartuussisuugallartutut ivertinneqassanersoq pillugu Domstolsstyrelsi malit-tarisassanik erseqqinnerusunik aalajangersaassaaq.

§ 17. Najukkami eqqartuussisutut ivertitaagallarneq nalunaarutigineqarsinnaavoq, atorfiup inuttaqan-ginnerani imaluunniit aalajangersimasumik eqqartuussisuusup pisinnaanginnerani tamanna pisariaqarlerpat.

Imm. 2. Imm. 1-imi taaneqartut pissutigalugit tamanna pisariaqartutut nalilerneqarpat, najukkami eqqartuussisoq kinaluunniit pissussaavoq atorfimmi saniatigut atorfiugallartumut allamut ivertinneqar-nissani akuerissallugu.

Imm. 3. Najukkami eqqartuussisutut atorfik qaqugukkulluunniit ukiut tallimat sinnerlugit sivisus-susilimmik utaqqiisaagallartumik inuttaqartinneqarsinnaangilaq.

Imm. 4. Utaqqiisaasumik ivertitsineq atorunnaassaaq atorfik inuttaqartinneqanngitsoq inuttalerneqarpat imaluunniit pisinnaajunnaarnermut pissutaasoq atuukkunnaarpat. Taamaattorli Kalaallit Nunaanni Eqqartuussivimmi eqqartuussisup ivertitsineq siusinnerusukkut atuukkunnaarseqqissinnaavaa.

§ 18. Eqqartuussivimmi eqqartuussisuusup saniatigut allamik utaqqiisaasumik ivertitsineq nalunaarutigineqarsinnaavoq, tamanna eqqartuussivimmi pissutsinit imaluunniit ilinniagaqarnermut tunngasutuilinnit pisariaqartinneqarpat.

Imm. 2. Ivertitsineq qaqugukkulluunniit ukiut marluk sinnerlugit atuutsinneqarsinnaanngilaq.

Imm. 3. Utaqqiisaasumik ivertitsineq Kalaallit Nunaanni Eqqartuussivimmi eqqartuussisumit atuukkunnaarseqqinneqassaaq.

§ 19. Najukkami eqqartuussisup suliassamut akooqusaannginnera pissutigalugu pisariaqassappat Kalaallit Nunaanni Eqqartuussivimmi eqqartuussisoq eqqartuussisup taartaanik ivertitsissaaq.

§ 20. Najukkami eqqartuussisumut ikiortitut ivertitsigallarneq Kalaallit Nunaanni Eqqartuussivimmi eqqartuussisumit nalunaarutigineqarsinnaavoq, tamanna atorfiup inuttaarunnerani imaluunniit eqqartuussisup pisinnaajunnaarnerani pisariaqartinneqarpat aammalu § 16 malillugu eqqartuussisuugallartusamik ivertitsisoqarsinnaasimangippat.

Imm. 2. Najukkami eqqartuussisumut ikiortitut ivertitsinermi piumasaqaatit § 12, imm. 1-imiittut aamma 4-miittut taamatulli atortuutinneqassapput.

Imm. 3. Kalaallit Nunaanni Eqqartuussivimmi eqqartuussisoq imm. 4 aamma 5 malillugit aalajangiisassaaq eqqartuussisumut ikiorti suliassanik sunik suliassaqarsinnaanersoq.

Imm. 4. Najukkami eqqartuussisumut ikiortit makkuninngaannerusoq suliassaqartussanngortinneqarsinnaapput:

- 1) Ataataassarsiunerit,
- 2) Pigisanik suliaqarnerit aamma
- 3) Uppernarsaasiinerit.

Imm. 5. Eqqartuussisumut ikiortit, eqqartuussisumut ilinniartitaanermi § 12, imm. 2-mi eqqartorneqartumi pinerluttulerinermi suliaqarnermi pinngitsaaliinikkut akuliuttarneq pillugu atuareersimasut ilaatigut suliassanik makkuninnga aamma suliassaqarsinnaapput:

- 1) Inatsimmi matumani kapitali 32-mi maleruagassat malillugit illersuisumik, eqqartuussiviup avataaneersumik siunnersortissamik imaluunniit najugarisami ikiortissamik ivertitsinissaaq pillugu apeqqutit,
- 2) pinerlineqartumut illersuisussamik § 333 malillugu ivertitsinissaaq pillugu apeqqutit,
- 3) inatsimmi matumani kapitali 35-mi maleruagassat malillugit tigummigallagassanngortitsineq pillugu apeqqutit,
- 4) inatsimmi matumani kapitali 36-mi maleruagassat malillugit nalunaarutini isertuussisussaannermi pinngitsaaliissuteqartarneq, alaatsinaattarneq, timimik misissuisarneq aamma uppernarsaatissanik ujarlerfiginnittarneq pillugit apeqqutit, aamma
- 5) inatsimmi matumani kapitali 37-mi maleruagassat malillugit paasiniaanermi pinngitsaaliinikkut allatigut akuliuttarneq pillugu apeqqutit.

Imm. 6. Najukkami eqqartuussisumut ikiortimik ukioq ataaseq tikillugu ivertitsisoqarsinnaavoq. Ivertinneqartoq toqqaqqinneqarsinnaavoq. Taamaattorli eqqartuussivimmi ataatsimi ivertitsineq sivisunerpaamik katillugit ukiunut pingasunut pisinnaavoq.

Imm. 7. Najukkami eqqartuussisunut ikiortinngortitaasimaneq atorunnaassaaq imm. 1 imaluunniit 2 malillugu ivertinneqarnissamut piumasaqaatit atuukkunnaarpat. Taamaattorli Kalaallit Nunaanni Eqqartuussivimmi eqqartuussisoq ivertitsinermik siusinnerusumiit atuukkunnaarsitseqqissinnaavoq.

§ 21. Kalaallit Nunaanni Eqqartuussivimmi eqqartuussisutut aamma Kalaallit Nunaata

Eqqartuussisuuneqarfiani eqqartuussisuunertut ivertitsigallarneq Domstolsstyrelsimit § 22 malillugu aamma Eqqartuussiviit Qullersaata præidentianit § 23 aamma § 24 malillugit nalunaarutigineqarsinnaavoq.

Imm. 2. Inuk, atorfimmu imm. 1-imi taaneqartutut ivertinneqarallartoq, eqqartuussisutut aalajangersimasumik atorfinitsinneqarnissamut pisinnaasatigut piunasaqaataasut assingini pisinnaasaqassaaq.

§ 22. Domstolsstyrelsi Kalaallit Nunaanni Eqqartuussivimmi eqqartuussisumik aamma Kalaallit Nunaata Eqqartuussisuuneqarfiani eqqartuussisuunermik ivertitsigallarsinnaavoq, tamanna atorfiup inuttaqannginnerata imaluunniit aalajangersimasumik eqqartuussisup pisinnaajunnaarnerata pisariaqalersipagu.

Imm. 2. Napparsimaneq pissutigalugu pisinnaajunnaarnerit saniasigut atorfik ukioq ataaseq sinnerlugu utaqqiisaasumik inuttaqartinneqarsinnaanngilaq.

Imm. 3. Ivertitsigallarneq eqqartuussisup innuttaasut sinnerlugit suliareqqusaasumik allamik suliasaqarneranik pissuteqarpat, ukiumik ataatsimik killeqartitsineq ukioq ataasiakkaarlugu tikillugu sivisusilerlugu sivitsorneqarsinnaavoq, taamaaliortoqassappat piunasaqaataavoq

- 1) pissutsit immikkut illuinnartut pissutissaqartitsissasut,
- 2) Eqqartuussiviit Qullersaata præidentia akuersissasoq, aamma
- 3) eqqartuussisutut toqqarneqarsimasoq atorfimmu ivertinneqarallarsimassasoq.

Imm. 4. Ukiumik ataatsimik killeqartitsinermik sivitsuisarneq sivisunerpaamik pisinnaavoq katillugit ukiuni pingasuni.

Imm. 5. Ivertitsigallarneq atorunnaassaaq atorfik inuttaqartinneqanngitsoq inuttalerneqarpat imaluunniit pisinnaajunnaarnermut tunngaviusoq atorunnaarpat. Taamaattorli Eqqartuussiviit Qullersaata præidentia innersuussuteqarneratigut Domstolsstyrelsip ivertitsineq siusinnerusukkumiit atuukkunnarseqqissinnaavaa.

§ 23. Eqqartuussiviit Qullersaata præidentia Kalaallit Nunaanni Eqqartuussivimmi eqqartuussisup saniatigut eqqartuussisumik imaluunniit Kalaallit Nunaata Eqqartuussisuuneqarfiani eqqartuussisuunerup saniatigut eqqartuussisuunermik ivertitsigallarsinnaavoq, eqqartuussivinni taakkunani pissutsit tamanna pisariaqartippassuk.

Imm. 2. Ivertitsineq qaqugukkulluunniit ukiut marluk qaangerlugit sivisussuseqarsinnaanngilaq.

Imm. 3. Eqqartuussiviit Qullersaata præidentia Kalaallit Nunaanni Eqqartuussivimmi eqqartuussisumik aamma Kalaallit Nunaata Eqqartuussisuuneqarfiani eqqartuussisuunermik isumaqatiginninni areerluni aalajangiissaaq eqqartuussisutut utaqqiisaasumik ivertinneqartup suliasat suut suliarissagai.

Imm. 4. Ivertitsigallarneq Eqqartuussiviit Qullersaata præidentia atuukkunnarseqqissavaa.

§ 24. Kalaallit Nunaanni Eqqartuussivimmi eqqartuussisup imaluunniit Kalaallit Nunaata Eqqartuussisuuneqarfiani eqqartuussisuunerup suliasamat akooqqusaannginnera pissutigalugu pisariaqalissappat Eqqartuussiviit Qullersaata præidentia eqqartuussisup taartaanik ivertitsissaaq.

Eqqartuussisut saniatigooralugu inuussutissarsiuteqarnerat, maleruagassanik unioqutitsinernik malersuisarneq aamma soraartarneq il.il.

§ 25. Najukkami eqqartuussisoq taamaallaat Eqqartuussisut Siunnersuisoqatigiit akuersineratigut atorfimmu pingaarnerup saniatigut aalajangersimasumik aningaasarsiutaasumik sulisinnaavoq.

§ 26. Najukkami eqqartuussisoq soraarsitaasinnaavoq piukkunnaateqannginneq imaluunniit nappaateqarneq pissutigalugu imaluunniit pineqartoq pisuusimappat pisumut, ataqqinassutsimik tagineqarnermillu eqqartuussisutut suliasaqarnermi piunasaqaataasunut, annaasaqartitsisumut.

Imm. 2. Soraarsitsisoqarsinnaavortaaq eqqartuussivinnik aaqqissuuseqqinnerup kingunerisaanik.

Imm. 3. Kalaallit Nunaanni Eqqartuussivimmi eqqartuussisoq nammineerluni sulissuteqarnermigut imm. 1 aamma 2 malillugit soraarsitsinissaq pillugu apeqquummik Domstolsstyrelsimut saqqummiussis-saaq.

Imm. 4. Imm. 1 aamma 2 tunngavigalugit suliassat Domstolsstyrelsimut aamma Eqqartuussisut Siunnersuisoqatigiivinut suliassanngortinneqartassapput.

§ 27. Atorfeqarfigisamik qinnuteqaataangitsumik allanngineq eqqartuussivinnik aaqqissuisoqaqqin-nerani aatsaat pisinnaavoq.

Imm. 2. Atorfeqarfigisap allanngortinneqarnissaanut kalerriunneqareersimasumut akerliliisoqassappat Kalaallit Nunaanni Eqqartuussivimmi eqqartuussisup Domstolsstyrelsi qinnuigissavaa suliassaq Eqqar-tuussisut Siunnersuisoqatigiivinut suliassanngortinneqassasoq. Akerliliissut saqqummiunneqassaaq, eqqartuussisup pineqartup atorfeqarfittaassaminik kalerrinneqarneraniit kingusinnerpaamik ullut 14-it qaangiunneranni.

§ 28. Najukkami eqqartuussisoq pillugu maalaarutit inummit, taamaaliornissaminut peqqutissaqar-tumit, Kalaallit Nunaanni Eqqartuussivimmi eqqartuussisumut tunniunneqartassapput.

Imm. 2. Maalaarut tunniunneqassaaq, maalaartup pissutsinik maalaaruteqarnissamut pissutissiisunik ilisimasaqalerneraniit kingusinnerpaamik sapaatit akunneri sisamat qaangiunnerini.

Imm. 3. Kalaallit Nunaanni Eqqartuussivimmi eqqartuussisup inuit, pisumut maalaarummi pineqartu-mut naleqquttumik soqutigisaqarfiginninngitsut, maalaarutaat itigartissinnaavai, aamma maalaarutit piffissaq eqqorlugu tunniunneqanngitsutut imaluunniit erseqqissumik tunngavissaqanngitsutut siumut naliliivigineqartut.

§ 29. Kalaallit Nunaanni Eqqartuussivimmi eqqartuussisup maalaaruteqarneq naapertorlugu imaluun-niit nammineerluni sulissuteqarnermigut eqqartuussisoq, atorfimmini suliassaminik sumiginnaasimasoq peqqissaarussisimangitsorlu imaluunniimmi assuarnartumik kusanaatsumilluunniit pissusilersorsi-masoq, mianersoqqusinnaavaa.

Imm. 2. Suliassaq qanoq ittuussutsi naapertorlugu imm. 1 malillugu aalajangiiffigissallugu naleqqutin-ngitsuusorineqarpat Kalaallit Nunaanni Eqqartuussivimmi eqqartuussisup Domstolsstyrelsi qinnuigis-savaa suliassaq taanna Eqqartuussisut Siunnersuisoqatigiivinut suliassanngortinneqassasoq.

§ 30. Suliassat, § 26, imm. 4, § 27, imm. 2, aamma § 29, imm. 2 naapertolugu Eqqartuussisut Siunner-suisoqatigiivinut tunniunneqartut, Domstolsstyrelsimut saqqummiunneqartassapput. Najukkami eqqar-tuussisoq, suliassami pineqartoq, tamatuma kingorna uparuaatissaminik allakkatigut saqqummiussaqaar-nissamut periarfissinneqartassaaq. Najukkami eqqartuussisoq taamaaliornissaminik noqqaassuteqarpat imaluunniit suliassap qanoq ittuunerata tamanna pisariaqartippagu Eqqartuussisut Siunnersuisoqatigiit suliassap oqaatsitigut isumaqatigiinniutigineqarnissaa pillugu aalajangiissapput tamannalu ilutigalugu aalajangiissapput tamanna matoqqasumik ingerlanneqassanersoq. Eqqartuussutissap isumaqatigiinni-utigineqarnissaa pillugu aalajangersakkat erseqqinnerusut Eqqartuussisut Siunnersuisoqatigiivisa siulit-taasuata aalajangersartassavai, malittarisassat saqitsaanermik suliassat siullermeersumik suliarineqarfi-anni eqqartuussutissamik isumaqatigiinniuteqarnermi atuuttut malillugit, pissutsit assigiinngissutaasa nassatarisaannik allannguuserlugit. Najukkami eqqartuussisoq pisimasuiup eqqortuuneranik assortuip-pat, aammalu Eqqartuussisut Siunnersuisoqatigiit tamanna pisariaqartuuserippassuk, suliassap ataqatigi-innera aalajangersarneqassaaq pinerlunnernik suliassanik paasiniaanermi maleruagassat malillugit, pisariaqartumik allannguuserlugit.

Imm. 2. Najukkami eqqartuussisup tamanna noqqaassutigippagu Eqqartuussisut Siunnersuisoqatigiit siulittaasuata pineqartoq eqqartuussissuserisussaani ivertitsivigissavaa. Eqqartuussissuserisup anin-gaasarsiassai aningaasartuutinullu taarsiissutit nammineq aningaasartuutiginnisamik eqqartuussisuler-suussisarneq pillugu malittarisassat malillugit akilerneqartassapput.

§ 31. Eqqartuussisut Siunnersuisoqatigiivinut suliassiissutit tunngavissaqanngitsutut paasineqartut

itigartitsissutigineqartassapput.

Imm. 2. Soraarsitsinissaq tunngavissaqarsorineqanngippat, taamaattorli assuarnartumik kusanaatumilluunniit pissusilersortoqarsimappat, Eqqartuussisut Siunnersuisoqatigiit assuarliummik oqaaseqaateqarsinnaapput imaluunniit eqqartuussisoq akiliisussanngortissinnaallugu.

Imm. 3. Eqqartuussisut Siunnersuisoqatigiit aalajangiissapput eqqartuussutikkut, tamanut ammasumik eqqartuussinermi oqaatigineqartussakkut.

Imm. 4. Eqqartuussut najukkami eqqartuussisumit imaluunniit Eqqartuussisut Siunnersuisoqatigiivinit Eqqartuussiviit Qullersaanut suliareqqitassanngortinneqarsinnaavoq saqitsaanermik suliassanik suliareqqitassanngortitsisarneq pillugu malittarisassat naapertorlugit.

§ 32. Eqqartuussisut Siunnersuisoqatigiit eqqartuussisoq atorfianiit tunuartikkallarsinnaavaat, pineqartumut pinerlunnermik suliassamik suliassiisoqarpat imaluunniit nalilernerqarpat pissutsinik § 26, imm. 1 malillugu soraarsitaassutaasinnaasunik atuuttoqartoq.

§ 33. Saniatigooralugu inuussutissarsiuteqarnermut, najoqqutassanik unioqqutitsinermik malersuiner-mut, atorfimmit tunuartaagallarnermut soraarsitaanermullu tunngatillugu Kalaallit Nunaanni Eqqartuussivimmi eqqartuussisumut aamma Kalaallit Nunaata Eqqartuussisuuneqarfiani eqqartuussisuuner-mut atuutissapput malittarisassat danskit eqqartuussisarnermik inatsisaanni §§ 47-50-imiittut.

Imm. 2. Saniatigooralugu inuussutissarsiuteqarneq pillugu nalunaarut Eqqartuussiviit Qullersaata præsidientianut tunniunneqartassaaq, taanna saniatigooralugu inuussutissarsiuteqarnissamut najoqqutas-sanillu unioqqutitsisoqarsimatillugu oqartussaaffeqartuuvoq, eqqartuussiviit præidentiisa danskit eqqartuussisarnermik inatsisaat malillugu oqartussaassuseqarfigisassaasa assinginik.

Imm. 3. Kalaallit Nunaanni Eqqartuussivimmi eqqartuussisoq aamma Kalaallit Nunaata Eqqartuussisuuneqarfiani eqqartuussisuuneq pillugu maalaarut Eqqartuussiviit Qullersaata præsidientianut imaluunniit Immikkut Ittumik Eqqartuussivimmut Maalaaruteqarfigineqarsinnaasumut tunniunneqartassapput, maalaaruteqartup pissutsinik maalaaruteqarnermut pissutissiisunik ilisimasaqalerneraniit kingusinnerpaamik sapaatit akunneri sisamat qaangiutsinnagit.

§ 34. Kalaallit Nunaanni Eqqartuussivimmi aamma Kalaallit Nunaata Eqqartuussisuuneqarfiani fuldmægtigitut kiisalu Kalaallit Nunaanni Eqqartuussivimmi eqqartuussisutut aamma Kalaallit Nunaata Eqqartuussisuuneqarfiani eqqartuussisuunertut ivertinneqarallarsimasunut, eqqartuussisutulli atorfinitsitaasimanngitsunut, atuutissapput malittarisassat atorfeqarfiusup allanngortinneqarnissaanut, najoqqutassanik unioqqutitsinernik malersuiner-nut, atorfimmit tunuartaagallarnermut soraarsitaanermullu tunngasut danskit eqqartuussisarnermik inatsisaanni §§ 54-55-imiittut.

Imm. 2. Kalaallit Nunaata Eqqartuussisuuneqarfiani eqqartuussisuuneq najoqqutassanik unioqqutit-sisoqarsimatillugu oqartussaaffeqartuuvoq, eqqartuussiviit præidentiisa danskit eqqartuussisarnermik inatsisaat naapertorlugi oqartussaaffiattut ittumik.

Imm. 3. Fuldmægtigi pillugu maalaarut nunap eqqartuussisuuneranut imaluunniit Immikkut Ittumik Eqqartuussivimmut Maalaaruteqarfigineqarsinnaasumut tunniunneqassaaq, maalaaruteqartup pissutsinik maalaarummut pissutissiisunik ilisimasaqalerneraniit kingusinnerpaamik sapaatit akunneri sisamat qaangiutsinnagit.

Eqqartuussisooqataasartut

Aalajangersakkat nalinginnaasut

§ 35. Eqqartuussisoqarfinni tamani qinersisoqartassaaq inunnik eqqartuussisooqataanissamut piuk-kunnaateqarsorineqartunik aalajangersimasumik amerlassusilinnik, januaarip aallaqqaataaniit naatsor-sorlugu ukiuni sisamani sulisussanik.

Imm. 2. Eqqartuussivinni eqqartuussisooqataasartut kommunalbestyrelsimit qinerneqartassapput

Kalaallit Nunaanni Eqqartuussivimmi eqqartuussisumiit inassuteqaat malillugu.

Imm. 3. Kalaallit Nunaanni Eqqartuussivimmi aamma Kalaallit Nunaata eqqartuussisuuneqarfiani eqqartuussisooqataasartut Inatsisartunit qinerneqartassapput Kalaallit Nunaanni Eqqartuussivimmi eqqartuussisumiit aamma nunap eqqartuussisuuneraniit inassuteqaatit naapertorlugit.

Imm. 4. Nunap eqqartuussisuunerata aalajangersinnaavaa eqqartuussisooqataasartuq eqqartuussisooqarfiup qinerneqarfigisami avataani sulisinnaasoq.

§ 36. Eqqartuussisooqataasartut qinerneqarsinnaavoq inuk kinaluunniit nammineersinnaassuseqarlunilu tusaamanerlugaanngitsoq. Pineqartoq taanna piffissami qinigaaffissami nalaani 70-inik ukioqalis-sanngilaq aamma anersaakkut timikkulluunniit sannginneq pissutigalugu eqqartuussisooqataasartup pisussaaffiinik naammassinnissinnaajunnaarsimasuussanngilaq.

Imm. 2. Eqqartuussisooqataasartuussanngillat naalakkersuisunut ilaasortat, eqqartuussissuserisut, eqqartuussissuserisuni fuldmægtigit, illersuisutut akuerisat, Namminersornerusuni qaffasissumik atorfililit, eqqartuussivinni, unnerluussisussaataasuni, naalagaaffiup sinnisoqarfiani, politiini pinerluuteqarsimasunillu isumaginnittoqarfimmi sulisut aamma kommunefogedit kiisalu ilagiinni upperisarsioqatiginnilu akuerisani kiffartortut.

Imm. 3. Makkua eqqartuussisooqataasartuujumanngissinnaapput:

- 1) Inatsisartunut ilaasortat atorfilittaallu kiisalu folketingimut ilaasortat,
- 2) sakkutuutut sulisut,
- 3) nakorsat ernisussiortullu,
- 4) kikkulluunniit 60-inik ukioqalereersimasut,
- 5) kikkulluunniit peqqissutsimikkut atugarisat ik imaluunniit inuussutissarsioqarfiup ilaqutariissutikkullu atugarisat ik pissutigalugit atugarissaarnerminnik navianartorsioqarfiup eqqartuussisooqataanisaminnut pisussaaffimmik naammassinnissinnaanngitsut, aamma
- 6) kikkulluunniit eqqartuussisooqarfimmi toqqagaaffiginnisaminni najugaqalersimasut.

§ 37. Inuit qinerneqartut qinersineq pillugu allakkatigut kalerrinneqartassapput tamatumunngalu akerriliissuteqarnissamut periarfissaq pillugu ilisimatinneqartassapput.

Imm. 2. Nunap eqqartuussisuunerata aalajangiiffigisassavaa inuk eqqartuussisooqataanisamut piumasaaqatiniq nammassinninnersoq aammalu eqqartuussisooqataannginnissamik noqqaassut akuerineqassanersoq. Aalajangiinerit maalaarutigineqarsinnaanngillat.

§ 38. Najukkani eqqartuussivinni aamma Kalaallit Nunaanni Eqqartuussivimmi eqqartuussisooqataasussat amerlassusissaat Kalaallit Nunaanni Eqqartuussivimmi eqqartuussisumit aalajangerneqartassaaq. Kalaallit Nunaata Eqqartuussisuuneqarfiani eqqartuussisooqataasussat amerlassusissaat nunap eqqartuussisuuneraniit aalajangerneqartassaaq. Amerlassusiliisoqartassaaq imaalillugu, eqqartuussisooqataasartup ataatsip ukiumut sisamariarluni sulisinneqartarnissaa ilimagineqartussanngorlugi.

Imm. 2. Eqqartuussivinni tamani eqqartuussisooqataasartut allattuiffimmi allattugaatigineqassapput.

§ 39. Domstolsstyrelsi eqqartuussisooqataasartut akissarsiaasaat allatigullu taartisiarisartagassaat pillugit malittarisassiussaaq.

Suliassanut ataasiakkaanut eqqartuussisooqataasussanik toqqartuineq

§ 40. Suliassaq aalajangersimasooq eqqartuussisooqataasartut peqataaffigisaannik suliarineqartussanngorpat, eqqartuussisut siulittaasuata inuit pisariaqartumik amerlassusillit eqqartuussisooqataasartunut allattuiffimmi qullerpaami allassimasut toqqassavai. Allattuiffik naaneqarpat, aallaqqaataaniit toqqartuisooqassaaq.

Imm. 2. Immikkut ittunik pissutissaqartoqartillugu, aamma pingaartumik eqqarsaatigalugu inuup eqqartuussinermi pissutsinik aalajangersimasunik immikkut ilisimasaqarnera, saqitsaannernik suliassani imm. 1-imik atuisitsinngitsoortoqarsinnaavoq.

Imm. 3. Toqqaaneq ullormut ataasiinarmut atuuttassaaq, taamaasilluni pineqartut taakku suliassani tamani, ullormi tassani aallarnerneqartuni, peqataasassallutik, massa suliassaq ulloq taanna naammassineqarsinnaangikkaluartuq.

Imm. 4. Eqqartuussisooqataasussat sinniisussallu minnerpaamik ullut pingasut sioqqullugit kalerrinneqarlutik aggersarneqartassapput.

§ 41. Eqqartuussisooqataasartuq, pissutissaqarani takkutinngitsoortuq, pinerluttulerinermi inatsit malillugu pineqaatissinneqarsinnaavoq. Eqqartuussivik aalajangiissutikkut tamatuminnaga aalajangiissaaq tunngavilersorneqarsimasumik pineqartumullu nalunaarutigineqartussamik. Eqqartuussisooqataasartup pissutissaqavissumik takkutinngitsoorsimanini uppersarsarpagu eqqartuussivik aalajangiinnerminik allanngortitsisinnaavoq.

Imm. 2. Eqqartuussiviup imm. 1 malillugu aalajangiinera eqqartuussisooqataasartut peqataatinnagit aalajangiinnerussaaq. Aalajangiineq malittarisassat §§ 566-imi aamma 577-imiittut malillugit aalajangeqqitassanngortinneqarsinnaavoq.

Eqqartuussisooqataasartut pisussaaffii piginnaatitaaffiilu

§ 42. Suliassamik suliaqarnissaaq aallartitsinnagu eqqartuussisut siulittaasuata eqqartuussisooqataasartuq nalunaarummik atsiugassaanik saqqummiussivigissavaa, tassani taanna ilumoorluni nalunngeqatiginnissutinilu naapertorlugu neriorsuissaaq eqqartuussivimmi isumaqatigiinniuteqarnerit malinnaaviginiarlugit, aamma inatsit suliassallu uppersarsaatitai malillugit eqqortuusorisani ilumoortuusorisani tunngavigalugu eqqartuussiniarluni.

§ 43. Eqqartuussisooqataasartut eqqartuussutissap isumaqatigiinniutigineqarnerani tamatumunngalu atasumik aalajangiiffigisassanik aalajangiiniarnerni sulissapput eqqartuussisutulli pisinnaatitaaffeqarlutik.

Eqqartuussisooqataasartut peqataasarnerat

§ 44. Pinerlunnernik suliassanik eqqartuussivimmi siullermeeriffiusumi suliaqarnermi eqqartuussisooqataasartut marluk peqataasassapput, taammaattoq tak. imm. 2 aamma 3.

Imm. 2. Eqqartuussisooqataasartut peqataasassanngillat suliassani, unnerluutigineqartuq pisuutitaasappat, akiliisitsinermiit, arsaarinninnermiit, biilersinnaanermut allagartaajaanermiit imaluunniit taarsiisuteqarnissamiit sakkortunerusumik pineqaatissiiffiusinnaangitsuni.

Imm. 3. Eqqartuussivik naliliippat suliassaq imm. 2 malillugu unnerluutigineqartumut immikkut sunniuteqartumik pingaaruteqassasoq, eqqartuussivik aalajangiisinnaavoq eqqartuussisooqataasartunik peqataasoqassasoq

§ 45. Pinerlunnernik suliassap suliareqqitassanngortinneqarsimasup sularineqarnerani, eqqartuussisup ataatsip peqataaffigisaani, eqqartuussisooqataasartut marluk peqataasassapput.

Eqqartuussisut pingasut peqataassappata eqqartuussisooqataasartut pingasut peqataassapput.

Imm. 2. Eqqartuussisooqataasartut peqataasassapput suliassani suliareqqitassanngortitani, eqqartuussivimmi siullermeeriffiusumi sularineqarnermi eqqartuussisooqataasartunit peqataaffigineqarsimasuni. Eqqartuussisooqataasartut aammattaaq peqataasassapput pisuni, eqqartuussisut siulittaasuata suliassap qanoq ittussusaa tunngavigalugu naleqquttuusorisani.

§ 46. Saqitsaannernik suliassani, eqqartuussivimmi siullermeeriffiusumik sularineqartuni, eqqartuussisooqataasartut marluk peqataasassapput, illuatungeriit arlaat taamaalioqqusippat imaluunniit eqqartuussivik tamatuminnaga aalajangiippat.

Imm. 2. Saqitsaannernik suliassani suliareqqitassanngortitani, eqqartuussivimmi siullermeeriffiusumik

suliarineqartuni eqqartuussisooqataasunit peqataaffigineqarsimasuni, imm. 1 taamatulli atortuutinneqasaaq. Eqqartuussisut pingasut peqataassappata eqqartuussisooqataasut marluk peqataassapput.

§ 47. Eqqartuussisooqataasartut peqataaffigisassanngilaat eqqartuussinerit eqqartuussutissap isumaqatigiinniutigineqarnerata avataatigut pisut imaluunniit aalajangiinerit, suliassap suliarineqarnerata nalaani aalajangiissutaasut, taamaattoq tak. imm. 2 aamma 3.

Imm. 2. Eqqartuussutissap isumaqatigiinniutigineqarnissaa sioqqullugu eqqartuussisinnaatitaasunut uppernarsaatiniq saqqummiussisoqassappat eqqartuussisooqataasartut tamatumani peqataassapput.

Imm. 3. Politimesterip eqqartuussaasimasullu akornanni pinerlunnermik suliassami eqqartuussutip paasineqarnissaa isumaqatigiinngissutigineqalerpat eqqartuussisooqataasartut tamatuma aalajangiiffigineqarnerani peqataasassapput, tak. § 595.

§ 48. Eqqartuussiviup nammineerluni misilittassavaa eqqartuussisooqataasartut peqataassanersut. Eqqartuussutissamik isumaqatigiinniuteqarneq eqqartuussisooqataasartut peqataatillugit aallartissimapat eqqartuussiviup aalajangersinnaavaa eqqartuussisooqataasartut peqataaginnassasut, suliassaq eqqartuussisooqataasartut peqataaffiginngisaannik suliarineqartussaasimagaluarpalluunniit.

Suliassamut akooqusaannginneq

§ 49. Kinaluunniit suliassami eqqartuussisutut iliuuseqassanngilaq pineqartoq taanna

- 1) nammineq suliassami illuatungiliuttuuguni imaluunniit suliassap qanoq inerneqarnissaa soqutiguniuk, imaluunniit pinerlunnermik suliassaappat, pinerlunnermi pinerlineqartuuguni.
- 2) illuatungeriit arlaat eqqarleriguniuk imaluunniit aappamigut ilaqutariguniuk (ilanngullugittaaq pinerlunnermik suliassami pasisaq imaluunniit unnerluutigineqartoq) aappariinnikkut siulimigut kinguaamigulluunniit siulimiluunniit qatanngutaasigut imaluunniit illuatungeriit arlaannut pasisaasumulluunniit aappaaguni, inooqataaguni, angajoqqaatut sinniisuuguni, qitornavissiamut imaluunniit qitornarsiamut angajoqqaajuguni kiisalu qitornavissiaaguni imaluunniit qitornarsiaaguni,
- 3) pinerlunnermik suliassami pinerlineqartoq aappariguniuk imaluunniit inooqatigiguniuk imaluunniit eqqarleriguniuk aappariinnikkulluunniit siulimigut kinguaamigulluunniit imaluunniit siulimi qatanngutaasigut qanittumik qanigisariguniuk,
- 4) suliassami ilisimannittutut nassuiaateqarsimaguni imaluunniit misissuisartutut naliliisartutullu, unnerluussisutut, illersuisutut, eqqartuussisuserisutut imaluunniit eqqartuussinermi pisinnaatitatut iliuuseqarsimaguni imaluunniit
- 5) suliassaq eqqartuussisutut imaluunniit eqqartuussisooqataasutut eqqartuussivimmi appasinnerusumi suliarisimaguniuk.

§ 50. Arlaannaalluunniit pinerlunnermik suliassami eqqartuussutissap isumaqatigiinniutigineqarnerani eqqartuussisutut peqataassanngilaq pisimasumi, unnerluussummi pineqartumi, unnerluutigineqartup § 359, imm. 2 malillugu tigummigallarneqarnissaanik imaluunniit § 384, imm. 3, naapertorlugu allakkanik ammaanissamik allakkanillu uninngatitsinissamik aalajangiisuusimaguni. Tamannali atuutissanngilaq suliassaq nassuernertut suliarineqarpat imaluunniit suliassaq pisimasumut, oqaaseqatigiinni siullerni taaneqartutut iliuuseqarnermut tunngavissiisumut, unnerluutigineqartup pisuuneranut uppernarsaatissamik naliliinissamik ilaqanngippat.

Imm. 2. Pinerlunnermik suliassami § 359, imm. 2 naapertorlugu tigummigallagassanngortitsinissaq, aamma tigummigallagassanngortitsinerup atorunnaarsinneqarnissaa pillugu imaluunniit § 384, imm. 3 naapertorlugu allakkanik ammaanissaq uninngatitsinissarlugu pillugit eqqartuussutissap isumaqatigiinniutigineqarnerata nalaani aalajangiisuusaaq eqqartuussisoq, eqqartuussutissap isumaqatigiinniutigineqarnerani peqataasimangitsoq. Tamannali atuutissanngilaq suliassaq nassuernertut suliarineqarpat, imaluunniit suliassaq pisimasumut, oqaaseqatigiinni siullerni taaneqartutut iliuuseqarnermut tunngavissiisumut, unnerluutigineqartup pisuuneranut uppernarsaatissamik naliliinissamik ilaqanngippat.

Imm. 3. Eqqartuussisup arlalinnik atorfeqarnini pissutigalugu suliassamik siusinnerusukkut suliassar-simanera suliassamut akooqqusaajunnaarnermik kinguneqassanngilaq, pissutsit atuuttut naapertorlugit pissutissaqanngippat isumaqassalluni taanna suliassap qanoq inerneqarnissaanut immikkut soqutigisartoq.

§ 51. Arlaannaalluunniit eqqartuussisutut iliuuseqassanngilaq pissutsinik atuuttoqarpat, eqqartuussisuusup kinaassusersiunngilluinnartuunera pillugu qulalersitsisinnaasunik.

§ 52. §§ 49-51 taamatulli atortuutinneqassapput eqqartuussivimmi eqqartuussisooqataasartunut fuldmægtiginullu.

Imm. 2. Eqqartuussisooqataasartut peqataasatillugit eqqartuussisut siulittaasuata suliassap sularineqarnera aallarnerneqalersinnagu taakkua aperisassavai pissutsinik atuuttoqarnersoq, eqqartuussisooqataasutut peqataanissaannut akornutaasunik.

§ 53. Eqqartuussisup imaluunniit eqqartuussisooqataasartup suliassamut akooqqusaanera pillugu apeqqut eqqartuussisunit peqataasussanillu kikkunnilluunniit saqqummiunneqarsinnaavoq.

Imm. 2. Imm. 1 malillugu aalajangiineq tunngavilersukkamik aalajangiinerussaaq. Eqqartuussinermi eqqartuussisut arlaliussappata eqqartuussisooq imaluunniit eqqartuussisooqataasartoq, akooqqusaanera nalornissutaalluni saqqummiunneqartoq, aalajangiiniarnermi peqataasinnaatitaavoq.

Imm. 3. Eqqartuussisooq, issiavimminiit qimaguttussaq, tamatuminnga aalajangiisoqareerneraniit taamaallaat suliassani kinguartinneqarsinnaanngitsuni iliuuseqarsinnaatitaavoq.

Kapitali 2

Eqqartuussiviit suliassat piginnaatitaanerallu

§ 54. Eqqartuussiviit ataaniipput:

- 1) Saqitsaannernik suliassat.
- 2) Pinerlunnernik suliassat.
- 3) Pigisanik agguaassinermik suliassat.
- 4) Nammineersinnaassusiiaanerit aammalu pigisat tungaasigut siunnersortissaliineq pillugu suliassat.
- 5) Ataataassarsiuussinernik suliassat.
- 6) Aappariinnermik aamma angajoqqaatut oqartussaassuseqarnermik suliassat.
- 7) Eqqartuussinertaqanngitsumik aalajangiinikkut kiffaanngissusiiaanernik misiliineq pillugu suliassat.
- 8) Akuersisitsinertaqanngitsumik qitornavissiartaartitsinissamik aalajangiinernik misiliineq pillugu suliassat.
- 9) Inerteqqutit, piginnaatitaaffinnik takussaannngitsunik innarliisoqarsimatillugu allakkanik qulakkeerineq, arsaarinnikkallarnerit, pinngitsaaliissummik tuniiaanerit pillugit suliassat aamma eqqartuussutinik naammassinninniaanerup tungaatigut suliassanik misiliineq.
- 10) Nalunaarsuinerit (eqqartuussivikkoortumik).
- 11) Uppernarsaasiinerit.
- 12) Imarsiornermut tunngasumik nassuiaanerit.
- 13) Misissuisartussanik naliliisartussanillu eqqartuussiviit sulinerisa avataatigut toqqaaneq, tamanna naalagaaffiup sinniisaanit isumagineqarsinnaanngikkaangat.
- 14) Uppernarsaatissanik katersuineq, suliassami eqqartuussivimmi ingerlanneqartumi atugassaassanngippata.
- 15) Suliassat allat, inatsisit naapertorlugit eqqartuussivinnut suliassanngortitat.

Najukkani eqqartuussiviit

§ 55. Najukkani eqqartuussiviit suliassanik tamanik, inatsisikkut, Inatsisartut inatsisaasigut imaluunniit Inatsisartut peqqussutaasigut Kalaallit Nunaanni Eqqartuussivimmu siullermeeriffiusumik suliarineqartussannngortinneqarsimangitsunik, siullermeeriffiusumik suliarinniffiusussaapput.

§ 56. Najukkami eqqartuussisup suliassaq Kalaallit Nunaanni Eqqartuussivimmu suliarisassatut innersuussutigissavaa,

1) suliassaq apeqqutinut piviusunut imaluunniit inatsisinut tunngassutilinnut immikkut ajornakusoor-tunut tunngasuuppat,

2) suliassaq tunngavissisussamik pingaaruteqartuuppat, imaluunniit

3) suliassaq illuatungiliuttumut immikkut sunniuteqartussamik pingaaruteqartuuppat.

Imm. 2. Imm. 1, nr. 3 pinerlunnernik suliassanut atuutissanngilaq.

Imm. 3. Imm. 1 malillugu innersuussineq sapinngisamik piaartumik pisassaaq, eqqartuussutissallu isumaqatigiinniutigineqarnerata aallarteerernerani pisinnaassanani.

Imm. 4. Imm. 1 malillugu innersuussinissaq pillugu aalajangiineq noqqaassuteqarnerup kingorna aalajangiinerussaqaq, tunngavilersorneqartussaqaq. Tamatuminnga noqqaassuteqarneq saqitsaannernik suliassani illuatungeriinnit tamanit saqqumiunneqarsinnaavoq aammalu pinerlunnernik suliassani pasisamit, politiinit, illersuisumit imaluunniit eqqartuussivik avaqqullugu siunnersortiliussamit saqqummiunneqarsinnaalluni.

Imm. 5. Kalaallit Nunaanni Eqqartuussivimmi eqqartuussisup suliassaq innersuussutigineqartoq, imm. 1-imi piumasaqaatigineqartunik naammassinninngitsoq, tigujumannngissinnaavaa.

Imm. 6. Imm. 1 aamma 5 malillugit aalajangiinerit suliassami peqataasunit il.il., imm. 4-mi taaneqartunit, Kalaallit Nunaata Eqqartuussisuunekarfanut saqqummiunneqarsinnaapput.

Kalaallit Nunaanni Eqqartuussivik

§ 57. Kalaallit Nunaanni Eqqartuussiviup suliarisassavai suliassat, inatsisikkut, Inatsisartut inatsisaasigut imaluunniit Inatsisartut peqqussutaasigut eqqartuussivimmi tassani siullermeeriffiusumik suliarineqartussannngortinneqarsimasut.

Imm. 2. Kalaallit Nunaanni Eqqartuussiviup suliarisavaattaq suliassat, § 56 naapertorlugu eqqartuussivinniit Kalaallit Nunaanni Eqqartuussivimmu siullermeeriffiusumik suliarineqartussatut innersuussutigineqarsimasut.

§ 58. Kalaallit Nunaanni Eqqartuussivimmi eqqartuussisup isumagisussaavaa najukkami eqqartuussisut aammalu eqqartuussivinni sulisut allat ilinniartitaanissaat kiisalu eqqartuussiviit apeqqutini inatsisunik atuinissamut tunngassutilinni ilitsersorneqarnissaat.

Kalaallit Nunaata Eqqartuussisuunekarfia

§ 59. Kalaallit Nunaata Eqqartuussisuunekarfiata suliarisassavai suliassat, najukkami eqqartuussivimmit imaluunniit Kalaallit Nunaanni Eqqartuussivimmit siullermeeriffiusumik suliarineqarlutik aalajangiiffigineqarsimasut, nunattalu eqqartuussisuunekarfanut aappasaanneeriffiusumik inatsimmi matumani malittarisassat naapertorlugit suliassiissutigineqarsinnaasut.

Eqqartuussiviit Qullersaat

§ 60. Eqqartuussiviit Qullersaata suliarisassavai suliassat, Kalaallit Nunaata Eqqartuussisuunekarfanit aappasaanneeriffiusumik aalajangiiffigineqarsimasut, aammalu Suliareqqitassannngortitsinissamik Aalajangiisartut akuersissuteqarnerisigut Eqqartuussiviit Qullersaannut pingajussaanniigassatut inatsimmi matumani malittarisassat naapertorlugit suliassiissutigineqarsinnaasut.

Kapitali 3

Politiit aamma unnerluussisussaataasut

§ 61. Politiit suliassaraat isumannaatsuutitsinissaq, eqqissimatitsinissaq torersaartitsinissarlu, inatsisinik ileqqoreqqusanillu maleruaanissamik nakkutiginninnissaq kiisalu pinerluttaaliuisitsinissamut pisariaqartunik iliuseqartarnissaq aamma tamakku pillugit suliassanik paasiniaanissaq malersuinissarlu. Politiit suliassaraattaaq unnerluussisussaataasutut suliassaqarnissaq.

Imm. 2. Inatsiseqarnermut ministerip akuersineratigut politiit allanik suliassinneqarsinnaapput.

§ 62. Inatsiseqarnermut ministeri politiinut qullersaavoq piginnaatitaanerminillu atuissaq rigspolitichefi politimesterilu aqutigalugit.

Imm. 2. Politimesteri kommufogedinik politiinullu ikiortinik ivertitsissaaq, najukkami politiit piginnaassuseqartitaanermik ingerlatsiniarnermi politiinut ikiuuttussanik. Inatsiseqarnermut ministeri tamanna pillugu erseqqarinnerusunik malittarisassaliorsinnaavoq.

Imm. 3. Inatsiseqarnermut ministeri inunnik allanik politiit piginnaaniliisinnaavoq.

§ 63. Kalaallit Nunaat politikredsiuvoq politimesterimit qullersaaffigineqartoq. Taanna Kalaallit Nunaanni najugaqartuussaaq.

Imm. 2. Politimesterip qimagusimanerani tullersortaa, vicepolitimesteri, politiassessor imaluunniit politifuldmægtig politikredsimi politiinut qullersaassaaq.

§ 64. Politiini sulisussatut atorfinitsinneqassagaanni pineqartut tusaamanerlugaanatillu tatiginartuussapput.

Imm. 2. Politimesteri, vicepolitimesteri, politiassessor aamma politifuldmægtigi inatsisilerituutut soraarummeernermi angusisimasuussapput.

Imm. 3. Politimesteritut atorfinitsinneqassagaanni piunasaqaataakkajuttarpoq pineqartoq sivikinnerpaamik ukiuni pingasuni politiini imaluunniit unnerluussisussaataitani qaffasissumik atorfeqareersimasuussasoq.

§ 65. Kalaallit Nunaanni pisortatigoortumik unnerluussisut tassaapput naalagaaffiup eqqartuussissuserisua aamma politimesteri kiisalu inuit pinerlunnernik suliassanik inatsisit naapertorlugit suliariaqarnermi taakkununga ikiuuttussatut atorfinitsitat.

Imm. 2. Pisortatigoortumik unnerluussisut suliassanik tamanik sularinnittussaapput, suliassap suussusaa naapertorlugu pilertortumik, taamaaliornermikkullu pisuusut akisussaatinneqarnissaat nakkutigiin-narnagu aammattaarli pisuussuteqanngitsunik malersuisoqannginnissaa nakkutigissavaat.

Imm. 3. Politiit unnerluussisussaataitutat sulinerannut tunngatillugu politimesterip naalagaaffiup eqqartuussissuserisua toqqaannartumik qullersaraa.

Imm. 4. Naalagaaffiup eqqartuussissuserisua politimesterip pinerlunnernik suliassanik sularinninnera-nik nakkutilliisuussaaq aammalu pinerlunnernik inatsisitigut malersuineq pillugu politimesterip aalajan-giineri pillugit maalaarutunik sularinnittassalluni. Naalagaaffiup eqqartuussissuserisuata maalaarutunik suliassani aalajangiineri inatsiseqarnermut ministerimut maalaarutigineqarsinnaangillat. Politimesterip suliassanik unnerluussisussaataasutut sulineranut tunngasunik suliassaqarnera pillugu naalagaaffiup eqqartuussissuserisua aalajangersaasinnaavoq. Naalagaaffiup eqqartuussissuserisuata politimesteri suliassanik aalajangersimasunik suliassaqarnissaq pillugu peqqussuteqarfigisinnaavaa, matumunnga ilanngullugu paasiniaanermik aallartitseqqusilluni imaluunniit nangitseqqusilluni, pinngitsoortitseq-qusilluni imaluunniit unitseqqusilluni.

Imm. 5. Imm. 4 malillugu maalaaruteqarnissamut piffissarititaq sapaatit akunnerinik sisamanik sivi-sussuseqarpoq, maalaaruteqartup aalajangiinermik nalunaarfigineqareerneraniit naatsorsorlugu.

Piffissarititap tamatuma naareerneratigut maalaarummik takkuttoqarpat maalaarut suliarineqassaaq, isumaqartoqartariaqarpat piffissarititamik qaangiineq patsisissaqartoq.

Imm. 6. Ingerlatsinermik inatsit aamma tamanut saqqummiussisussaataitanermik inatsit malillugu alagaatinik takunnissinnaatitaaneq pillugu aalajangiinernik maalaaruteqartoqarni aalajangersakkat imm. 4 aamma 5-imiittut taamatulli atortuutinneqassapput.

Kapitali 4

Illersuisut

§ 66. Kalaallit Nunaanni Eqqartuussivimmi eqqartuussisoq piginnaaniliissaaq inunnik tusaamanerlugaanatillu nammineersinnaassuseqartunik 18-ileereersimasunik naleqquttumik amerlassusilinnik pinerlunnernik suliassani illersuisuusussanik.

Imm. 2. Illersuisutut sulisinnaatitaasoq eqqartuussivinni, Kalaallit Nunaanni Eqqartuussivimmi aamma Kalaallit Nunaata Eqqartuussisuuneqarfiani najuussinnaatitaavoq. Illersuisutut sulisinnaatitaaneq pinerlunnernik suliassani eqqartuussivinni taakkunani illersuisutut ivertinneqarnissamut pisusaaffeqarnermik nassataqarpoq.

§ 67. Illersuisutut sulisinnaatitaapput inuit § 66, imm. 1-imi piumasagaatinik naammassinnissimasut aamma illersuisutut immikkut ilinniartitaanermik naammassinnissimasut.

Imm. 2. Inatsiseqarnermut ministeri illersuisutut ilinniartitaaneq pillugu malittarisassanik erseqqinnerusunik aalajangersaassaaq, matumunnga ilanngullugittaaq ilinniartitaaneq naammassineqalersinnagu inuup illersuisutut erseqqinnerusumik annertussusilikkamik suligallarsinnaatitaanissaa pillugu malittarisassat. Illersuisutut ilinniartitaaneq Kalaallit Nunaanni Eqqartuussivimmi eqqartuussisumit aquneqassaaq.

Imm. 3. Inatsiseqarnermut ministeri malittarisassiorsinnaavoq, tamatuma kingorna inuk imm. 1 malillugu ilinniartitaanissamik piumasagaateqarnerup ilaanut ilaanngitsoortinneqarsinnaalersillugu.

Imm. 4. Illersuisutut sulisinnaatitaaneq piginnarumallugu piginnaatitsissummik tunineqarsimasoq illersuisutut ilinniaqqinnermi peqataassaaq. Inatsiseqarnermut ministeri taamatut ilinniaqqittarneq pillugu erseqqinnerusunik malittarisassiussaaq, matumunnga ilanngullugittaaq ilinniaqqinnissamik piumasagaatit ilaasa inummut aalajangersimasumut atortinneqanngitsoorsinnaanerata pillugu malittarisassat.

§ 68. Illersuisutut sulisinnaatitaaneq Kalaallit Nunaanni Eqqartuussivimmi eqqartuussisumit arsaarinnissutigineqassaaq, inuk sulisinnaatinneqartoq sulisinnaatitsissummik pinissamut imaluunniit pigisaqaannarissamut piumasagaatinik naammassinnissinnaajunnaarpat, imaluunniit taanna illersuisutut suliassarititaasunik suliagarnermini imaluunniit allanut atasunik sulinermini ima pissusilersorsimappat pissutissaqartumik isumaqartoqarluni pineqartup illersuisutut suliassarititaasut isumannaatsumik suliarsinnaassanngikkai.

Imm. 2. Illersuisutut sulisinnaatitaanerup arsaarinnissutigineqarnissaa aalajangiissuteqarnikkut piasaaq, tunngavilersorneqartussakkut. Suliassaq oqaatsitigut suliarineqassaaq, illersuisutut sulisinnaatinneqartoq taamaalioqqusissappat.

§ 69. Kalaallit Nunaanni Eqqartuussivimmi eqqartuussisoq inuit, illersuisussatut sulisinnaatitaasutut nalunaarfigineqarsimasut, allattorsimaffiannik ukiumut ataasiarluni saqqummiussisassaaq. Illersuisutut sulisinnaatitaanerup tunniunneqarnerata, arsaarinnissutaanerata allatulluunniit iliornikkut atorunnaarnerata kingunerisaatut allattukkani allannguutit ingerlaanaq saqqummiunneqartassapput.

§ 70. Inatsiseqarnermut ministeri nuna tamakkerlugu illersuisussamik pisortani atorfilimmik imaluunniit namminersortumik toqqaasinnaavoq, Kalaallit Nunaanni illersuisunik ilinniartitsinermi siunnersuinermilu suliassanik isumaginnittussamik.

§ 71. Kalaallit Nunaanni Eqqartuussivimmi eqqartuussisoq toqqaassaaq inunnik naleqquttumik amerlassusilinnik illersuisunut ikiortitit sulisussanik.

Imm. 2. Illersuisumut ikiorti illersuisutut sulisinnaatitaasumut qaqutiguuissumik taartaasinnaavoq,

1) illersuisutut sulisinnaatitaasoq ornigutsinneqarsinnaanngippat, aamma

2) eqqartuussineq imaluunniit paasiniaanermi iliuuseq, tassani illersuisup pasisaq ikiortussaallugu, kinguartinneqarsinnaanngitsutut isigineqartariaqarpat.

Imm. 3. Inuk, pasisatut killisiorneqartussaq, illersuisumut ikiortimik aggersaasoqartinnagu, illersuisutut sulisinnaatitaasumik imaluunniit eqqartuussissuserisumik isumasioqateqarsinnaatitaassaaq.

Kapitali 5

Eqqartuussissuserisut

Eqqartuussissuserisutut il.il. ivertitsineq

§ 72. Eqqartuussissuserisut inatsiseqarnermut ministerimit ivertinneqartassapput malittarisassat danskit eqqartuussisarnermik inatsisaanni § 119-imiittut, tak. § 121, malillugit. Danskit eqqartuussisarnermik inatsisaanni § 121, imm. 4 malillugu suliasat Kalaallit Nunaanni Eqqartuussivimmit suliarineqartassapput.

§ 73. Inuit eqqartuussissuserisutut ivertinneqarsimanngitsut inuillu eqqartuussissuserisutut suleqqusaanngitsut imaluunniit inatsit manna naapertorlugu taamatut sulisinnaajunnaarsimasut sulinermut atatilugu eqqartuussissuserisutut imminnut taagussanngillat. Eqqartuussissuserisoq eqqartuussissuserisutut sulisinnaatitsissuminik Inatsiseqarnermut Ministereqarfimmut paarisassanngortitsisimasoq sulinerminut atatillugu eqqartuussissuserisutut immiut taagussanngilaq.

Imm. 2. Imm. 1-imik unioqquitsineq pinerluttulerinermi inatsit malillugu pineqaatissiinermik kinguneqarsinnaavoq.

Eqqartuussissuserisutut sulineq

§ 74. Eqqartuussissuserisutut sulineq eqqartuussivinni, unnerluussisussaataitaasuni politiiniluunniit atorfirmut kattutsinneqarsinnaanngilaq.

Imm. 2. Eqqartuussissuserisutut sulineq pisortani atorfirmut sugaluartumulluunniit kattutsinneqarsinnaanngilaq, inatsiseqarnermut ministeri pisuni immikkut ittuni allatut aalajangiisimannngippat. Immikkut akuerineqarnissaq pillugu aalajangiinerni eqqartuussissuserisup pisortanut attaveqartuussaanngitsuunera ingammik pingaartinneqartassaaq, taamaalilluni pisortani atorfeqarnerup pineqartullu eqqartuussissuserisutut sulinerata akornanni soqutigisatigut akerleriissuteqartoqalinnginniassammat.

§ 75. Eqqartuussissuserisoq eqqartuussissuserisumik allamik ingerlatseqateqarluni eqqartuussissuserisoqarfimmik ingerlataqassaguni, kisimiilluni eqqartuussissuserisoqarfimmik ingerlataqassaguni imaluunniit eqqartuussissuserisut ingerlatsivianni aktiaateqarsinnaassaguni piginneqataassuteqarsinnaassaguniluunniit eqqartuussissuserisumi eqqartuussissuserisoqarfimmik ingerlatalimmi fuldmægtigitut akuerisatut sivikinnerpaamik ukiumi ataatsimi sulisinnaatitaasimassaaq imaluunniit eqqartuussissuserisumi allami eqqartuussissuserisoqarfimmik ingerlatalimmi atorfeqareersimassaaq.

Imm. 2. Inatsiseqarnermut ministeri pissutsini immikkut ittuni imm. 1-imi aalajangersakkamik atuisitsinngitsoorsinnaavoq.

§ 76. Eqqartuussissuserisoqarfimmik ingerlataqarneq kisimiilluni ingerlataqarnerup imaluunniit eqqartuussissuserisunik peqateqarluni ingerlataqarnerup saniatigut taamaallaat ingerlanneqarsinnaavoq eqqartuussissuserisutut ingerlatsivimmit, aktiaateqarnikkut imaluunniit piginneqataassuteqarnikkut imaluun-

niit assigiinngitsunik pisussaatisutut aktiaateqarluni ingerlatseqatigiinnikkut (partnerselskab) ingerlanneqartumit. Eqqartuussissuserisutut ingerlatsiviup taamaallaat siunertarissavaa eqqartuussissuserisutut ingerlataqarnissaq. Taamaattorli eqqartuussissuserisutut ingerlatsivik, eqqartuussissuserisunit kisimi pigineqartoq, eqqartuussissuserisutut ingerlatsivimmi allami aktianik imaluunniit piginneqataassutinik pigisaqarnissamik kisimi siunertaqartoq ingerlataqartorlu, eqqartuussissuserisutut ingerlatsivimmi allami aktiaateqarsinnaavoq imaluunniit piginneqataassuteqarsinnaavoq. Eqqartuussissuserisutut ingerlatsiviup pisussaaffigaa kisimiillunilu piginnaatitaaffigissallugu taaguummuni oqaatsinik ”advokataktieselskab”-imik imaluunniit ”advokatanpartsselskab”-imik imaluunniit ”advokatkommanditaktieselskab”-imik taakkualuunniit naalisarnerinik atuissalluni. Oqaaseqatigiit siulliit aappaallu apeqquaatinnagit peqatigiiffiit, kattuffiit soqutigisaqatigiit assigisaallu piginnaassusiligaasut eqqartuussivimmi suliasanik ilaasortatik sinnerlugit ingerlatsisinnaapput peqatigiiffiup soqutigisaqarfisaa iluini.

Imm. 2. Eqqartuussissuserisoq eqqartuussissuserisutut ingerlatsivimmi sulisoq imaluunniit ingerlatsivimmi atorfilik alla imm. 3, nr. 2 naapertorlugu tassani aktiaateqartoq imaluunniit piginneqataassuteqartoq piumasaqaataalersinnaasunut, pineqartup sullitaminik ikiorsiinerata nassatarisaanik pilersimasunut, tamanut ingerlatsivik peqatigalugu nammineerluni akisussaaffignittuuvoq.

Imm. 3. Eqqartuussissuserisutut ingerlatsivimmi aktiat piginneqataassutilluunniit taamaallaat pigineqarsinnaapput ukunangga, taamaattoq tak. imm. 8:

- 1) eqqartuussissuserisunit ingerlatsivimmi, ingerlatsiviup qitiusumik qullersaqarfiani imaluunniit immikkoortortaqarfiani eqqartuussissuserisoqarfimmik ingerlataqartunit,
- 2) ingerlatsivimmi sulisunit allanit, imaluunniit
- 3) eqqartuussissuserisutut ingerlatsivimmit allamit.

Imm. 4. Inuit imm. 3, nr. 2-mi taaneqartut ingerlatsiviup aktiaataasa imaluunniit piginneqataassutaasa qulerarterutaat ataallugit taamaallaat pigisinnaavaat aamma ingerlatsivimmi taasisinnaasut qulerarterutaat ataallugit taamaallaat ataatsimut pigisinnaavaat. Ingerlatsiviup malittarisassaani imaluunniit piginneqataasutut isumaqatigiissummi aalajangersagaliortoqaqusaanngilaq aktieselskabit pillugit inatsimmi aktianik aningaasanngortitsineq pillugu malittarisassanik killilersuisunik.

Imm. 5. Inuit imm. 3, nr. 2-mi taaneqartut, eqqartuussissuserisullu ingerlatsivianni aktiaateqartut imaluunniit piginneqataassuteqartut, malittarisassani eqqartuussissuserisutut suliaqarnermut immikkut pingaaruteqartuni misilitsillutik angusisimassapput. Inatsiseqarnermut ministeri tamanna pillugu erseqqinnerusumik malittarisassiussaaq. Eqqartuussissuserisoqatigiit misilitsinneq isumagissavaat.

Imm. 6. Inuit imm. 3, nr. 2-mi taaneqartut pillugit maalaarutit, Advokatnævnumut saqqummiunneqarsinnaapput malittarisassat §§ 93-imiittut aamma 94-imiittut naapertorlugit.

Imm. 7. Eqqartuussissuserisutut ingerlatsivimmi siulersuisunut ilaasortat, siulersuisunut ilaasortat sulisut qinigaat minillugit, ingerlatsivimmi taassumaluunniit qitiusumik qullersaqarfiani imaluunniit taassuma immikkoortortaqarfiani eqqartuussissuserisutut sulisassapput. Eqqartuussissuserisutut ingerlatsiviup qullersaqarfiani ilaasortat ingerlatsivimmi eqqartuussissuserisutut suliaqartuussapput.

Imm. 8. Inatsiseqarnermut ministeri eqqartuussissuserisutut ingerlatsivittut ingerlataqarnissaat pillugu erseqqinnerusunik malittarisassiussaaq, matumani ilanngullugit eqqartuussissuserisutut ingerlatsiviup siunertanut allanut allannortinneqarnera aamma aktiaatinik piginneqataassutinillu tuniniaaneq pillugu malittarisassat.

Imm. 9. Imm. 1-imik, 3-mik, 4-mik aamma 7-imik unioqutitsineq pinerluttulerinermi inatsit malillugu pineqaatissiissutaasinnaavoq.

Imm. 10. Najoqqutassiani, imm. 5 aamma 8 naapertorlugit suliarineqartuni, aalajangersarneqarsinnaavoq najoqqutassani aalajangersakkanik unioqutitsineq pinerluttulerinermi inatsit malillugu pineqaatissiissuteqarnermik kinguneqarsinnaasoq.

Imm. 11. Ingerlatsiviit il.il. (inatsisitigut pisinnaatitaasut pisussaataasullu) pinerluttulerinermi inatsimmi kapitali 5 malillugu pinerluttulerinermi inatsisitigut akisussaaffilerneqarsinnaapput.

§ 77. Eqqartuussissuserisoq taamaallaat pisuni, inatsisip aalajangersagartaasa immikkut ittut atuuffigisaanni, eqqartuussivikkut suliasanik suliaqarnissaminut pisussaaffeqarpoq.

§ 78. Eqqartuussissuserisoq pissusilersortassaaq eqqartuussissuserisut ileqqorissaartussaanerannut naapertuuttumik. Eqqartuussissuserisoq taamaaliornermini sulisassaaq sukumiisumik, peqqissaartumik sullitaminullu iluaqutaasussat isiginiarlugit. Suliassat pisariaqarnerattut sukkassusilimmik suliarineqartassapput.

Imm. 2. Eqqartuussissuserisoq suliassaminut naleqquttuosorineqartuniit qaffasinnerusunik akileqqusassanngilaq.

Imm. 3. Fuldmægtigip, eqqartuussissuserisumi sulisinnaatitaasup, atuagarsornikkut tunngaviusumik ilinniarnermi, misilitsinnermi aamma eqqartuussivimmi suliassanik suliaqarnermik, danskit eqqartuussisarnermik inatsisaanni § 119, imm.2, nr. 5 naapertorlugu aalajangersarneqartumik, misiliinermi peqataanissaa eqqartuussissuserisup suleqataaffigissavaa. Eqqartuussissuserisup aammattaaq akilissavai tunngaviusumik ilinniarnermut, misilitsinnermut aamma eqqartuussivimmi suliassamik suliaqarluni misiliinermut aningaasartuutit.

Imm. 4. Eqqartuussissuserisoq eqqartuussissuserisutut sulinermi avataani suliassaminut tunngassutilinni imaluunniit allatut aningaasarsiornermut tunngassutilinni eqqartuussissuserisunut ataqqinaataajaasumik pissusilersussanngilaq.

Imm. 5. Eqqartuussissuserisoq aamma advokatfuldmægtigeq kinaluunniit eqqartuussissuserisutut inuussutissarsiornermi pingaaruteqartumik ilinniaqqinnermut ingerlaavartumik peqataasassaaq. Eqqartuussissuserisup fuldmægtigi, eqqartuussissuserisumi sulisinnaatitaasooq, tamatumunnga aningaasartuutunik akiliuttassavaa. Inatsiseqarnermut ministeri tamanna pillugu erseqqinnerusumik malittarisassiusaaq.

§ 79. Eqqartuussissuserisoqatigiit malittarisassiusapput eqqartuussissuserisut aningaasaatinik paarisassanngortitanik suliassaqarnerannut, eqqartuussissuserisutut suliassaqarnerminni aningaasatigut akisussaaffiligaanissamut qularnaveeqqusiinissaannut kiisalu naatsorsuutitigut aningaasatigullu paasisutissanik pisariaqartunik tamanik Eqqartuussissuserisoqatigiinnut nalunaaruteqartarnissaannut kiisalu nakkutilliinermi piareersaatinik pisariaqartunik aallarnissaanissaannut tunngatillugu eqqartuussissuserisutut pisussaaffii pillugit. Malittarisassat inatsiseqarnermut ministerimit akuersissutigineqassapput.

§ 80. §§ 77-79 eqqartuussissuserisutut ingerlatsivinnut atuutissapputaaq.

Imm. 2. § 78, imm. 1, 2 aamma 4 kiisalu § 79 eqqartuussissuserisutut ingerlatsivimmi atorfilinnut, eqqartuussissuserisutut ingerlatsivimmi aktiaatillinnut imaluunniit piginneqataassutillinnut, atortuutinneqassapput, tak § 76, imm. 3, nr. 2.

§ 81. Pinerluttulerinermi inatsimmi §§ 48 aamma 49, § 50, imm. 1 aamma 3, aamma § 55 taamatulli atortuutinneqassapput eqqartuussissuserisunut taakkualu fuldmægtigiinnut, peqatigisaannut, sulisuinut allanullu, eqqartuussissuserisutut ingerlatsivimmi sulisinneqartunut.

Eqqartuussissuserisut eqqartuussivinnut il.il. ornigussinnaatitaanerat

§ 82. Eqqartuussissuserisoq kinaluunniit naalagaaffiup iluani allaffilik najukkani eqqartuussivinnut, Kalaallit Nunaanni Eqqartuussivinnut aamma Kalaallit Nunaata Eqqartuussisuuneqarfianut ornigussinnaatitaavoq.

Imm. 2. Eqqartuussissuserisoq eqqartuussissuserisumik allamik imaluunniit fuldmægtigiminik akuerisamik ornigutsitsinnaavoq, taamaattorli pinerlunnerni suliassani aatsaat fuldmægtigi nammineq illersuisuusussatut sulisinnaatitaappat.

Imm. 3. Eqqartuussissuserisoq oqaatsitigut isumaqatigiinniuteqarnerup nalaani inuk kinaluunniit tusaamanerlugaanngitsoq aqqutigalugu suliassap kinguartineqarnissaanik noqqaassuteqarsinnaallunilu tunngavilersuuteqarsinnaavoq, pissutsit eqqartuussissuserisup nammineq ornigunissaanut akornusiisut pissutigalugit.

Imm. 4. Eqqartuussinerni oqaatsitigut isumaqatigiinniuteqarnerup avataani pisuni eqqartuussissuserisoq aammattaq inummik tusaamanerlugaananilu nammineersinnaassusilimmik 18-inik ukioqalereersimasumik ornigutsitsisinnaavoq, pissutissaqavissumik ornigussinnaannginnini nalunaarutilugu. Eqqartuussiviup illuatungiusullu piumasarisinnaavaat pissutissaqavissumik ornigussinnaannginneq uppersarsarneqassasoq.

Imm. 5. Eqqartuussutinik naammassinninniaalluni suliaqarnerni eqqartuussissuserisut inummik kimilluunniit tusaamanerlugaanngitsumik 18-inik ukioqalereersimasumik ornigutsitsisinnaapput, ataatsimiinnermi akerliliissutit imaluunniit illuatungaaniit piumasaqaatit suliarineqassanngippata imaluunniit eqqartuussiviup ornigutsitsineq taamaattoq naleqqutinngitsuosorinngippagu.

*Nammineq aningaasartuutiginnisamik eqqartuussisulersuussisoqarnerani
eqqartuussissuserisut*

§ 83. Inatsiseqarnermut ministeri eqqartuussissuserisunik naleqquttunik amerlassusilinnik Kalaallit Nunaanni allaffilinnik sulisussarsissaq saqitsaanernik aamma pinerlunnernik suliassanik suliaqartartussanik.

Imm. 2. Inatsiseqarnermut ministeri siunertamut tamatumunngarpiaq sulisussarsissaq eqqartuussissuserisunik naleqquttumik amerlassusilinnik naalagaaffiup iluani allami allaffilinnik.

Inatsisitigut siunnersorneqarneq

§ 84. Eqqartuussissuserisut Kalaallit Nunaanni allaffillit nammineq aningaasartuutiginnisamik eqqartuussisulersuussinerni sulisussarsiarineqarsimasut inatsisitigut siunnersuisassapput inunnik, aningaasatigut piumasaqaatinik § 254, imm. 3 naapertorlugu aalajangersarneqartunik eqquutitsissunik.

Imm. 2. Eqqartuussissuserisut, imm. 1-imi pineqanngitsut, pisortatut oqartussaasumut, inatsiseqarnermut ministerip aalajangigaanut, nalunaarnikkut assingusumik pisussaaffeqarumasinnaapput.

Imm. 3. Inatsiseqarnermut ministeri inatsisitigut siunnersuisarneq pillugu malittarisassanik aalajangersaassaaq, matumani ilanngullugit eqqartuussissuserisup pisussaaffiisa annertussusaat, suliassat suut inatsisitigut siunnersuiffiqineqassasut aamma kikkut inatsisitigut siunnersorneqarsinnaatitaanersut pillugit malittarisassanik.

Imm. 4. Inatsiseqarnermut ministeri eqqartuussissuserisut inatsisitigut siunnersuinnermut akissarsiasaat pillugit aammalu akissarsianut akiliutissatut naalagaaffiup karsianiit tapiisarnissaq pillugu malittarisassanik aalajangersaassaaq. Aalajangerneqarsinnaavoq inatsisitigut siunnersorneqarmissamik qinnuteqaateqartoq akissarsiarititassat ilaannik nammineq akiliissasoq.

Imm. 5. Inatsiseqarnermut ministeri inatsisitigut siunnersuisarnermik aaqqissuussinernut allanut naalagaaffiup karsianiit tapiissuteqarsinnaavoq.

Advokatfuldmægtig akuerisat

§ 85. Eqqartuussissuserisoq kinaluunniit ataatsimik marlunnilluunniit akuerisanik fuldmægtigeqarsinnaavoq, danskisut bacheloritut inatsisilerituutullu soraarummeersimasussaasunik.

Imm. 2. Akuersissut Kalaallit Nunaanni Eqqartuussivimmi eqqartuussisumit tunniunneqassaaq.

Imm. 3. Qallunaat eqqartuussisarnermik inatsisaanni § 121, imm. 1-3 aamma imm. 4, oqaaseqatigiit pingajui taamatulli atortuutinneqassapput. Eqqartuussivik aalajangiissappat allagartaqartitaanissaq itigartitsissutigineqassasoq tamanna aalajangiinikkut pissaaq, tunngavilersorneqartussakkut. Suliassaq suliarineqassaaq saqitsaanernik suliassanik eqqartuussisarnertut ilusilimmik aamma oqaatsitigut suliarineqassaaq, tamanna qinnuteqaateqartup noqqaassutigippagu.

Eqqartuussissuserisutut suliassanik ingerlataqarsinnaatitaanermik atorunnaarsitsineq

§ 86. Eqqartuussissuserisutut suliaassanik ingerlataqarsinnaatitaaneq atorunnaassaaq, pineqartuq piumasaqaatinik qallunaat eqqartuussisarnermik inatsisaanni § 119, imm. 2, nr. 1-imiittunik (piginnaaniliineq pillugu) aamma nr. 2-miittunik (akiliisinnaassuseqarneq pillugu) naammassinnissinnaajunnaarpat.

§ 87. Eqqartuussissuserisutut suliaassanik ingerlataqarsinnaatitaaneq pinerluttulerinermi inatsimmi § 165-imi malittarisassat naapertorlugit pinerlunnernik suliaassap suliarineqarnerani arsaarinnissutaasinnaavoq, pisimasoq atorfimmik atonerluisoqarsinnaaneranut navianartoqartitseqqajaappat imaluunniit pineqartuq ataqqineqarlunilu tatigisaanissamut, eqqartuussissuserisutut sulinermi piumasarisariaqartumut, qinngaqqunnarpat.

§ 88. Niaqulaarnermik nappaateqarnerup imaluunniit pisortanut annertuunik akiitsoqarnerup nassatarisaatut eqqartuussissuserisutut sulisinnaatitaanerup eqqartuussutikkut arsaarinnissutaasinnaanera pillugu inatsit qallunaat eqqartuussisarnermik inatsisaanni § 139-miittoq taamatulli atortuutinneqassaaq. Suliassaq Kalaallit Nunaanni Eqqartuussivimmit suliarineqassaaq.

§ 89. Eqqartuussissuserisoq, eqqartuussivikkut suliaassap inivillugu aalajangiiffigineqarnissaa tikillugu, eqqartuussissuserisutut sulisinnaatitaanngitsoq aamma eqqartuussissuserisoq, inatsit manna naapertorlugu eqqartuussissuserisutut sulisinnaatitaajunnaarsimasoq imaluunniit piginnaatitsissummik arsaarneqarsimasoq, eqqartuussissuserisutut ivertitaassutiminik Inatsiseqarnermut Ministereqarfimmut utertitsissaaq.

Imm. 2. Pineqartuq taanna eqqartuussissuserisutut suliaassanik ingerlataqarnissamut piginnaatitaaqilerpat piginnaatitsissut noqqaassuteqarnikkut tunniunneqassaaq.

Imm. 3. Eqqartuussissuserisutut sulisinnaatitaaneq § 86-imi aalajangersagaq malillugu akiliisinnaajunnaarnerup nassatarisaanik atorunnaarpat, inatsiseqarnermut ministeri, akiliisinnaajunnaarnermi pigisat suliarineqareernerisigut, piginnaatitsissutip tunniunneqarnissaanik itigartitsissuteqarsinnaavoq, piumasaqaatinik nalunaarutigineqarsimasunik sulii peqarpat pineqartumut akileqquneqarsinnaasunik.

§ 90. Eqqartuussissuserisoq sulisinnaatitaassutiminik Inatsiseqarnermut Ministereqarfimmut paarisassanngortitsisinnaavoq. Sulisinnaatitaassut aatsaat tunniuteqqinneqarsinnaavoq, eqqartuussissuserisup piumasaqaatit qallunaat eqqartuussisarnermik inatsisaanni §§ 119-imiittut aamma 121-miittut naammassisimappagit.

§ 91. Inunnut, eqqartuussissuserisutut suliaassaqarsinnaatitaanngitsunut imaluunniit §§ 86-88 naapertorlugu suliaassaqarsinnaajunnaarsinneqarsimasunut, atuutissapput malittarisassat, aningaasanik paarisassanngortitanik suliarinnineq pillugu § 79 naapertorlugu aalajangersarneqarsimasut. Eqqartuussissuserisut Siunnersuisoqatigiit malittarisassat malinneqarnerannik nakkutilliisuussapput. Malittarisassat atuutissapput Eqqartuussissuserisut Siunnersuisoqatigiit tamatuma atorunnaarnissaanik aalajangiinissaat tikillugu, sivilisunerpaailli suliaassanik ingerlataqarsinnaajunnaarnermiit imaluunniit piginnaatitaanerup atorunnaarneraniit qaammatini arfinilinni. Eqqartuussissuserisut Siunnersuisoqatigiit pineqartup sullitai suliaassanik ingerlataqarsinnaajunnaarneq imaluunniit piginnaatitaanerup atorunnaarnera pillugu aammalu tamatuma kingunerisassai pillugit ilisimatitsissuteqarsinnaapput.

Imm. 2. *Imm. 1-imi* malittarisassanik unioqutitsineq pinerluttulerinermi inatsit malillugu pineqaatissiissutaasinnaavoq.

Eqqartuussissuserisoqatigiit

§ 92. Danskit eqqartuussisarnermik inatsisaanni § 143, imm. 1 Kalaallit Nunaanni eqqartuussissuserisunut taamatulli atortuutinneqarpoq.

Imm. 2. Eqqartuussissuserisoqatigiit atugarisaat sulinerallu pillugu danskit eqqartuussisarnermik inatsisaanni kapitali 15 atuuppoq.

Akissarsiat pillugit maalaarutit

§ 93. Eqqartuussissuserisup, eqqartuussissuserisutut ingerlatseqatigiiffiup imaluunniit inuit § 76, imm. 3, nr. 2-mi taaneqartut arlaata eqqartuussissuserisutullu ingerlatseqatigiiffimmi aktiaateqartut imaluunniit piginneqataassuteqartut suliassamik suliaqarsimanermut akissarsiassatut piumasarisaaat pillugit maalaarutit kialuunniit, taamaaliornissaminut inatsisitigut soqutigisallip, Advokatnævni- mut saqqummiussinavai. Maalaarut sularineqartassaaq malittarisassat danskit eqqartuussisarnermik inatsisaanni § 146-miittut malillugit.

Imm. 2. Maalaarut pillugu suliassami illuatungeriit apeqqutinik, imm. 1 naapertorlugu maalaarummut saqqummiunneqartumut ilaasunik, eqqartuussivitsigut suliassiissuteqarsinnaanngillat, maalaarut pillugu suliassaq Advokanævni- mit inaarutaasumik aalajangiiffineqareersinnagu.

Maleruagassanik unioqqutitsinernik suliassat

§ 94. Eqqartuussissuserisup, eqqartuussissuserisutut ingerlatseqatigiiffiup imaluunniit inuit § 76, imm. 3, nr. 2-mi taaneqartut ilaata aamma eqqartuussissuserisutut ingerlatseqatigiiffimi aktiaateqartup imaluunniit piginneqataassuteqartup pisussaaffimminik, inatsit manna naapertorlugu imaluunniit najoqutassanik inatsit manna naapertorlugu aalajangersagaasunik sumiginnaaneranik maalaarutit Advokatnævni- mut saqqummiunneqarsinnaapput. Maalaarut danskit eqqartuussisarnermik inatsisaanni §§ 147 c aamma 147 f, imm. 1 malillugu sularineqassaaq.

Imm. 2. Maalaarutit tunniunneqartassapput maalaaruteqartup pissutsinik maalaarutaasunik ilisimasaqalerneraniit kingusinnerpaamik ukioq ataaseq qaangiutsinnagu. Advokatnævni- lli maalaarut, kingusinnerusukkut tunniunneqartoq, sularisinnaavaa, piffissarititamik qaangiineq naleqquttumik tunngavilersorneqarsimasorineqarpat.

Imm. 3. Advokatnævni- p inuit, pissutsini maalaarummi pineqartuni inatsisitigut soqutigisaqartuunngitsut, maalaarutaat itigartitsissutiginnaavai, aamma maalaarutit ersarissumik tunngavissaqanngitsutut nalilerneqareersinnaasorineqartut.

Imm. 4. Advokatnævni- illuatungeriinnik aamma ilisimannittunik eqqartuussivimmi, pineqartut najugaqarfigisaanni imaluunniit najorallagaanni, killisiuisitsisinnaavoq.

Imm. 5. Eqqartuussivikkoortitsilluni misiliinisarneq pillugu aalajangersakkat danskit eqqartuussisarnermik inatsisaanni §§ 147, d-miittut, 147 e-miittut aamma 147 f, imm. 2-miittut taamatulli atortuutinneqassapput. Suliassat Kalaallit Nunaanni Eqqartuussivimmit sularineqartassapput.

Immikkoortoq II

Eqqartuussivikkut suliassanut tamanut ataatsimut aalajangersakkat

Kapitali 6

Oqaatsit eqqartuussinermi atorneqartussat

§ 95. Oqaatsit eqqartuussinermi atorneqartussat tassaapput kalaallisut danskisullu oqaatsit. Eqqartuussisunut ilaasortat suliassamilu illuatungeriit oqaatsit atorneqartut paasisinnaanngippatigit oqalutsi nutserissaaq.

Imm. 2. Suliassamut akooqqusaannginneq pillugu §§ 49-51 oqalutsinut aamma atuupput.

Imm. 3. Eqqartuussinissamut piffissaliivigeriikkamut oqalutsimik ikiortissarsiornissaq ajornassappat imaluunniit oqalutsimik aggersaanissaq suliassap sivirusumik naleqqutinngitsumillu kinguartikkallarnissaanik kinguneqassappat eqqartuussisuni ilaasortat ilaat oqaluttaasinnaavoq.

Imm. 4. Inuit imm. 3-mi taaneqartut ilaat oqaluttaassappat tamanna eqqartuussisut suliaannik allassimaffimmut allanneqassaaq.

Imm. 5. Oqalutsi ungasianiit attaveqaatit assiliartallit atorlugit peqataasinnaavoq, oqaluttaaffigisassap sumiiffigisaanut oqalutsip ornigutsinniarnissaa naleqqutinngitsumik ajornakusuussappat aamma ungasianiit attaveqaatit assiliartallit atorlugit oqaluttaatitsinissaq illersorneqarsinnaasorineqarpat. Inuk, ungasianiit attaveqaatit aqputigalugit peqataasoq, oqaluttaaffigineqarpat oqalutsi pineqartup najuuffigisaaniittariaqarpoq.

Kapitali 7

Eqqartuussisut suliaannik allassimaffiit

§ 96. Inatsiseqarnermut ministeri malittarisassiussaaq eqqartuussisut suliaannik allassimaffiit suut eqqartuussivinni atorneqarnissaat pillugu, aamma taakkuninnga atortuulersitsineq, aqqissuussineq atuinnissarlu pillugu. Inatsiseqarnermut ministeri aammattaq malittarisassiorsinnaavoq eqqartuussinernik immiussisarneq pillugu.

Imm. 2. Eqqartuussisut siulittaasuata eqqartuussisut suliaannik allassimaffiit eqqortumik allatorneqarnissaat akisussaaffigivaa.

§ 97. Eqqartuussisut suliaannik allassimaffik eqqartuussivimmi iliuutsit tamaasa pillugit paasisutissartaqassaaq.

Imm. 2. Eqqartuussisut suliaannik allassimaffimmi taaneqartassapput:

- 1) piffissaq sumiiffillu eqqartuussiviusoq,
- 2) inuit, eqqartuussisutut, eqqartuussisooqataasutut, oqalutsitut eqqartuussisunullu allatsitut sulisut aqqi,
- 3) suliassap normua illuatungeriit aqqi ilanngullugit,
- 4) illuatungeriit najuuttut aqqi aamma taakkua sinniisoqartinneqarsimappata taakkua aqqi,
- 5) pinerlunnernik suliassani unnerluussisutut illersuisutullu najuuttut aqqi, aamma
- 6) eqqartuussineq tamanut ammasuunersoq matoqqasuunersorluunniit.

§ 98. Eqqartuussisut suliaannik allassimaffiup imarissavai illuatungeriit piumasaqaataat, kissaataat akerliliissutaallu. Taakku allakkianit, eqqartuussivimmut tunniunneqarsimasunit, ersersinneqarpat taakkuninnga innersuussineq naammappoq. Eqqartuussisut suliaannik allassimaffiup aammattaq imarissavai akerliliissutit, ilisimannittunit, misissuisutitanit imaluunniit naliliisartunit saqqummiunneqartut.

Imm. 2. Suliassap ingerlasimaneranik aamma illuatungeriit ilisimannittullu suliassami pissusiviusut pillugit nassuiaataannik imaqarniliuineq naatsoq allanneqartassaaq.

Imm. 3. Eqqartuussiviup eqqartuussutai aalajangiinerilumi eqqartuussisut suliaannik allassimaffimmi tamakkivillugit allanneqartassapput.

Imm. 4. Paasisutissat allat eqqartuussisut suliaannik allassimaffimmut aatsaat allanneqartassapput tamanna inatsimmi peqqussutaasimatillugu.

Imm. 5. Eqqartuussinerit naammassineri tamaasa eqqartuussisut suliaannik allassimaffik eqqartuussisut siulittaasuani atsiorneqartassaaq.

§ 99. Allatut aalajangersaasoqarsimangippat eqqartuussisut suliaannik allassimaffimmut allanneqartut aatsaat atuarneqarlutillu pissutsit malillugit akuersissutigineqartassapput, eqqartuussisut siulittaasuata nammineerluni immikkut ittunik pissuteqartumik tamanna pisariaqarsorippagu imaluunniit

saqitsaanernik suliassani akerlerisamiit, ilisimannittumiit imaluunniit misissuisuutitaallunilu naliliisartumiit noqqaassuteqarneq naapertorlugu.

§ 100. Suliassap pappiarartai uppernarsaatitullu allakkiat allat, eqqartuussivimmi saqqummiunneqartut, tamanna pillugu oqaaseqaatitalerneqartassapput.

§ 101. Pisut, inatsimmi matumani tamanna pillugu immikkut ittunik aalajangersaavigineqartut, avataanni illuatungeriit allallu, inatsisitigut tamatumani soqutigisaqartut – taamaattorli kingullertut taaneqartut pinerlunnernik suliassani aatsaat suliassaq inerlugu sularineqareeraangat – piumasarisinnaavaat eqqartuussisut suliaannik allassimaffiit assilineqarneri kiisalu uppernarsaatitut allakkiat saqqummiunneqarsimasut allat, eqqartuussivimmiittut, tunniunneqassasut.

Imm. 2. Naalagaaffiup isumannaatsuunissaa imaluunniit naalagaaffinnut takornartanut pissutsinik pingaartitsineq imaluunniit tamakkuninnga immikkut ittunik qajassuussineq pissutigalugu allassimaffiup assilineqarneranik imm. 1 malillugu tunniussaqarnissaq eqqarsarnartoqartinneqarpat allassimaffiup assilineqarnera tamarmiisoq ilaannakorluunniit tunniukkumaneqanngissinnaavoq. Aamma taamaassaaq annilaanngatigineqarpat allassimaffiup assilineqarnera inatsisinut akerliusumik iliornikkut atorniarneqarsinnaasoq. Eqqartuussisut suliassaq aalajangiissuteqarnikkut aalajangiiffigissavaat, tunngavilersorneqartussamik.

Imm. 3. Allassimaffiit assilineqarneri sapinngisamik sapaatip akunnerata ataatsip ingerlanerani tunniunneqartariaqarput.

Imm. 4. Inatsiseqarnermut ministerip aalajangersinnaavaa, pinerlunnernik suliassani allassimaffiit assilineqarneri aatsaat tunniunneqarsinnaassasut, eqqartuussivik politimesterimut oqaaseqaammik piniareeraangat. Politimesterip imm. 2-mi taaneqartunik pissuteqarluni allassimaffiit assilineqarnerannik tunniussaqarnissaq akerliuffigippagu eqqartuussiviup suliassaq aalajangiissuteqarnikkut aalajangiiffigissavaa, tunngavilersorneqartussamik.

Imm. 5. Eqqartuussiviup imm. 2 aamma 4 malillugit aalajangiineri nunatta eqqartuussisuunneqarfianut saqqummiunneqarsinnaapput sapaatit akunneri arfinillit qaangiutsinnagit. Nunattali Eqqartuussisuunneqarfia piffissaliussamik taassuminnga qaangiismanermik qaammatit arfinillit tikillugit pingaartitsinngitsoorsinnaavoq, pissutsit immikkut ittunik qaangiinnermut pissutaasimappata. Pisuni imm. 4, oqaaseqatigiit aappaanni taaneqartuni suliassaq politimesterimit nunatta eqqartuussisuunneqarfianut ullut pingasut qaangiutsinnagit saqqummiunneqartassaaq, taamaattoqarneranilu suliassaq nunatta eqqartuussisuunneqarfianit aalajangiiffigineqareersinnagu allassimaffiup assilineqarneranik tunniussisoqartassanngilaq.

Imm. 6. Eqqartuussap imminut eqqartuussutitut nalunaarutaasup assilineqarneranik tunineqarsinnaatitaanera paragraffimi matumani aalajangersakkanit attorneqassanngilaq.

§ 102. Inuit, § 145, imm. 1-imi, 2-mi imaluunniit 4-mi pineqartut, pinerlunnernik suliassani unnerluussisutitik eqqartuussiviup allaffianni misissuataarisinnaapput. Noqqaassuteqarnikkut inuit taakkorpiaat eqqartuussiviup allaffiani unnerluussisutit nuutsinneqarnerannik tunineqarsinnaapput. Allakkiat misissuataarneqalersinnagit imaluunniit nuutsinneqalersinnagit kimut tunngasuunerat ilisarnarunnaarsarneqassaaq, taamaasilluni pinerlineqartup imaluunniit ilisimannittut kinaassusaat taakkunanni takuneqarsinnaajunnaarlugu. Inatsiseqarnermut ministeri malittarisassanik aalajangersaassaaq, qaqugukkut misissuataarinissaq imaluunniit tunniussinissaq pisinnaasoq pillugu.

Imm. 2. Pinerluffiisoq pillugu ikiutissatut ilanngussat titartakkallu, unnerluussisussaataasunit illersuisumillu sularineqarsimasut, eqqartuussutissap isumaqatigiinniutigineqarnerani inunnut imm. 1-imi taaneqartunut atukkiunneqarsinnaapput.

Imm. 3. Saqitsaanernik suliassani suliassap allakkiartaa ataaseq arlallilluunniit illuatungeriit akuersisillugit inunnut, imm. 1-imi taaneqartunut, eqqartuussutissap isumaqatigiinniutigineqarnerata nalaani atukkiunneqarsinnaapput. Suliassani, saqitsaanernik suliassat immikkut ittunik pillugit inatsimmi matumani immikkoortoq IV malillugu sularineqartussani, atukkiussisoqarsinnaanngilaq.

Imm. 4. Inuit imm. 1-imi taaneqartut eqqartuussiviup allaffiani eqqartuussisut suliaannik allassimaffimmik misissuataarisinnaapput, taanna allaqqissaarneqareerpat. Eqqartuussineq imaluunniit killisiuineq tamakkerlugu ilaannaaluunniit matoqqasumik ingerlanneqarsimappat eqqartuussisut suliaannik allassimaffimmik misissuataarisinqarsinnaangilaq, eqqartuussiviup initaani eqqissisimanissaq torersaarnissarluunniit piinnarlugu matut matuneqarnissaat aalajangerneqarsimanngippat. Noqqaassuteqarneq naapertorlugu allattukkat assilineqarneri tunniunneqassapput. Aalajangersagaq atuutissanngilaq suliassani, saqitsaannernik suliassat immikkut ittut pillugit inatsisip uumap immikkoortua IV naapertorlugu suliarineqartuni.

Imm. 5. Pissutsinik § 101, imm. 2-mi taaneqartut itunik atuuttoqartillugu eqqartuussiviup unnerluussisussaataniiit imaluunniit illersuisumiit noqqaavigineqarnikkut imaluunniit nammineq sulissuteqarnermigut imm. 1 aamma 4 malillugit misissuataarinissaq imaluunniit tunniussaqaarnissaq itigartitsissutigisinnaavaa. Aammattaaq eqqartuussutissap isumaqatigiinniutigineqarnerani eqqartuussivik imm. 2 malillugu atukkiussinissamik itigartitsisinaavoq, tamanna allakkiap qanoq ittuuneranit, sianigisassanit pingaarutilinnit pasisamut, unnerluutigineqartumut imaluunniit ilisimannittumut tunngassutilinnit imaluunniit pingaartitassanit § 101, imm. 2-mi taaneqartunit tamanna pisariaqartinneqarpat. § 101, imm. 4 taamaaliornermi taamatulli atortuutinneqassaaq. Eqqartuussiviup aalajangiineri aalajangiissuteqarnikkut pisassapput, tunngavilersorneqartussakkut.

Imm. 6. Allakkiat uppernarsaatissat allattukkallu assilineqarneri imm. 1-4-mi taaneqartut tusagassiutini tusagassiortut aammalu aaqqissuisoqarfinni suleqataasut saniasigut allanit pineqarsinnaassanngillat taamaallaallu tusagassiornikkut aaqqissuinikkullu suliassanut tapersiutitut atorneqarsinnaapput.

Imm. 7. Inatsiseqarnermut ministeri malittarisassiussaaq tusagassiorfiit eqqartuussisut suliaannik allassimaffiisa assilineqarnerinik unnerluussisutillu nuutsinneqarnerinik toqqortarinninnissaat pillugu.

Imm. 8. Imm. 6-*imik* unioqquitsineq akiliisitsissutaasinaavoq. Najoqqutassani, imm. 7 naapertorlugu aalajangersarneqarsimasuni, aalajangersarneqarsinaavoq najoqqutassani aalajangersakkanik unioqquitsineq akiliisitsissutaasinaasoq. Aammattaaq alajangersarneqarsinaavoq, ingerlatseqatigiiffiit il.il. (inuit inatsisitigut pisinnaatitaasut pisussaataasullu) unioqquitsinerini ingerlatseqatigiiffik il.il. pinerluttulerinermi inatsimmi kapitali 5-imi malittarisassat malillugit akisussaaffilerneqarsinaasoq.

Kapitali 8

Eqqartuussinerup siulersorneqarnissaa

§ 103. Eqqartuussisut siulittaasuata isumaqatigiinniarnert siulersussavai aamma isumaqatigiinniarnep immikkuualuttuisa ataasiakkaat tulleriissaarnissaat aalajangertassavaa, inatsimmi tamanna pillugu najoqqutassamik allamik allassimasoqanngippat. Eqqartuussisut siulittaasuata akuersiseqqaartinnagu arlaannaaluunniit oqaaseqassanngilaq, eqqartuussisullu siulittaasuata siulersuineranik malinnikkumanngitsoq oqaaseqaqquusaajunnaarsinneqarsinaavoq. Eqqartuussisut siulittaasuata suulluunniit isumaqatigiinniarnermut sivitsorsaataasut sapinngisamik peerneqartarnissaat akisussaaffigivaa, isumaqatigiinniarnerrullu immikkuualuttui naammassineqartissavai, sammineqartoq naammattumik suliarineqarsimasutut isigineqaraangat.

§ 104. Eqqartuussisut siulittaasuata isumaqatigiinniarnert torersumik ataqqinartumillu ingerlanissaat akisussaaffigaa, tamatumunngalu atatillugu illuatungeriit, ilisimannittut allalluunniit avoqqaarisinnaavai, taakkua tulluanngitsunik oqaaseqaraangata imaluunniit inummut tulluanngitsunik saassussigaangata. Illuatungeriit arlaat avoqqaarineqaraluarluni pigaluttuinnarpat eqqartuussisut siulittaasuata pineqartoq oqaaseqartarsinnaajunnaarsissinnaavaa. Inuit, nipiliorlutik allatulluunniit tulluanngitsumik pissusilersorlutik isumaqatigiinniarnernik akornusersuisut imaluunniit eqqartuussisunut asissuisut, eqqartuussiviup initaaniit anisinneqarsinnaapput.

Imm. 2. Eqqartuussisut mianersoqqusinnaavaat inuk, eqqartuussissunik imaluunniit eqqartuussivimmu orniguttut arlaannik ajuallatsitsisoq, isumaqatigiinniarnernik akornusersuisoq imaluunniit eqqartuussisut siulittaasuata peqqussutaanik malinnikkumangitsoq imaluunniit pineqartoq eqqartuussiviup initaaniit anisillugu. Eqqartuussivik aammattaaq pisuni taama ittuni akiliisussanngortitsisinnaavoq.

Kapitali 9

Eqqartuussisut isumasioqatigiittarnerat aamma aalajangiisarnerat

§ 105. Eqqartuussutissat aalajangiinerillu isumasioqatigeereernerup kingorna taasinikkut akuersissutigineqartassapput. Taamaattoqassanngilarli, eqqartuussisoq ataasiinnaasimappat imaluunniit aalajangiinerit eqqartuussisut siulittaasuata aalajangiivigisinnaasai pineqarpata. Eqqartuussutissap inernera isumaqatigiinnigissutaatillugu allaanerusumik isummernerit eqqartuussisut suliaannik allassimaffimmut allaqquneqarsinnaapput. Pinerlunnernik suliassani eqqartuussisut siulittaasuata taasineq pillugu eqqartuussisut suliaannik allassimaffimmut oqaaseqaateqartassaaq, unnerluutigineqartoq eqqartuussisut siulittaasuata taasineranut akerliusumik pinerluttuliornermut pisuutitaagaangat.

Imm. 2. Eqqartuussisut isumasioqatigiinnerat taasinerallu tusarnaartunit pinnani taamaallaat eqqartuussisut allattaannit najuuffigineqarsinnaavoq. Taamaattorli pisuni immikkut ittuni allat najuunnissaat eqqartuussisunit akuerineqarsinnaavoq. Eqqartuussisut isumasioqatigiinneri taasinerilu pillugit paasissutissanut tunngatillugu nipangiussisussaataaneq atuuppoq, tak. Pinerluttulerinermi inatsimmi § 50.

Imm. 3. Eqqartuussisoq imaluunniit eqqartuussisooqataasartoq suliassap aalajangiiffigineqarneranut peqataasinnaanngillaq, oqaatsitigut isumaqatigiinniarnernit tamakkerlugit najuuffigisimangikkunigit.

§ 106. Aalajangiinerni tamani taasisoqarnerani amerlanerussuteqartoqartassaaq. Aalajangiinermi taasisoqarnerani amerlanerussuteqartoqanngippat, eqqartuussisut siulittaasuata taasinerani aalajangiisuusassaaq, taamaattoq tak. *imm.* 2.

Imm. 2. Pinerlunnernik suliassani pisuutitsineq pillugu apeqqummut aamma pineqaatissiissutissamik aalajangiiniarnermut tunngatillugu taasinerit amerlaqatigiissillugit unnerluutigineqartumut iluaqutaanerpaasussaq atuutissaaq. Isummat assigiinnigitsut marlunniit amerlaneruppata, taakku arlaannaalluunniit amerlanerussuteqaratik, taasinerit unnerluutigineqartumut iluaqutaanerpaajusut naatsorsutigineqassapput iluaqutaannginnerpaat qaninnerit taakkununga katigullugit, taasinerit amerlanerussuteqalernissaat tikillugu.

§ 107. Eqqartuussisut eqqartuussutikkut imaluunniit aalajangiinikkut aalajangiisassapput.

Imm. 2. Eqqartuussutit tamatigut tunngavilersorneqartassapput. Aalajangiinerit, immikkut ittunik aalajangersaasoqarsimatillugu, tunngavilersorneqartassapput.

§ 108. Eqqartuussummik suliareqqitassanngortitamik atuuttussanngortitsisoqarsinnaavoq pissutaasut, eqqartuussummi suliareqqitassanngortitami taaneqartut, naapertorlugit imaluunniit tunngavilersuut nutaaq naapertorlugit.

Imm. 2. Nunatta eqqartuussisuunekarfiata eqqartuussutaani tamatigut oqaatigineqartassaaq eqqartuussivimmi sorlermi eqqartuussut suliareqqitassanngortitaq eqqartuussutaasimanersoq.

§ 109. Eqqartuussivik sukkualluunniit nammineerluni sulissuteqarnermigut imaluunniit noqqaavigineqarnermigut iluarsisinnaavoq eqqartuussutini allannerliukkanik oqaatsinik, aternik kisitsisinilluunniit, naatsorsuinerliornernik ersarissunik kiisalu kukkunernik puiukkanilluunniit, aalajangiinerup ilusaanut taamaallaat tunngassutilinnik.

Imm. 2. Piffissaq suliareqqitassanngortitsivissaq qaangiutsinnagu taamaalioqqusisoqassappat, eqqartuussiviup iluarsisinnavai illuatungeriit oqaatsitigut ilisimatitsissutaasa oqaaseqaataasalu

issuarneqarnerat, saqitsaanermik suliassap aalajangiiffigineqarneraniittut imaluunniit suliassap ataqatigiivinnerata saqqummiunneqarnera pinerlunnernik suliassap aalajangiiffigineqarneraniittoq, saqqummiineq qaangiataarinernik, ersarluttuliornernik imaluunniit oqaatsinik imminnut assortuuttunik kukkuneqassappat. Eqqartuussivilli tunngavilersuutinik inerniliinernilluunniit allannguisinnaanngilaq. Illuatungeriit, pinerlunnernilu suliassani aamma illersuisoq periarfissaqassapput oqaaseqaateqarnissamut, iluarsisutit taamaattut pillugit aalajangiisoqartinnagu. Eqqartuussisut aalajangiisuusassapput illuatungeriillu ilisimatittassallugit aamma pinerlunnernik suliassani illersuisoq ilanngullugu ilisimatittassallugu, malittarisassat aalajangiinivimmi atuussimasut taakkorpiat malillugit.

Imm. 3. Aalajangiinerup iluarsisap aalajangiisimaneq siulleq sutigut tamatigut taarsissavaa. Iluarsineq pillugu aalajangiineq aalajangeqqitassanngortinneqarsinnaanngilaq.

§ 110. Aalajangiinerit allanngortinneqarsinnaapput, paasissutissat nutaat pigineqalerpata kiisalu eqqartuussiviup taamaaliornissaq aamma naleqquttuursorippagu.

Kapitali 10

Tamanut ammasuunissaq

Oqaatsitigut saqqummiussisussaataaneq

§ 111. Eqqartuussivimmi suliassat oqaatsitigut suliarineqartassapput. Allakkatsigut suliarinninneq aatsaat atorneqartassaaq tamatuma inatsimmi matumani immikkut aalajangerneqarsimanerata annertussusaa naapertorlugu.

Imm. 2. Allakkiat uppersaatissat atuarneqassatillugit eqqartuussisut siulittaasuata aalajangertassavaa kina atuaasuussanersoq, inatsimmi allatut aalajangiisoqarsimanngippat.

Tamanut ammasuunissaq

§ 112. Eqqartuussinerit tamanut ammasuussapput, inatsisikkut imaluunniit inatsit naapertorlugu allatut aalajangiisoqarsimanngippat.

Imm. 2. Eqqartuussutit tamatigut tamanut ammasumik eqqartuussinermit nalunaarutigineqartassapput.

§ 113. Eqqartuussisut siulittaasuata inuit, tamanut ammasumik eqqartuussinermit isersinnaatitaasut, amerlassusissaat killilersinnaavaa, eqqartuussiviup initaata ulikkaavinnissaa pinngitsoortinniarlugu.

Imm. 2. Eqqartuussisut siulittaasuata inuit makkua eqqartuussinermit tamanut ammasumut iseqqunngissinnaavai,

1) 15-it inorlugit ukiullit, imaluunniit

2) ima pissusilersortut, najuunnissaat eqqartuussiviup ataqisariaqarneranut imaluunniit torersuunissaanut akerliulluni.

Imm. 3. Eqqartuussisut siulittaasuata aammattaaq inuit imaluunniit inuit eqimattat aalajangersimasut tamanut ammasumik eqqartuussinermit iseqqunngissinnaavai, nalilerneqarpat ilisimannittup imaluunniit illuatungiusup ilumoortunik nassuiaateqartinnissaanut tamanna pisariaqartuusoq.

Matunik matusineq

§ 114. Eqqartuussisut aalajangersinnaavaat eqqartuussineq matoqqasumik ingerlanneqassasoq (matunik matusineq),

1) inimi eqqartuussiviusumi eqqissisimanissaq torersaarnissarlu pissutigalugu tamanna pisariaqartinneqarpat,

2) naalagaaffiup naalagaaffinnut takornartanut attaveqarnera imaluunniimmi taakkununga immikkut qajassuussinissaq pillugu tamanna pisariaqartinneqarpat, imaluunniit

3) tamanut ammasumik eqqartuussinermi suliassamik sularinninneq arlaannut pisariaqanngitsumik ajullatsitsissutaassappat, matumunnga ilanngullugu eqqarsaatigineqarluni inuussutissarsiutigut isertuussassat pillugit nassuiaasoqartoqarniartillugu.

Imm. 2. Pinerlunnernik suliassani aammattaq matunik matusinissaq aalajangiiffigineqarsinnaavoq,

1) pasisaq (unnerluutigineqartoq) 18-it inorlugit ukioqarpat,

2) tamanut ammasumik eqqartuussinermi suliassap sularineqarnerani arlaata isumannaatsuunera ulorianartorsiortissasorineqarpat, imaluunniit

3) tamanut ammasumik eqqartuussinermi suliassamik sularinninnermit suliassap paasinarsarneqarnera pingaarutilitsigut akornuserneqarsinnaasorineqarpat.

Imm. 3. Eqqartuussutissap aalajangiiffiginiarnerani imm. 2, nr. 3 naapertorlugu matunik matusineq eqqartuussivimmi siullermeeriffiusumi taamaallaat pisinnaavoq aamma aatsaat ilimagineqartariaqarpat suliassap sularineqarnerani unnerluutigineqartut saniasigut inunntut allanut pisimasut taakkorpiat pillugit kingusinnerusukkut unnerluussissuteqartoqassasoq, aammalu pingaartitassat immikkut illuinnartut matunik matusinissaq pisariaqartippassuk. Eqqartuussutissamik isumaqatigiinniuteqarneq eqqartuussisut suliassamik allasimaffimmut ima sukumiitigisumik issuarneqartassaaq, eqqartuussutit nalunaarutigineqarnerani eqqartuussutissap isumaqatigiinniutigineqarnerata ingerlasimanera avammut ilisimatinneqarsinnaalersillugu, matunik matusinermi siunertarisat annertussusaat naapertorlugu.

Imm. 4. Matunik matusinissaq pillugu aalajangiisoqarsinnaanngilaq issuaanissaq imaluunniit aternik taaseqqusaannginneq pillugu imaluunniit inunnik ataasiakkaanik najuutsitseqqusaannginneq pillugu malittarisassat atorineqarnissaat naammappat.

§ 115. Pinerluttulerinermi inatsimmi §§ 74-imik, 77-imik aamma 80, imm. 2-mik unioqquitsinerit pillugit suliassani pinerlineqartup nassuiaateqarnerani matut matuneqartassapput, pineqartup tamanna noqqaassutigippagu. Aamma taamaattassaaq pinerluttulerinermi inatsimmi § 79-imik, tak. § 77, unioqquitsineq pillugu suliassani.

Imm. 2. Imm. 1 taamatulli atortuutinneqassaaq immiussanik takutitsinermi imaluunniit nipinik imaluunniit assiliartanik immiussanik allanik, pissutsinik suliassap ingerlanerani pasilliutaasunik unnerluussissutaasuniluunniit takutitsisunik, tusarnaarnermi isiginnaarnermilu.

§ 116. Matunik matusinissaq pillugu eqqartuussisut aalajangiissapput noqqaavigineqarnikkut imaluunniit namminneq sulissuteqarnermikkut.

Imm. 2. Pasisaq (unnerluutigineqartoq) 18-inik sinnerlugilluunniit ukiulik najuuttoq qajassuunnarlugu matunik matusineq pineqartup nammineq taamaalioqqusineratigut aatsaat aalajangerneqarsinnaavoq

§ 117. § 114 malillugu matunik matusinissamik aalajangiineq tunngavilersukkatut aalajangiinerussaaq, illuatungeriit inuillu najuuttut, § 145, imm. 1-imi, 2-mi imaluunniit 4-mi pineqartut, oqaaseqaateqarnissamat periarfissaqartitaarepata. Eqqartuussisut, ingammik naalagaaffinnut takornartanut pingaarutilitsigut qajassuussinissap imaluunniit suliassap paasissutissiissutigineqarnissaata tamanna pisariaqartippagu, tunngavilersukkamik aalajangiinikkut aalajangiisinnaapput matut matuneqarnissaat pillugu isumaqatigiinniarneq aamma matoqqasumik ingerlanneqassasoq.

Imm. 2. Imm. 1 malillugu matunik matusinissamik aalajangiineq eqqartuussinerup aallartinnerani imaluunniit tamatuma ingerlanerani nalunaarutigineqarsinnaavoq aammalu ingerlaannaq kingusinnerusukkulluunniit eqqartuussinerup ilaanut tunngatitatur annikillisinneqarsinnaalluni. Aalajangiineq tamanut ammasumik eqqartuussinermi tamatigut nalunaarutigineqartassaaq.

§ 118. Eqqartuussinerni, matoqqasumik ingerlanneqartuni, isumaqatigiinniutaasimasunik tamanut issuaanissaq inerteqqutaavoq, matunik matusisimaneq inimi eqqartuussiviusumi eqqissisimanissaq torersaarnissarlu pissutiginnarlugit pisimangippat.

§ 119. Eqqartuussisut siulittaasuata, taamaaliornissamut immikkut ittumik pissutissaqarpat, suliassamut susassaqtut saniasigut allat eqqartuussinermut, matoqqasumik ingerlanneqartumut, najuunnissaat akuerisinnaavaa. Pineqartut taakku eqqartuussineq pillugu kimulluunniit, eqqartuussinermut isersinnaatitaasimanngitsumut, nalunaaruteqassanngillat, matunik matusisoqarsimanngippat inimi eqqartuussiviusumi eqqissisimanissaq torersaarnissarlu pissutiginnarlugit.

Issuaaqqusaannginneq

§ 120. Eqqartuussiviup pinerlunnernik suliassani isumaqatigiinniarnermik tamanut issuaanissaq (issuaaqqusaannginneq) inerteqqutigisinnaavaa,

- 1) pasisaq (unnerluutigineqartoq) 18-it inorlugit ukioqarpat,
- 2) tamanut issuaanissaq arlaata isumannaatsuuneranik ulorianartorsiortitsilersinnaasutut isumaqarfigineqartariaqarpat,
- 3) tamanut issuaanissaq suliassap paasissutissiissutigineqarnissaanik ajoqusiisnaappat, imaluunniit
- 4) tamanut issuaanissaq arlaannut pisariaqanngitsumik nikanarsaataassappat.

§ 121. Eqqartuussivik noqqaavigineqarnikkut imaluunniit nammineerluni sulissuteqarnermigut issuaaqqusaannginneq pillugu aalajangiisassaaq.

Imm. 2. Pasisaq (unnerluutigineqartoq) 18-inik sinnerlugilluunniit ukiulik, najuuttoq, pillugu issuaaqqusaannginneq aatsaat aalajangerneqarsinnaavoq pineqartoq nammineq taamaalioqqusippat.

§ 122. Issuaanissap inerteqqutaanerani aalajangiineq tunngavilersukkamik aalajangiinerussaaq, illuatungeriit inuillu najuuttut, § 145, imm.1-imi, 2-mi imaluunniit 4-mi pineqartut, oqaaseqaateqarnissamut periarfissaqartinneqareerpata. Aalajangiineq eqqartuussinerup aallartinnerani imaluunniit tamatuma ingerlanerani nalunaarutigineqarsinnaavoq aammalu ingerlaanaq kingusinnerusukkulluunniit eqqartuussinerup ilaanut tunngatitatut annikillisinneqarsinnaalluni.

Imm. 2. Eqqartuussiviup noqqaavigineqarnikkut, aamma inunniit § 145, imm. 1-imi, 2-mi imaluunniit 4-mi pineqartunit, imaluunniit nammineerluni sulissuteqarnermigut issuaaqqusaannginneq kingusinnerusukkut atorunnaarsissinnaavaa.

Atinik taaseqqusinnginneq

§ 123. Eqqartuussiviup pinerlunnernik suliassani pasisap (unnerluutigineqartup) inuilluunniit allat suliassap suliarineqarnerani taaneqartut aqqinik, atorfiinik najugaqarfiinilluunniit tamanut ammasumik taasaqarnissaq inerteqqutigisinnaavaa, imaluunniit pineqartup kinaassusaata tamanut allatut saqqummiunneqarnissaa (atinik taaseqqusinnginneq) inerteqqutigisinnaavaa,

- 1) tamanut issuaanissaq arlaata isumannaatsuuneranik ulorianartorsiortitsilersinnaasutut isumaqarfigineqartariaqarpat,
- 2) tamanut issuaanissaq arlaannut pisariaqanngitsumik nikanarsaataassappat.

Imm. 2. Eqqartuussisut imm. 1, nr. 2-misulli piunasaqaatit tunngavigalugit inuup inatsisitigut pisinnaatitaasup pisussaataasullu aqqata, matumunnga ilanngullugu saniatigut aqqa taaguutaaluunniit, najugaqarfiala tamanut issuarneqarnissaat inerteqqutigisinnaavaat.

Imm. 3. Eqqartuussisut atinik taaseqqusinnginneq pillugu aalajangiinerminni inatsisinik unioqqutitsinerup peqqarniissusaa inuiaqatigiinnullu pingaarutaa pingaartittassavaat. Aammattaq atinik taaseqqusinnginermut ilalernartinneqanngilaq pasisaq (unnerluutigineqartoq) innuttaaqatigiinnut naleqqiullugu immikkut pingaarutilimmik atorfeqarpat.

Imm. 4. Atinik taaseqqusinnginneq annertusineqarsinnaavoq suliassamik suliareqqitassanngortitsinerusinnaasup nalaani atuuttussanngorlugu, suliareqqitassanngortitsinermut unnerluutigineqartup pisuuneranut uppernarsaatissanik naliliinissaq ilaappat.

§ 124. Eqqartuussisut noqqaavigineqarnikkut atinik taaseqqusinnginneq pillugu aalajangiisassapput. Aalajangiineq tunngavilersukkamik aalajangiinerussaq, illuatungeriit inuillu najuuttut, § 145, imm. 1-imi, 2-mi imaluunniit 4-mi pineqartut, oqaaseqaateqarnissamut periarfissinneqareerpata. Aalajangiisoqarsinnaavoq eqqartuussinermi, atinik taaseqqusinnginneq pillugu noqqaassummut isummerfiginninnissaq kisiat siunertaralugu ingerlanneqartussami.

Imm. 2. Eqqartuussisut noqqaavigineqarnikkut, aamma inunniit § 145, imm. 1-imi, 2-mi imaluunniit 4-mi pineqartunit imaluunniit namminneerlutik sulissuteqarnermikkut, atinik taaseqqusinnginneq kingusinnerusukkut atorunnaarsissinnaavaat.

Imm. 3. Atinik taaseqqusinnginneq atorunnaartassaaq kingusinnerpaamik inaarutaasumik eqqartuussutip nalunaarutigineqarnerani.

Isiginnaagassanik tusarnaagassanillu immiussisarnerit

§ 125. Inerteqqutaavoq eqqartuussinierip nalaanni assiliinissaq aammalu nipinik immiussinissaq, eqqartuussisut qaqutigoortumik tamanna akuersissutigisimangippassuk. Isiginnaagassanik tusarnaagassanillu, tamatumunnga akerliusumik immiussanik, tamanut saqqummiussinissaq inerteqqutaavoq. Eqqartuussisut aamma sukkulluunniit suliassap sularineqarnerani inerteqqutigisinnaavaat isiginnaagassanik tusarnaagassanillu, eqqartuussinermi immiussanik, tamanut saqqummiinissaq. Eqqartuussisut aalajangiinerat tunngavilersukkamik aalajangiinerussaq.

Imm. 2. Inuit eqqartuussisoqarnerani nassuiaateqartut isiginnaagassanik tusarnaagassanillu immiussisoqarneranik ilisimatinneqartassapput.

Imm. 3. Eqqartuussiviup illutaani isiginnaagassanik immiussinissaq inerteqqutaavoq, eqqartuussiviup tamanna akuerisimangippagu. *Imm. 1,* oqaaseqatigiit aappaanniit sisamaannut taamatulli atortuutinneqassapput.

Imm. 4. *Imm. 1-imi* aamma 3-mi pineqanngillat aallakaatitsinerit §§ 128-mi aamma 163-imi eqqartorneqartut, eqqartuussinierit ingerlanneqarnerisa ilaattut pisut.

Titartaasarneq

§ 126. Eqqartuussiviup pisuni immikkut ittuni eqqartuussisoqarnerani titartaanissaq imaluunniit eqqartuussinermiit titartakkanik tamanut saqqummiussinissaq inerteqqutigisinnaavaa. Aalajangiineq tunngavilersukkamik aalajangiinerussaq.

Unioqqutitsinerit

§ 127. § 118-imik, § 119-imi oqaaseqatigiit aappaannik, § 125, imm. 1-imi oqaaseqatigiinnik siullernik aappaannillu aamma imm. 3-mik, imaluunniit § 120, § 125, imm. 1, oqaaseqatigiit pingajui aamma § 126 malillugit eqqartuussiviup inerteqqutaanik unioqqutitsineq akiliisitsissutaasinnaavoq.

Imm. 2. § 123 malillugu inerteqqummik unioqqutitsineq akiliisitsissutaasinnaavoq, pineqartup inerteqqut nalusimangippagu. Aamma taamaassaaq, pineqartup ilisimasimappagu imaluunniit ilisimasariaqarsimappagu suliassaq eqqartuussivimmi ingerlanneqartoq imaluunniit politiit suliassaq paasinaavigigaat, aamma pineqartoq politiinut, unnerluussisussaatitaasunut imaluunniit eqqartuussivimmut atinik taaseqqussaangitsoqarnerisoq pillugu paasinaasimangippat.

Imm. 3. Ingerlatsiviit il.il. (inuit inatsisitigut pisinnaatitaasut pisussaatitaasullu) pinerluttulerinermi inatsisitigut akisussaatitaasinnaapput pinerluttulerinermi inatsimmik kapitali 5-imi malittarisassat malillugit.

Ungasianiit attaveqatigiinneq

§ 128. Eqqartuussivik inatsit manna naapertorlugu aalajangiisimappat illuatungiusoq imaluunniit eqqartuussinermi taanna sinnerlugu pisinnaatitaasoq eqqartuussinermi ungasianiit attaveqaatit atorlugit peqataassasoq, pineqartoq taanna eqqartuussivimmut nammineerluni orniguttutulli eqqartuussinermi peqataasutut naatsorsuutigineqassaaq.

Imm. 2. Eqqartuussinermi nassuiaateqartoqassappat illuatungiusoq imaluunniit taanna sinnerlugu pisinnaatitaasoq ungasianiit attaveqaatit assiliartallit aqutugalugit § 163-imi aalajangersarneqartunut naapertuuttumik taamaallaat peqataasinnaavoq.

Kapitali 11

Nalunaarutiginninnerit

§ 129. Eqqartuussivimmiit nalunaarutit nalunaarutiginneqartassapput, tamanna inatsisikkut aalajangersarneqarsimappat.

Imm. 2. Eqqartuussivinniit nalunaarutit eqqartuussisut siulittaasuata aalajangiineratut iliorluni nalunaarutiginneqartassapput, inatsimmi allatut aalajangiisoqarsimanngippat.

§ 130. Saqitsaannermik suliassami illuatungiusoq nalunaarutiginninnissamik taamaatitsisinnaavoq.

§ 131. Saqitsaannermik suliassani nalunaarutiginninneq allatullu ilisimatitsissuteqarneq pisinnaavoq illuatungiusup eqqartuussissuserisuanut imaluunniit eqqartuussinermi sinniisitut pisinnaatitaasumut allamut.

Imm. 2. Saqitsaannermik suliassami illuatungiusoq aammattaaq inummik toqqaasinnaavoq, malittarisassat §§ 133-135-imiittut malillugit nalunaarutiginniffigineqarsinnaasumik. Taamaattorli malittarisassaq § 135, imm. 5-imiittoq taamaallaat atortuutinneqartassaaq pineqartoq taanna nalunaarutiginnissummik tigusaqarumalluni nalunaarsimappat.

§ 132. Eqqartuussisoqarnerani piffissaq ataatsimeeqqiffissaq (eqqartuusseqqiffissaq) imaluunniit eqqartuussivikkut iliuseqarnissaq pillugu aalajangiisoqarsimappat, aalajangiineq inunnut, najuuttunut, nalunaarutiginneqartutut naatsorsuutigineqartassaaq.

Imm. 2. Aalajangiineq inunnut, inatsisit malillugit aggersarneqarsimasunut, kisiannili ornigutinngitsoorlutiluunniit suli aalajangiisoqartinnagu pissutissaqanngitsumik eqqartuussinermiit qimagussimasunut, nalunaarutigineqarsimasututtaaq naatsorsuutigineqartassaaq. Eqqartuussiviulli pineqartut taakku aalajangiineq pillugu nalunaarfigisassavai, aalajangiineq tamanna taakkununga immikkut soqutiginaateqartutut isumaqarfigineqarpat.

§ 133. Nalunaarutiginninneq imatut pisinnaavoq

- 1) nalunaarutiginnittartup nalunaarutiginninneratigut,
- 2) allakkerivitsigut nalunaarutiginninnertut imaluunniit
- 3) allakkatigut nalunaarutiginninnertut.

Imm. 2. Nalunaarutiginnittartooq aqutugalugu nalunaarutiginninneq pisassaaq, politiitut atorfillip, kommunefogedip imaluunniit nalunaarutiginnittartup allakkatigut nalunaarummik inummut tunniussaqaarneratigut, nalunaarutiginniffigineqartorlu kajumissaarneqartassaaq tigusaqarneq atsiornermigut ingerlaannaq uppernarsaqqullugu.

Imm. 3. Allakkerivitsigut nalunaarutiginninneq pisassaaq nalunaarutiginnittartooq aqutugalugu nalunaarutiginninnerup assinganik pissuseqarluni, allakkerisarfili tunniussisuussalluni.

Imm. 4. Allakkatigut nalunaarutiginnittoqartassaaq allakkatigut nalunaarut inummut nassiullugu noqqaassuteqartoqarluni pineqartup tigusaqarnerminut uppernarsaat ilanngunneqartoq atsiorlugulu utertissagaa. Tamatuma kingorna nalunaarutiginninneq ullormi, tiguisup nalunaarummik tigusaqarsimasutut taasaani, pisimasutut naatsorsuutigineqassaaq. Ulloq tiguisiffiusoq

allanneqarsimangippat imaluunniit ulloq tigusaqarfiusimasutut taasaq utertitsilluni nassiussat naqissutaanni ulluliussamiit kingusinneruppat, nalunaarutiginninneq allakkat naqissutaata ulluani pisimasutut naatsorsuutigineqassaaq.

§ 134. Allakkatigut nalunaarutiginninneq taamaallaat pisinnaavoq tiguisussamut namminermut, taamaattoq tak. § 131.

§ 135. Nalunaarutiginnittartog aqutigalugu aamma allakkatigut nalunaarutiginninneq sapinngisamik pisariaqarpoq inummut allaffigisamut namminermut pineqartup najugaani, najorallagaani imaluunniit suliffigisaani. Taamaattorli tiguisussamut namminermut nalunaarutiginninneq atuuttussaavoq, nalunaarutiginninnerup sumi pinera apeqquataatinnagu. Nalunaarutiginnittuusup allattassavaa nalunaarutiginninneq qanga pisimasog.

Imm. 2. Tiguisussag naapinneqarsinnaangippat, nalunaarutiginninneq pisinnaavoq

1) najugaqarfigisami imaluunniit inuit inoqutigiinnut ilaasut najugarisaanni imaluunniit allaffigisag allap inigisaani attartukkamini najugaqarpat, attartortitsisumut taassumaluunniit aapparisaanut imaluunniit aapparisaatut inooqataanut, pineqartut taakku najukkami imaluunniit najorallakkami naapinneqarsinnaappata, imaluunniit

2) tiguisussap suliffiani sulisitsisumut imaluunniit taassuma sinniisaanut imaluunniit namminersortutut inuussutissarsiuteqartunut tunngatillugu, tiguisussap allaffiani, sulliviani imaluunniit pisiniarfiup initaani inunnut sullivimmi atorfeqartitanut,

3) umiartortunut tunngatillugu umiarsuarmi, attaveqarfigisaanni, inummut umiarsuarmiumut imaluunniit umiarsuaatillit allaffianni umiarsuaatilimmut taassumaluunniit sinniisaanut.

Imm. 3. Imm. 2 malillugu nalunaarutiginninneq inunnut 18-it inorlugit ukiulinnut pisinnaangilaq.

Imm. 4. Nalunaarutiginninneq inummut tiguisussamut namminermut pisinnaangippat, nalunaarutiginnissummik isumaginnittumit allanneqartassaaq nalunaarutiginninneq sumi, qanga kimullu pisimanersog.

Imm. 5. Inuk imm. 2 malillugu nalunaaruteqarfiusinnaasoq, pissutissaqavinnani, nalunaarummik tiguisumangippat imaluunniit pineqartoq nalunaarutiginnissummik tigusaqarsimasog nalunaarummik tiguisussamut tunniussinngitsoorpat, naak tamanna aningaasartuutigivallaarnagu imaluunniit ajornartorsiutigivallaarnagu pisinnaagaluartog, pineqartoq taanna tamatuma nassatarisaanik aningaasartuutitut taarsisussanngortitaasinnaavoq. Eqqartuussisut tamatuminnga aalajangiinerat tunngavilersukkatut aalajangiinerussaaq.

§ 136. Inuk naalagaaffiup ilaani allami imaluunniit nunami allami ilisimaneqartumik najugaqarfeqarpat imaluunniit najorallagaqarpat, nalunaarutiginninnerlu Kalaallit Nunaanni § 133, imm. 1, nr. 1 aamma 2 malillugit pisinnaangippat, allakkatigut nalunaarutiginnittoqartassaaq imaluunniit nunat assigiinngitsut akornanni isumaqatigiisummi imaluunniit nunap pineqartup inatsisaani peqqussutaasutut periuseqarluni.

Imm. 2. Nunami allami nalunaarutiginninneq eqqartuussivinnut tunngatillugu Kalaallit Nunaanni Eqqartuussivimmit aallarnerneqartassaaq.

§ 137. Inuup naalagaaffimmi maani najugaqarfia, najorallagaa imaluunniit suliffigisaa ilisimatitsissutigineqarsinnaangippat imaluunniit pisortaqarfiup takornartap susassaartup § 136 malillugu nalunaarutiginninnissamik noqqaassuteqarneq itigartippagu imaluunniit malikkumangippagu, nalunaarutiginninneq pisinnaavoq Statstidendekket, Atuagagdliutitigut (AG/Grønlandsposten), tusagassiakkut naqitanngortitakkut allakkut nalunaaruteqarnikkut imaluunniit inatsiseqarnermut ministerip aalajangersagaanik allatut periuseqarluni.

Imm. 2. Nalunaarut imaqassaaq nalunaarutip eqikkarneqarneranik aamma oqaasertalerneqartassaaq nalunaarut tamakkerlugu eqqartuussivimmut saaffiginninnikkut pineqarsinnaasoq. Nalunaarummi aammattaaq oqaatigineqartassaaq soog nalunaarutiginneriaaseq tamanna atorneqarnersog.

Imm. 3. Inuk pineqartoq naalagaaffiup avataani ilisimaneqartumik najugaqarfeqarpat nalunaarut aamma pineqartumut taassumunnga allakkatigut nassiuuneqartassaaq.

Imm. 4. Aalajangersagaq taanna malillugu eqqartuussiviit sinnerlugit nalunaarutiginnittuusassaaq Kalaallit Nunaanni Eqqartuussivik.

§ 138. Nalunaarutiginninneq atuussinnaassuseqassaaq, massa nalunaarut tiguisussumit ilisimaneqalinngikkaluartoq.

Imm. 2. Uppernarsaatitut allakkiq, nalunaarutigineqartussaq, tiguisussumit tiguneqarsimappat tamanna nalunaarutiginninnertut naatsorsuutigineqassaaq, massa nalunaarutiginninneq §§ 133-135-imut naapertuuttumik pisimanngikkaluartoq.

§ 139. Politiit atorfilit aamma kommunefogedit immikkut piginnaaniligaanngikkaluarlutik nalunaarutiginnittuusinnaapput.

Imm. 2. Politimesteri eqqartuussisoqarfinnut tamanut immikkut ivertitsissaaq inunnik pisariaqartumik amerlassusilinnik nalunaarutiginnittartut eqqartuussivitsigut nalunaarutininik nalunaarutiginnittartussanik. Nalunaarutiginninneq atuussinnaassuseqassaaq nalunaarutiginnittartuq eqqartuussisoqarfiup, ivertinneqarfigisami, avataani sulisimagaluarpalluunniit.

Imm. 3. Politiit imaluunniit eqqartuussisut siulittaasuat pisariaqassappat inummik nalunaarutiginnittartussat piukkunnartumik nalunaarutiginninnernik ataasiakkaanik isumaginnittartussamik piginnaassusiliinnaapput.

§ 140. Inatsiseqarnermut ministeri nalunaarutiginninneq pillugu ersarinnerusunik malittarisassiusaaq, matumunnga ilanngullugit politiit paasissutissanik, §§ 133-135 malillugit nalunaarutiginninnissamut pisariaqartunik, pissarsiniarnissamut peqataanissaat pillugu malittarisassat, aamma nalunaarutiginnittartunut akissarsiaqartitsineq pillugu malittarisassanik. Taamatut akissarsiaqartitsineq pisortanit akilerneqartassaaq.

Imm. 2. Politiit atorfilit pinerlunnernik suliassani nalunaarutiginninnernut akissarsiaqartussaataangillat.

Kapitali 12

Ilisimannittut

§ 141. Kinaluunniit pisussaavoq eqqartuussisoqarfimmi, najugaqarfigisamini, ilisimannittut nassuiaateqassalluni.

Imm. 2. Eqqartuussiviup inuk, eqqartuussisoqarfiup avataani najugaqartoq, peqqusinnaavaa ilisimannittut orniguteqqullugu

1) tamanna annertuumik akornutaanngitsumik imaluunniit aningaasartuutaanngitsumik pisinnaappat, imaluunniit

2) nalilerneqarpat, ilisimannittup nassuiaateqarnissaa suliassap aalajangiiffigineqarnissaanut ima pingaaruteqartigimmat aammalu suliassaq ima pingaaruteqartigimmat ilisimannittup aggeqquneqarnissaa tulluurtuusoq.

Imm. 3. Eqqartuussiviup aalajangersinnaavaa ilisimannittoq ungasianiit attaveqaatit assiliartallit atorlugit nassuiaateqassasoq, taamaaliornissaq naleqquttuusorineqarlunilu isumannaatsuusorineqarpat. Ilisimannittoq sumiiffimmut erseqqinnerusumik taaneqartumut aggersarneqartassaaq, tak. § 163.

Imm. 4. Eqqartuussiviup aalajangersinnaavaa, ilisimannittoq ungasianiit attaveqaatit assiliartaqanngitsut atorlugit nassuiaateqassasoq, eqqartuussivimmi imaluunniit ungasianiit attaveqaatit assiliartallit atorlugit nassuiaateqarnissaq ajornartorsiutitaqarpallaassappat aammalu ungasianiit attaveqaatit assiliartaqanngitsut aqutugalugit nassuiaateqarnissaq illersorneqarsinnaasorinassappat. Ilisimannittoq peqquneqarsinnaavoq eqqartuussiviup erseqqinnerusumik taasaatut iliornikkut ungasianiit

attaveqaatinik pilersitsinerani piareersimassasoq. Ilisimannittumik aggersaaneq aamma pisassaaq § 148 malillugu.

Imm. 5. Ilisimannittoq imm. 2-4 naapertorlugit nassuiaateqarsinnaanngippat eqqartuussivimmuq eqqartuussisoqarfimmi, pineqartup najugaqarfigisaaniittumut, nassuiaateqariortoqquneqarluni aggersarneqassaaq. Ilisimannittup noqqaassuteqarneratigut ilisimannittut nassuiaanissaaq eqqartuussivimmi allami tamatumunnga taarsiullugu pisinnaavoq. Killisiuineq eqqartuussisooqataasartut peqataaffiginngisaannik eqqartuussisumit ingerlanneqassaaq. Killisiuinerup qaqugu sumilu pinissaanik illuatungeriit ilisimatineqassapput. Killisiuineq naammassereerpat killisiuineq pillugu eqqartuussisut suliaannik allasimaffiup assilineqarnera eqqartuussivimmuq killisiuinissamik noqqaassuteqartumut nassiuinneqassaaq.

§ 142. Kinaluunniit pisortaqarfimmi sulisuusooq imaluunniit sulisimasooq imaluunniit pisortatigoortumik suliasaartitaasooq pisortat oqartussaataat susassaartoq akuersiseqqaartinnagu pissutsit, pisortat soqutigisaanni isertuunneqartussaasut, pillugit nassuiaateqarnissamut peqquneqarsinnaanngilaq. Inatsisartuni imaluunniit Folketingimi ilaasortanut tunngatillugu folketingimi siulittaasooq aammalu kalaallit naalakkersuisuini ilaasortaq ministeriluunniit susassaartoq akuersiseqqaartariaqarpoq.

Imm. 2. Akuersiumasooqanngippat eqqartuussisut pisortat oqartussaataannut susassaartumut peqqusisinnaapput itigartitsinermut tunngavigisat eqqartuussisunut nassuiaateqarfigeqqullugit, pineqartup nassuiaateqarnissaa pingaaruteqarluinnartuusorineqarpat. Tamatuma kingorna eqqartuussiviup suliasami paasissutissat isertuussisussaannermiit pingaartittariaqarsorigunigit aalajangersinnaavaa ilisimannittut nassuiaasooqassasoq. Taamaassanngilarli itigartitsinermut naalagaaffiup isumannaatsuunissaanik imaluunniit naalagaaffinnut allanut attaveqarneranik pingaartitsineq tunngavilersuutigineqarpat.

§ 143. Ilagiinni imaluunniit upperisarsioqatigiinni allani palasit, ajoqit, ilageeqarnermi suliasaartuusut, nakorsat, illersuisut eqqartuussissuserisut aamma eqqartuussivinni sinniisut pisinnaatitat, sulinerikkut ilisimalersimasatik pillugit nassuiaateqarnissamut peqquneqarsinnaanngillat, inuk soqutigisaanik isertuussisussaaffigisartik isumaqataalluni akuersisimassanngippat.

Imm. 2. Eqqartuussivik nakorsanut, eqqartuussinermi sinniisut peqataanissamut piginnaatitaasunut eqqartuussissuserisunullu, pinerlunnernik suliasani illersuisuusut pinnagit, peqqusisinnaavoq ilisimannittut nassuiaateqarqullugit, nassuiaateqarnissaaq suliasap qanoq inerneqarnissaanut suliallu suussusaanut illuatungiusumullu imaluunniit inuiaqatigiinnut pingaaruteqarneranit tamanna tunngavissaqartuusorineqarpat. Saqitsaannernik suliasani peqqussuteqarnek annertunerutinneqarsinnaanngilaq eqqartuussissuserisup imaluunniit eqqartuussivimmi sinniisut peqataanissamut pisinnaatitap eqqartuussivimmi suliasamut pineqartup ingerlassimasaanut imaluunniit siunnersuuffigisimasaanut atasumik ilisimasaqarfigeriigaaniit.

Imm. 3. Eqqartuussiviup aalajangersinnaavaa pissutsit, ilisimannittuusup inatsisit malillugit nipangiussimasasai, pillugit nassuiaateqartoqassanngitsooq aamma isertuussinissaaq pingaaruteqarluinnartuusappat.

Imm. 4. Imm. 1-3 aamma atuutissapput inuit pineqartut ikiortaannut.

§ 144. Illuatungiusup qaniginerpaasaata pisussaaffiginngilaa ilisimannittut nassuiaateqassalluni.

Imm. 2. Aamma nassuiaateqarnissaaq pisussaaffiussanngilaq, nassuiaateqarnikkut ilimanassappat

- 1) ilisimannittoq nammeneq pinerluttulereq pillugu inatsisitigut malersorneqalissasoq imaluunniit atugarissaarnerminik annaasaqassasoq imaluunniit
- 2) ilisimannittup qaniginerpaasai pinerluttulereq pillugu inatsisitigut malersorneqalissasut imaluunniit atugarissaarnerminnik annaasaqassasut imaluunniit
- 3) ilisimannittoq nammeneq imaluunniit taassumap qaniginerpaasai annertuumik ajoquserneqassasut.

Imm. 3. Taamaattorli pisuni imm. 1-imi aamma imm. 2, nr. 2-mi 3-milu taaneqartuni eqqartuussisut ilisimannittoq nassuiaateqarqusinnaavaat nassuiaateqarnissaaq suliasap inerneranut

pingaaruteqarluinnartussatut isumaqarfigineqarpat, aammalu suliassap qanoq ittuunerata kiisalu illuatungerisamut susassaqtumut imaluunniit inuiaqatigiinnut sunniutissap tamanna tungavissaqartippassuk.

§ 145. Aaqqissuisut aaqqissuisoqarfimmilu sulisut, tusagassiornermi akisussaassuseqarneq pillugu inatsimmi § 1, nr. 1-mi pineqartut, makku pillugit ilisimannittutut nassuiaateqarnissaminnut pisussaaffeqanngillat:

1) Kimit paasissutissaq tusarsimanerlugu imaluunniit kina allaaserisamik allaaserinnittuusooq imaluunniit kina assiliisuusimasooq allamilluunniit assiliartalimmik saqqummiussisuusimasooq. Tamanut saqqummiussisoqassappat ilisimannittutut nassuiaateqannginnissamut piumasqaataavoq paasissutissarsiffiusooq, allaaserinnittuusooq, assiliisooq saqqummiisorluunniit atuagassiami naqitami kinaassusersineqarsinnaassanngitsoq,

2) Assimi kina pineqartoq imaluunniit kina eqqartorneqartoq, pineqartut taakku neriorsorneqarsimappata kinaassutsitik isertuunneqassasut. Tamanut saqqummiussisoqassappat ilisimannittutut nassuiaateqannginnissaq atuutissaq, kinaassuseq allatanit ersersinneqanngiinnarpat.

Imm. 2. Radiokkut fjernsynikkulluunniit aallakaatitassiorfinni aaqqissuisut aaqqissuisoqarfimmilu suleqataasut, tusagassiornermi akisussaassuseqarneq pillugu inatsimmi § 1, nr. 2-mi pineqartut, ilisimannittutut makku pillugit nassuiaateqarnissaminnut pisussaaffeqanngillat:

1) Kina paasissutissisuusimasooq imaluunniit kina allaaserisamut allaaserinnittuusimasooq imaluunniit kina assiliisuusimasooq allatulluunniit assiliartalinnik saqqummiussisuusimasooq. Paasissutissaq, suliassaq il.il. aallakaatinneqassappat ilisimannittutut nassuiaateqartitsinnginnissamut piumasqaataavoq paasissutissarsiffiusooq, allaaserinnittuusooq, assiliisooq saqqummiisorluunniit aallakaatitassiami kinaassusersineqarsimassanngitsoq.

2) Peqataasut kinaassusaat, taakkua neriorsorneqarsimallutik peqataanermi kinaassutsitik paasineqarsinnaassanngitsut. Immiussa q aallakaatinneqassappat ilisimannittutut nassuiaateqartitsinnginnissamut piumasqaataavoq pineqartut aqqi taaneqassanngitsut, aammalu kinaassutsimik isertuinissamut iliuusissatigit naammattunik piareersaateqartoqarsimassasooq.

Imm. 3. Imm. 1-mi 2-milu eqqaaneqartutut ilisimannittutut nassuiaateqartitsinnginnissaq aamma atuutissaq allanut, atuagassiamut taassumaluunniit saqqummersinneranut attuumassuteqarnermikkut imaluunniit radiokkut fjernsynikkulluunniit aallakaatitassiorfinnut imaluunniit aallakaatitassiap pineqartup sananeqarneranut attuumassuteqarnermikkut paasissutissisup, allaaserinnittup imaluunniit peqataasup kinaassusaanik ilisimannilersimasunut.

Imm. 4. Imm. 1-3 taamatulli atortuutinneqassapput tusagassiiutinut, tusagassiornermi akisussaassuseqarneq pillugu inatsimmi § 1, nr. 3-mi pineqartunut.

§ 146. Suliassaq inatsisinik unioqquitsinermit imaannaanngitsuusumut tungassuteqarpat eqqartuussisut inuit § 145-mi taaneqartut ilisimannittutut nassuiaasussanngortissinnaavaat, ilisimannittutut nassuiaateqarnissaq suliassap qulaarneqarnissaanut aalajangiisuusumik pingaaruteqartuusorineqarpat aammalu qulaarinissaq tusagassiuutit paasissutissarsiffigisaminnik illersuisinnaasariaqarneranniit pingaaruteqarneruppat.

Imm. 2. Eqqartuussiviup aamma inuit § 145-mi taaneqartut ilisimannittutut nassuiaasussanngortissinnaavai, suliassaq pinerluttulerinermi inatsimmi § 50, imm. 1-imik aamma 2-mik unioqquitsinermit tungasuuppat. Taamaassanngilarli isumaqartoqartariaqarpat allaaserinnittoq paasissutissisorluunniit pissutsinik, saqqummiunneqarnissaat inuiaqatigiinnut pingaarutilinnik, qulaajaaniarsimasooq.

§ 147. Eqqartuussivik §§ 142-146-mi aalajangersakkat imarisaat pillugit ilisimannittunut ilitsersuisassaaq, pissutsit tamatumunnga tungavissaqartitsippata.

Imm. 2. Ilisimannittoq pisuni §§ 142-146-mi taaneqartuni nassuiaateqassappat eqqartuussiviup sianigisassavaa ilisimannittup imaluunniit isertuunneqartussaasup immikkut ittumik

qajassuunneqarnissaa. Eqartuussiviup tamatumunnga atatillugu aalajangersinnaavaa nassuiaasoqarnerani matut matuneqassasut imaluunniit nassuiaatinik tamanut issuaanissaq inerteqqutigalugu.

§ 148. Ilisimannittut ornigunnissamut aggeqqusissut allatut aalajangiisoqarsimatinnagu suliarineqartassaaq eqqartuussivimmit ilisimannittut nassuiaateqarfiusussamit. Aggeqqusissut ilisimannittumut nalunaarutigineqartassaaq. Eqqartuussivik ilisimannittumut aggeqqusissummik suliaassaruni eqqartuussiviup aggeqqusissutip nalunaarutigineqarnissaa isumagissavaa, paasissutissat illuatungiusumit susasaqartumit paasissutissiisutaasut tunngavigalugit. Pinerlunnernik suliaasani ilisimannittut politiinit aggersarneqartassapput.

Imm. 2. Aggeqqusissutip imarissavai:

- 1) ilisimannittup aqqa najugaalu,
- 2) aggeqqusissummik siunertat pillugit paasissutissat,
- 3) eqqartuussiviup, ilisimannittut nassuiaateqarfiusussap, taaguutaa,
- 4) eqqartuussineq qaqugu sumilu pissasoq pillugu paasissutissat,
- 5) ilisimannittup kalerrinneqarsinnaatitaanera pillugu paasissutissat, aamma
- 6) takkutinngitsoornerup sunniutissai pillugit paasissutissat.

Imm. 3. Ilisimannittut aggersaanissamut piffissarititaasoq sapaatip akunnera ataasiuvoq.

Imm. 4. Eqqartuussisut kalerriinissamut piffissamik allamik aalajangiisinnaapput imaluunniit ilisimannittup ingerlaannaq aggernissaa peqqussutigisinnaallugu.

§ 149. Eqqartuussisut kikkunnilluunniit, eqartuussinermi najuuttunik imaluunniit eqqartuussiviusup qanittuaniittunik, ingerlaannaq ilisimannittut nassuiaateqarqussisinnaapput. Ilisimannittut najuuttut nutaamik piffissaliisoqarnerani aggeqquneqarsinnaapput.

§ 150. Ilisimannittoq pissutissaqavinnani imaluunniit piffissaagallartillugu takkutinnginnissaminik nalunaarani takkutinngitsoorpat imaluunniit apeqqutit pissutissaqarani akiumanngippagit, eqqartuussisut:

- 1) ilisimannittoq akiliisussanngortissinnaavaat,
- 2) ilisimannittoq politiinut aatissinnaavaat,
- 3) ilisimannittoq aningaasartuutigititaanik taarsiisussanngortissinnaavaat, imaluunniit
- 4) ilisimannittoq akiliisaqattaartussanngortissinnaavaat, suliaasamili taassumanerpiaq qaammatinit arfinilinnit sivilunerunngitsumik, qaammatit ingerlatiinnarlugit imaluunniit ataatsimut katillugit.

Imm. 2. Ilisimannittumut pinngitsaaliissutinik atuinissaq pillugu aalajangiineq eqqartuussivimmit, ilisimannittup nassuiaateqarnissamut aggersarneqarfīgisaanit, aalajangiinerussaaq. Aalajangiineq tunngavilersukkatut aalajangiinerussaaq eqqartuussisunit allanngortinneqarsinnaavoq. Eqqartuussisut ilisimannittumut takkutinngitsoortumut akiliisussanngortitsippata imaluunniit taarsiisussanngortitsippata, tamatumunnga aalajangiineq pineqartumut nalunaarutigineqartassaaq. Aalajangiinermik taamaattumik allanngortitseqqusissut saqqummiunneqartassaaq eqqartuussinermi siullermi, ilisimannittup orniguffīgisaani, imaluunniit, ilisimannittoq kingusinnerusukkat ornigutinngippat, aalajangiinerup ilisimannittumut nalunaarutigineqarneraniit imaluunniit taassumanga ilisimaneqalereerneraniit kingusinnerpaamik ullut 14-it qaangiutsinnagit.

§ 151. Ilisimannittoq eqqartuussisunut ornigutinngitsoorsinnaangilaq, pineqartoq suliaasami nassuiaateqarumannginnissaminut piginnaatitaasorinini pissutiginnarlugu.

§ 152. Ilisimannittup eqqartuussivimmut ornigutsinnani suliaasaq pillugu ilisimasani pisariaqassappat eqqaaqqinniassavai, assersuutigalugu naatsorsuutit allattorsimaffii, allakkat allattukkalluunniit atuarlugit imaluunniit pigisanik misissuataaraluni, aningaasartuutiginagit imaluunniit akornuteqanngitsumik

misissuataarsinnaasani. Taamatut pisussaassuseq ilisimannittup malikkumanngippagu § 150-imi malittarisassat taamatulli atortuutinneqassapput.

§ 153. Ilisimannittoq killisiorneqalersinnagu eqqartuussisut ilisimannittup kinaassusaa qularnaassavaat, aammalu ilisimannittup nassuiaateqarnissaanut sumilluunniit akornutissaqartoqannginera. Tamatuma kingorna eqqartuussisut ilisimannittoq eqqortumik oqaloqqullugu ilungersortumik peqqussavaat aamma ilisimannittoq eqqunngitsumik nassuiaateqarnermi akisussaaffimmik ilisimatissavaat.

§ 154. Ilisimannittut tamarmik immikkut killisiorneqartassapput. Ilisimannittoq ilisimannittut allat, misissuitinneqartartut naliliisinneqartartullu imaluunniit illuatungiusut nassuiaataannik tusarnaartassanngilaq, eqqartuussisut allatut aalajangiisimanngippata.

§ 155. Ilisimannittoq illuatungiusumit, ilisimannittup killisiorneqarnissaanik noqqaassuteqarsimasumit, killisiorneqaaqqaartassaaq. Tamatuma kingorna illuatungiusoq ilisimannittumik killisiuisinnaatitaassaaq, tamannalu pereerpat illuatungiusoq ilisimannittumut apeqquteqarsinnaassalluni illuatungiusup killisiuinerata apeqqutigisariaqalersitaanik. Eqqartuussisut sulii apeqquteqaaqqinnissaq imaluunniit killisiuinerup nangeqqinneqarnissaa akuerisinnaavaat.

Imm. 2. Eqqartuussisut ilisimannittumut apeqquteqartarsinnaapput. Eqqartuussisut killisiuineramik ingerlatsisunngorsinnaapput illuatungeriit ilisimannittumik killisiuinerat tulluanngitsumik pippat, imaluunniit § 156, imm. 1-imi aalajangersakkamut akerliusumik ingerlanneqarpat imaluunniimmi pissutsit tamanna pisariaqartissappassuk.

Imm. 3. Eqqartuussisut aalajangertassavaat meeqqat 15-it inorlugit ukiullit qanoq kimillu killisiorneqassasut. Kommunalbestyrelsimut sinniisuutitamik inummilluunniit allamik killisiuisoqarnerani ikiuunnissamat piukkunnaatilimmik aggersaasinnaapput. Eqqartuussisut pineqartoq taanna taartisiassaqartissinnaavaat § 160, imm. 1-imi malittarisassat malillugit.

§ 156. Imatut killisiuisoqartassaaq nassuiaatinik erseqqissunik eqqortunillu saqqummiisoqarsinnaanngorlugu.

Imm. 2. Ilisimannittoq sapinngisamik ataqatigiiaamik oqaaseqaateqarsinnaatitaassaaq. Nassuiaammit takuneqarsinnaasariaqarpoq tamanna ilisimannittup nammineq qimerloorsimasaanit tunngaveqarnersoq.

Imm. 3. Eqqartuussisut aalajangissavaat ilisimannittup killisiorneqarnermini eqqaamasassiatut allattukkani ikiuutissalluunniit allat atorsinnaanera.

§ 157. Ilisimannittup nalinginnaasumik uppernassusia pillugu uppernarsaateqarneq taamaallaat pisinnaavoq eqqartuussisut aalajangigaattut periuseqarluni aamma annertussuseqarluni. Ilisimannittoq siornatigut unnerluutigisaasimanersoq imaluunniit pineqaatissinneqarsimanersoq pillugu apeqqutit allaganngorlugit saqqummiunneqarlutillu akineqartassapput. Eqqartuussisut illuatungeriillu kisimik akissummik ilisimatinneqartassapput.

Imm. 2. Imm. 1, oqaaseqatigiit siulliit taamatulli atortuutinneqassapput pinerlineqartup suliassani pinerluttulerinermi inatsimmi §§ 77-imi aamma 79-imi, tak. § 77, unioqquitsineq pillugu suliassani atoqatigiinnerup tungaatigut pissusilersuutigisarsimasai pillugit uppernarsaateqarnissamat tunngatillugu. Taamatut uppernarsaateqarnissaq taamaallaat akuerineqarsinnaavoq tamanna suliassamat pingaaruteqarluinnartuusoq nalilerneqarpat.

§ 158. Eqqartuussutissap isumaqatigiinniutigineqarnerani ilisimannittup nassuiaatai eqqartuussisut suliassanik allassimaffimmut allanneqartassapput, eqqartuussisut aalajangiinerat naapertorlugu annertussusilimmik. Eqqartuussisut tamatumani pingaartittariaqarpat illuatungeriit imaluunniit ilisimannittut kissaatigisaat aamma imaqarniliuineq suliassap misileqqinneqarnerani sunniuteqarsinnaassanersoq.

Imm. 2. Tamatuma saniatigut ilisimannittut nassuiaataat pingaarnersiorlugit allanneqartassapput. Oqaaseqaatit pingaarnarpaat ilisimannittup nammineq oqaasii malillugit sapinngisamik issuarniarneqartassapput.

§ 159. Ilisimannittoqarnissaq pillugu isumaqatigiinnginneq noqqaavigineqarneq malillugu pisassaaq aalajangiinikkut, tunngavilersorneqartussakkut.

§ 160. Domstolsstyrelsi malittarisassiussaaq ilisimannittunut taartisiarititassat pillugit. Taartisiarititassat, ilisimannittup pisassai imaluunniit, taartisiarititassat eqqorluartumik naatsorsorneqarsinnaanngippata naleqquttumik annertussusilittut siumoorutissat, aggersaanermut peqatigitillugu neqeroorutigineqartassapput.

Imm. 2. Inatsiqarnermut ministeri malittarisassiussaaq inunntu aggersarneqarnermikkut politiiunut nassuiaateqarsimasunut taartisiarititassat pillugit.

§ 161. Naalagaaffinnut takornartanut, naalagaaffiup isumannaatsuunissaanut soqutiginninnerup imaluunniit imaannaanngitsunik pinerluuteqarnerit qulaarneqarnissaasa tamanna pisariaqartippagu eqqartuussisut politiilluunniit inuk, ilisimannittut killisiorneqarsimasooq, peqqusinnaavaat pineqartoq suliassaq pillugu ilisimasaminik nipangiussissasoq.

Imm. 2. Peqqussuteqarneq atorunnaassaaq suliassaq naammassineqarpat. Peqqussuteqarneq eqqartuussisunit politiinilluunniit tamanna sioqqullugu atorunnaarsinneqarsinnaavoq. Politiit peqqussummik atorunnaarsitsiumannginnerat noqqaassuteqartoqarneratigut eqqartuussisunut saqqummiunneqartassaaq. Pineqartoq eqqartuussivinni misiliisitsisinnaaneq pillugu ilitsersorneqartassaaq.

Imm. 3. Imm. 1 malillugu peqqussutaasumik unioqquitsineq pineqaatissiisutaasinnaavoq pinerluttulerinermi inatsit malillugu.

§ 162. Inatsimmi matumani malittarisassat aamma atortuutinneqassapput ilisimannittunik killisiuinerni, nunani allani pisortat oqartussaataitaanniit noqqaavigineqarneq malillugu ingerlanneqartuni. Iliuutsimik imaluunniit periutsimik immikkut ittumik atuinissamik noqqaassut sapinngisamik akuersaarniarneqartariarpoq, tamanna nunap inatsisitigut aaqqissuusaaneranut erseqqissumik naleqquttuunngitsutut isigineqanngippat.

§ 163. Ilisimannittoq ungasianiit attaveqaatit assiliartallit atorlugit killisiorneqassappat, ilisimannittoq aggersarneqassaaq uunga orniguteqqullugu

1) eqqartuussivimmu,

2) pisortat oqartussaataitaannut, attaveqaatinik atugassiinissamut piginnaassusiligaasumut, tak. imm. 2, imaluunniit

3) inuinnarmut imaluunniit inatsisitigut piginnaatitaasumut pisussaataitaasumullu, imm. 3 malillugu piginnaaniligaasumut.

Imm. 2. Domstolsstyrelsi pisortat oqartussaataitaanik piginnaatitaqarsinnaavoq attaveqaatinik atugassiissasoq eqqartuussisut suliassaataanni ungasianiit attaveqaatit atorneqartussanik. Piginnaatitsissummi ungasianiit attaveqarnerup ingerlannissaanut naammassisassanik aalajangersaasoqarsinnaavoq. Domstolsstyrelsip piginnaatitsissut utertissinnaavaa piumasaqaatit unioqquatinneqarpat.

Imm. 3. Domstolsstyrelsi inuinnarmik imaluunniit inatsisitigut piginnaatitamik pisussaataitaasumillu attaveqaatinik atugassiinissamik piginnaatitaqarsinnaavoq, eqqartuussisut suliassaataanni ungasianiit attaveqaatit assiliartallit atorneqartussanik. Piginnaatitsissummi ungasianiit attaveqarnerup ingerlannissaanut naammassisassanik aalajangersaasoqarsinnaavoq. Domstolsstyrelsip piginnaatitsissut utertissinnaavaa piumasaqaatit unioqquatinneqarpat.

Imm. 4. Domstolsstyrelsi erseqqinnerusunik malittarisassiussaaq piginnaassusiliinernik, tak. imm. 2, aamma piginnaatitsissutinik, tak. imm. 3, tunniussisarneq utertitsisarnerlu pillugit kiisalu naammassisassanik aalajangersaasarneq pillugu. Domstolsstyrelsi aammattaaq malittarisassiorsinnaavoq piginnaassusiligaanissaq imaluunniit piginnaatitaanissaq pillugit qinnuteqaammik suliarinninnermut akiliuteqarnissaq pillugu.

Imm. 5. Eqqartuussisut akuerisinnaavaat ilisimannittoq, nunami allamiittoq, ungasianiit attaveqaatit assiliartallit aqqutigalugit nassuiaateqassasoq, nalilerneqarpat nassuiaateqarneq, imm. 1 malillugu, nassuiaateqarnertulli isumannaatsigisumik ingerlanneqarsinnaasoq.

Kapitali 13

Misissuisarneq naliliisarnerlu

§ 164. Saqitsaannernik suliassami imaluunniit pinerlunnernik suliassami misissuisoqarnissamik naliliisoqarnissamillu noqqaassummik saqqummiussisoqarpat, eqqartuussisullu noqqaassut akuerippassuk, eqqartuussisut misissuisussamik naliliisussamillu ataatsimik arlalinnilluunniit toqqaassapput.

§ 165. Taamallaat inuit, tusaamanerlugaanngitsut, misissuisartutut naliliisartutullu toqqarneqarsinnaapput. Inuit, suliassami eqqartuussisutut iliuuseqarsinnaatitaanngitsut, misissuisartutut naliliisartutullu toqqarneqarsinnaanngillat.

§ 166. Kinaluunniit, ilisimannittutut pisussaaffeqartoq, aamma misissuisartutut naliliisartutullu toqqagaanissaminut pisussaaffeqarpoq.

§ 167. Illuatungeriit tamarmik misissuisartussatut naliliisartussatullu toqqaanissaq pillugu eqqartuussisunut siunnersuuteqarsinnaapput, eqqartuussisulli siunnersuutaasunik pinngitsooratik malinnittussaannngillat. Misissuisartussanik naliliisartussanillu eqqartuussisut toqqaatinnagit illuatungeriit periarfissinneqartariaqarput inuit eqqartuussisut toqqarnialersaagaat pillugit oqaaseqaateqarnissamut. Taamaassanngilarli pinerlunnernik suliassani pissutsit tamanna ajornartippassuk.

§ 168. Saqitsaannernik suliassani misissuisartussanik naliliisartussanillu toqqaanissaq pillugu aalajangiinermi erseqqissumik oqaatigineqassaaq suna pillugu aamma suna siunertaralugu misissuisoqarlunilu naliliisoqartussaansoq.

Imm. 2. Pinerlunnernik suliassani misissuataarinissaq, misissuinissamut naliliiffiginninnissamullu pisariartinneqartoq, eqqartuussinermi ingerlanneqartassaaq eqqartuussisut allatut aalajangiisimannngippata. Eqqartuussisut misissuisussanik naliliisussanillu toqqaanissamik aalajangiinermi imaluunniit eqqartuussinerup ingerlanerani misissuisussanut naliliisussanullu ilisimatitsissutigissavaat misissuinermi naliliisoqarnermilu suna misissorneqassasoq aamma suna siunertaansoq, tak. imm. 1, kiisalu najoqqutassat allat, misissuinissami naliliiffiginninnissamilu pisariaqartinneqarnersut. Misissuisartut naliliisartullu allakkatigut nalunaarusiussappata misissuinissaq naliliinissarlu pillugit aalajangiinermi imaluunniit eqqartuussisut suliaannik allassimaffimmi allanneqassapput apeqqutit aalajangersimasut misissuisartunit naliliisartunillu akineqartussat.

§ 169. Misissuisussanik naliliisussanillu toqqaaneq pillugu aalajangiineq kinguarsarani inunnut toqqarneqartunut nalunaarutigineqartassaaq malittarisassat, ilisimannittunut atuuttut, naapertorlugit.

Imm. 2. Saqitsaannernik suliassani misissuisartut naliliisartullu illuatungeriit nalunaarfigisassavaat qaqugu sumilu misissuisoqarlunilu naliliisoqassanersoq, taamatuttaaq illuatungeriit allakkatigut nalunaarusiap nuutsinneranik tunisassavaat, tak. § 170, imaluunniit taakkua taassuminnga

paasiniaatissinnaavaat eqqartuussisunut saqqummiunneqarnissaa kingusinnerpaamik ullunik pingasunik sioqqullugu.

Imm. 3. Misissuisartut naliliisartullu periusaannik maalaarutit saqqummiunneqassapput eqqartuussivimmut, misissuineramik naliliinermillu nalunaarummik saqqummiussiviusussamut, tak. § 170. Eqqartuussisut taakkununga peqqusisinnaapput misissuinerminnik naliliinerminnillu allanngortitseqqullugit imaluunniit tamakkiisunngortitseqqullugit.

§ 170. Misissuisartut naliliisartullu nassuiaateqartassapput eqqartuussisunut allakkatigut atsiukkamillu nalunaarusiorlutik. Eqqartuussisut misissuisartunut naliliisartunullu peqqusisinnaapput allakkatigut nalunaarusiaq eqqartuussivimmi oqaatsitigut nassuiaatinik ilassuteqaasissagaat. Eqqartuussisut nalunaarusiaq amigaateqarsorigunikku taanna taakkununga aamma allanngorteqqusinnaavaat imaluunniit allakkatigut nalunaarusioqqinnikkut tamakkiisunngorteqqusinnaallugu. Amigaataasut nalunaarutit ilusilersorneranut tunngassuteqarpata amigaataasut iluarsiviginissaannut eqqartuussisut pisariaqarneratut ikiuttariaqarput. Taamatut ikiunneq aamma pisinnaavoq, misissuisartut naliliisartullu tamatuminnga kissaateqarpata pissutsillu tamatumunnga tunngavissaqartitsippata, eqqartuussinissaq misissuisartut naliliisartullu saqqummiussivissaat pitinnagu. Taamaassappat eqqartuussisut kingusinnerpaamik eqqartuussinermi tamatumani illuatungeriinnut tamatuminnga ilisimatitsissuteqassapput.

Imm. 2. Pinerlunnernik suliassani eqqartuussisut aalajangiisinnaapput allakkatigut nalunaarusiortoqassanngitsoq, misissuisartut naliliisartullu eqqartuussutissap isumaqatigiinniutigineqarnerani nassuiaateqassappata.

§ 171. Iisimannittut pillugit malittarisassat misissuisartunut naliliisartunullu atuutsinneqassapput, pissutsit assigiinngissutaasa nassatarisaannik allannguutitalerlugit. Taamaattorli misissuisartut naliliisartullu misissuisartunik naliliisartunillu allanik ilisimannittunillu killisiuinermi aallaaviusumik najuussinnaatitaapput, eqqartuussisullu taakkua peqqusinnaavaat akissuteqaateqartinnatik apeqqut akunnerminni oqaloqatigiissutigissagaat.

§ 172. Misissuisoqareeraluartoq imaluunniit naliliisoqareeraluartoq misissorneqarsimasumik taassuminngarpiq misissueqqinnissaq nalileeqqinnissarlunniit mattunneqanngilaq, inuit taakkorpiat imaluunniit, eqqartuussisut tamanna naleqquttuusorippasuk, misissuisartut naliliisartullu allat misissuisoralugit.

§ 173. Misissuisartut naliliisartullu misissuinermit naliliinermullu kiisalu eqqartuussivimmut orniguttarnermut akissarsiaqartussaataapput aammalu aningaasartuutigisimasaminnut taartisisinneqartussaataallutik. Eqqartuussisut akissarsiat taartisariat assallu annertussusissaat aalajangissavaat.

Imm. 2. Eqqartuussisut aalajangersinnaavaat misissuisoqarnissaq naliliisoqarnissarlu aatsaat pisinnaasoq inuit misissuinissamik naliliinissamillu noqqaassuteqartut misissuisartut naliliisartullu akissarsiassaannut qularnaveeqqusiippata.

Immikkoortoq III

Saqitsaannernik sulissanik suliarinnineq

Kapitali 14

Aalajangersakkat nalinginnaat

Isumaqatigiinniarnermi najoqqutassaq il.il.

§ 174. Illuatungiusoq piumasaqaatigisaminiit annertunerusumik pisassinneqarsinnaanngilaq, tamaallaallu tunngavilersuutit illuatungiliuttup patsisiginiarsimasai imaluunniit tunuartinneqarsinnaanngitsut isiginiarneqarsinnaapput.

Imm. 2. Illuatungeriit noqqaassutaasa saniatigut uppernarsaateqarnissaq aallartinneqarsinnaanngilaq allanik immikkut ittunik inatsisitigut tunngavissaqartoqanngippat.

§ 175. Illuatungiusup piumasaqaatai imaluunniit tunngavilersuutai ersarluppata imaluunniit amigaateqarpata eqqartuussivik illuatungiusumut apeqqutinik paasinarsaataasunik apeqquteqarsinnaavoq.

Imm. 2. Eqqartuussiviup illuatungiusoq kajumissaarsinnaavaa apeqqutinut inatsisinut pissusiviusunullu tunngassutilinnut, suliassamut pingaaruteqarpasissunut, isummernini nalunaarutigissagaa.

Imm. 3. Eqqartuussiviup illuatungiusoq uppernarsaasiinissaanik kajumissaarsinnaavaa, suliassami pissusiviusut naammattumik ersarissarneqarsimannippata.

§ 176. Illuatungiusoq apeqqutit pissusiviusunut tunngasut, suliassamut pingaarutillit, pillugit oqaaseqaateqarumannippat imaluunniit uppernarsaasiiumannippat imaluunniit illuatungiusup oqaaseqaatai ersarluppata tamakkiisuunnippataluunniit tamanna uppernarsaatissanik naliliinermi illuatungerisamut iluaqutaasussamik sunniuteqatinneqarsinnaavoq, illuatungiusoq illuatungerisaminiit eqqartuussivimmiilluunniit oqaaseqaateqaqquneqarluni uppernarsaaseeqquneqarluni kajumissaarneqarsimappat.

Illuatungeriinnik ilitsersuisarneq

§ 177. Eqqartuussisut siulittaasuat ilitsersuummik, matumunnga ilanngullugu ilitsersuutigalugit suliareqqitassanngortitsisarnermut malittarisassat, illuatungiusup suliassap ingerlanneqarnerani soqutigisaminik isumaginnissinaaneranut pisariaqartunik ilitsersuisassaaq.

Imm. 2. Ilitsersuineq ima annertutiginaniluunniit imatut ingerlanneqassanngilaq eqqartuussisut nakerisarsiunnginnerat qularutigineqalersinneqarluni.

Imm. 3. Illuatungiusoq kajumissaarneqarsinnaavoq inatsisitigut siunnersuisarfimmut ilitsersortissarsioqqullugu. Nalilerneqarpata illuatungiusoq soqutigisaminik isumaginnissinnaassaguni annertunerusumik ikiorserneqartariaqartoq eqqartuussiviup illuatungiusoq taanna kajumissaassavaa eqqartuussinermi nammineq sinnerluni pisinnaatitassaminik pissarsioqqullugu, tak. § 198. Illuatungiusoq eqqartuussivimmi sinniisitut pisinnaatitamik inatsisinik paasisimasalimmik pisariaqartitsippat illuatungiusoq tamatumunnga atatillugu ilitsersorneqassaaq nammineq aningaasartuutiginnigisaminik eqqartuussisulersuussinissamut qinnuteqarnissamut periarfissat pillugit.

Isumaqatigiilerneq

§ 178. Eqqartuussisut illuatungeriinnik isumaqatigiilersitsiniaasassapput.

Imm. 2. Isumaqatigiilersitsiniaanngitsoortoqarsinnaavoq ilimagineqareertariaqarpata isumaqatigiilersitsiniaanissaq iluatsinnaviannngitsooq imaluunniit isumaqatigiilersitsiniaanissaq patsisit piviusut pissutigalugit naammassiniaruminaassappat.

Imm. 3. Isumaqatigiilersitsiniaaneq sapinngisamik siusissukkut ingerlanneqartariaqarpoq, kisiannili aamma suliassap ingerlanerani sukkulluunniit pisinnaavoq, tamatumani tak. § 241.

Imm. 4. Illuatungeriit isumaqatigiilerpata suliassaq inerneqassaaq, isumaqatigiilerneq eqqartuussisut suliannik allassimaffimmut allanneqarluni.

Imm. 5. Eqqartuussivik illuatungeriit akuersinerisigut aalajangersinnaavoq isumaqatigiissitsiniaanerup nalaani matut matuneqassasut, tamanna isumaqatigiilersitsinissamut iluaqutaassasorineqarpata.

Eqqartuussinissamut aggersaaneq il.il.

§ 179. Illuatungeriit eqqartuussinissanut, suliassami ingerlanneqartussanut, aggersarneqartassapput. Taamaassanngilarli illuatungiusup taamaaliornissaq taamaatiinnarsimappagu imaluunniit eqqartuussinissamik kinguartitsineq suliassap kinguarsarneqangaatsiarnissaanik nassataqarsinnaasorineqarpat.

Uppernarsaatissanik saqqummiussineq

§ 180. Uppernarsaatinik, suliassamut pingaaruteqassanganneqanngitsunik, saqqummiussisoqarsinnaanngilaq.

§ 181. Uppernarsaatinik saqqummiussisoqartassaaq eqqartuussutissap isumaqatigiinniutigineqarnerani. Eqqartuussisut qaqutigootumik aalajangersinnaavaat uppersnarsaatinik saqqummiussinissaq tamatumaluunniit ilaa suliassamik piareersaanermi pissasoq.

§ 182. Illuatungeriit ilisimannittullu killisiorneqassapput illuatungiusumit imaluunniit taassuma eqqartuussinermi sinniisitut pisinnaatitaanit, killisiuinissamik kissaateqarsimasumit. Taamaattorli pisariaqassappat eqqartuussisut siulittaasuut killisiuisuusinnaavoq. Eqqartuussisut imaluunniit illuatungeriit tungaanniit ilassutitut apeqquteqartoqartarsinnaavoq.

§ 183. Eqqartuussiviup akuerisinnaavaa illuatungiusumiit imaluunniit ilisimannittumiit allakkatigut nalunaarussiaq uppersnarsaatitut atorneqassasoq, pineqartup eqqartuussivimmi oqaatsitigut nassuiaateqarnissaa pisariaqanngitsutut isumaqarfigineqarpat. Eqqartuussivik oqaaseqatigiit siulliit malillugit aalajangiilersinnagu illuatungiusoq apeqqut tamanna pillugu oqaaseqaateqarnissaminut periarfissaqartinneqassaaq.

Uppernarsaatissanik saqqummiusseqqusisarneq

§ 184. Eqqartuussivik illuatungiusumiit tunngavilersukkamik noqqaavigineqarnikkut illuatungiusumut imaluunniit inummut pingatsiuttumut peqqussuteqarsinnaavoq allakkatigut uppersnarsaatissanik, pineqartumut atugassanngortitaasimasunik aammalu suliassamut pingaarutilinnik, saqqummiussissasoq imaluunniit tunniussissasoq. Taamaassanngilarli taamaaliornikkut pissutsit, pineqartup akuuffigisinnaanngisai imaluunniit ilisimannittutut nassuiaateqanngitsoorfigisinnaasai, pillugit paasissutissanik saqqummersoqassappat. Tamanna pillugu aalajangiisoqalersinnagu inuk, allakkianik pineqartunik atuisinnaatitaasoq, oqaaseqaateqarnissamut periarfissaqartinneqassaaq.

Imm. 2. Illuatungiusoq pissutissaqarani imm. 1 malillugu peqqussutaasumik malinnikkumanngippat § 176-imi aalajangersagaq taamatulli atortuutinneqassaaq.

Imm. 3. Inuk pingatsiuttoq pissutissaqarani imm. 1 malillugu peqqussutaasumik malinnikkumanngippat § 150-imi ilisimannittunik pinngitsaaliisarneq pillugu aalajangersagaq taamatulli atortuutinneqassaaq.

Imm. 4. Inuup pingatsiuttup saqqummiussinermi aningaasartuutigisimasani illuatungiusumut siumoortumik akileqqusinnaavai.

Piomasagaatinik ataatsimut katitsineq immikkoortitsinerlu il.il.

§ 185. Suliassiisoq suliassami ataatsimi suliassanngortitamut arlalinnik piomasagaateqarsinnaavoq, 1) piomasagaatit tamarmik eqqartuussivikkut suliassanik suliarinnitarneq pillugu malittarisassat assigiit malillugit suliarineqarsinnaappata,

2) najukkami eqqartuussivinnut tunngatillugu, najukkami eqqartuussivik piumasaqaataasunut tamanut tunngatillugu naapertuilluartumik suliarinnissinnaassuseqarpat aammalu piumasaqaatit ilaannik ataatsimik suliarinnittussaappat,

3) Kalaallit Nunaanni Eqqartuussivimmu tunngatillugu, eqqartuussivik piumasaqaataasut ilaannut ataatsimut tunngatillugu naapertuilluartumik suliarinnissinnaassuseqarpat, aamma

4) eqqartuussivimmik piumasaqaatinik tamarmiusunik suliarinniffiusinnaasumik Kalaallit Nunaanni peqarpat.

Imm. 2. Suliassanngortitaq suliassap suliarineqarnerani illuatungaaniit piumasaqaateqarsinnaavoq piumasaqaatigalugu tamakkiisumik ilaannakuusumilluunniit pinngitsuutitsisoqassasoq. Taamatut illuatungaaniit piumasaqaat pillugu immikkoortumik eqqartuussuteqartoqarsinnaavoq, tamatuminnga suliarinnittussamik Kalaallit Nunaanni eqqartuussiveqarpat imaluunniit illuatungaaniit piumasaqaat inatsisitigut pissutsinit, suliassiusup piumasaqaataanut tapersiisunit, aallaaveqarpat.

Imm. 3. Piumasaqaatinik nutaanik suliassap ingerlanneqarnerani ilanngussinissaq pillugu aamma § 224-mi malittarisassaq atortuutinneqassaaq.

Imm. 4. Ataatsimut katitsinissamut piumasaqaatit naammassineqarsimangippata piumasaqaat ajornangippat eqqartuussivimmi eqqortumi immikkut suliarisassanngortinneqarluni innersuussutigineqassaaq. Ataatsimut katitsinissamut piumasaqaatit eqqartuussivimmi taamaattumi allami naammaassineqarsinnaasorineqarpata eqqartuussiviup taarsiullugu suliassaq tamakkerlugu taassumunnga suliarisassanngortissinnaavaa.

§ 186. Illuatungeriit arlallit suliassami ataatsimi suliassiissuteqarsinnaapput imaluunniit suliassanngortinneqarsinnaapput,

1) piumasaqaatit tamarmik eqqartuussivimmi suliassat suliarineqartarnerannik malittarisassat assigiit malillugit suliarineqarsinnaappata,

2) najukkami eqqartuussivinnut tunngatillugu, najukkami eqqartuussivik piumasaqaataasunut tamanut tunngatillugu naapertuilluartumik suliarinnissinnaassuseqarpat aammalu piumasaqaatit ilaannik ataatsimik suliarinnittussaappat,

3) Kalaallit Nunaanni Eqqartuussivimmu tunngatillugu, eqqartuussivik piumasaqaataasut ilaannut ataatsimut tunngatillugu naapertuilluartumik suliarinnissinnaassuseqarpat, aamma

4) eqqartuussivimmik piumasaqaatinik tamarmiusunik suliarinniffiusinnaasumik Kalaallit Nunaanni peqarpat, aamma

5) illuatungeriit arlaannaalluunniit akerliliissuteqanngippat imaluunniit piumasaqaatit ima imminnut ataqatigiissuseqarpata akerliliissuteqartoqaraluartoq suliassami ataatsimi ataatsimoortillugit suliarineqartariaqarlutik.

§ 187. Illuatungeriit tamarmik immikkut inummut allamut piumasaqaammik suliassap ingerlanneqarnerani ilanngussisinnaapput,

1) eqqartuussivimmik inummut allamut piumasaqaammik suliarinniffiusinnaasumik Kalaallit Nunaanni peqarpat,

2) piumasaqaat suliarineqarsinnaappat piumasaqaatit allat eqqartuussivikkut suliarineqartarnerannik malittarisassat assingi malillugit aamma

3) illuatungeriit sinneri akerliliissuteqanngippata imaluunniit pingatsiuttoq akerliliissuteqanngippat imaluunniit piumasaqaat piumasaqaatit allat ilaannut ima attassuteqartigippat, piumasaqaat akerliliissuteqartoqaraluartoq suliassami ataatsimi suliarineqartariaqarluni.

Imm. 2. Eqqartuussivik aallaqqaammulli illuatungeriit arlaanniit noqqaavigineqarnermigut inuup allap tungaanut piumasaqaateqarnissamik itigartitsisinnaavoq, piumasaqaat taanna siusinnerusukkulli ilanngunneqareersimasariaqaraluarpat. Piareersarneq naammassineqareeraangat inummut allamut piumasaqaammik aatsaat ilanngussisoqarsinnaavoq eqqartuussivik akuersitillugu.

§ 188. Piumasaqaatit § 186, nr. 5-imiittut imaluunniit § 187, imm. 1, nr. 3-miittut naammassineqarsimangippata eqqartuussivik piumasaqaatit immikkoortillugit suliarineqarlutillu aalajangiiffineqarnissaat pillugu aalajangiissuteqassaaq. Eqqartuussivik piumasaqaammut aalajangersimasumut tunngatillugu suliarinnittussaangippat imaluunniit naapertuilluartumik suliarinnissinnaangippat piumasaqaat eqqartuussivimmumut eqqortumut aalajangigassanngortillugu innersuussutigineqassaaq.

§ 189. Inuk alla suliassanngortitsissummik eqqartuussivimmumut tunniussaqaqarnermigut siullermeeriffiusumi eqqartuussisoqarnerani suliassami illuatungiliuttut ilanngussinnaavoq,

1) eqqartuussivimmik inuup allap taassuma piumasaqaataanik suliarinniffiusinnaasumik Kalaallit Nunaanni peqarpat,

2) inuk alla taanna suliassami sammineqartumut tunngatillugu immikkut piumasaqaateqarniarpat, imaluunniit inuup allap taassuma piumasaqaataa aallaqqaammumut piumasaqaataasumut ima atassuteqartigippat suliassami ataatsimi suliarineqartariaqarluni, aamma

3) inuup allap akuliunnera illuatungeriioqqaartumut pingaarutilitsigit akornusersuutaalissanngippat.

Imm. 2. Eqqartuussiviup illuatungeriit aappaanit noqqaavigineqarnermigut inuup allap piumasaqaataa itigartitsissutigisinnaavaa, suliassami akuliunneq siusinnerusukkulli pisimasariaqartutut isumaqarfigineqarpat. Piareersaateqarnerup naammassereernerata kingorna aatsaat akuliuuttoqarsinnaavoq eqqartuussiviup isumaqataalluni akuersineratigut.

Imm. 3. Pingatsiuttup piumasaqaataa suliassatut immikkoortut eqqartuussiviup piviusorsioqarnermigut suliarisinnaangippagu piumasaqaat eqqartuussivimmumut eqqortumut innersuussutigisinnaavaa.

§ 190. Eqqartuussiviup aalajangersinnaavaa suliassat arlallit, illuatungeriinnit taakkorpianit imaluunniit assigiinngitsunit eqqartuussivimmumut suliassiissutigineqartut, ataatsimut suliarineqassasut. Eqqartuussiviup tamatuminnga aalajangiinera eqqartuussivimmumut qulliunerusumut saqqummiunneqarsinnaangilaq.

§ 191. Eqqartuussiviup aalajangersinnaavaa suliassamik suliaqarnerq piumasaqaatip, suliassami pineqartup, ilaanut killilerneqassasooq imaluunniit suliassami piumasaqaatit apeqqutilluunniit arlallit pineqartillugit taakku ilaannut.

Imm. 2. Eqqartuussivik piumasaqaatip, suliassami pineqartup, ilaa pillugu immikkut aalajangiisinnaavoq. Suliassami piumasaqaatit apeqqutilluunniit arlallit pineqarpata taakkua ilaat pillugu eqqartuussivik immikkut aalajangiisinnaavoq.

Pingatsiuttup illuatungiusumut tapersiilluni akuliunnera

§ 192. Pingatsiuttoq, suliassap qanoq inerneqarnissaanut inatsisitigut soqutigisalik, suliassami akuliussinnaavoq illuatungeriit arlaannut tapersiilluni.

Imm. 2. Suliassami akuliunnissamik noqqaassut allaganngorlugu eqqartuussivimmumut tunniunneqassaaq imaluunniit eqqartuussinermi oqaatsitigut suliassami saqqummiunneqassaaq. Eqqartuussiviup illuatungeriit noqqaassuteqarsimaneq pillugu nalunaarfigissavai. Akuliunnissamik apeqqut pillugu aalajangiissuteqarnerq noqqaavigineqarnikkut aalajangiinerusassaaq, tunngavilersorneqartussaaq.

Imm. 3. Eqqartuussiviup aalajangertassavaa akuliuuttoq suliassap ingerlanneqarnerani qanoq iliornikkut oqaaseqarsinnaallunilu uppersaasiisnaasoq.

Imm. 4. Eqqartuussivik noqqaavigineqarnermigut akuliuttumut suliassami aningaasartuutunik akiligassanngortitsisnaavoq imaluunniit akileeqqusisnaalluni.

§ 193. Illuatungiusoq eqqartuussivimmuq ornigussinnaassaguni aammalu eqqartuussinermi suliasami allakkianik tunniussisinnaassaguni nammineersinnaassuseqassaaq.

Imm. 2. Nammineersinnaassusilimmuq sernissuisuusoq pineqartoq sinnerlugu oqaaseqartuussassaaq. Angajoqqaajusut peqatigiillutik sernissuisuuppata taakkualu arlaat eqqartuussinissamut takkutinnitsoorpat, angajoqqaaq orniguttoq nammineersinnaassuseqanngitsumut eqqartuussinermi sinniisuussaaq.

Imm. 3. Nammineersinnaassuseqanngitsumut sernissuisuusup nammineersinnaassuseqanngitsuoq akuersiseqqaarnagu eqqartuussivimmuq suliasissutigisinnaanngilai aningaasatigut pisinnaatitaaffinnut tunngassutillit, nammineersinnaassuseqanngitsumut atugassiissutaasut, imaluunniit suliasaq, isumaqatigiissummut nammineersinnaassuseqanngitsup namminersorluni atuussinnaassusilittut isumaqatigiissuteqarfigisimasaanut tunngassutilik. Aamma nammineersinnaassuseqanngitsumut sernissuisuusup taassumangga akuerineqqaartinnani eqqartuussivimmuq suliasissutigisinnaanngilai timikkut narrunarsagaanermut imaluunniit eqqissisimanissap ataqqinassutsillu tungaasigut ajuallatsitsinermut tunngassutillit, nammineersinnaassuseqartitaannginneq niaqulaarnermik imaluunniit eqqarsartaatsikkut amigaateqarnermik pissuteqanngippat.

Imm. 4. Inuk pigisami tungaasigut siunnersortiligaasimasoq siunnersortini peqatigalugu taamaallaat eqqartuussinermi peqataasinnaavoq.

Imm. 5. Sernissuisoqanngippat imaluunniit sernissuisuusoq ornigussinnaanngippat eqqartuussivik sernissuisuusussamik immikkut ittumik nammineersinnaassuseqanngitsumut sinniisusussamik ivertitsissaaq.

§ 194. Arlaat, suliasamut pisariaqartumik ataatsimoortinneqartumut ilaalersimasoq, eqqartuussinermut takkutinnitsoorpat, allat peqataasussat ornigussimasut, orniguttut taakkua takkutinnitsoortunut sinniisuussapput.

§ 195. Eqqartuussiviup nammineerluni sulissuteqarnermigut itigartittassavaa kinaluunniit suliasap suliarineqarnerani illuatungiliuttut peqataassinnaassuseqanngitsutut paasineqartoq.

Illuatungeriinnik killisiuineq

§ 196. Illuatungiusup eqqartuussivimmuq nassuiaateqarnissaaq pisussaaffiginngilaa, piginnaatitaaffigaluguli,

Imm. 2. Eqqunngitsunik nassuiaateqarneq pinnerluttulerinermi inatsit malillugu pineqaatissiinernik kinguneqarsinnaavoq. Illuatungiusoq, nassuiaateqalersinnagu tamatuminnga paasitneqassaaq.

Imm. 3. Eqqartuussiviup illuatungiusumiit noqqaavigineqarnermigut illuatungiusoq najuukkiartoqqullugu aggersarsinnaavaa nassuiaateqarnissaa siunertaralugu.

Imm. 4. Illuatungiusoq nammineq piumassutsiminik nassuiaateqartoq pisussaavoq illuatungiusup eqqartuussisulluunniit apeqquteqaatigisinnaasai allat akisassallugit.

Imm. 5. Aamma illuatungiusumik killisiuineri taamatulli atortuutinneqassapput ilisimannittunik killisiuisarnek pillugu malittarisassat §§152-imi, 153-imi, 155-159-imi aamma 161-163-imiittut.

Kapitali 16

Eqqartuussinermi nammineq sinnerluni pisinnaatitat

§ 197. Illuatungiusoq inummik allamik tusaamanerlugaananilu nammineersinnaassusilimmik 18-inik ukioqalereersimasumik nammineq sinnerluni eqqartuussivimmuq ornigutsitsisinnaallunilu suliasami allakkianik tunniussisitsisinnaavoq.

Imm. 2. Eqqartuussinermi nammineq sinnerluni pisinnaatitaasoq, eqqartuussissuserisuunngitsuoq, piginnaatitsissutiminik uppersaasiisinnaassaaq.

Imm. 3. Eqqartuussissuserisut piginnaatitsissuteqarnerminnik nalinginnaasumik uppersaaseqquneqartanngillat aamma taama ittumik pissarsiniarnissamut kinguartitsigallarnissaq piumasarisinnaavaat.

Imm. 4. Eqqartuussiviup nammineepluni sulissuteqarnermigut inuit, eqqartuussinermi inuk sinnerlugu pisinnaatitaasussaatitaanngitsut imaluunniit piginnaatitsissummik peqanngitsut, itigartissinnaavai. Aamma taamaassaaq suliassami allakkianut, inunnit taamaattunit atsiorneqarsimasunut, tunngatillugu.

§ 198. Eqqartuussiviup illuatungiusoq, suliassap sularineqarnerani soqutigisani isumagisinnaajumallugit eqqartuussinermi nammineq sinnerluni pisinnaatitaasumiit ikiorserneqartariaqartutut naliliivigineqartoq, kajumissaartassavaa eqqartuussinermi nammineq sinnerluni pisinnaatitaasumik piukkunnaateqartumik pissarsioqqullugu.

Imm. 2. Illuatungiusup imm. 1 malillugu kajumissaarneqarneq malinngippagu aammalu suliassaq tamatuma kingorna isumannaatsumik sularineqarsinnaanngippat eqqartuussisut illuatungiusoq peqqusinnaavaat eqqartuussinermi nammineq sinnerluni pisinnaatitaasussamik piukkunnartumik pissarsiusasooq. Peqqussut eqqartuussivimmu qulliuneru sumut saqqummiunneqarsinnaanngilaq.

Imm. 3. Illuatungiusup imm. 2 malillugu peqqussut malinngippagu illuatungiusoq kingusinnerusukku eqqartuussinermi takkutinngitsoortutut naatsorsuunneqartassaaq, taamatuttaaq suliassami allakkiat, illuatungiusumit tunniunneqartut, tunniunneqanngitsutut naatsorsuunneqartassapput. Pissutsit immikkut ittut tamatumunnga pissutissaqartitsissappata eqqartuussiviup illuatungiusoq tamatumunnga taarsiullugu eqqartuussinermi taanna sinnerlugu pisinnaatitaasumik piukkunnartumik ivertitsivigisinnaavaa.

Imm. 4. Eqqartuussinermi illuatungiusoq sinnerlugu pisinnaatitanngortinneqartumut aningaasartuutit annertussusilernissaannut akilerneqarnissaannullu atortuutinneqassapput nammineq aningaasartuutiginnngisamik eqqartuussisulersuussisarnermi maleruagassat assingi. Eqqartuussiviulli illuatungiusoq, nammineq aningaasartuutiginnngisamik eqqartuussisulersuussinissamut aningaasatigut piumasaaqatinik naammassinninngitsoq, aningaasartuutini tamanik ilaannaannilluunniit pisortanut taarsiussannngortissinnaavaa.

§ 199. § 198 aamma atortuutinneqartassaaq illuatungiusoq eqqartuussinermi nammineq sinnerluni pisinnaatitaasussarsisimatillugu inatsisilerituutut soraarummeersimannngitsumik, pisariaqartumik ikiorsisinnaanngitsumik.

§ 200. Eqqartuussinermi nammineq sinnerluni pisinnaassusiligaasup iliuusai imaluunniit iliuuseqanngitsoorneri piginnaatitaanermu attuumassuteqartuussappata illuatungiusumut ima pituttuitigaat, soorlusooq illuatungiusup nammineq iliuuserisimagai.

Imm. 2. Illuatungiusoq eqqartuussinermi nammineepluni oqaaseqartarsinnaavoq, massa eqqartuussinermi nammineq sinnerluni pisinnaassusilikkamik sinniiseqaralarluni.

Imm. 3. Eqqartuussisut illuatungiusoq, eqqartuussinermi nammineq sinnerluni pisinnaatitamik ornigutsitsisoq, nammineepluni orniguteqqullugu kajumissaarsinnaavaat.

Kapitali 17

Suliassiineq

Pisinnaasaqassuseq piviusorsioortoq

§ 201. Eqqartuussiviup nammineepluni sulissuteqarnermigut nakkutigissavaa suliassamik sularinninissaminut kapitali 2 malillugu piviusorsioortumik pisinnaasaqassuseqarnerluni.

Imm. 2. Eqqartuussivik piviusorsioortumik pisinnaasaqassuseqanngippat suliassaq ajornanngippat eqqartuussivimmu eqqortumut innersuussutigineqassaaq. Taamaattorli Kalaallit Nunaanni

Eqqartuussivik aalajangersinnaavoq suliassaq inerlugu sularineqassasoq, pisinnaasaqassuseq pillugu apeqquq suliassap sularineqarnerani aatsaat kingusissukkut saqqummiunneqarsimappat.

Imm. 3. Innersuussisoqarsinnaangippat eqqartuussiviup eqqartuussutikkut suliassaq itigartitsissutigissavaa.

§ 202. Illuatungeriit isumaqatigiissutigisinnaavaat eqqartuussivimmi suliassaq, Kalaallit Nunaanni Eqqartuussiviup ataaniittoq, eqqartuussivimmit sularineqassasoq. Taamaattorli eqqartuussiviup isumaqatigiissutaasimasoq taamaattoq apeqqutaatinnagu suliassaq Kalaallit Nunaanni Eqqartuussivimmut § 56 malillugu innersuussutigisinnaavaa.

Najugarisami pisinnaasaqassuseq

Suliassanngortitap najugaa imaluunniit sumiiffia

§ 203. Eqqartuussivimmi suliassat eqqartuussisoqarfimmi, suliassanngortitap najugaqarfigisaani, suliassiissutigineqartassapput, inatsisikkut allatut aalajangiisoqarsimanngippat. Suliassanngortitaq eqqartuussisoqarfinni arlalinni najugaqarfeqarpat suliassaq taakku tamaasa aqqutigalugit suliassiissutigineqarsinnaavoq.

Imm. 2. Suliassanngortitaq aalajangersimasumik najugaqanngippat suliassaq eqqartuussisoqarfimmi, taassuma sumiiffigisaani, suliassiissutigineqarsinnaavoq.

Imm. 3. Suliassanngortitaq najugaqarfeqanngippat imaluunniit sumiiffia ilisimaneqanngippat suliassaq eqqartuussisoqarfimmi, suliassanngortitap kingullermik najugaqarfigisimasaani imaluunniit najorsimasaani, suliassiissutigineqarsinnaavoq.

Inuussutissarsiummik ingerlatallit

§ 204. Inunnut inuussutissarsiutigalugu sullivimmik ingerlatalinnut suliassiissutit, suliassaq sullivimmut tunngassuteqartillugu, eqqartuussisoqarfimmi sullivimmik ingerlataqarfiusumi suliassiissutigineqarsinnaapput.

Illuutit

§ 205. Illuutitut piginnittussaataaneq pillugu suliassat eqqartuussisoqarfimmi, pigisap inissisimaffigisaani, suliassiissutigineqarsinnaapput.

Isumaqatigiissutinut tunngassutillit

§ 206. Isumaqatigiissutinut tunngasutigut suliassat eqqartuussisoqarfimmi, pisussaaffiup suliassamut tunngaviusup naammassineqarfiani imaluunniit naammassineqarfigisassaani, suliassiissutigineqarsinnaapput.

Imm. 2. Imm. 1 aningaasanik piumasaqaatinut atuutinnigilaq, piumasaqaat eqqartuussisoqarfimmi najugaqarnermi pilersimassanngippat pissutsit imaattut atuutsillugit, piffik qimatsinnagu piumasaqaat naammassineqartussaasimagaluarluni.

Atuisunik isumaqatigiissuteqarnerit

§ 207. Atuisunik isumaqatigiissuteqarnerit, inuussutissarsiummik ingerlatallip aalajangersimasumik ingerlatsiveqarfianut nammineerluni saaffiginnikkut isumaqatigiissusiaasimanngitsut, pillugit suliassani atuisoq inuussutissarsiummik ingerlatalimmut eqqartuussivimmi, atuisup nammineq najugaqarfigisaani eqqartuussisoqarfimmiittumi, suliassiissuteqarsinnaavoq

Ingerlatsiviit il.il.

§ 208. Ingerlatsivinnut, peqatigiiffinnut, suliffeqarfinnut inuinnaat pigisaannut kattuffinnullu allanut, eqqartuussivikkut suliassani illuatungiusinnaasunut, suliassat suliassiissutigineqartassapput eqqartuussisoqarfimmi pingaarnertut allaffeqarfiup sumiiffigisaani eqqartuussivimmi, imaluunniit pingaarnertut allaffeqarfik paasissutissiissutaasinnaanngippat, eqqartuussivimmi siulersuisunut imaluunniit qullersaqarfimmut ilaasortat ilaata najugaqarfigisaanni eqqartuussisoqarfimmiittumi.

Imm. 2. Kattuffiit imm. 1-imi taaneqartut inuussutissarsiutigalugu sullivinnik eqqartuussisoqarfinni allani imm. 1-imi taaneqartut avataanniittuni ingerlataqarpata suliassaq aamma suliassiissutigineqarsinnaavoq eqqartuussisoqarfimmi sullivimmik ingerlataqarfiusumi eqqartuussivikkut.

Imm. 3. Suliassat kattuffinnut imm. 1-imi taaneqartunut tunngasut aammalu kattuffiit ilaasortanut ataasiakkaanut eqqartuussivikkut suliassiissutaat imaluunniit kattuffiit akornanni suliassiissutinngortussat eqqartuussisoqarfinni imm. 1-imi aamma 2-mi taaneqartuni suliassiissutigineqarsinnaapput.

Imm. 4. Kattuffinni imm. 1-imi taaneqartuni pilersitsisunut, siulersuisunut ilaasortanut direktørinullu taarsiivigineqarnissaq pillugu suliassat eqqartuussisoqarfinni imm. 1-imi aamma 2-mi taaneqartuni suliassiissutigineqarsinnaapput.

Kommunit

§ 209. Kommuninut suliassiissutit eqqartuussisoqarfimmi kommunip pingaarnertut allaffeqarfigisaani suliassiissutigineqarsinnaapput.

Namminersornerullutik Oqartussat naalagaaffillu

§ 210. Namminersornerullutik Oqartussanut naalagaaffimmullu suliassat suliassiissutigineqarsinnaapput eqqartuussisoqarfimmi, pisortatut oqartussaaitap, Namminersornerullutik Oqartussat imaluunniit naalagaaffik sinnerlugu suliassanngortinniakkap, allaffeqarfigisaani.

Eqqartuussivik suliarinniffiususaaq pillugu isumaqatigiissutit

§ 211. Illuatungeriit isumaqatigiissutigisinnaavaat suliassaq eqqartuussivimmi sorlermi suliassiissutigineqassanersoq.

Imm. 2. Atuisunik isumaqatigiissuteqarnerit pillugit suliassani eqqartuussivik suliarinniffiususaaq pillugu isumaqatigiissuteqareersimaneq atuisumut pituttuissanngilaq.

Suliassanngortitat, Kalaallit Nunaanni eqqartuussisoqarfimmi najugaqanngitsut

§ 212. Inunnut, ingerlatsivinnut, peqatigiiffinnut, inuinnaat suliffeqarfiinut kattuffinnullu allanut, Kalaallit Nunaanni eqqartuussivimmik suliarinniffiusinnaasumik najugarfeqanngitsunut, suliassiissutit Kalaallit Nunaanni suliassiissutigineqarsinnaapput eqqartuussivik aalajangersakkat §§ 204-mi, 205-imi, 206-imi, 208, imm. 2-mi, aamma 211-miittut malillugit suliassamik suliarinniffiusussatut naatsorsuunneqarsinnaappat. Atuisunik isumaqatigiissuteqarnerit pillugit suliassani atuisoq inunnut kattuffinnullu oqaaseqatigiinni siullerni taaneqartunut nammineq eqqartuussisoqarfimmi najukkaminiittumi suliassiissuteqarsinnaavoq, isumaqatigiissuteqarnissaq sioqqullugu immikkut neqerooruteqartoqarsimappat imaluunniit Kalaallit Nunaanni ussassaaruteqartoqarsimappat, atuisorlu isumaqatigiissusiornissamut pisariaqartunik Kalaallit Nunaanni iliuuseqarsimappat.

Imm. 2. Eqqartuussiviit arlaannaalluunniit imm. 1 malillugu eqqartuussivittut suliassami suliarinniffiusinnaasutut naatsorsuunneqarsinnaanngippat suliassat aningaasatigut pisassanut tunngassutillit inunnut imm. 1-imi taaneqartunut suliassiissutigineqartut suliassiissutigineqarsinnaapput eqqartuussivimmi, taakkua suliassanngortitsissummik nalunaarfigineqarnerminni najugaqarfigisaanni.

Imm. 3. Inunnut kattuffinnullu imm. 1-imi taaneqartunut suliassiissutit aningaasatigut pisassanut tunngassutillit malittarisassaq imm. 1-imiittoq malillugu eqqartuussivimmik suliarinniffiusinnaasoqanngippat suliassiissutaasinnaapput eqqartuussivimmi, inuup kattuffiulluunniit pineqartup suliassiissuteqartoqarnerani pigisaasa sumiiffigisaanni imaluunniit pigisaminik, piumasqaammut tunngasunik, inissisimatitsiffigisaani. Pigisanik arsaarinnikkallarnissaq qularnaveeqqusiisoqarneratigut pinngitsoortinneqarpat qularnaveeqqusiussat isigineqassapput pigisatut, piffimmi akiitsullip arsaarinnikkallarnermik suliassamut tunngatillugu eqqartuussivimmi suliarinniffiusussami imaluunniit suliarineqarfigisassaraluani inissisimasutut.

Umiarsuarmik arsaarinnikkallarnermik atuuttussanngortitsisarneq

§ 213. Umiarsuarmik arsaarinnikkallarnernup atuuttussanngortinneqarnissaa pillugu aamma piumasqaatit, arsaarinnikkallaqqusissutaasut, pillugit suliassat suliassiissutigineqarsinnaapput eqqartuussivimmi, §§ 201-212 naapertorlugu piumasqaatit pillugit suliassanik suliarinniffiusussami.

Najukkami eqqartuussivimmut allamut innersuussisarneq

§ 214. Eqqartuussivik aalajangiisinnaavoq suliassaq eqqartuussivimmut suliassiissutigineqarsimasoq eqqartuussivimmut allamut, malittarisassat siulianiittut malillugit suliarinniffiusussaaitamut, innersuussutigineqassasoq, ilisimannittut najugaat pissutigalugit imaluunniit allat pissutigalugit tamanna naleqquttutut nalilerneqarpat.

Imm. 2. Tamanna immikkut ittunik tunngavissaqarsorineqarpat Kalaallit Nunaanni Eqqartuussivik aalajangiisinnaavoq suliassaq suliarineqassasoq eqqartuussivimmi, malittarisassat siulianiittut malillugit suliarinniffiusussaannngitsumi.

Imm. 3. Imm. 1 malillugu nuussinissaq pillugu aalajangiineq eqqartuussivimmit, suliassiissuteqarfiusimasumit, aalajangiinerusaaq.

Imm. 4. Eqqartuussiviup imm. 1 aamma 2 malillugit aalajangiineri tunngavilersukkatut aalajangiinerussapput.

Eqqartuussisut eqqartuussivimmik suliarinniffiusussamik naliliiffiginnittarnerat

§ 215. Eqqartuussiviup nammineerluni sulissuteqarnermigut misissortassavaa suliassaq eqqartuussivimmut suliarinniffiusussavimmut suliassanngortinneqarsimanersoq. Suliassanngortitaq piareersaaneq naammassineqartinnagu eqqartuussiviup piginnaatitaanera pillugu akerliliissuteqarsimannngippat, tak. § 223, eqqartuussivik suliarinniffiusussatut eqqortutut isigineqassaaq.

Imm. 2. Suliassaq eqqartuussivimmi, suliassamik imaluunniit piumasqaataasut ilaannik suliarinniffiusussaviunngitsumi, suliassiissutaasimatillugu eqqartuussiviup ajornanngippat suliassaq piumasqaataasorluunniit eqqartuussivimmi eqqortumi aalajangiiffigisassanngortillugu innersuussutigissavaa. Innersuussinissamik aalajangiineq tunngavilersukkamik aalajangiinerusaaq. Suliassaq innersuussutigineqarsinnaanngippat eqqartuussiviup eqqartuussuteqarnimigut suliassaq itigartitsissutigisassavaa.

Kapitali 18

Eqqartuussivimmi siullermeeriffiusussami suliap piareersarneqartarnera

Oqaatsitigut allakkatigullu piareersaaneq

§ 216. Suliassaq oqaatsitigut allakkatigullu piareersarneqarsinnaavoq. Oqaatsitigut piareersaanermi illuatungeriit eqqartuussivimmut aggersarneqassapput. Allakkatigut piareersaanermi illuatungeriit suliassami allakkiamik, allakkiap nuutsinneqarneranik eqqartuussiviup pissaanik ilanngussillutik, tunniussinissaminut piffissaliivigineqassapput.

Imm. 2. Eqqartuussivik naliliippat illuatungiusoq suliassami allakkatigut oqaasertaliorsinnaanngitsaq, suliassaq taassumunnga tunngatillugu oqaatsitigut piareersarneqassaaq.

Imm. 3. Eqqartuussiviup akuerisinnaavaa illuatungiusoq imaluunniit taassumunnga sinniisissatut pisinnaassusiligaasoq piareersaatitut ataatsimiinnermi ungasianiit attaveqaatit aqputigalugit peqataassasoq, taamatut peqataanissaq naleqqutinngitsoosorineqanngippat.

Suliassanngortitsissut

§ 217. Suliassanngortitsisoqassaaq tunniussaqaarnikkut suliassanngortitsissummik, taassuma nuutsinneqarnera eqqartuussiviup pissaa ilanngullugu. Eqqartuussiviup suliassanngortitsissummut allattassavaa taanna ulloq suna tiguneqarsimasoq.

Imm. 2. Suliassanngortitsissutip imarissavai:

- 1) Illuatungeriit aqqi najugaallu, matumunnga ilanngullugu najugaq, suliassanngortinneqartumut nalunaarutininik nassiussiviusinnaallunilu nalunaarutiginnissuteqarfiusinnaasoq,
- 2) suliassiisup oqarasuaatigisinnaasaata telefaxerisinnaasaatalu normui,
- 3) eqqartuussiviup suliassiisuteqarfiusussap aqqa,
- 4) suliassiisup piumasaqaataa,
- 5) suliassiisup piumasaqaataanut tunngaviusoq pillugu nassuiaat, aamma
- 6) allakkiat uppersaatissat uppersaatissallu allat, suliassiisup saqqummiunnialersaagai.

Imm. 3. Allakkiat uppersaatit suliassiisup saqqummiunnialersaagai ilanngunneqassapput, taakku nuutsinneqarneri suliassiisup pigippagit nuutsinneqarneri ilanngullugit.

§ 218. Suliassanngortitsissutip piumasaqaatinik § 217-imiittunik naammassinnissimanissaa eqqartuussiviup nakkutigissavaa. Taamaangippat imaluunniit suliassanngortitsissut ersarluppat imaluunniit amigaateqarpat eqqartuussivik suliassiisumut saaffiginnissaaq pineqartorlu amigaataasunik iluarsiinissaanut sivikinnerusumik piffissaliivigalugu. Eqqartuussiviup tamatumunnga atatillugu suliassiisoq § 177 malillugu ilitsersussavaa.

Imm. 2. Amigaataasut iluarsineqarsinnaanngippata imaluunniit suliassiisoq piffissaliussap iluani taamaaliunngitsoorpat suliassaq eqqartuussivimmit itigartitsissutigineqassaaq. Eqqartuussiviup suliassamik itigartitsineq nalunaarutigileruniuk peqatigitillugu suliassiisoq suliasseseqqinnissamut periarfissaqarnermik ilitsersortassavaa.

Suliassanngortitsissummik nalunaarutiginnittarneq

§ 219. Eqqartuussiviup suliassanngortitsissutip suliassanngortinneqartumut nalunaarutigineqarnissaa isumagisassavaa, taamaattoq tak. § 130. Nalunaarutiginninnermut peqatigitillugu suliassanngortitap suliassami nammineq soqutigisaminik isumaginnissamut piffissaliussap iluani iliuuserisinnaasai pillugit ilitsersuut tunniunneqartassaaq.

Akissutitut allakkiaq

§ 220. Suliassanngortitamiit akissutitut allakkiap imarissavai:

- 1) suliassanngortitap aqqa najugaalu, matumunnga ilanngullugu najugaq nalunaarutininik nassiussiviusinnaallunilu suliassanngortitamut nalunaarutiginnissuteqarfiusinnaasoq,

- 2) suliassanngortitap oqarasuaatigisinnaasaata telefaxerisinnaasaatalu normui,
- 3) suliassanngortitap piunasaqaataa, matumunnga ilanngullugu illuatungerisamiit piunasaqaataasinnaasut,
- 4) suliassiisup piunasaqaataanut tunngaviusoq pillugu nassuiaat, aamma
- 5) allakkiat uppernarsaatissat uppernarsaatissallu allat, suliassanngortitap saqqummiunnialersaagai.

Imm. 2. Allakkiat uppernarsaatit, suliassanngortitap saqqummiunnialersaagai ilanngunneqassapput, taakku nuutsinneqarneri suliassanngortitap pigippagit nuutsinneqarneri ilanngullugit.

Najuutinngitsoornermi eqqartuussut

§ 221. Suliassanngortitap piffissaliussap iluani qisuarianngippat imaluunniit suliassanngortitap ataatsimiinnermut aggeqqusaaffimminut takkutinnitsoorpat eqqartuussivik najuutinngitsoornermi eqqartuussummik eqqartuussuteqassaaq suliassiisup piunasaqaataa malillugu, suliassap saqqummiunneqarnerani tunngavilersuutigineqarsimasorineqartunut aammalu saqqummersunut allanut naapertuuttumik. Eqqartuussut suliassanngortitsissummi oqaaseqaatit allanneqarsinnaavoq. Najuutinngitsoornermi eqqartuussummik aatsaat eqqartuussuteqartoqarsinnaavoq suliassanngortitap periarfissamik tamatumunnga ilisimatinneqareersimappat. Eqqartuussiviup suliassanngortinneqartoq eqqartuussut pillugu kalerripagu tamatumunnga ilutigitillugu suliassanngortitap suliassami nangititsinissamut periarfissat pillugit ilitersorneqartassaaq, tak. § 232.

Piareersaanerup ingerlatiinnarneqarnera

§ 222. Eqqartuussiviup aalajangersinnaavaa piareersaataasunik arlaleriarluni eqqartuussisoqartassasoq, imaluunniit illuatungiusoq eqqartuussiviup piffissaliussaa qaangiutsinnagu suliassamut allakkiamik suli allamik tunniussaqaassasoq.

Imm. 2. Eqqartuussivik piffissaliussanik eqqortitsinnginnerup aamma eqqartuussinernut pineqartup aggersarneqarfigisaanut takkutinnitsoornerup inatsisitigut sunniutai pillugit ilitersuisassaaq.

Piareersaanerup naammassineqarnera

§ 223. Eqqartuussivik aalajangiissaaq piareersaaneq qaqugukkut naammassineqassasoq. Piareersaanerup naammassineqarnerani eqqartuussutissap isumaqatigiinniutigineqarnissaanut piffissaq sumiiffissarlu aalajangerneqartassapput.

Imm. 2. Eqqartuussivik aalajangiisinnaavoq eqqartuussutissap isumaqatigiinniutigineqarnissaa piareersaatit ataatsimiinnermut atatiinnarlugu pissasoq, suliassaq naammattunik paasinarsimasorineqarpat aamma pissutsit tamatumunnga akerliussanngippata.

Imm. 3. Eqqartuussiviup piareersaaqqinnissaq pisariaqarsoriguniuk aalajangiisinnaavoq, piareersaaneq nangeqqinneqassasoq.

Piunasaqaatit, tunngavilersuutit uppernarsaatissallu nutaat

§ 224. Eqqartuussutissap isumaqatigiinniutigineqarnissaanut piffissaliisoqarlunilu sumiiffissaq aalajangerneqareerpat illuatungiusoq eqqartuussivimmit akuerineqarluni piunasaqaatiminik taamaallaat annertunerulersitsinnaavoq imaluunniit tunngavilersuutinik uppernarsaatissanilluunniit nutaanik saqqummiussaqaarsinnaavoq. Illuatungiusoq akerliliigaluartoq aatsaat taamatut akuersissuteqartoqarsinnaavoq,

- 1) allannguuteqartitsinerup siusinnerusukkut pisimannginnera utoqqatsissutissaqartutut isigineqarpat,
- 2) eqqartuussutissap isumaqatigiinniutigineqarnissaa kinguartinneqanngikkaluartoq illuatungiusoq soqutigisaminik isumaginninnissaminut naammattumik periarfissaqarpat, imaluunniit
- 3) akuersissuteqarumanninneq illuatungiusup naleqqutinngitsunik annaasaqarneranik kinguneqassappat.

Suliassap sularineqarnissaanik kinguartitsineq

§ 225. Suliassaq aatsaat kinguartikkallarneqarsinnaavoq eqqartuussiviup tamanna pisariaqarsorippagu.

Imm. 2. Taamaattorli eqqartuussiviup suliassaq kinguartittassavaa illuatungiusup noqqaassutigippagu eqqartuussissuserisutut oqartussaaitat eqqartuussissuserisup akissarsiassaanut isummissasut, imaluunniit atuisup suliassaq Kalaallit Nunaanni Atuisartunut Pisisartunullu Maalaaruteqartarfimmut suliassannqorteqqappagu.

Piareersaanerup ingerlanerani kingusinnerusukkut takkutinngitsoorneq

§ 226. Suliassannqortitaq, suliassami siusinnerusukkut akissuteqarsimasoq, kingusinnerusukkut eqqartuussinnermut, aggersarneqarfigisaminut, takkutinngitsoorpat imaluunniit suliassannqortitaq eqqartuussiviup aalajangiineratut eqqartuussinnermi suliassami allakkianik allanik tunniussaqaanngitsoorpat eqqartuussivik suliassiisup piumasaqaataa malillugu eqqartuussuteqassaaq, suliassap saqqummiunneqarnerani tunngavilersuutigineqarsimasorineqartunut aammalu saqqummersunut allanut naapertuuttumik. Piumasaqaatit tunngavilersuutillu suliassiisup suliassannqortitsissummi imaluunniit eqqartuussinnermi, suliassannqortitap najuuffigisaani, imaluunniit suliassami allakkiami, suliassannqortitamut nalunaarutigineqarsimasumi, taagorsimasai kisimik tunngavigineqarsinnaapput.

§ 227. Suliassiisq eqqartuussinnermut, aggersarneqarfigisaminut, takkutinngitsoorpat imaluunniit suliassiisq eqqartuussinnermi suliassami allakkiamik eqqartuussiviup aalajangiineratut tunniussaqaanngitsoorpat eqqartuussiviup suliassaq itigartitsissutigissavaa. Taamaattorli § 233, oqaaseqatigiit aappaat, taamatulli atortuutinneqassappat.

§ 228. Suliassiisq suliassannqortitarlu ataatsimiinnissamut, tamarmik aggersarneqarfigisaminnut, takkutinngitsoorpata eqqartuussiviup suliassaq taamaatiinnassavaa. Aamma taamaassaaq illuatungeriit marluullutik suliassami allakkianik eqqartuussiviup aalajangiineratut tunniussaqaanngitsoorpata.

§ 229. Illuatungiusoq eqqartuussinnermut takkutinngitsoorpat imaluunniit illuatungiusoq suliassami allakkiamik piffissaq eqqorlugu tunniussaqaanngitsoorpat tamanna aatsaat itigartitsinnermik imaluunniit najuutinngitsoornermi eqqartuussummik kinguneqarsinnaavoq illuatungiusoq periarfissaq tamanna pillugu ilisimatinneqareersimappat.

§ 230. Pissutsit immikkut ittut tamatumunnga tunngavissaqartitsippata eqqartuussiviup aalajangersinnaavaa takkutinngitsoorneq imaluunniit suliassami allakkiamik tunniussaqaanngitsoorneq §§ 226-228 malillugu kinguneqartinneqassanngitsoq. Taamaassappat suliassaq nangillugu sularineqartussannqorlugu kinguartikkallarneqassaaq.

Imm. 2. Imm. 1 malillugu aalajangiinerni pingaartumik eqqarsaatigineqartassaaq takkutinngitsoorneq imaluunniit tunniussaqaanngitsoorneq pissutissaqavissumik agginngitsoornerunersoq imaluunniit pissutsit utoqqatsissutaasinnaasut atuussimanersut, aammalu illuatungerisaq suliassamik kinguartitserusunersoq.

Nassuerutiginninnermi eqqartuussut

§ 231. Suliassannqortitaq nalunaarpat suliassiisup piumasaqaataanut akerliunani eqqartuussivik suliassiisup piumasaqaataa naapertorlugu eqqartuussuteqassaaq.

Nangitsineq

§ 232. Suliassangortitaq, takkutinnitsoortutut imaluunniit akissuteqaateqarsimannigitsutut eqqartuunneqarsimasoq, suliassap nangeqqinneqarnissaanik piumasaqarsinnaavoq. Noqqaassut eqqartuussivimmut saqqummiunneqartassaaq eqqartuussutip nalunaarutigineqarneraniit kingusinnerpaamik sapaatit akunneri sisamat qaangiunneranni. Eqqartuussivik suliassap nangeqqinneqarnissaanik qaqutigootumik akuersisinnaavoq noqqaassut kingusinnerusukkut saqqummiunneqarpat, kingusinnerpaamilli eqqartuussuteqartoqarneraniit ukiup ataatsip qaangiunnerani. Suliassaq nangeqqinneqassappat suliassangortitap suliassamut aningaasartuutunik akiliinissaa imaluunniit qularnaveequsiinissaa piumasaqaatigineqarsinnaavoq. Nangititsinissamik noqqaassut suliareqqitassangortitsinertulli kinguartitsigallarnissamik sunniuteqartassaaq.

Imm. 2. Suliassaq nangeqqinneqassappat eqqartuussiviup suliassaq qanoq sularineqassanersoq aalajangertassavaa.

Imm. 3. Suliassangortitaq, suliassap nangeqqinneqarnissaanik piumasaqaateqartoq, takkutinnitsoorpat imaluunniit pineqartoq suliassami allakkatigut akissuteqaammik piffissaliussaq qaangiutsinnagu tunniussaqaqngippat nangititsinissaq itigartitsissutigineqassaaq.

Atorunnaarsitsineq itigartitsinerlu

§ 233. Suliassangortitap suliassaq unitsissinnaavaa eqqartuussutissap isumaqatigiinniutigineqarnerani piumasaqaateqartoqarnissaa tikillugu. Suliassangortitaq eqqartuussinermi, suliassiisup najuuffigisaani imaluunniit suliassami allakkiami, suliassiisuteqartumut nalunaarutigineqarsimasumi, illuatungaaniit piumasaqaateqarpat suliassap sularineqarnera ingerlatiinnarneqassaaq, tamannali pissaaq suliassangortitap illuatungaaniit piumasaqaatip aalajangiiffigineqarnissaanik noqqaassuteqarneratigut.

Kapitali 19

Suliassap aalajangiiffigineqarnera

Eqqartuussutissap isumaqatigiinniutigineqarnera

§ 234. Takkutinnitsoorneq piareersaasoqarnerata nalaanitulli sunniuteqartassaaq, illuatungiliuttup eqqartuussutissap isumaqatigiinniutigineqarnerani piumasaqaateqarnissaata tungaanut.

Imm. 2. Piareersaanerup nangeqqarneqarnissaa pillugu § 223, imm. 3 aamma piumasaqaatinik, tunngavilersuutunik uppersaasatissanillu nutaanik saqqummiussisinnaaneq pillugu § 224 eqqartuussutissap isumaqatigiinniutigineqarnerani taamatullu atortuutinneqassapput.

§ 235. Eqqartuussivik aalajangersinnaavoq illuatungiusoq suliassami allakkiat allakkiatullu uppersaasatissat, suliassap sularineqarnerani saqqummiunnialersaakkat, nuutsinneqarnerinik eqqartuussivimmut nassiussissasoq. Pappiaqqat nuutsinneqarneri piffissaq eqqorlugu nassiunneqanngippata takkutinnitsoorneq pillugu malittarisassat taamatullu atortuutinneqassapput.

§ 236. Eqqartuussutissap isumaqatigiinniutigineqarnera aallarnerlugu illuatungeriit piumasaqaatiminnik saqqummiussissapput, pisariaqassappat eqqartuussivimmit ikiorneqarlutik.

Imm. 2. Tamanna pereerpat eqqartuussisut siulittaasuata imaluunniit illuatungiusup imaluunniit taanna sinnerlugu pisinnaatitaasup, eqqartuussisut siulittaasuannit taamaalioqquneqartup, suliassaq naatsumik saqqummiutissavaa.

Imm. 3. Suliassaq saqqummiunneqareerpat uppersaasiineq malitsigitinneqassaaq. Uppersaasiineq, eqqartuussutissaq isumaqatigiinniutigineqalersinnagu pisimasoq, atuffassinikkut uppersarneqassaaq.

Imm. 4. Uppernarsaasiineq naammassereerpat, suliassaq aalajangiiffigineqartussanngortinnagu suliassiisoq siulliulluni tamatumalu kingorna suliassanngortitaq naggasiillutik oqaseqaateqarnissaminnut periarfissaqassapput.

§ 237. Eqqartuussutissap isumaqatigiinniutigineqarnera naammassigaangat eqqartuussisut saqitsaannermik suliassami sapinngisamik piaartumik aalajangiisassapput. Suliassap eqqartuussutissanngortinneqarnerani eqqartuussiviup nalunaarutigisassavaa eqqartuussut qaqugu nalunaarutigineqassasoq. Eqqartuussutit aalajangiinerillu oqaatigineqartassapput suliassap aalajangiiffigisassanngortinneqarneraniit kingusinnerpaamik sapaatit akunneri arfinillit qaangiunneranni. Suliassanulli, Kalaallit Nunaata Eqqartuussisuuneqarfiani suliarineqartussanut tunngatillugu, piffissarititaq qaammatinik pingasunik sivisussuseqassaaq.

Imm. 2. Tamanna pissutsit immikkut itut pisariaqartippassuk eqqartuussiviup aalajangersinnaavaa piffissarititaq imm.1-imiittoq atuutissanngitsoq. Aalajangiinermi pissutsit, piffissarititamik eqquinngitsoortitsisut taaneqassapput. Aalajangiineq aalajangeqqitassanngortinneqarsinnaanngilaq.

Imm. 3. Eqqartuussut nalunaarutigineqartassaaq eqqartuussutip inerneranik atuaanikkut, eqqartuussutip tamarmiusup allanneqareernerata kingorna.

§ 238. Eqqartuussut illuatungeriit piumasaqaataannik suliassallu saqqummiunneqarneranik imaqaassaaq, matumunnga ilanngullugit illuatungeriit tunngavilersuutaat, pisariaqarneratullu annertutigisumik ilisimannittullu nassuiaataat kiisalu pissusiviusut inatsisinullu tunngasutigut pissutsit, suliassap aalajangiiffigiinarnerani pingaartinneqarsimasut.

Imm. 2. Eqqartuussutini, suliarinneqqaarfiusumi eqqartuussutaasuni, suliassamik saqqummiussineq illuatungeriit tunngavilersuutaasa naatsumik oqaatigineqarnerinut annikillisinneqarsinnaavoq, tamanna ilutigalugu aalajangiinermut peqqissaartumik tunngavilersuisoqarpat. Taamaassappat eqqartuussummit ersersinneqassaaq eqqartuussut suliassap saqqummiunneqarneranik tamakkiisumik imaqaanngitsoq.

Imm. 3. Eqqartuussut, imm. 2 malillugu allanneqarsimasooq, suliareqqitassanngortinneqassagaluarpat eqqartuussivik suliassanut ilassuteqaammik nassuiaasiussaaq. Nassuiaasiaq nunap eqqartuussisuuneqarfianut sapinngisamik piaartumik nassiunneqassaaq, eqqartuussiviup suliareqqitassanngortitsinermik nalunaarfigineqareernerata kingorna. Tamatumunnga peqatigitillugu nassuiaasiap nuutsinneqarnera illuatungeriinnut nassiunneqassaaq.

§ 239. Eqqartuussiviup akuerisinnaavaa illuatungiusooq imaluunniit taassumunnga sinniisitut pisinnaatitaasooq eqqartuussutissap isumaqatigiinniutigineqarnerani ungasianiit attaveqaatit aqputigalugit peqataassasoq, taamatut peqataanissaq immikkut ittumik pissuteqartumik naleqquttuusorineqarpat.

Imm. 2. Illuatungeriit aamma eqqartuussinerni sinniisitut pisinnaatitat eqqartuussutissap isumaqatigiinniutigineqarnerani ungasianiit attaveqaatit aqputigalugit peqataanissaat pillugu § 128 aamma atortuutinneqassaaq.

§ 240. Eqqartuussisut aalajangiinerannut tunngaviussapput illuatungeriit piumasaqaataat tunngavilersuutaallu kiisalu paasissutissat eqqartuussutissap isumaqatigiinniutigineqarnerani uppernarsaasiinnikkut saqqummersimasut imaluunniit eqqartuussutissap isumaqatigiinniutigineqarnerani atuaanikkut uppernarsaasiissutigineqartut.

Isummernermik nalunaarutit

§ 241. Suliassaq eqqartuussutissanngortinneqartinnagu eqqartuussisut isummernerminnik illuatungeriinnut oqaatsitugit imaluunniit allakkatigut nalunaaruteqarsinnaapput, suliassap isumaqatigiissutigineqarnissaanut siunnersuummik imalimmik. Isummernermik nalunaarutip imarisinnaavaa aalajangiissutaasinnaasup qanoq ituunissaa pillugu eqqartuussisuniit siumoortumik isummerneq imaluunniit kiffaanngissuseqarnerusumik isumaliutiginninneq aallaavigalugu isumaqatigiissuteqarnissamut siunnersuummik imaqarsinnaavoq. Erseqqissumik takuneqarsinnaassaaq

isummerneq taakku arlaattut ittuunersoq. Illuatungeriit sivikitsumik isumaliorfissaqartinneqarsinnaapput isummerneq tunngavigalugu isumaqatigiissuteqartoqarsinnaanersoq. Taamaassanngippat suliassaq ingerlaannaq eqqartuussutissanngortinneqassaaq.

Allakkatigut tunngavilersuutit aallaavigalugit aalajangiineq

§ 242. Pissutsit immikkut ittut tamatumunnga tunngavissaqartitsippata eqqartuussivik qaqutigut aalajangersinnaavoq suliassaq tamakkiisumik ilaannakuusumilluunniit allakkatigut tunngavilersuutit aallaavigalugit aalajangiiffigineqassasoq. Taamatut aalajangiisoqassappat illuatungeriit tamanna pillugu isumaqatigiissapput, aammalu suliassap sularineqarneranut soqutiginninneq taamatut periaaseqarnissamut akerliunngippat. Pissutsini taama ittuni aalajangiinermut tunngavigisassat tassaassapput suliassanngortitsissut, akissutitut allakkiaq allakkiallu allat uppersaatsissiat, suliassap piareersarneqarnerani saqqummiunneqarsimasut kiisalu eqqartuussisut suliannik allasimaffimmut allatorneqarsimasut.

Kapitali 20

Suliassamut aningaasartuutit

§ 243. Ilisimannittunut aningaasartuutit pisortanit akilerneqassapput illuatungiusumut §§ 248 aamma 249 malillugit taarsertinniarneqarsinnaanngorlugit. Tamanna atuuppoq kiap ilisimannittumik killisiuinissaq kissaatigisimaneraa apeqquaatinnagu.

§ 244. Misissuineranut naliliinermullu aningaasartuutit eqqartuussiviup aalajangiinera malillugu pisortaniit tamakkiisumik ilaannakuusumilluunniit akilerneqassapput, illuatungiusup taamatut uppersaaseeqquisup aningaasartuutit annertuumik annaasaqaatiginagu akilersinnaanngippagit. Pisortat utertisisinnaatitaanerata pillugu §§ 248 aamma 249 taamatulli atortuutinneqassapput.

§ 245. Eqqartuussiviup aalajangersimappagu illuatungiusoq najugaqarfigisamini imaluunniit najorallakkamini eqqartuussivimmut nassuiaateqassanngitsoq aammalu ungasianiit attaveqaatit atorlugit killisiuisoqarsinnaanngippat eqqartuussiviup aalajangersinnaavaa illuatungiusup imaluunniit sinniisitut pisinnaatitap angalaneranut unnuineranullu il.il. aningaasartuutit pisortanit tamakkiisumik ilaannakuusumilluunniit akilerneqassasut, illuatungiusup aningaasartuutit annertuumik annaasaqaatiginagu akilersinnaanngippagit. Pisortat utertisisinnaatitaanerata pillugu §§ 248 aamma 249 taamatulli atortuutinneqassapput.

§ 246. Suliassamik ingerlatsinermit aningaasartuutit allat illuatungiusup, eqqartuussivikkoortitsisup aningaasartuuteqarfiusumik, akilissavai.

§ 247. Illuatungiusup suliassami ajorsartup pisussaaffigaa illuatungerisami suliassamik ingerlatsinerminut aningaasartuutai pisariaqartut imaluunniit naleqquttumik tunngavissaqartut taarsissallugit. Tamannali atuutissanngilaq eqqartuussivik isumaqarpat tunngavigisassap tamatuma saneqqunneqarnissaanut immikkut pissutissaqartoqartoq.

Imm. 2. Illuatungeriit immikkut tamarmik suliassap ilaanut ajorsarlutillu ilaanut ajugaappata, eqqartuussiviup naliliiffigissavaa aningaasartuutit illuatungeriinnut agguataarneqassanersut. Illuatungiusorli illuatungiminut suliassami aningaasartuutininik taarsiissuteqartussanngortitaasinnaavoq illuatungerisap taassuma piumasaqaataa suliassap inerneraniit annikitsuinnarmik allaanneruppat.

Imm. 3. Suliassaq unitsinneqarpat, eqqartuussiviup pissutsit naapertorlugit illuatungiusoq illuatungerisami suliassamut aningaasartuutaanut tamakkiisumik ilaannakuusumilluunniit

taarsiisussanngortissinnaavaa imaluunniit aalajangersinnaavaa illuatungeriit tamarmik immikkut aningaasartuutigisimasaminnut akisussaaffiginnissasut.

Imm. 4. Suliassaq itigartitsissutigineqarpat suliassamut aningaasartuutitut tunngatillugu suliassiisoq ajorsartutut naatsorsuutigineqassaaq.

Imm. 5. Tunngavilersuutaasut ataasiakkaat atorsinnaatitaannginnerat imaluunniit uppersaaitit ataasiakkaat suliassami arlaannik paasinarsaatitut isumaqarfigineqannginnerat tamatumunnga aningaasartuutit pisariaqanngitsutut isigineqarnissaannik taamalu taarsiissuteqarnissap mattunneqarneranik nassataqartussaannigilaq.

Imm. 6. Suliassanngortitap, suliassiissuteqartoqarnerata kingorna, suliassiisoq pisassarisaanik neqeroorfigisimappagu suliassiisup suliassanngortitaq suliassap ilaanut tamatuma kingorna suliareqartumut aningaasartuutit taarsiiffigissavaa.

§ 248. Eqqartuussiviup illuatungiusoq, suliassami tamakkiisumik ilaannakuusumilluunniit ajorsarsimasoq, §§ 243-245 malillugit uppersaasiinerni pisortat aningaasartuutaannut taarsiisussanngortissinnaavaa. § 247, imm. 2-5, taamatulli atortuutinneqassapput.

Imm. 2. Imm. 1 malillugu aatsaat taarseeqqusisoqarsinnaavoq illuatungiusup aningaasartuutit annaasaqaatigingarnagu akilersinnaassappagit.

§ 249. Eqqartuussiviup illuatungiusoq, suliassami ajugaasuusoq, illuatungerisami pisortallu aningaasartuutaannik taarseeqqusinnaavaa, pissutsit, illuatungiusumut ajugaasuusumut assuarliutaasinnaasut, pissutigalugit suliassaq pisariaqartumiit annertuninngorsimappat. § 248, imm. 2, taamatulli atortuutinneqassaaq.

§ 250. Peqatigiillutik suliassiisimasut suliassamut aningaasartuutitut akisussaaqatigiissapput. Taamaattorli eqqartuussiviup, pissutissaqartoqartillugu, ataasiinnaq imaluunniit taakkua ilaat ataaseq aningaasartuutit ilaannik aalajangersimasunik akiliisussanngortissinnaavaa.

§ 251. Suliassamut aningaasartuutit aamma taakku utertitsinneqarnissaat pillugu eqqartuussiviup aalajangiinera eqqartuussutikkut imaluunniit immikkoortumik aalajangiinikkut pisassaaq, tamanna pillugu piumasaqaateqartoqanngikkaluartorluunniit. Aalajangiineq noqqaassuteqartoqartillugu tunngavilersorneqassaaq.

§ 252. Nunami allamioq, suliassiisutut peqataasoq, suliassanngortitamit imaluunniit pisortaniit noqqaassuteqarneq naapertorlugu eqqartuussiviup piffissaliussaa qaangiutsinnagu suliassamut aningaasartuutitut qularnaveeqqusiisussaataavoq. Qularnaveeqqusiisutissat annertussusilerneqassapput taassumunnga akileqquneqarsinnaasut pillugit eqqartuussiviup missingiinera naapertorlugu. Qularnaveeqqusiisuteqarnissaq piumasarineqarsinnaanngilaq danskisut innuttaassusillit naalagaaffimmi pineqartumi pissutsit assigisaannik atugaqassatillutik qularnaveeqqusiisussaassanngippata. Suliassiisoq piumasarineqartutut qularnaveeqqusiinngippat suliassaq itigartitsissutigineqassaaq.

§ 253. Akiliisitsisarnermut eqqartuussivik aamma pigisanik agguassinermit eqqartuussivik akerliliissutit imaluunniit illuatunganiit piumasaqaatit pillugit aalajangiissappat, kapitalimi matumani aalajangersakkat taamatulli atortuutinneqassapput.

Kapitali 21

Nammineq aningaasartuutiginnigisamik eqqartuussisulersuussineq

§ 254. Inuk qinnuteqaateqareernikkut nammineq aningaasartuutiginngisamik eqqartuussisulersuussisinnaatitaavoq

- 1) nalilerneqarpat inuk taanna eqqartuussisulersuussinissaminut naleqquttumik pissutissaqartoq,
- 2) suliassamik ingerlatsinissamut inatsisitigut ikiorserneqarnissaq pisariaqarsorineqarpat, aamma
- 3) inuup suliassami aningaasartuutit, inatsisilerituutut ilinniarsimasumik eqqartuussinermi sinniisitut pisinnaatitamik sulisussarsinermut atasut, annertuumik annaasaqaatiginagu akilersinnaanngippagit.

Imm. 2. Nammineq aningaasartuutiginngisamik eqqartuussisulersuussisinnaanermut taamaallaat ilaapput suliassami aningaasartuutit, inatsisitigut siunnersorneqarnissamut sillimmasiissutinit imaluunniit

allatut sillimmasiissutinit matusivigineqanngitsut.

Imm. 3. Inatsiseqarnermut ministeri malittarisassiorsinnaavoq qaqugukkut imm. 1, nr.1-imi aamma 3-mi piumasagaatit naammassineqartutut isigineqarnissaat pillugu. Isertitatigut aningaasatigullu killiliussat ukiut tamaasa januaarip aallaqqaataani naleqqussarneqartassapput, tamannalu tamanut nalunaarutigineqartassaaq.

Imm. 4. Eqqartuussivinni, Kalaallit Nunaanni Eqqartuussivimmi aamma Kalaallit Nunaata Eqqartuussisuuneqarfiani suliassani nammineq aningaasartuutiginngisamik eqqartuussisulersuussinissaq Kalaallit Nunaanni Naalagaaffiup Sinniisuanit nalunaarutigineqartassaaq, taamaattoq tak. § 257, imm. 5.

Imm. 5. Eqqartuussiviit Qullersaanni suliassani nammineq aningaasartuutiginngisamik eqqartuussisulersuussinissaq inatsiseqarnermut ministerimit nalunaarutigineqartassaaq, taamaattoq tak. § 257, imm. 5.

§ 255. Inatsiseqarnermut ministeri qinnuteqarneq naapertorlugu nammineq aningaasartuutiginngisamik eqqartuussisulersuussinissamut akuersisinnaavoq, taamaasiornissamut immikkut ittunik pissutissaqartillugu, naak piumasagaatit § 254, imm. 1-imiittut naammassineqanngikkaluartut. Tamanna pingaartumik atuutissaaq suliassani tunngavissiisumik pingaarutilinni imaluunniit tamanut nalinginnaasumik soqutiginaatilinni imaluunniit qinnuteqartup inuttut imaluunniit inuussutissarsiornikkut atugarisaanut annertuumik pingaarutilinni.

§ 256. Inatsiseqarnermut ministeri malittarisassiorsinnaavoq nammineq aningaasartuutiginngisamik eqqartuussisulersuussisinnaanermut qinnuteqaatit imarisassaat aammalu paasissutissat qinnuteqartumit nalunaarutigineqartussat pillugit. Inatsiseqarnermut ministeri aammattaaq malittarisassiorsinnaavoq, qinnuteqarnermi immersugassaaq immikkut ittoq atorneqassasoq.

§ 257. Nammineq aningaasartuutiginngisamik eqqartuussisulersuussisinnaaneq illuatungiusumut pineqartumut ima sunnuteqartassaaq:

- 1) Eqqartuussisuserisumik inatsisilerituumilluunniit allamik suliassamik ingerlatsisussamik ivertitsinermik, pisortanit akissarsiaqartinneqartussamik, tak. § 261.
- 2) Aningaasartuutiniq, suliassap suliarineqarnissaa imaluunniit paasinarsarneqarnissaa pissutigalugu iliuuserineqarsimasunut naleqquttumik akiliutaasimasunik, pisortaniit taarsivigineqarnermik.
- 3) Illuatungiusumut suliassami aningaasartuutiniq taarsiissuteqanngitsoornermik.
- 4) Eqqartuussivimmut akitsuutiniq akiliinngitsoornermik.

Imm. 2. Angalanernut unnuinernullu il.il. aningaasartuutit taamaallaat eqqartuussivimmit pisariaqartutut akuerineqarsimasut akilerneqartassapput.

Imm. 3. Nammineq aningaasartuutiginngisamik eqqartuussisulersuussisinnaanermi ajunngitsorsiassat, taamaallaat imm. 1-imi taaneqartunut, killiliiffigineqarsinnaapput.

Imm. 4. Nammineq aningaasartuutiginngisamik eqqartuussisulersuussisinnaanerp sunniutaanut ilaapput eqqartuussinermi pineqartumi suliassamut tunngasut tamarmik, matumunnga ilanngullugit suliassap eqqartuussivimmi tassanerpiaq nangitsinnissaanut iliuussat pisariaqartinneqartut, kiisalu aalajangiinermik naammassisitsiniaaneq. Sunniutinut ilaassapputtaaq iliuutsit, suliassiissutit

piareersarneqarnera pissutigalugu nammineq aningaasartuutiginngisamik eqqartuussisulersuussisinnaaneq nalunaarutigineqatinnagu iliuuserineqarsimasut naleqquttut.

Imm. 5. Nammineq aningaasartuutiginngisamik eqqartuussisulersuussisinnaanerup sunniutaanut ilaavortaaq suliassap aappassaaneersumik imaluunniit pingajussaaneersumik eqqartuussivimmi suliarineqarnera, suliassaq taanna illuatungiusumit eqqartuussivimmut qulliunerusumut ingerlateqqinneqarsimappat, illuatungiusorlu, nammineq aningaasartuutiginngisamik eqqartuussisulersuussisinnaanermut akuerineqarsimasoq, eqqartuussivimmi siuliani suliarinnissimasumi tamakkiisumik ilaannakuusumilluunniit taparserneqarsimappat.

Imm. 6. Nammineq aningaasartuutiginngisamik eqqartuussisulersuussisinnaanerup sunniutai illuatungiusup toqunerani atorunnaartussaannngillat.

Imm. 7. Akuersissut utertinneqarsinnaavoq paasinarsippat akuersissutip tunniunneqarneranut tunngavigisat atuutinngitsut imaluunniit atuukkunnaarsimasut. Akuersissut utertinneqassatillugu nammineq aningaasartuutiginngisamik eqqartuussisulersuussisinnaanerup sunniutai atuukkunnaassapput.

§ 258. Illuatungerisap suliassamut aningaasartuutit akilissavai, soorlulusooq illuatungiusoq nammineq aningaasartuutiginngisaminik eqqartuussisulersuussisinnaannngitsaq. Aningaasat pisortanut pisassannngortitaassapput. Illuatungiusoq, nammineq aningaasartuutiginngisaminik eqqartuussisulersuussisinnaanermut akuerisaq, nammineerluni suliassamut atatillugu aningaasartuuteqarsimappat eqqartuussiviup aningaasat pisortat illuatungiusullu taassuma akornanni agguataassavaat.

§ 259. Eqqartuussiviup illuatungiusoq, nammineq aningaasartuutiginngisamik eqqartuussisulersuussisinnaanermut akuerisaasimasoq, peqqusinnaavaa nammineq aningaasartuutiginngisamik eqqartuussisulersuussisinermi aningaasartuutininik tamakkiisumik ilaannakuusumilluunniit pisortanut taarsiissuteqassasoq, aningaasartuutit illuatungiusumut akiligassannngortinneqanngitsut annertussusaat apeqquataatillugu, illuatungiusup atugarisai pissutsillu taamaasiornissamut tunngavissaqartitsippata.

§ 260. Eqqartuussinermi sinniisitut pisinnaatitamik ivertitsineq eqqartuussivimmit, suliassiissuteqarfiusumit, isumagineqartassaaq. Suliassani suliareqqitassannngortitani eqqartuussivik qulliunerusoq ivertitsisuusassaaq.

Imm. 2. Eqqartuussinermi sinniisitut pisinnaatitatut ivertinneqartassaaq eqqartuussissuserisoq, § 83 malillugu eqqartuussivimmit sulisussarsiarineqarsimasoq. Taamaattorli eqqartuussissuserisut, eqqartuussivimmit sulisussarsiarineqarsimannngitsut, aamma inatsisilerituut eqqartuussissuserisuunngitsut ivertinneqarsinnaapputtaaq, tamanna isumannaatsuusorineqarpat pineqartorlu ivertinneqarusppat.

Imm. 3. Illuatungiusoq eqqartuussissuserisumik imaluunniit inatsisilerituumik aalajangersimasumik ivertitseqqusippat eqqartuussiviup ivertitsineq piumasaqaatitallersinnaavaa pineqartup angalanermut unnuinermullu il.il. aningaasartuutininik taarsiiffigineqarnissaq pisortanut tamakkiisumik ilaannakuusumilluunniit piumasaqaatigissannngikkaa.

§ 261. Eqqartuussinermi sinniisitut pisinnaatitaq naleqquttunik akissarsiaqartussaavoq aamma akilerallakkaminik taarsiivigineqartussaavoq.

Imm. 2. Akissarsiasat taartisiarititassallu eqqartuussivimmit, eqqartuussinermi sinniisitut pisinnaatitamik ivertitsisimasumit, annertussusilerneqassapput. Annertussusiliineq immikkut aalajangiinikkut pissaq, suliassap imaluunniit eqqartuussinermi iliutsip naammassineqarneranut peqatigitillugu.

Imm. 3. Eqqartuussinermi sinniisitut pisinnaatitaq aningaasat, eqqartuussiviup aalajangigaasa, saniasigut akissarsianik taartisiassanilluunniit tigusaqaqqusaanngilaq. Taamaattorli illuatungiusup

sinniisitullu pisinnaatitap akornanni isumaqatigiissutigineqarsinnaavoq illuatungiusup angalanermut unnuinermullu il.il. aningaasartuutit ilaat, pisortanit akilerneqartussaannigitsut, akilissagai.

§ 262. Danskit eqqartuussiviisigut suliassiissuteqarnermut atatillugu nammineq aningaasartuutiginnngisamik eqqartuussisulersuussisinnaaneq pillugu qinnuteqaat inunnit Kalaallit Nunaanni najugalinnit tunniunneqarsinnaavoq Kalaallit Nunaanni Naalagaaffiup Sinniisuanut. Naalagaaffiup Sinniisuata qinnuteqaat pisortat oqartussaataannut, danskit eqqartuussisarnermik inatsisaat malillugu suliassami nammineq aningaasartuutiginnngisamik eqqartuussisulersuussisinnaanermik akuersisinnaatitaasunut ingerlateqqissavaa.

Kapitali 22

Akiliisitsiniaanermik sulianik suliaqarneq

§ 263. Kapitalimi matumani malittarisassat atortuutinneqassapput aningaasatigut piumasaqaatit pillugit eqqartuussivinni suliassanut, tassani suliassiissuteqartup pinngitsaaliissutinik naammassinninniaannaq siunertaralugu suliassannortitsissummi taasimassavaa ilimagineqanngitsaq suliassannortitaq piumasaqaammut akerliliissuteqassasoq imaluunniit akisilluni piumasaqaammik atuutsitsiniaassasoq. Aalajangersakkanit taakkunannga allaanerusunik malitassaqartinnagu saqitsaannernik suliassanik suliarinninneq pillugu malittarisassat nalinginnaasut atortuutinneqassapput, matumunnga ilanngullugit pinngitsaaliissummik naammassinninniaasarneq pillugu malittarisassat.

§ 264. Suliassannortitsisoqassaaq suliassannortitsissummik eqqartuussivimmumut, suliassannortitap §§ 203, 204 imaluunniit 208, imm. 1 aamma 2 malillugit eqqartuussisoqarfigisaanut, tunniussaqaarnikkut.

§ 265. Suliassannortitsissut suliassannortitamut nalunaarutigineqartassaaq. Nalunaarutiginninnermut peqatigitillugu akissuteqaatitut allakkiornissamut allaffissaq tunniunneqartassaaq ilitersuutigineqarlunilu suliassannortitaq piffissaliussatut taasap qaangiutinnginnerani qanoq iliuseqassanersoq, suliassami nammineq soqutigisani isumaginiarlugit.

Imm. 2. Nalunaarutiginninnermi suliassannortitaq akiliisitsisarnermut eqqartuussivimmukaqquneqassaaq, nalinginnaasumik nammineq ornigulluni, tak. § 604, imm. 3, suliassannortitarlu peqquneqassaaq eqqartuussiviup piffissaliussaa qaangiutsinnagu akissuteqaatitut allakkiamik tunniussaqaassasoq.

Imm. 3. Akiliisitsiniaanissaq § 603 malillugu itigartitsissutigineqarsinnaappat suliassannortitaq akiliisitsisarnermut eqqartuussivimmumut imm. 2-mi oqaaseqatigiit siulliit malillugit aggersarneqassanngilaq, taamatuttaaq § 266, imm. 2 malillugu naammassinninniaasoqassanani.

§ 266. Suliassannortitaq piffissarititaasoq qaangiutsinnagu akissuteqaatitut allakkiamik eqqartuussivimmumut tunniussaqaanngippat eqqartuussivik najuutinngitsoornermi eqqartuussuteqassaaq suliassiisup piumasaqaataa malillugu, suliassannortitsissummi oqaatigineqarsimasuni tunngavilersorneqarsimasorineqartutut annertussusilimmik. Suliassannortitaq suliassami naammaginartumik akissutitut allakkiorsinnaasorineqanngippat oqaatsitigut piareersaataasumik ataatsimiinnissamut aggersarneqassaaq. § 230 taamatulli atortuutinneqassaaq.

Imm. 2. Eqqartuussivik imm. 1 malillugu najuutinngitsoornermi eqqartuussuteqarpat imaluunniit oqaatsitigut piareersaataasumik ataatsimiinnerup imm. 1-mi oqaaseqatigiit aappaanni taaneqartup kingorna nassuerutiginninnermi eqqartuussuteqarpat, eqqartuussivik eqqartuussutip assilineqarneranik illuatungeriinnut nassiussissaaq. Suliassiisup piumasaqaatai pinngitsaaliinikkut naammassiniarneqassapput tamanna pillugu immikkut noqqaassuteqartoqanngikkaluartoq. Eqqartuussut ingerlaannaq naammassisinniarneqarsinnaavoq, eqqartuussummi allatut aalajangiisoqarsimanngippat.

Imm. 3. Najuutinnitsoornermi imaluunniit nassuerutiginninnermi eqqartuussuteqartoqanngippat suliassap eqqartuussivikkut suliarineqarnera ingerlateqqinneqassaaq saqitsaannernik suliassanik suliarinnittarneq pillugu malittarisassat nalinginnaasut malillugit, suliassanngortitallu § 265, imm. 2 malillugu ornigunnissamut pisussaanaera atorunnaassaaq.

§ 267. § 614, imm. 3-6 malillugit pigisanik qularnaveeqqutissatut sillimmasiussat arlaliusut tulleriiaarnerisa aalajangersarneqarnerani, suliassanngortitsissut, § 266 malillugu eqqartuussummik kinguneqartussaq, pinngitsaaliinikkut naammassinninniaanissamik noqqaassuteqarnermut naligitinneqassaaq.

Immikkoortoq IV

Saqitsaannernik suliassanik immikkut ittunik suliaqarneq

Kapitali 23

Aalajangersakkat nalinginnaat

§ 268. Suliassanik, immikkoortumi matumani pineqartunik, suliaqarnermi saqitsaannernik suliassanik suliaqartarneq pillugu aalajangersakkat atuutissapput, immikkoortumi matumani malittarisassat malitsigisaannik suliallu assigiinnnginnerisa nassatarisaannik allannguuteqartillugit.

Kapitali 24

Pigisanik agguaassinermik suliassat

§ 269. Akiliisinnaajunnaartup pigisaanik agguaassinissaq Kalaallit Nunaanni Eqqartuussivimmi eqqartuussisup aalajangiinera malillugu danskit pigisanik agguaassisarnermut eqqartuussiviani suliarisassanngortinneqarsinnaavoq, suliassamik suliarinninnissami tunngavigisassat tamanna pisariaqartissappassuk. Suliassaq nassiunneqalersinnagu akiitsoqartup pigisai, Kalaallit Nunaanniittut, nalunaarsorneqassapput.

Imm. 2. Toqusup pigisaanik agguaassinissaq, suliassamik suliarinninnissami tunngavigisassat tamanna pisariaqartissappassuk, Kalaallit Nunaanni Eqqartuussivimmi eqqartuussisup aalajangiinera malillugu Danmarkimi pigisanik agguaassisarnermut eqqartuussivimmi suliarisassanngortinneqarsinnaavoq. Suliassaq nassiunneqalersinnagu toqusup pigisai, Kalaallit Nunaanniittut, nalunaarsorneqassapput.

Imm. 3. Aappariit akornanni pigisanik agguaassineq Kalaallit Nunaanni Eqqartuussivimmi eqqartuussisup aalajangiinera malillugu Danmarkimi pigisanik agguaassisarnermut eqqartuussivimmi suliassanngortinneqarsinnaavoq, illuatungeriit tamanna kissaatigissappassuk imaluunniit suliassamik suliarinninnissami tunngavigisassat tamanna pisariaqartippassuk. Suliassaq nassiunneqalersinnagu aappariit pigisaat, Kalaallit Nunaanniittut, nalunaarsorneqassapput.

§ 270. Pigisanik agguaassinermut eqqartuussivimmi uppersaasiisoqartassaaq malittarisassat, saqitsaannernik suliassanik suliaqartarneq pillugu atuuttut, malillugit.

Imm. 2. Pigisanik agguaassinermut eqqartuussiviup agguagarsisussaq orniguteqqusinnaavaa apeqqutillu pigisanik suliaqarnermut pingaarutillit pillugit nassuiaateqaqqullugu. Iisimannittut pillugit malittarisassat taamatulli atortuutinneqassapput.

Kapitali 25

Nammineersinnaajunnaarsitsineq aamma pigisat tungaasigut siunnersortissaliisarneq pillugit suliassat

§ 271. Nammineersinnaajunnaarsitsineq aamma pigisat tungaasigut siunnersortissaliisarneq pillugit imaluunniit taakkuninnga atorunnaarsitsinissaq pillugu suliassat saqitsaannernik suliassatulli sularineqartassapput. Noqqaassut saqqummiunneqarsinnaavoq pineqartumit namminermi, politimesterimit kiisalu pineqartup apparisaanit imaluunniit inooqataanit, angajoqqaaminiit qummut ilaqutaanit imaluunniit kinguaavinit imaluunniit angajoqqaavisa kinguaavinit.

Imm. 2. Suliassanngortitsissut eqqartuussisumit sularineqassaaq pineqartumullu nalunaarutigineqassalluni.

Imm. 3. Eqqartuussisooq eqqartuussinermi sinniisitut pinnaatitamik ivertitsissaaq suliassap sularineqarnerani aggeqqusaasup soqutigisaanik isumaginnittussamik. Eqqartuussinermi sinniisitut pinnaatitaq ilaqutaasut imm. 1-imi taaneqartut akornanni qinerneqassanngilaq. Aggeqqusaasooq eqqartuussinissamut aggersarneqassaaq, taamaassananili taanna ima pissuseqarpat nammineersinnaajunnaarsitsinissamik apeqqut paasisinnaanagu.

Imm. 4. Nammineersinnaajunnaarsitsinissamik imaluunniit pigisat tungaasigut siunnersortiliinissamik aalajangiineq eqqartuussutikkut aalajangiinerussaaq. Suliassamut aningaasartuutit, matumunnga ilanngullugit eqqartuussinermi sinniisitut pinnaatitap akissarsiai, pisortaniit akilerneqassapput. Nammineersinnaajunnaarsitsinissaq imaluunniit pigisat tungaasigut siunnersortiliinissaq aalajangiiffigineqarepat eqqartuussisooq pineqartumut akisussaasussamik imaluunniit pigisat tungaasigut siunnersortissamik ivertitsissaaq.

Kapitali 26

Ataatassarsiuneq aamma meeqqanut akilersuutissanik aalajamersaasarneq pillugit suliassat

§ 272. Suliassaq naalagaaffimmi maani suliassiissutaasinnaavoq

1) suliassanngortitaq tamaani najugaqarluniluunniit najugaqarallarpap imaluunniit suliassanngortitap toqkkut qimagussimasup pigisai tamaani sularineqarpata imaluunniit sularineqarsimappata, imaluunniit

2) anaanaasooq meerarluunniit tamaani najugaqarpat.

Imm. 2. Imm. 1 sanioqqunneqarsinnaavoq naalagaaffimmik takornartamik isumaqatigiissuteqarnikkut.

§ 273. Suliassaq anaanaasup angerlarsimaffiani eqqartuussivikkut suliassiissutaassaaq.

Imm. 2. Anaanaasooq naalagaaffimmi maani najugarisamini eqqartuussivimmik suliassiiffissaqanngippat suliassaq suliassanngortitap najugaani eqqartuussivikkut suliassiissutigineqassaaq.

Imm. 3. Eqqartuussivimmik suliassinneqartussamik allamik innersuussivissaqanngippat suliassaq meeqqap najugaani eqqartuussivikkut imaluunniit inatsiseqarnermut ministerip aalajangiinera malillugu eqqartuussivikkut allakkut suliassiissutigineqassaaq.

Imm. 4. Illuatungeriit arlaata eqqartuussisoqarfik qimappagu illuatungeriit arlaannaalluunniit nassuiaateqariartinnagu suliassaq eqqartuussivimmut, tamatuma pinerani sularinnittussaviummut, innersuussutigineqarsinnaavoq. Aamma Kalaallit Nunaanni Eqqartuussivimmi eqqartuussisup suliassaq eqqartuussivimmi allami sularineqartussanngortillugu innersuussutigisinnaavaa, tamanna suliassap sularineqarneranut pisariillisaataassasorineqarpat imaluunniit pilertornerulersitsissasorineqarpat.

§ 274. Ataataassuseq akuersissutigineqarsinnaavoq allakkatigut nalunaaruteqarnikkut, nammineerluni politiinut ornigunnikkut tunniunneqarsimasussakkut, imaluunniit oqaatsitigut eqqartuussisumut nammineerluni nalunaaruteqarnikkut. Pisuni taamaattuni tamani eqqartuussisup akuersineq eqqartuussisut suliannik allassimaffimmut allattassavaa.

Imm. 2. Pisuni allani suliassaq sularineqassaaq eqqartuussinermi suliassatut nalinginnartut.

§ 275. Eqqartuussisoq suliassami suliassanngortitsissummik sanassaaq, eqqartuussinissap qaqugu sumilu pinissaa aalajangiivigalugu, suliassanngortitsissutillu meeqqamut ataataasinnaasumut imaluunniit ataataasinnaasunut nalunaarutigineqarnissaa isumagissavaa. Suliassanngortitsissummik sananngitsoortoqarsinnaavoq pineqartoq eqqartuussiviup aggeqqusineratigut orniguppat.

Imm. 2. Taamaasiornissamut immikkut ittunik pissutissaqassappat eqqartuussivik anaanaasumut imaluunniit suliassanngortitamut eqqartuussinermi sinniisitut pisinnaatitassamik ivertitsisinnaavoq.

§ 276. Illuatungeriit ilisimannittullu ornigunnissaminnut pisussaaffeqarput aammalu suliassamut pingaaruteqarsinnaasut tamaasa pillugit oqaaseqaateqarnissamut. Ilisimannittunut pinngitsaaliissutaasartut pillugit malittarisassat taamatulli atortuutinneqassapput.

Imm. 2. Illuatungeriit pisussaaffigaat eqqartuussiviup suliassamut paasinarsaatissatut pingaaruteqarsorisaatut misissortissallutik.

§ 277. Ataataassarsiuinermik suliassani eqqartuussinerit matoqqasuussapput.

§ 278. Eqqartuussivik suliassami eqqartuussummik kingullermik nalunaaruteqartuusimasoq suliassamik nangititsisinnaavoq aallaqqaataaniit suliassanngortillugu, illuatungeriit arlaata qularnarunnaarsippagu eqqartuussut eqqunngitsunik tunngaveqarsimasoq aammalu nutaanik paasissutissiineq aalajangiinermik allannguuteqartitsisinnaasoq.

Imm. 2. Malittarisassaq taanna taamatulli atortuutinneqassaaq ataataassutsimik akuersissutiginnissimasumut.

Imm. 3. Suliassap nangeqqinneqarnissaanik noqqaassut ataataasumit imaluunniit akilersuisussaasumit eqqartuussivimmut saqqummiunneqassaaq, pissutsinik noqqaanermut tapersiisuusunik taassuma ilisimasaqalerneraniit kingusinnerpaamik ukiup ataatsip qaangiunnerani, meeqqallu inunngorneraniit kingusinnerpaamik ukiut tallimat qaangiunneranni.

Imm. 4. Aalajangiinermik suliareqqitassanngortinneqarsinnaanngikkaluamik suliareqqitassanngortitsineq imaluunniit piffissaliussat imm. 3-mi taaneqartutut qaangiutereersut nangititsinissaq Kalaallit Nunaata Eqqartuussisuuneqarfiani eqqartuussisuunermit akuerineqarsinnaavoq, taamaasiornissamut immikkut ittunik tunngavissaqarpat aammalu ilimagineqartariaqarpat suliassamik sularinneqqinnissaq meeqqamut annertuunik ajoqtissarsissutaassanngitsoq.

§ 279. Meeqqamut akilersuutissat eqqartuussivimmit aalajangersarneqartassapput averusernissamik imaluunniit avinnissamik eqqartuussummumut atatillugu imaluunniit angajoqqaat inooqatigiikkunnaarneranni sorliup meeqqanut angajoqqaatut oqartussaassuseqartinneqarnissaanik aalajangiinermut atatillugu tamanna pissagaangat. Pisuni allani meeqqamut akilersuutissat eqqartuussisumit aalajangerneqartassapput.

Imm. 2. Eqqartuussisoq akilersuutisisinnaatitaasumiit imaluunniit akilersuisussaasumiit noqqaavigineqarnikkut akilersuutininik sukkulluunniit allannguuteqartitsisinnaavoq.

Kapitali 27

Aappariinneq imaluunniit angajoqqaatut oqartussaassuseqarneq pillugu suliassat

§ 280. Immikkoortumi matumani malittarisassat malillugit sularineqartassapput

- 1) averuserneq, avinneq imaluunniit aappariinnermik atorunnaarsitsineq pillugu suliassat,
- 2) angajoqqaatut oqartussaassuseqatigiinnerup atorunnaarsinneqarnissaanik suliassat,
- 3) angajoqqaat angajoqqaatut oqartussaassuseqatigiitsinnagit angajoqqaatut oqartussaassuseqarnerup anaanaasumiit ataataasumut nuunnissaanik suliassat,

- 4) angajoqqaatut oqartussaassusillip toqunerani oqartussaassuseqarnemik aalajangiinerit pillugit suliassat,
- 5) angajoqqaatut oqartussaassuseqarneq pillugu isumaqatigiissummik imaluunniit aalajangiinermik allannguuteqartitsinissamik suliassat,
- 6) angajoqqaat arlaata angajoqqaatut oqartussaassuseqataannngitsup meeqqaminik najorteqartarsinnaanerani suliassat,
- 7) averusernermi, avinnermi imaluunniit aappariinnermik atorunnaarsitsinermi atugassarititaasunik allannguuteqartitsinissaq imaluunniit akerliliineq pillugu imaluunniit averusernermi, avinnermi imaluunniit aappariinnermik atorunnaarsitsinermi pigisanik agguataarinissaq pillugu isumaqatigiissutaasunik akerliliineq pillugu aappariit akornanni suliassat,
- 8) averusersimanerup atuunnerani imaluunniit atorunnaarsimanerani aalajangiiffiginiagassatut aappariit akornanni suliassat, aamma
- 9) illuatungeriit aappariunerisa imaluunniit aappariunnginnerisa aalajangiiffiginiarnissaanik suliassat.

§ 281. Inatsiseqarnermut ministeri imaluunniit ministerip taamaasiornissamut piginnaassusiligaa imaluunniit aappariissimanermi aappaasoq aappariinnerup atorunnaarsinneqarnissaanik suliassiissuteqarpat, suliassaq aappariinnut tamanut suliassiissutaassaaq. Suliassaq eqqartuussivikkut § 284 malillugu aappariit arlaannik suliassannngortitsiviusinnaasukkut suliassiissutaassaaq.

§ 282. Illuatungeriit nammineerlutik iliuuseqarsinnaapput, massa nammineersinnaanngikkaluarlutik imaluunniit pigisat tungaasigut siunnersorteqartitaagaluarlutik. Taamaattorli illuatungeriinni illuatungiusoq niaqulaarnermik nappaateqarneq imaluunniit eqqarsartaatsikkut amigaateqarneq pissutigalugu nammineersinnaajunnaarsitaasimappat sernissuisuusoq taanna sinnerlugu iliuuseqassaaq. Sernissuisuusoq aatsaat eqqartuussiviup akuersineratigut suliassiissuteqarsinnaavoq.

§ 283. Danskiteqartuussisarnermik inatsisaanni § 448 c malillugu aalajangerneqartassaaq aappariinnermik suliassaq naalagaaffimmi maani (Danmarkimi imaluunniit Kalaallit Nunaanni) suliassiissutaassanersoq.

Imm.2. Danskiteqartuussisarnermik inatsisaanni § 448 f malillugu aalajangerneqartassaaq angajoqqaatut oqartussaassuseqarnermik suliassaq naalagaaffimmi maani (Danmarkimi imaluunniit Kalaallit Nunaanni) suliassiissutaassanersoq.

§ 284. Suliassaq suliassannngortitap najugaani eqqartuussivikkut suliassiissutaassaaq.

Imm. 2. Suliassannngortitaq naalagaaffimmi maani najugarisami eqqartuussivimmik suliassiivissaqanngippat suliassiissuteqartup najugaani eqqartuussivik suliassiissuteqarfiussaaq.

Imm. 3. Illuatungeriit arlaannaallunniit naalagaaffimmi maani najugaanni eqqartuussivimmik suliassiissuteqarfissaqanngippat suliassaq inatsiseqarnermut ministerip suliassiivissatut aalajangigaa aqutigalugu suliassiissutigineqassaaq.

§ 285. Aappaasumut akilersuutissat aappariinnermik suliassamut atatillugu eqqartuussummi aalajangiiffigineqassapput.

Imm. 2. Aappariit akilersuutissat annertussusissaannik apeqqut kinguartissappassuk kingusinnerusukkut aalajangiiffigisassannngortillugu, kingusinnerusukkullu aalajangiisoqassappat akilersuutissat annertussusaasa allannngortinneqarnissaat pillugu, tamanna eqqartuussisup aalajangiissuteqarneratigut pissaq.

§ 286. Pissutsit, aappariinneq imaluunniit angajoqqaatut oqartussaassuseqarneq pillugu sionatigut suliassasumi eqqartuussuteqarfineqarsimallutik atuutsinneqarsimasut imaluunniit atuutsinneqarsinnaasimasut, nutaamik suliassiissuteqarnermi tunngavigisassatut atorneqarsinnaanngillat.

§ 287. Eqqartuussiviup aalajangersinnaavaa illuatungiusup aappaa imaluunniit illuatungeriit marluullutik meeqqamik oqaloqatiginninnissami, namminersorsinnaanermik inatsimmi § 25 malillugu pisussami, najuutissanngitsut. Suliassaq aalajangiiffigineqalersinnagu illuatungeriit oqaloqatigiissutaasimasunik ilisimatinneqassapput, tamanna najuutinngitsoortitsinermi tunngavigisanut akerliussanngippat.

§ 288. Eqqartuussinerit matoqqasuussapput. Eqqartuussutinik tamanut issuaanerni inuit eqqartuussummi taaneqartut aqqi, atorfii najugaalluunniit tamanut saqqummiunneqassanngillat imaluunniit allatut iliornikkut pineqartut kikkussusii saqqummiunneqassanatik. Aalajangersakkamik unioqqutitsineq Kalaallit Nunaanni pinerluttulerinermi inatsit malillugu pineqaatissiissutaasinnaavoq.

§ 289. Piffissaq suliareqqitassanngortitsivissaq eqqartuussutip nalunaarutigineqarneraniit sapaatit akunnerinik arfineq-pingasunik sivissuseqassaaq. Illuatungeriit arlaat eqqartuussutip nalunaarutigineqarnerani najuussimanngippat piffissaliussaq sapaatit akunneri 16-it tikillugit sivitsorneqarsinnaavoq. Tamannali aatsaat atuutissaaq eqqartuussisut naliliippata silap tungaatigut pissutsinit eqqartuussummik nalunaarutiginninnissaq imaluunniit suliareqqitassanngortitsinissaq kinguarsarneqarsinnaasoq.

Imm. 2. Piffissap suliareqqitassanngortitsivissap qaangiutereerneratigut eqqartuussummik, averusernissamat, avinnissamat imaluunniit aappariinnermik atorunnaarsitsinissamat tunngasumik, imaluunniit aappariinnerup atuukkunnaarsimaneranik aalajangiiffiusimasumik, suliareqqitassanngortitsinissaq akuerineqarsinnaanngilaq. Taamaattorli atugassarititanik immikkut suliareqqitassanngortitsinissaq akuerineqarsinnaavoq, tak. *imm.* 3.

Imm. 3. Eqqartuussutit, averusernermut, avinnermut imaluunniit aappariinnerup atorunnaarsinneqarneranut tunngasut atugassarititanut tunngatillugu imaluunniit atugassarititat ataasiakkaat immikkut suliareqqitassanngortinneqarsinnaapput. Suliareqqitassanngortitsineq atugassarititanut taamaallaat tunngassuteqarpat eqqartuussiviup suliareqqitassanngortitsiviusup averuserneq, avinneq imaluunniit atorunnaarsitsineq pillugu eqqartuussutip aalajangersagartaa kisiat allanngortissinnaavaa, tamatuminna suliareqqitassanngortitsineq piffissarititaasoq qaangiutsinnagu aallartinneqarsimappat.

§ 290. Aappariinneq imaluunniit angajoqqaatut oqartussaassuseqarneq pillugu suliassaq illuatungiusup toqunerata kingorna suliassiissutaasinnaanngilaq.

Imm. 2. Eqqartuussut nalunaarutigineqartinnagu illuatungeriit arlaat toquppat suliassaq unitsinneqassaaq.

§ 291. Suliassaq suliassiissuteqarnissamat piffissarititap, aappariilertarneq aappariigunnaartarnerlu pillugit inatsimmi aalajangersarneqarsimasup, qaangiutinnginnerani suliassiissutaasoq itigartitsissutigineqarpat, suliassiisoq, naak piffissarititaq qaangiussimagaluartoq, suliassanngortitseqqiisinnaavoq eqqartuussinermiit suliassap itigartinneqarfigisaaniit qaammat ataaseq qaangiutsinnagu.

Imm. 2. *Imm.* 1 taamatulli atortuutinneqassaaq averusernissamat avinnissamulluunniit akuersissut itigartitsissutigineqarpat suliarlu tamatuma kingorna eqqartuussivinnut suliassanngortinneqarpat. Suliassap eqqartuussivinnut suliassiissutigineqarnissaanut piffissarititaq naatsorsorneqassaaq itigartitsinerup pineqartumut nalunaarutigineqarneraniit aallartittumik.

Kapitali 28

Kiffaanngissusii aanermik pisortatigut aalajangerneqarsimasumik misiliineq

§ 292. Inuk, pisortatigut oqartussaaitamit kiffaanngissusiiarneqartoq imaluunniit inuk, pineqartoq sinnerlugu iliuuseqartoq, piunasaqarsinnaavoq kiffaanngissusii asimanerup inatsisinut

naapertuuttuunera pillugu imaluunniit siusinnerusukkut kiffaanngissusiaagaasimanerup atuutiinnarnissaa pillugu apeqqut eqqartuussivimmut aalajangiigassanngortinneqarluni suliassiisutiginеqassasoq. Tamannali atuutissanngilaq pinerlunnernik eqqartuussisarnerup iluani aamma nunami allamiut pillugit inatsit naapertorlugu kiffaanngissusiaanermi.

Imm. 2. Pisortatut oqartussaasoq, kiffaanngissusiaanissamik aalajangiisoq, kinguarsarani kingusinnerpaamillu kiffaanngissusiaanerup aallartinnerani pisussaavoq ilitersuutigissallugu suliassaq eqqartuussivimmut suliassanngortinneqarsinnaasoq.

Imm. 3. Eqqartuussivikkut misiliisoqarnissaq pillugu noqqaassuteqartoqarpat pisortanut oqartussaataasup, kiffaanngissusiaanissamik aalajangiisimasup imaluunniit tamatuminna atorunnaarsitsiumanngitsup, suliassaq piaarnerpaamik ajornanngippallu kingusinnerpaamik noqqaassuteqarnermiit ullut arfineq-marluk qaangiutsinnagit, eqqartuussivimmut pineqartup najugaqarfignasiittumut saqqummiutissavaa.

Imm. 4. Eqqartuussivikkoortitsinissaq pillugu misiliinissamik noqqaassuteqarneq kiffaanngissusiaanerup aallartinneqarnissaanut imaluunniit tamatuma atuutiinnarnissaanut akornutaassanngilaq, eqqartuussisut tamanna aalajangersimanngippassuk.

Imm. 5. Kiffaanngissusiaanerup inatsisinut naapertuuttuunera eqqartuussutikkut atuuttussanngortinneqarsimappat eqqartuussisut eqqartuussivikkoortitsinissamik misileeqqinniarnеq pillugu noqqaassut itigartitsissutigisinnaavaat, ukiup ataatsip qaangiunnissaa tikillugu, eqqartuussummi sivikinnerusumik piffissaliisoqarsimanngippat.

Imm. 6. Inatsisinut naapertuutinningsumik kiffaanngissusiaasimaneq pillugu pisortaniit taarsiivigineqarnissamik piumasagaat kiffaanngissusiaanerup inatsisinut naapertuuttuunera pillugu suliassap suliarineqarnerani noqqaassuteqartoqareerneratigut aalajangiiffigineqassaaq. Eqqartuussisulli taarsiivigineqarnissamik apeqqut kinguartillugu kingusinnerusukkut suliarisassanngortissinnaavaat.

§ 293. Suliassami illuatungeriittut naatsorsuunneqassapput kiffaanngissusiaagaasimasoq, inuk alla taanna sinnerlugu iliuuseqartoq aamma pisortat oqartussaataat kiffaanngissusiaanissaq pillugu aalajangiisimasoq.

Imm. 2. Eqqartuussisоq eqqartuussinermi sinniisitut pinnaatitassamik ivertitsissaaq kiffaanngissusiaagaasimasup soqutigisaanik isumaginnittussamik, taamaattoqassanngilarli kiffaanngissusiaagaasimasup tamanna kissaatiginnippagu.

Imm. 3. Kiffaanngissusiaasoqareersimappat kiffaanngissusiaagaasimasoq eqqartuussivimmukartinneqassaaq, eqqartuussisut tamanna kissaatigippassuk. Kiffaanngissusiaagaasimasoq nammineq najuukkusuppat pineqartoq taanna nalinginnaasumik najuuttussanngortinneqartariaqarpoq, eqqartuussisut naliliinngippata taassuma qanoq innera tamatumunnga akornutaassasoq imaluunniit ima ajornartorsiutitaqartigissasoq suliassap kinguartinneqarujussuarneranik kinguneqassalluni. Pisuni taama ittuni eqqartuussummi aalajangerneqarsinnaavoq kiffaanngissusiaagaasimasoq najuutsinneqarsinnaaleriarpat suliassaq suliareqqinneqassasoq.

Imm. 4. Illuatungeriit oqaaseqaateqarnissamut periarfissaqartinneqareerpata uppersaasiinerlu naammassereerpata eqqartuussisut eqqartuussutikkut aalajangiiffigissavaat kiffaanngissusiaanissamik aalajangiineq atortussanngortinneqassanersoq imaluunniit atorunnaarsinneqassanersoq.

Kapitali 29

Akuersissutitaqanngitsumik qitornavissiarthaarnermik eqqartuussivikkut misiliineq

§ 294. Kapitalimi matumani malittarisassat atorneqassapput suliassani qitornavissiarthaarnerneq pillugu inatsimmi § 11 malillugu eqqartuussisunut suliassanngortinneqartuni.

§ 295. Suliassaq suliassanngortinneqartassaaq eqqartuussivimmut, aalajangiinerup eqqartuussivikkut misilinneqarnissaanik kissaatqarsimasup (maalaaruteqartup) najugarisaaniittumut. Maalaaruteqartoq naalagaaffimmi maani majugarisamini eqqartuussisoqarfimmik suliassiivissaqanngippat suliassaq meeqqap najugaani eqqartuussivimmut suliassanngortinneqassaaq. Maalaaruteqartup imaluunniit meeqqap naalagaaffimmi maani najugaani eqqartuussisoqarfeqanngippat suliassaq eqqartuussivimmut inatsiseqarnermut ministerip toqqagaanut suliassiissutigineqassaaq.

Imm. 2. Suliassaq eqqartuussivimmut suliassanngortinneqartassaaq Naalagaaffiup sinnisuata eqqartuussivikkut misiliinissaq pillugu noqqaassumik tigusaqareerneraniit kingusinnerpaamik sapaatit akunneri pingasut qaangiunneranni. Naalagaaffiup sinnisuata suliassap pappiarartai eqqartuussivimmut nassutissavai ilanngutissallugit aalajangiineq misileqquneqartoq pillugu paasissutissat kiisalu pissutsinut uppersaatsissanullu, suliassap aalajangiiffigineqarnissaanut pingaaruteqarsinnaasunut atuutsinniarneqartunut, nassuiaat naatsoq.

Imm. 3. Eqqartuussivikkut misiliinissamik noqqaassut piffissarititaq qitornavissiartaarneq pillugu inatsimmi § 11, imm. 1-imi taaneqartoq qaangiutereersoq tiguneqarsimappat eqqartuussiviup suliassaq itigartitsissutigissavaa, piffissamik qaangiineq utoqqatsissutisartaqanngippat imaluunniit suliassamik sularinninnissamut immikkut ittunik tunngavissaqanngippat. Aalajangiineq eqqartuussisup aalajangiinerissavaa tunngavilersugassaq. Nunatta eqqartuussisuunekarfiata aalajangiineranik Eqqartuussiviit Qullersaanut saqqummiussinissaq akuerineqarsinnaangilaq.

§ 296. Naalagaaffiup sinnisua maalaaruteqartorlu suliassami illuatungeriittut isigineqassapput. Maalaaruteqartoq nammineersinnaassuseqanngikkaluarluni imaluunniit pigisat tungaasigut siunnersortissaqartitaagaluarluni nammineq peqataassaaq.

Imm. 2. Eqqartuussisoq maalaaruteqartup eqqartuussinermi sinniisitut pisinnaatitassaanik ivertitsissaaq, taamaattoqassanngilarli maalaaruteqartup tamanna kissaatiginngippagu.

Imm. 3. Eqqartuussisoq meeqqamut sernersuisussamik ivertitsisinnaavoq, taamaassappat taanna suliassami illuatungiusutut peqataassaaq.

§ 297. Pissutsit immikkut ittut tamatumunnga tunngavissaqartitsippata eqqartuussisoq aalajangiisinnaavoq, maalaaruteqartoq immaqalu aamma eqqartuussinermi sinniiseq uppersaasiisoqarnerani tamatumaluunniit ilaani najuutissanngitsut. Maalaaruteqartoq uppersaasiisarnerup imarisaanik suliassaq aalajangiiffigineqalersinnaagu ilisimatinneqassaaq, tamanna tunngavigisanut peqataanngitsoortitsisunut akerliussanngippat.

§ 298. Eqqartuussinerit matoqqasumik ingerlanneqassapput.

Imm. 2. Eqqartuussutinik tamanut ammasumik issuaanermi inuit, suliassap sularineqarnerani taaneqartut, arlaannaasaluunniit aqqi, atorfi najugaalluunniit taaneqassanngillat. Unioqquitsineq pinerluttulerinermi inatsit malillugu pineqaatissiissutaasinnaavoq.

Imm. 3. Angajoqqaajusut imaluunniit taakkua sinnerlugit sernersuisuusup qitornavissiartaarniartoq ilisarimanngippassuk qitornavissiartaarniartup ilisimannittullu aqqi eqqartuussisut suliannik allassimaffiisa assilineqarnerini imaluunniit eqqartuussisut aalajangiinerisa assilineqarnerini taaneqassanngillat.

§ 299. Piffissap suliareqqitassanngortitsivissap qaangiutereerneratigut suliareqqitassanngortitsinissaq akuerineqarsinnaangilaq.

Immikkoortoq V

Pinerlunnernik suliassat sularineqartarnerat

Aalajangersakkat nalinginnaasut

Pinerlunnernik eqqartuussisarnerup atuuffii il.il.

§ 300. Pinerlunnernik suliassat sularineqartassapput immikkoortumi matumani malittarisassat malillugit, inatsisikkut allatut immikkut ittunik aalajangiisoqarsimangippat.

§ 301. Aammattaaq immikkoortumi matumani malittarisassat malillugit sularineqartassapput suliassat, tamanna inatsisikkut, inatsisartut inatsisaasigut imaluunniit inatsisartut peqqussutaasigut immikkut aalajangerneqarsimatillugu aamma suliassat piumasqaateqarfiusut makku pillugit

- 1) kinguneqartitsinerit immikkut ittut, inatsisit ilaannik aalajangersimasunik, matumunnga ilanngullugit illuutit pillugit inatsisit aamma akileraarutit pillugit inatsisit, unioqquitsinerit pisortanut naammassininniagassangortillugit aalajangersarneqarsimasut,
- 2) peqatigiiffimmik atorunnaarsitsinissaq, imaluunniit
- 3) kingornussissinnaassusermik annaasaqarneq.

§ 302. Pinerlunnernik suliassat, inuinnaat unnerluussuteqarfigisaat, sularineqartassapput saqitsaanernik sularinnittarneq pillugu malittarisassat malillugit.

Imm. 2. Suliassani imm. 1-imi taaneqartuni pinerlineqartuusoq unnerluutiginnissinnaatitaasuuvoq. Taanna nammineersinnaasuunngippat nammineersinnaanngitsut eqqartuussulersuussisarnerat pillugu malittarisassat taamatulli atortuutinneqassapput. Pinerlineqartoq toqusimappat imaluunniit toqkkut qimagussimasumut iliuusaasimasoq pinerluttuliorneruppat, unnerluutiginnissinnaatitaasut tassaassapput toqkkut qimagussimasup apparisaa, apparisatut inooqatigisaa, angajoqqaavi, qitornai qatanngutaaluunniit.

Imm. 3. Kinaluunniit, imm. 2 malillugu unnerluutiginnissinnaatitaasoq, taamatut piginnaatitaanernik taamaatitsisinnaavoq. Aamma taamaassaaq, naak suliassaq suliassiissutaareersimagaluortoq.

Eqqartuussivik suliassinneqartussaq

§ 303. Pinerlunnernik suliassaq sumiiffimmi iliuuseqarfiusimasumi eqqartuussivimmut suliassangortinneqarsinnaavoq.

Imm. 2. Pinerluuteqarnermi iliuusaasimasut arlaliuppata imaluunniit pinerluuteqarnerit arlaliuppata, eqqartuussisoqarfimmi assigiinngitsuni piliaasimasut, suliassaq taakkua arlaanni sumiluunniit eqqartuussivimmut suliassiissutaasinnaavoq.

Imm. 3. Inatsisinik unioqquitsineq Kalaallit Nunaata immakkut oqartussaaffigisaata avataani umiarsuarmi piliarineqarsimappat suliassaq sumiiffimmi umiarsuup Kalaallit Nunaannut apuunnermini tikeqqaagaani eqqartuussivimmut suliassiissutaasinnaavoq.

§ 304. Pinerlunnernik suliassat aammattaaq sumiiffimmi pasisaasup najugaqarfigisaani imaluunniit najorallagaani eqqartuussivimmut suliassiissutaasinnaapput.

§ 305. Eqqartuussivik aalajangiisinnaavoq pinerlunnernik suliassaq eqqartuussivimmut allamut, §§ 303 aamma 304 malillugit inatsisinut naapertuuttumik suliassiissuteqarfiussinnaasumut, nuunneqassasoq, tamanna ilisimannittut najugarisaat imaluunniit tunngavigisassat allat tunngavigalugit naleqquttuorineqarpat.

Imm. 2. Taamaasiornissamut immikkut ittunik tunngavissaqartillugu Kalaallit Nunaanni Eqqartuussivik aalajangiisinnaavoq suliassaq eqqartuussivimmi, malittarisassat siuliniittut malillugit suliassiissuteqarfiusussaangitsumi, sularineqassasoq.

Imm. 3. Imm. 1 malillugu nuussinissamik aalajangiineq eqqartuussivimmit malersuiiffulersumit aalajangiinerussiaq.

Imm. 4. Eqqartuussiviup imm. 1 aamma 2 malillugit aalajangiineri aalajangiinerussapput tunngavilersugassat.

§ 306. Suliassaq Danmarkimi suliassiissutaasinnaavoq imaluunniit pinerluttulerinermi inatsimmi § 7 malillugu tassani malersugassanngortinneqarsinnaavoq.

§ 307. Eqqartuussivimmik suliassinneqartussamik toqqaaniarnermi pingaartumik soqutiginiarneqartariaqarpoq suliassaq sumi pitsaanerpaamik paasinarsinneqarsinnaasoq aammalu eqqartuussivimmi sorlermi uppersaasiinissaq, ingammillu ilisimannittunik killisiuinissaq, pisariinnerpaamik pisinnaaner-soq.

§ 308. §§ 303-307 pissutsit assigiinngiiaarnerisa nassatarisaannik allannguutitalerlugit taamatulli ator-tuutinneqassapput suliassat § 301-imi taaneqartut pillugit.

Pinerlunnernik suliassanik ataatsimut katitsisarneq immikkoortiterisarnerlu

§ 309. Arlaleriarluni pinerluuteqarsimasutut pasisaasumut imaluunniit pinerluuteqarnermi ataasiinnaasumi pasisaasunut arlaliusunut ataatsimut malersuisoqassappat tamanna pisassaaq suliassamut ataatsimut ataatsimoortitsinikkut, ataatsimoortitsilluni malersuinissaq naleqquttuosorinnangitsutut isumaqarfigineqanngippat.

§ 310. Eqqartuussivik noqqaavigineqarnikkut imaluunniit nammineerluni sulissuteqarnermigut aalajangiisinnaavoq suliassat § 309 malillugu ataatsimut katititat immikkoortinneqassasut.

Kapitali 31

Unnerluutiginnissut

§ 311. Pinerlunnernik suliassanik, inatsisini tunngavigisassat immikkut ittut naapertorlugit inuinnaat unnerluutiginnissuteqarfigisassarinnngissaannik, unnerluutiginnissuteqarneq politiit unnerluussisussaataitaasutut isumagisassaraat.

Unnerluutiginnissummik taamaatitsineq

§ 312. Suliassami unnerluutiginnissut tamakkerlugu ilaannaaluunniit taamaatiinneqarsinnaavoq

- 1) pasilliut tunngavissaqanngitsuusoq paasinarsippat,
- 2) malersueqqinnissaq pasisaasup pisuutitaanissaanik kinguneqassangatinneqanngippat, imaluunniit
- 3) suliassap ingerlanneqarnissaa kinguneqassappat ajornartorsiutinik, aningaasartuutinik imaluunniit suliassap suliarineqarneranut piffissanik, suliassap pingaarutaanut aamma pineqaatissiissutissatut ilimagineqarsinnaasumut naleqqiullugit naleqqutinngitsunik.

Unnerluusummik tunuartitsineq

§ 313. Suliassami unnerluussinissaq tamakkerlugu ilaannaaluunniit tunuartinneqarsinnaavoq

- 1) pisimasup iliuuserineqarsimasup pingaaruteqarpiannnginnera pissutigalugu unnerluussinngitsoornissaq naleqquttuosorineqarpat,
- 2) pinerluttulerinermi inatsimmi §§ 6 imaluunniit 124 atorneqarsinnaappat aamma pineqaatissiisoqannginnissaa imaluunniit annikitsuinnarmik pineqaatissiisoqarnissaa ilimagineqarsinnaappat,

3) pasisaq pinerluuteqarnerup pinerani 18-it inorlugit ukioqarsimappat aamma unnerluussinissamik tunuartitsinissaq iliuserisimasamut suliassamilu pissutsinut allanut naleqqiullugu naapertuutinngitsuosorineqanngippat,

4) suliassap ingerlannissaa ajornartorsiutinik, aningaasartuutinik imaluunniit suliassap suliarineqarneranut piffissanik, suliassap pingaarutaanut aamma pineqaatissiissutissatut ilimagineqarsinnaasumut naleqqiullugu naleqqutinngitsunik, nassataqassappat imaluunniit

5) tamanna aalajangersakkanit rigsadvokatimit imaluunniit inatsiseqarnermut ministerimit aalajangersagaasunit aalajangersaavigineqarsimappat.

Imm. 2. Pisuni allani unnerluussinissaq taamaallaat tunuartinneqarsinnaavoq pissutsinik immikkut sakkukillisaataasunik allanilluunniit immikkut ittunik atuuttoqarpat aammalu unnerluussinissaq soqutigisassat nalinginnaasut pissutigalugit pisariaqarsorineqanngippat.

Imm. 3. Politiit unnerluussinissamik imm. 1 malillugu tunuartitsinnaapput, kisiannili unnerluussinermik imm. 2 malillugu tunuartitsinissaq rigsadvokatimit aalajangerneqartassaaq.

Kalerrisarneq aamma aalajangiinermik allanngartitsisarneq

§ 314. Unnerluussummik taamaatitsinermi imaluunniit unnerluussinissamik tunuartitsinermi pasisaq allallu tamatumani soqutigisallit aalajangiinermik ilisimatinneqartassapput.

Imm. 2. Unnerluussummik taamaatitsinissamik imaluunniit unnerluussinissamik tunuartitsinissamik aalajangiineq unnerluussisussaataasumut qullersaasumut maalaarutigineqarsinnaavoq § 65-imi malittarisassat malillugit.

Imm. 3. § 313, imm. 1, nr. 1-3 aamma 5 kiisalu imm. 2, naapertorlugit unnerluussinissamik tunuartitsinermi pasisap noqqaassutigisinnaavaattaq suliassaq eqqartuussisunut saqqummiunneqassasoq. Noqqaassut aalajangiinerup nalunaarutaareerneraniit kingusinnerpaamik sapaatit akunnerisa sisamat qaangiunneranni tunniunneqassaaq pisortatut oqartussaasumut suliassami aalajangiisuusimasumut, aammalu tamanna pereerpat suliassap kapitali 38-mut aamma 39-mut naapertuuttumik suliarineqarnissaanik sulissutiginnittussamut. Peqatigisaanik maalaarutaasinaasoq imm. 2 malillugu naammassineqassaaq.

§ 315. Unnerluussuteqarnissamik aalajangerneq imaluunniit §§ 312-313 malillugit aalajangerneq allanngartinneqarsinnaavoq rigsadvokatimit imaluunniit inatsiseqarnermut ministerimit. Taamaatorli unnerluussummik taamaatitsisoqartillugu imaluunniit unnerluussinissamik tunuartitsisoqartillugu allannguuteqartitsinissaq aatsaat pisinnaavoq tamatuminnga nalunaarut pasisamut nalunaarutiginnissutaassappat, unnerluussummik taamaatitsinerup imaluunniit unnerluussinissamik tunuartitsinerup pineqartumut nalunaarutaareerneraniit kingusinnerpaamik qaammatit pingasut qaangiutsinnagit, piffissaq eqqorlugu nalunaarutiginninnissaq pasisap atugarisaanik akornuserneqanngippat.

Imm. 2. Inatsiseqarnermut ministeri unnerluussummik taamaatitsisarneq, unnerluussinissamik tunuartitsisarneq aammalu unnerluussuteqartarneq pillugit erseqqinnerusunik malittarisassiorsinnaavoq, matumunnga ilanngullugit suliassanik taama ittunik rigsadvokatimut imaluunniit inatsiseqarnermut ministerimut saqqummiussinissamut pisussaaneq pillugu malittarisassanik.

Inuinnaat pinerlunnernik suliassiissutaannik pisortatigoortumik malersuisarneq

§ 316. Iliuseqarneq inatsisinik unioqquitsinertalik inuinnaat unnerluussissutigisassaat aamma inatsisinik unioqquitsinertaqarpat, pisortatigoortumik unnerluussissutigisassamik, politiit inuinnartut unnerluussuteqarsinnaatitaasumiit noqqaavigineqarnermikkut inatsisinik unioqquitsinernik taakkuninnga ataatsimoortitsillutik malersuisinnaapput.

Imm. 2. Inuinnaap illuatungiliuttup pisuni imm. 1-imi taaneqartuni suliassaq sumulluunniit killikkaluarpas malersuineq, aallarteqqusimasani, unitsisinnaavaa.

§ 317. Inatsisinik unioqquitsinermik inuinnaat malersorniarsinnaasaannik pisortatigoortumik unnerluussutiginnittoqarsinnaavoq, tamanna pingaartitassat nalinginnaasut pisariaqartissappassuk. Tamannali atuutissanngilaq inuinnaat unioqquitsineq pillugu suliassiissutaanni eqqartuussuteqartoqareersimappat.

Imm. 2. Imm. 1 malillugu pisortatigoortumik malersuiniarneq aallartereersillugu inuinnaq unnerluussuteqarsinnaatitaajunnaassaaq. Politiit malersuilernertik unitsippassuk inuinnaq unnerluussuteqarsinnaavoq imaluunniit unnerluussutiminik nangitsisinnaavoq.

Malersuiniarnerup kingusinnerusukkut taamaatinneqartarnera

§ 318. Suliassami eqqartuussuteqartoqanngikkallartillugu pinerlunnermik suliassamik malersuineq taamaatinneqarsinnaavoq. Malersuineq eqqartuussutissap isumaqatigiinniutigineqalereerneragut taamaatinneqarpat eqqartuussisut pinngitsuutitsissummik eqqartuussuteqassapput. Pisuni allani eqqartuussisut noqqaavigineqarnermik kingorna malersuilersimanermik taamaatitsineq pillugu allakkatigut nalunaarusiortassapput.

Akerleriinnik isumaqatigiissitsiniartarnek

§ 319. Inatsiseqarnermut ministerip Namminersorerullutik Oqartussat oqaloqatigereerlugit akerleriinnik isumaqatigiissitsiniartarnek pillugu misiligummik aaqqiineq aallartissinnaavaa.

Kapitali 32

Pasisaq taassumalu illersuisua

Illersuisoqarsinnaatitaaneq

§ 320. Kinaluunniit pinerluuteqartutut pasisaasoq illersuisussaminik eqqartuussinermi najuussinnaatitaasumik nammineerluni toqqaasinnaatitaavoq imaluunniit malittarisassat ataani allassimasut malillugit eqqartuussisunit taama ittumik ivertitsivigineqartussaavoq.

Imm. 2. Politiit pasisaq ilitsersussavaat eqqartuussisunit illersuisussalernerqarsinnaanera pillugu. Politiit nalunaarusiaanni allassimassaaq pasisaq eqqortumik ilitsersorneqarsimasoq. Politiit pasisamik ilitsersuisarnissaat pillugu inatsiseqarnermut ministeri erseqqinnerusunik malittarisassiussaaq.

Imm. 3. Pasisaq tamatuminnga kissaateqarpat imaluunniimmi suliassaq taamaasiornissamut tunngavis-saqartitsippat politiit illersuisuliinissamik apeqquut eqqartuussisunut saqqummiutissavaat. Aamma taamaassaaq pasisaq pisariaqarneratut illersuisoqarnersoq nalornissutigineqarpat.

Imm. 4. Eqqartuussisut politiit pasisarlu illersuisussamik ivertitsineq pillugu tamatuminngalu itigar-titsineq pillugu kalerrittassavaat.

Imm. 5. Eqqartuussisut namminneerlutik sulissuteqarnermikkut inuit illersuisutut eqqartuussinermi najuussinnaatitaanngitsut ivertinneqarnissaat itigartitsissutigisassavaat.

Illersuisussamik ivertitsineq

§ 321. Eqqartuussisut pasisaq illersuisulissavaat, pasisaq nammineerluni ornigussinnaatitaasumik ill-ersuisussaminik, suliassami orniguttartussamik, pissarsisimanngippat, aamma

1) tiggummigallagaanissaq imaluunniit tamatumunnga taarsiullugu iliuusissatut piareersaatit pillugit, imaluunniit tigusarinninnerup atuutiinnarnissaa pillugu noqqaassuteqartoqarpat,

2) suliassami unnerluussuteqartoqarsimalluni unnerluutigineqartoq tamatumani pisuutitaassappat ilimagineqartariaqarluni akiliisitaanermiit, arsaagaanermiit, biilersinnaanermut allagartamik arsaagaanermiit taarsiissuteqarnissamiit sakkortunerusunik inatsisitigut kinguneqartitsisoqassasoq,

3) unnerluussuteqarnissaq sioqqullugu uppersaasiisoqassappat eqqartuussutissap isumaqatigiinniutigineqarnerani atugassanik, illersuisumik aggersaanissaq eqqartuussinissamut kinguartitsissutaassanngippat, uppersaataissat annaaneqarnerannik kinguneqartumik.

Imm. 2. Pisut imm. 1-imi taagorneqartut saniasigut eqqartuussisut pasisaq, unnerluussuteqartoqal-ersinnagu aammalu unnerluussuteqartoqareerneragut, illersuisulersinnaavaat, tamanna suliassap suus-susaa, pasisap inuttut atugarisai pissutsilluunniit allat naapertorlugit kissaatiginartissasorineqarpat.

Imm. 3. Eqqartuussisut imm. 1 aamma 2 malillugu isumaqarpata suliassami illersuisussamik iver-titsinissaq tunngavissaqanngitsoq aalajangiineq pasisamit politiinillu eqqartuussivimmut qulliuneru-sumut suliassiissutigineqarsinnaavoq.

§ 322. Eqqartuussivinni illersuisumik akuerisamik iver-titsisoqartassaaq.

Imm. 2. Suliassani immikkut illuinnartumik ilungersunassuilinni eqqartuussisut eqqartuussissuser-ismik illersuisussanngortitsissapput, illersuinissaq pissutigalugu tamanna pisariaqartinneqarpat.

Imm. 3. Eqqartuussisut imm. 2 malillugu aalajangiineri pasisamit, taassuma illersuisuanit § 327 malil-lugu eqqartuussivik avaqqullugu siunnersortinngortitaasimasumit politiinillu eqqartuussivimmut qulli-unerusumut suliassiissutigineqarsinnaapput.

§ 323. Kalaallit Nunaanni Eqqartuussivimmi aamma Kalaallit Nunaata Eqqartuussisuuneqarfiani eqqartuussissuserisumik imaluunniit illersuisumik akuerisamik, inatsisilerituutut soraarummeernermi angusisimasumik, illersuisuliisoqartassaaq.

Imm. 2. Suliassani, illersuinissaq pissutigalugu nangaanartoqarnanngitsuni, illersuisumik akuerisamik inatsisilerituutut soraarummeernermi angusisimanngikkaluartumik iver-titsisoqarsinnaavoq.

Imm. 3. Eqqartuussisut illersuisumik inatsisilerituutut soraarummeernermi angusisimanngikkaluar-tumik iver-titsinerat pasisamit, taassuma illersuisuanit aammalu § 327 malillugu eqqartuussivik avaqqul-lugu siunnersortinngortitaasumit eqqartuussivimmut qulliunerusumut suliassiissutigineqarsinnaavoq.

§ 324. Pasisap inummik aalajangersimasumik illersuisulerneqarnissaq kissaatigippagu noqqaassut ajornartinnagu akuersaarniarneqartariaqarpoq.

Imm. 2. Inummik aalajangersimasumik iver-titsisoqassappat piumasaqaatigineqarsinnaavoq pineqartup taassuma akissarsiassanik, eqqartuussisut illersuisussatut toqqagaannut aningaasartuutit qaangerlugit aningaasartuutinut tunngasunik, pisortanut piumasaqaateqarnissani tamakkiisumik ilaannakortumilluun-niit taamaatiinnassagaa, matumunnga ilanngullugit angalanermut unnuinermullu il.il. aningaasartuutit.

Illersuisumik ilaaqqusinnginneq

§ 325. Eqqartuussisut illersuisoq aalajangersimasoq iver-tikkumannngissinnaavaat imaluunniit suliassap suliarineqarnerani sukkulluunniit aalajangersinnaallutik iver-titsisimaneq atorunnaassasoq, illersuisuusup peqaataanera eqqartuussisaatsikkut pingaartitassat aallaavigalugit suliassap eqqortumik suliarineqarnis-saanut isumannaatsuosorineqanngippat, imaluunniit erseqqissumik aarleqqutigisariaqarpat pineqartup taassuma suliassap paasinarsarneqarnissaa akornusersussagaa aamma akerlilersussagaa.

Imm. 2. Imm. 1 malillugu aalajangiineq Immikkut Ittumik Eqqartuussivimmut Maalaaruteqarfi-gineqarsinnaasumut, tak. danskit eqqartuussisarnermik inatsisaanni § 1 a, suliassiissutigineqarsinnaavoq aalajangiinerup nalunaarutigineqarneraniit kingusinnerpaamik sapaatit akunneri marluk qaangiunnerini. Suliassaq suliarineqassaaq aalajangeqqitassanngortitsisarneq pillugu malittarisassat malillugit pissutsit assigiinnngissutaasa nassatarisaannik allannguutitalerlugit. Maalaaruteqartarfiup taaneqartup aalajangiin-era ingerlateqqitassanngortinneqarsinnaanngilaq.

§ 326. Eqqartuussisut illersuisumik, pasisap nammineq toqqarsimasaanik, ivertitsinissaq itigartitsisutigisinnaavaat pineqartoq taanna suliassami § 322, imm. 2-mi pineqartutut ittumi illersuisussanngortitaanissamut piumasaqaatinik naammassinninngippat. Tamanna aamma atuuppoq illersuisussatut toqqakkamut, § 323-mi aalajangersakkat malillugit suliassami ivertinneqarsinnaatitaassanngitsumut.

Imm. 2. Eqqartuussisut illersuisussatut toqqagaq suliassap suliarineqarnerani qaqugukkulluunniit itigartissinnaavaat, § 325, imm. 1 malillugu ivertitsinerup itigartitsissutaanissaanut imaluunniit atorunnaarsinneqarnissaanut piumasaqaatit naammassineqarsimappata. § 325, imm. 2-mi aalajangersagaq taamatumani taamatulli atortinneqassaq.

Eqqartuussivik avaqqullugu siunnersortissamik ivertitsineq

§ 327. Illersuisumut, inatsisilerituutut soraarummeernermi angusisimannngitsumut, eqqartuussivik avaqqullugu siunnersorti ivertinneqarsinnaavoq suliassani, suliassap ilungersunartuunerata nassatariisaatut illersuinissaq pissutigalugu nangaanartoqarnanngitsuutitani. Eqqartuussivik avaqqullugu siunnersortinngortinneqassaaq eqqartuussissuserisoq imaluunniit illersuisussatut akuerisaq, inatsisilerituutut soraarummeernermi angusisimasoq.

Imm. 2. Eqqartuussissuserisoq eqqartuussisoqarfimmi, suliassap suliarineqarfissaani, allaffeqarpat imm. 1-imi taaneqartutut pisoqartillugu eqqartuussissuserisoq suliassami illersuisussatut taarsiullugu ivertinneqarsinnaavoq.

Imm. 3. Eqqartuussisut imm. 1 malillugu aalajangiinerat pasisamit, taassuma illersuisuanit politiinillu eqqartuussivimmut qulliunerusumut suliassiissutigineqarsinnaavoq.

Imm. 4. Eqqartuussivik avaqqullugu siunnersortinut § 325 taamatulli atortuutinneqassaaq.

Najugarisami ikiortimik ivertitsineq

§ 328. Najugarisami illersuisumut ikiortissaq ivertinneqarsinnaavoq illersuisup eqqartuussutissamik isumaqatigiinniuteqarnerup avataani suliassai piffimmi, illersuisup najunngisaani, ingerlanneqassatillugit. Najugarisami ikiortissatut ivertinneqassaaq inuk illersuisutulli peqataasinnaatitaasoq.

Imm. 2. Najugarisami ikiortinut § 325 taamatulli atortuutinneqassaaq.

Akooqusaannginneq

§ 329. Suliassami kinaluunniit illersuisutut iliuseqassanngilaq, pineqartoq nammineq

- 1) pinerluuteqarnermi pinerlineqartuusimaguni,
- 2) pinerlineqartumut ima attaveqaruni, eqqartuussisup suliassami iliuseqanngitsoorutigisinnaasaanik,
- 3) suliassami ilisimannittutut, misissuisartutut naliliisartutullu nassuiaajartoqquneqarsimaguni,
- 4) suliassami unnerluussisutut imaluunniit pinerlineqartoq eqqartuussinermi sinnerlugu pisinnaatitatut imaluunniit politiini atorfeqartitatut imaluunniit eqqartuussisutut imaluunniit eqqartuussisooqataasutut iliuseqareersimaguni,
- 5) pinerlunnermik suliassami allami pasisaasumut, maanna pasisaasup soqutigisaanut akerliusunik soqutigisalimmut, illersuisuusimaguni,
- 6) unnerluussisumut imaluunniit suliassami pinerlineqartunut aappaaguni imaluunniit aapparisaatut inooqataaguni imaluunniit ilaqutaaguni imaluunniit aappariinnikkut siulimigut kinguaamigulluunniit imaluunniit siulimi qatanngutaasigut qanittumik ilaqutaaguni.

Imm. 2. Inuit arlallit suliassami ataatsimi pasisaagunik taamaallaat ataatsimut illersuisoqarsinnaapput pasisaasut soqutigisaat suliassap suliarineqarnerani akerleriinngippata.

Imm. 3. Inuit imm. 1-imi taaneqartut akuusinnaatitaannginnerat pillugu eqqartuussisut aalajangiineri pasisamit, inummit pineqartumit politiinillu eqqartuussivimmut qulliunerusumut suliassanngortinneqarsinnaapput.

Illersuisutut il.il. atorfirmik atornerluineq

§ 330. Inuk, illersuisutut atorfirminik atornerluilluni suliassap paasinarsarneqarnissaanik akornuser-suisoq imaluunniit illersuisutut pisussaaffimminik sumiginnaasoq pinerluttulerinermi inatsimmi kapitali 11 malillugu pineqaatissinneqarsinnaavoq.

Illersuisumut il.il. akissarsiaritit

§ 331. Illersuisussanngortitaq, eqqartuussivik avaqqullugu illersuisumut siunnersortissatut ivertin-neqartoq aammalu najugarisami illersuisumut ikiortissatut ivertitaq naleqquttumik annertussuilinnik akissarsiaqarnissamik aammalu aningaasartuutiminnut taartisisinneqarnissamik piumasaqarsinnaavoq. Akissarsiaassat suliassap naammassineqarnerani eqqartuussivimmit aalajangerneqassapput.

Imm. 2. Angalanermut unnuinermullu il.il. aningaasartuutit ivertitsineq naapertorlugu aningaasar-tuutissatut pisariaqartutut kisimik eqqartuussisunit akuerineqartut akilerneqartassapput.

Imm. 3. Illersuisumut aningaasartuutit § 480 malillugu pisortanit akilerneqassapput.

Imm. 4. Inuit imm. 1-imi taaneqartut aningaasat eqqartuussisut annertussusiligaasa saniasigut akissar-siaqarniarsinnaanngillat imaluunniit aningaasartuutigisimasaminnut taartisiaqarsinnaanngillat. Angalan-ermut unnuinermullu il.il. aningaasartuutininik pisortanut piumasaqarsinnaaneq § 324, imm. 2 malillugu tamakkiisumik ilaannakortumilluunniit taamaatinneqarsimatillugu pasisap illersuisullu isumaqatigiis-sutigisinnaavaat aningaasartuutit taamaattut, pisortanit matussuserneqartussaangitsut, pasisap akilissa-gai.

§ 332. Illersuisussatut nammineq toqqakkamut akissarsiarititassat pisortat susassarinnngilaat.

Imm. 2. Pasisap nammineq illersuisussaminik toqqaasimanera pissutsit naapertorlugit naapertuuttuso-rineqaraangat eqqartuussisut taanna pisassaqartissinnaavaat aningaasanik, illersuisup eqqartuussisunit toqqarneqarsimasup pisassaaniit annertunerunnngitsunik. Aningaasat § 480 malillugu pisortanit akilern-eqassapput.

Kapitali 33

Pinerlineqartup inissisimaffia

Pinerlineqartumut ikiorsiineq

§ 333. Nakuusernermut imaluunniit taamaaliornissamik qunusaarinnermut tunngatillugu pinerluttuler-inermi inatsimmi § 37-mik imaluunniit §§ 74-imik, 77-81-imik, 84, imm. 1-imik, tak. 12, 88-89, 90, imm. 3, 91-92, kiisalu 112-imik unioqquutitsineq pillugu suliassani eqqartuussisut pinerlineqartumiit noqqaavigineqarnikkut illersuisumik ivertitsisassapput taassumunnga tapersersuillunilu ilitersuisuus-samik, ivertitsisoqassanngilarli inatsisinik unioqquutitsineq ilungersunartuunnngippat imaluunniit illersui-sumik ikiortissaqartitsinissaq pisariaqanngitsutut isigineqartariaqarpat. Pinerlineqartoq 15-it inorlugit ukioqarpat illersuisussamik ivertitsivigineqarsinnaatitaavoq, suliassaq pinerluttulerinermi inatsimmi §§ 74-imut aamma 77-81-imut tunngasuuppat.

Imm. 2. Politiit pinerlineqartoq ilitersortassavaat illersuisussamik ivertitsisinnaaneq pillugu. Sulias-samit ersersinneqartassaaq taamatut ilitersuisoqarsimasoq.

Imm. 3. Politiit pinerlineqartup ivertitsivigineqarnissamik noqqaassutaa eqqartuussisunut suliassiis-sutigissavaat.

Imm. 4. Illersuisoq naleqquttumik akissarsiaqartussaataitaavoq aammalu aningaasartuutiminut taartisis-inneqartussaataitaavoq. Angalanermut unnuinermullu il.il. aningaasartuutit aatsaat akilerneqarsinnaapput aningaasartuutaasut pisariaqartumik aningaasartuutit eqqartuussisunit akuersissutigineqarsimappata.

Akissarsiassat eqqartuussisunit annertussusilerneqassapput suliassap naammassineqarnerani pisortaniillu akilernerqassallutik.

Imm. 5. Inatsiseqarnermut ministeri illersuisup suliassai piginnaatitaaffiilu pillugit erseqqinnerusunik malittarisassiorsinnaavoq.

Inuinnaat piumasaqaataat

§ 334. Eqqartuussisut pinerlineqartoq pinerlunnermi ajoqusersimaneranut taarsiissutininik, unnerluutigineqartup akiligassaanik, pinerlunnermik suliassap suliarineqarnerani pisassissinnaavaat. Pinerlineqartup tamanna noqqaassutigippagu politiit piumasaqaataasoq suliassap ingerlanerani atuuttusannngortinniassavaat. Taarsiissutissat isumaqatigiissutaasinnaangippata taarsiissutissat pillugit apeqqut suliassap ingerlanerani aalajangiiffigineqassaaq, unnerluutigineqartoq pisumi taarsiivigineqarnissamik piumasaqaatinut tunngaviusuni pisuutitaannikkaluarpalluuniit. Pisuunerup aalajangiiffigineqarnissaa sioqqullugu imaluunniit aalajangiiffigineqareerpat taarsiissutissat aalajangiiffigineqarsinnaapput.

Imm. 2. Pisunili immikkut ittuni, taarsiivigineqarnissamik piumasaqaat pigisanik aseruinnermut tunngasuutillugu aammalu inatsisitigut uppersaatsatigulluunniit nalornisoorutissaqartillugu, eqqartuussisut isumaqatigiissitsinialussinnareerlutik taarsiivigineqarnissamik piumasaqaat pillugu pinerlunnermik suliassap suliarineqarnerani aalajangiiumangissinnaapput. Eqqartuussisut tamatuminna aalajangiinerat tunngavilersorneqarsimassaaq. Aalajangiineq nunatta eqqartuussisuuneqarfianut aalajangeqqitasannngortinneqarsinnaavoq. Taarsiivigineqarnissamik piumasaqaat saqitsaassutaasoq pinerlunnermik suliassap suliarineqarnerani aalajangiivigineqanngippat pinerlineqartoq immikkoortoq III-mi malittarisassat malillugit saqitsaannermik suliassamik suliassiisuteqarsinnaavoq.

Imm. 3. Piumasaqaataasumut naatsorsuusiamik ajornangippat sanasoqartassaaq aamma taakkununga uppersaatsatissat saqqummiunneqartassapput. Naatsorsuusiat uppersaatsatissallu unnerluutigineqartumut nalunaarutigineqartassapput eqqartuussisunullu tunniunneqassallutik unnerluussisutip uppersaatsatissallu allattorsimaffiata tunniunneqarnerannut peqatigitillugit, tak. §§ 441 aamma 443.

§ 335. Pinerlineqartup pinerlunnermik suliassap suliarineqarnerani pinerliisumut piumasaqaatai, inuinnartut unnerluutiginnissutaasussat, pinerlunnermik suliassatulli iliorluni malersorniarneqassapput, tak. § 302.

Taarsiisuteqartarneq pillugu politiit ilitersuisarnerat

§ 336. Politiit inuinnaat piumasaqaateqarsinnaanerannik pinerlunnermik suliassap suliarineqarnerani ilitersuisassapput, tak. § 334.

Imm. 2. Politiit tamatuma saniatigut ilitersuisassapput taarsiivigineqarnissamik Nakuuserfigineqarsimasut Taartisinissaannik Aalajangiisartunut qinnuteqarsinnaatitaaneq pillugu, tak. Pinerluffigineqartunut taarsiisuteqartarnermik inatsimmi § 10, imm. 3.

Imm. 3. Suliassamit ersersinneqartassaaq imm. 1 aamma 2 malillugit ilitersuisoqarsimasoq.

Kapitali 34

Paasiniaasarneq killisiuisarnerillu pillugit aalajangersakkat nalinginnaat

Inatsisinik unioqqutitsinernik nalunaarutiginnittarnerit

§ 337. Inatsisinik unioqqutitsinernik nalunaarutiginninnerit politiinut tunniunneqartassapput.

Imm. 2. Politiit nalunaarutiginninneq itigartitsissutigisassavaat paasiniaanerup aallarnerneqarnissaa tunngavissaqarsorineqanngippat.

Imm. 3. Nalunaarutiginnissut itigartitsissutaappat inuit tamatumani soqutigisaqarsorineqartut ilisimat-inneqartassapput. Aalajangiineq unnerluussisussaaitamut qullersaasumut maalaarutigineqarsinnaavoq malittarisassat § 65-imiittut malillugit.

Paasiniaanermik aallarniisarneq unitsitsisarnerlu

§ 338. Politiit nalunaarutiginnissuteqarnerup kingorna imaluunniit namminneerlutik sulissuteqarner-mikkut paasiniaaneq aallarnertassavaat, tunngavissaqartumik pasitsaassigunik inatsisunik unioqqutit-sisoqarsimasoq, pisortatigoortumik unnerluussutaasussamik.

Imm. 2. Paasiniaanerup siunertaraa pinerluttulerinermi inatsit malillugu pineqaatissiinissamut piuma-saqaatit atuunnersut paasiniassallugu, aammalu paasissutissanik suliassap aalajangiivigineqarnissaani atugassanik pissarsiniassalluni kiisalu suliassap eqqartuussivikkut suliarineqarnissaanut piareersaneq.

Imm. 3. Paasiniaaneq aallarneriigaq ingerlatiinnassallugu tunngavissaqanngippat paasiniaanermik unitsitsinissaq politiinit aalajangiivigineqarsinnaavoq, pasilliummik ingerlatitsisoqareersimassanngippat. Pasilliut ingerlanneqalereersimappat aalajangersakkat §§ 312-imi aamma 313-imiittut atortuutinneqas-sapput. § 337, imm. 3, taamatulli atortuutinneqassaaq.

Politiit nalunaarusiaat

§ 339. Politiit killisiuinerit allatigullu paasiniaanerni alloriarnerit pillugit piaarnerpaamik nalunaaru-siortassapput, tamakku pillugit paasissutissat allatut iliornikkut pigineqareersimannngippata.

Illersuisup piginnaatitaaffii

§ 340. Illersuisoq suliassami politiit paasissutissaataannik paasiniaasinnaatitaavoq. Paasissutissat akornutaanngitsumik nuutsinneqarsinnaappata taakku nuutsinneqarneri illersuisumut nassiuinneqartas-sapput. Illersuisoq politiinit akuerineqaaqqaartinnani tigusaminik pasisamut allanulluunniit tunniussaqa-sannngilaq.

Imm. 2. Illersuisoq politiit pasisamik killisiuineranni najuussinnaatitaavoq aammalu allanik apeqquteqarsinnaatitaavoq. Noqqaavigineqarneq naapertorlugu illersuisoq ilisimatinneqartassaaq kil-lisiuinerit qaqugu pissasut. Pasisaq tiggummigallagaappat aammalu aalajangiisoqarsimappat immik-kortinneqarluni kisimiitinneqassasoq, tak. § 373, pasisaq illersuisuusoq najuutsinnagu killisiorneqassan-ngilaq, pasisaq illersuisorlu tamatumunnga akuersisinneqareersimannngippata.

Imm. 3. Killisiuineq kinaassusersiitsineq, assimik takutitsineq allatulluunniit paasiniaanermi iliuuseq assingusumik pingaarutilik uppersarsaatit eqqartuussutissap isumaqatigiinniutigineqarnerani atorn-eqassangatinneqarpat, politiit tamanna pilersinnagu illersuisumut kalerriissapput, taamaasilluni iller-suisoq najuunnissaminut periarfissaqarsinnaaqullugu. Illersuisoq paasiniaanermi iliuuseqarnissap pin-eqartup naammassiniarnissaa pillugu siunnersuteqarsinnaatitaavoq. Illersuisup tamanna pillugu oqaaseqaatai politiit nalunaarusiaanni allanneqartassapput. Illersuisoq najuunnissaminut periarfissaqan-ngippat imaluunniit illersuisumut kalerriinissaq ajornassappat paasiniaanermi iliuuseriniakkat taamaal-laak kinguartinneqarsinnaanngitsut ingerlanneqassapput, illersuisorlu iliuuserisimasanik kinguarsarani ilisimatinneqassaaq.

Imm. 4. Naalagaaffinnik allanik qajassuussinissap, naalagaaffiup isumannaatsuunissaanik imaluunniit suliassap qulaarneqarnissaanik soqutiginninnerup imaluunniit inuup pingatsiuttup qaqutigoortumik pisariaqartilerpagu malittarisassat imm. 1-imi aamma 3-miittut sanioqqunneqarsinnaapput, imaluunniit politiit illersuisumut peqqusisinnaapput taassuma paasissutissat, politiinit pisimasani, ingerlatitseqqis-sannngikkai. Peqqussut sivitsorneqarsinnaavoq unnerluutigineqartup eqqartuussutissamik aalajangi-iniarnermi nassuiaateqareernissaata tungaanut.

Paasiniaaneq pillugu isumaqatigiinnginneq

§ 341. Politiit paasiniaanerminni iliuuserisaat inatsisinut naapertuuttuunersut pillugu aamma pasisap illersuisullu piginnaatitaaffii pillugit isumaqatigiingissutit eqqartuussisut aalajangiiffigisassavaat, matumunnga ilanngullugittaaq illersuisup pasisalluunniit suli allatigut paasiniaasoqarnissamik iliuusereqqusaat. Aalajangiissuteqarnikkut aalajangiisoqartassaaq, noqqaassuteqartoqarnera naapertorlugu tunngavilersorneqartussamik.

§ 342. Eqqartuussisunit paasineqarpat iliuuseqarnek, inatsit manna naapertorlugu politiinit aallarnerneqarsimasoq eqqartuussisunillu akuersissutigineqartussaq, eqqartuussisunut saqqummiussinissamat piffissarititaq qaangiutsinnagu saqqummiunneqarsimanngitsoq, eqqartuussisut politiinut nasuiaateqaqqusereernikkut aalajangiiffigisavaat iliuuserineqartoq ingerlaannassanersoq imaluunniit unitsinneqassanersoq.

Paasiniaanerup nalaani eqqartuussinerit

§ 343. Eqqartuussisoqartassaaq noqqaassuteqartoqaraangat iliuuserisassat, eqqartuussisunit peqataaffigineqartariaqartut, pillugit.

Imm. 2. Aammattaaq noqqaassuteqarnek naapertorlugu eqqartuussisoqartassaaq

- 1) uppersaatissanik, annaneqarnissaat annilaanngatigineqarsinnaasunik imaluunniit annertuumik pisarissersoqqaartinnani imaluunniit kinguaattooqqaartinnani eqqartuussisinnaatitaasunut imaaliinnarlugu saqqummiunneqarsinnaanngitsunik, qularnaarinissaq pisariaqaraangat,
- 2) paasiniaanermut pingaaruteqartut isumaqarfigineqaraangat,
- 3) pisortat soqutigisaat pillugit naleqquttuosorineqaraangat, imaluunniit
- 4) pasisaq allaniit immikkoortillugu tigummigallarneqarpat, aamma uppersaatinik qulakkeerinissaq immikkoortitsilluni kisimiititsinerup atorunnaarsinneqarnissaanik apeqqummut pingaaruteqarsinnaagaangat.

§ 344. Pasisaq eqqartuussinissat tamaasa pillugit ajornanngippat ilisimatinniarneqartassaaq taakunungalugu najuunissaminut piginnaatitaassaaq. Tamanna atuutissanngilaq eqqartuussinernut kapitalit 36 aamma 37 kiisalu §§ 417-427 malillugit pinngitsaaliinikkut iliuuseqarnissaq pillugu eqqartuussisut aalajangiinissaat siunertarlugu ingerlanneqartunut tunngatillugu. Pasisaq tigummigallagaappat politiit pineqartoq eqqartuussinermi najuutsinngitsoorsinnaavaat, najuutsitsinissaq naleqqutinngitsunik ajornartorsiutitaqassappat.

Imm. 2. Eqqartuussisut noqqaavigineqarnek naapertorlugu aalajangersinnaavaat pasisaq eqqartuussinissamik ilisimatinneqassanngitsoq imaluunniit pasisap eqqartuussineq tamarmiusoq ilaannaaluunniit najuuffigisanngikkaa, tamanna naalagaaffinnut allanut pissutsinit, naalagaaffiup isumannaatsuunis-saanit imaluunniit suliassap qulaarniarnissaanut pingaartitassanit qaqutigoortumik pisariaqartinneqas-sappat.

Imm. 3. Pasisaq eqqartuussinermi najuussinnaatitaasimanngippat eqqartuussisut, pasisaq najuuppat taamaanngippallu politiit, pasisaq piaarnerpaamik ilisimatissavaat eqqartuussisut suliaannik allassimafimmi qanoq allassimasoqarnersoq. Taamaattorli pingaartitassat immikkut ittut, najuutinngitsoortitsinermut pissutaasimasut, suli atuuppata eqqartuussisut aalajangersinnaavaat pasisaq tamatuminnga ilisimatinneqassanngitsoq, soorluttaaq eqqartuussisut illersuisoq peqqusinnaagaat pasisaq eqqartuussinermi pisimasunik ilisimatissanngikkaa. Peqqussuteqarnek sivitsorneqarsinnaavoq unnerluutigineqartup eqqartuussutissamik isumaqatigiinniartoqarnerani nassuiaateqareernissaanut.

Imm. 4. Eqqartuussisut pasisaq peqqusinnaavaat eqqartuussinermut orniguteqqullugu. Peqqussut siusinnerusukkut eqqartuussinermi tunniunneqarsimanngippat, tamanna allakkatigut nalunaarutigineqassaaq. Pasisaq sivikinnerpaamik eqqartuussinissaq aqaguttoq unnukkut aggersarneqassaaq. Taamaattorli eqqartuussisut allamik kalerriinissamat piffissaliisnaapput imaluunniit pasisaq ingerlaannaq orniguteqqusinnaavaat. Aggeqqusissut pasilliutaasoq pillugu paasissutissanik imaqassaaq. Pasisaq takutinngitsoorpat pineqartoq § 352 malillugu tigusarineqarsinnaavoq.

§ 345. Illersuisoq eqqartuussinissanik tamanik ilisimatinneqartassaaq aamma taakkununga najuussinnaatitaavoq. Illersuisup kalerrinneqarnissaa ajornarpat eqqartuussinerit kinguartinneqarsinnaanngitsut taamaallaat ingerlanneqartassapput. Taamaattorli eqqartuussinernut § 344, imm. 1-imi oqaaseqatigiit aappaanni taaneqartunut tunngatillugu malittarisassaaq sanioqqunneqarsinnaavoq, tamanna naalagaaffinnut allanut, naalagaaffiup isumannaatsuunissaanut imaluunniit suliasap paasineqarnissaanut soqutiginninnermit pisariaqartinneqarpat imaluunniit inuup allap qaqutigoortumik pisariaqartissappagu. Aalajangiineq eqqartuussisut politiinit noqqaavigineqarnermik kingorna aalajangiinerissavaat. Illersuisoq aatsaat eqqartuussisunit akuerineqarnikkut paasissutissanik eqqartuussinerni, pasisaasup peqataaffiginngisaani, pissarsiaasunik ingerlatitseqqiisinnaavoq.

Imm. 2. Illersuisoq piginnaatitaavoq oqaaseqaatiminik saqqummiussinissaminut aammalu taakkununga eqqartuussisut suliaannik allasimaffimmut naatsumik issuaasitsinissaminut. Eqqartuussisut aalajangissavaat tamanna eqqartuussinerup ingerlanerani qaqugukkut pissanersoq.

Politiini killisiuinerit

§ 346. Politiit killisiuisinnaapput, kisianni nassuiaateqaqqusillutik peqqussisinnaanngillat. Oqaaseqartitsiniaanermi pinngitsaaliineq atorneqassanngilaq. Taamaattorli kinaluunniit noqqaavigineqaruni pisussaavoq ateq, najugaq aammalu inuuk politiinit ilisimatitsissutigissallugu. Taamatut noqqaasuteqarnermik itigartitsineq akiliisitsissutaasinnaavoq.

Imm. 2. Nassuiaatigineqartut pingaarnerusortaat nalunaarusianut allanneqartassapput. Nassuiaatit immikkut ittumik pingaarutilittaat killisiorneqartup nammineq oqaasii sapinngisamik atorlugit issuarneqartassapput.

Imm. 3. Killisiorneqartoq nassuiaatit issuarneqarnerannik ilisimatinneqarnissaminik periarfissinneqartassaaq. Killisiorneqartup naqqutigisinnaasai ilassutigisinnaasaalu ilanngunneqartassapput. Killisiorneqartoq nalunaarusiamik atsiuinissaminut neqeroorfigineqartassaaq, ilisimatinneqassallunili tamanna pisussaaffiginngikkaa. Nalunaarusiamit takuneqarsinnaassaaq malittarisassat tamakkua malinneqarsimasut.

Imm. 4. Nassuiaatinik båndimut assigissaannulluunniit immiussineq aatsaat pisinnaassaaq killisiorneqartoq tamatuminnga ilisimatinneqareeraangat.

§ 347. Politiit pasisamik killisiuilersinnagit pineqartoq erseqqissumik ilisimatinneqartassaaq suna pasilliutaanersoq aammalu pineqartoq oqaaseqaateqarnissamut pisussaataannngitsaq. Nalunaarusiamit takuneqarsinnaassaaq malittarisassat taakkua malinneqarsimasut.

Imm. 2. Inatsiseqarnermut ministeri malittarisassiussaaq pisuni suni kommune kalerrinneqartassasoq aamma pasisamik 18-it inorlugit ukiulimmik killisiuinerimik najuusinnaassasoq.

Imm. 3. Pasisamut apeqqutit imatut apeqqutigineqassanngillat ilimagineqarluni miserratigisaq imaluunniit nassuerutigiumanngisaq nassuerutigineqassasoq. Neriorsuinerit, paasissutissat eqqunngitsut imaluunniit qunusaarinerit atorneqassanngillat.

Imm. 4. Killisiuineq nassuertitsinissaaq anguniaannarlugu sivitsorneqartassanngilaq. Killisiuineri, sivikitsuararsuunngitsuni, nalunaarusiani piffissat killisiuinerup aallartiffii naammassiffiilu taaneqartassapput.

Imm. 5. Pasisaq apeqqutigineqartut akinissaat pillugu illersuisuminut allamulluunniit siunnersoqqusinnaanngilaq.

§ 348. Politiit inummik pasisaanngitsumik killisiuineranni §§ 147, imm. 1, 154 aamma 156, imm. 1 aamma 2 taamatulli atortuutinneqassapput.

Eqqartuussivimmi killisiuinerit

§ 349. Eqqartuussivimmi killisiuinerni § 346, imm. 2-4, aamma 347 taamatulli atortuutinneqassapput. *Imm. 2.* Pasisamik killisiuinerni § 155, imm. 1 aamma 2 taamatulli atortuutinneqassapput.

Kapitali 35

Tigusarinninneq tigummiagassanngortitsinerlu

Tigusarinninneq

Tigusarinninnissamut piumasaqaatit

§ 350. Politiit inummik, inatsisinik unioqutitsisutut pisortatitoortumik unnerluutigineqarnissamut naammattunik tunngavissaqartutut pasineqartumik, tigusarinnissinnaapput tigusarinninnissaq pisariaqarsorineqarpat unioqutitseqqinnissaq akornuserniarlugu, inuup najuukkallarnissaa qularnaarniarlugu imaluunniit inuup allanut attaveqarnissaa akornuserniarlugu.

Imm. 2. Aamma taamatut piginnaatitaapput kikkulluunniit inatsisinik unioqutitsisumik imaluunniit tamatumunnga qularutissaanngitsumik attuumassutilimmik, pisortatigoortumik unnerluutigisassaati-taasumik, naammattuuisut tamarmik. Tigusarineqartoq sapinngisamik piaarnerpaamik politiinut tunni-unneqartassaaq ilisimatitsissutigineqarluni qanoq ilinerani aammalu suut tunngavigalugit tigusarineqar-simasoq.

Imm. 3. Inuit eqiterunneranni inummut pigisanulluunniit nakuusertoqartillugu imaluunniit nakuusernissamik siorasaarisoqartillugu, aamma kina imaluunniit kikkut pisuusutut qularani tikkuarneqarsinnaatinnagit politiit najuuttunik, inatsisaatsuliornermi peqataasutut pasineqarsinnaasunik, tamanik tigusarinnissinnaapput. Aamma taamaassaaq pagginerni, inuit arlallit peqataaffigisaanni, pagginneq inuarnermik imaluunniit timikkut ajoquseerujussuarnermik nassataqarsimappat.

§ 351. Kinaluunniit atugassarititaasunik nakkutigisassanngortitsilluni, katsorsagassanngortitsilluni imaluunniit inissiisussanngortitsilluni eqqartuussummi aalajangersarneqarsimasunik imaluunniit mis-iligummik iperagaanissamik, misiligummik angerlartitaanissamik imaluunniit piumasaqaasiinikkut saammaanneqarnissamik aalajangersakkamik unioqutitsisutut naammaginarartunik tunngavissalimmik pasisaasoq politiinit tigusarineqarsinnaavoq, taamatut iliornikkut pisariaqarpat pasisap najuunnissaa qulaakkiissallugu.

Imm. 2. Aamma taamaassaaq najoqqutassanik, inuusuttunut immikkut ittumik ikiorsiiniutitut eqqartuussummut atatillugu nalunaarutigineqarsimasunik imaluunniit iliuusissatut piareersaatini § 361 naapertorlugu aalajangersarneqarsimasunik, sumiginnaanerni.

§ 352. Pasisaq inatsisit malillugit aggeqqusaagaluarluni takkutinnngitsoorpat eqqartuussisut aalajangersinnaavaat pasisaq tigusarineqassasoq, aggeqqusissummi imaluunniit eqqartuussisoqarnerani nalunaarutaareersimappat pineqartoq taanna nammineerluni ornigutissasoq aammalu takkutinnngitsoornermi tigusarineqarnissaq ilimagineqarsinnaasoq.

Imm. 2. Tigummigallaaneq pisariaqartumiit sivisunerusussanngorlugu sivitsorneqassanngilaq aamma nal. akunnerinit 24-nit sivisunerusinnaanngilaq.

§ 353. Tigusarinnittoqassanngilaq, kiffaanngissusiiaaneq suliassap suussusaa pissutsilluunniit naapertorlugit naleqqutinngitsumik akuliunnerussapput.

§ 354. Inatsisartunut ilaasorta q kinaluunniit inatsisartut akuersiseqqaartinnagit tigusarineqarsinnaanngilaq imaluunniit qanorluunniit allatut kiffaanngissusiarneqarsinnaanani, taamaassananili ilaasorta pineqartoq iliuuseqaleruttortoq pakasarneqarsimappat.

Tigusarinninnermi periaaseq

§ 355. Pissutsit naapertorlugit sapinngisamik qajassuartumik tigusarinnittoqartassaaq.

Imm. 2. Politiit tigusarineqartoq oqaatsit pineqartup paasisinnaasai atorlugit pasilliutaasumik piffissamillu tigusarinniffiusumik sapinngisamik piaarnerpaamik ilimatissavaat. Nalunaarusiamit ersersinneqassaaq malittarisassaq tamanna malinneqarsimasoq.

Imm. 3. Politiit § 403, imm. 3, § 406 aamma § 407 isiginiarlugit tigusarineqartup timaanik atisaanillu misissuiffiginnissinnaapput, pineqartup pigisanik nakuusernermut qimaanissamulluunniit atorneqarsinnaasunik imaluunniit tigusarineqartumut allanulluunniit ulorianartorsiortitsissutaasinnaasunik arsaarneqarnissaa siunertarlugu. Politiit pigisat taama ittut aningaasallu, tigusarineqartumi nassaarineqartut, paarisassatut tigusinnaavaat.

Imm. 4. Tigusarinnittoqarnerani pineqartoq taanna, tigusarinninnerup siunertaata torersuutitsinissallu pisariaqarnerata saniasigut, kiffaanngissutsimini allatigut killiliiffigineqanngilaq.

Imm. 5. Politiiniit noqqaassuteqartoqarnera naapertorlugu tigusarinninneq pillugu aalajangiineq eqqartuussisunit aalajangiiffigineqarsinnaavoq.

Iperagaaneq

§ 356. Kinaluunniit tigusarineqartoq iperagaassaaq tigusarinninnermut tunngavissaasoq peerunniariasappat. Piffissaq iperagaaffiusoq nalunaarusiamit ersersinneqassaaq.

Eqqartuussivimmi sassartitaaneq

§ 357. Tigusarinninnermiit nal. akuneri 24-t qaangiutsinnagit tigusarineqartoq, tamanna sioqqullugu iperagaasimanngitsoq, eqqartuussivimmi sassartinneqartassaaq. Piffissaq tigusarinniffiusoq aamma eqqartuussivimmi sassartitaaffiusoq eqqartuussisut suliaannik allassimaffimmut allanneqartassaaq.

Imm. 2. Eqqartuussisoqarfimmi pasisap najugarisaani eqqartuussisoqanngippat eqqartuussinermik ingerlatsisinnaasumik, tigusarinninnermiit nal. akunneri 24-t qaangiutsinnagit pasisaq eqqartuussivimmut allamut piffissarititaq qaangiutsinnagu sassartinneqartassaaq ungasianiit attaveqaatit atorlugit, tak. §§ 128 aamma 163. Tigusarinninnermiit nal. akunneri 24-t qaangiutsinnagit eqqartuussisoqarsinnaanngippat pasisaq eqqartuussiviup inissisimaffigisaata avataaniitsilluni tigusarineqarsimatillugu piffissarititaasoq qaangiutsinnagu ornigutsinneqarsinnaanngimmat, pasisaq piffissarititaasup iluani eqqartuussivimmut sassartinneqartassaaq ungasianiit attaveqqaatinik atuinikkut, imaluunniit tamanna ajornassappat ungasianiit attaveqqaatinik atuinikkut eqqartuussivimmut allamut sassartinneqartassaaq, tak. §§ 128 aamma 163.

Imm. 3. Nal. akunneri 24-t qaangiutsinnagit eqqartuussineq imm. 2-mi taaneqartutut ingerlanneqarsinnaanngippat sassartitsisoqartassaaq sapinngisamik piaarnerpaamik, kingusinnerpaamillu sassartitsinissamut akornutaasut atorunnaarneriniit nal. akunneri 24-t qaangiunnerini. Eqqartuussisut suliaannik allassimaffimmi pissutsit, piffissaq eqqorlugu sassartitsinnginnermut pissutaasut, pillugit paasissutissat allanneqartassapput. Taamaattorli tigusarinninneq aallartinneqarnerminiit nal. akunneri 24-t sinnerlugit ingerlatiinnarneqarsinnaanngilaq, aatsaat ingerlatiinnarneqarsinnaavoq tigusarinninnerup imaluunniit tigummigallagaanerup ingerlaannarnissaa pillugu piumasaqaatit, tak. §§ 358, imm. 1, 359 aamma 360, politiit naliliinerat malillugu atuuppata.

Tigusarinninnerup ingerlaannarnera

§ 358. Inatsisinik unioqqutitsineq pillugu tigusarinnittoqarsimappat, tigummigallagaatitsinissaq mattunneqarsimanani, imaluunniit § 351 naapertorlugu tigusarinnittoqarsimappat, tigusarineqartorlu ingerlaannaq iperarneqarsinnaasorineqanngippat eqqartuussisut, paasissutissat pigineqartut naammanginnerat allalluunniit pissutigalugit tigummigallagaatitsinissaq pillugu apeqqut ingerlaannaq

isummerfigisinnaasorinngikkunikku, aalajangersinnaapput pasisaq tigummigallarneaannassasoq. Aalajangiinnermi pissutsit tigummigallagaatitsiinnermut tunngavissiisut taagorneqassapput. Tigusarinninnerup ingerlaannarnissaani § 361 taamatulli atortuutinneqassaaq. Pasisaq paasisutissaasinnaasunik, pissarsiarerusutaminik, taagugaqarnissaminut periarfissaqartitaassaaq.

Imm. 2. Kinaluunniit tigummigallarneaannartussanngortitaasoq, iperagaareersimanngikkuni, eqqartuussisunut sassarteqqinneqartassaaq, eqqartuussisullu siullermeersumik eqqartuussinerup naammassineraniit kingusinnerpaamik nal. akunneri 24-t pingasoriarlugit qaangiutsinnagit aalajangiiffigisassavaat tigummigallarneaqartoq iperagaatinneqassanersoq imaluunniit tigummigallagaassanersoq imaluunniit § 361 malillugu periarfissiisuteqarfigineqassanersoq.

Tigummigallagassanngortitsineq

Tigummigallagassanngortitsinissamut piumasaqaatit

§ 359. Pasisaq tigummigallarneaqarsinnaavoq

1) pissutissaqartumik pasitsaanneqarpat pasisaq

a) inatsisunik peqqarniitsumik unioqqutitsisimasoq imaluunniit

b) arlaleriarluni inatsisunik unioqqutitsisimappat eqqartuussutaareersimanngitsunik, inatsit malillugu inissiisarfimmiittussanngortitaanermik kinguneqarsinnaasunik aamma

2) tamatumunnga peqatigitillugu

a) pissutsit pasisap atugai pillugit ilisimatitsissutigineqartut naapertorlugit aalajangersimasunik pissutissaqartumik isumaqartoqarpat pasisap malersuiniarneq imaluunniit naammassinninniaanissaq pinngitsoortinniarsinnaagaa,

b) pissutsit pasisap atugai pillugit ilisimatitsissutigineqartut naapertorlugit aalajangersimasunik pissutissaqartumik annilaanngatigineqarpat pasisaq iperagaasimatilluni inatsisunik unioqqutitseqqissasoq siuliini taaneqartutut ittunik, imaluunniit

c) suliassami pissutsit naapertorlugit aalajangersimasunik pissutissaqartumik isumaqartoqarpat pasisap suliassami malersuiniarneq ajornakusuulersissagaa, pingaartumik takussutissanik piiaalluni imaluunniit allanik mianersoqqusilluni imaluunniit sunniiniarluni.

Imm. 2. Pasisaq aammattaaq tigummigallagassanngortinneqarsinnaavoq immikkut qularnaallisillugu pasitsaanneqarpat pasisaq ima peqqarniissusilimmik inatsisunik unioqqutitsisimasoq, inatsisunik atortitsinermik soqutiginninneq pissutigalugu pasisap iperagaasimannginnissaa pisariaqarsorineqarluni.

Imm. 3. Tigummigallagassanngortitsisoqarsinnaanngilaq iligimagineqarpat inatsisunik unioqqutitsineq taamaallaat akiliisitaanermik kinguneqarsinnaasoq, imaluunniit kiffaanngissusiiaaneq pasisap atugaanik akornusersuinnermut, suliassap qanoq ittuuneranut peqqarniissusaanullu kiisalu pasisaq pisuutitaassappat pineqaatissiisutissatut ilimagineqarsinnaasumut naleqquttuosorinassanngippat.

§ 360. Tunngavissaqartumik pasitsaanneqarpat inuk atugassarititaasunik, nakkutigisassanngortitsilluni eqqartuussummi imaluunniit misiligummik iperagaanermi imaluunniit misiligummik angerlartitaanermi imaluunniit piumasaqaasiinikkut saammaasaanermi aalajangersarneqartunik, unioqqutitsisimasoq inuk pineqartoq tigummigallagassanngortinneqarsinnaavoq, eqqartuussisut isumaqarpata unioqqutitsineq ima ittuummat angerlarsimaffimmi, paaqqinnffimmi imaluunniit napparsimmavimmi naleqquttumi inissiinissaq imaluunniit inissiisarfimmi inissiinissaq apeqqutaasoq.

Periarfissiisutit sakkukinnerusut

§ 361. Tigummigallagassanngortitsinissamut patsisissaqarpat, kisiannili tigummigallagassanngortitsinerup siunertaa sakkukinnerusumik sunniutilinnik periarfissiisuteqarnikkut anguneqarsinnaappat, eqqartuussisut pasisaq akuersitillugu tamanna pillugu aalajangiissapput.

Taamaattorli eqartuussisut qaqutigootumik pasisaq akuersiseqqaarnagu tamanna pillugu aalajangiisarsinnaapput.

Imm. 2. Eqqartuussisut sakkukinnerusumik sunniutilinnik periarfissiissutitut aalajangersinnaavaat, pasisaq

- 1) erseqqinnerusumik aalajangersarneqartumik nakkutigisassanngortinneqassasoq,
- 2) najugaqarneq, suliffeqarneq, sunngiffimmik atuineq inunnillu aalajangersimasunik attaveqarnissaq pillugit immikkut aalajangersakkanik malinnissasoq,
- 3) angerlarsimaffimmi paaqqinnittarfimmiluunniit naleqquttumi najugaqassasoq,
- 4) tarnimigut katsorsartissasoq imaluunniit imigassamik, ikiaroorartunik assigisaanilluunniit atupilunnermut katsorsartissasoq, pisariaqassappat napparsimmavissuarmi imaluunniit paaqqinniffimmi immikkut ittumi,
- 5) piffissani erseqqinnerusumik taaneqartuni politiinut allanulluunniit orniguttassasoq,
- 6) pas-iminik pappiaqqanilluunniit kinaassutsimut uppersaatinik allanik politiini allaniluunniit paarisassanngortissasoq,
- 7) eqqartuussinermi najuuttarnissaminut aammalu eqqartuussissutaasinnaasup naammassitinneqarnissaanut aningaasanik eqqartuussisut annertussusiligaannik qularnaveeqqusiissuteqassasoq imaluunniit
- 8) atugassarititanik eqqartuussisut aalajangersagaannik allanik malinnissasoq.

Imm. 3. Pasisaq eqqartuussinermut orniguttusaaernerminik imaluunniit eqqartuussutaasumik naammassinniarnerninik sumiginnaappat eqqartuussisut, aalajangiinermi pineqartut ajornartinnagu oqaaseqartinnissaannut periarfissiisoqareerpat, aalajangersinnaavaat aningaasat qularnaveeqqusiissutaasut naalagaaffiup karsianut pisassanngortinneqassasut. Aalajangiineq tunngavilersukkamik aalajangiinerussaaq. Taamaattorli eqqartuussisut aalajangersinnaavaat pinerlineqartup taarsiivigineqarnissamik piumasaqataa aningaasanit taakkunannga akilerneqassasoq. Eqqartuussisut pissutsit immikkut ittut atuutsillugit aalajangiissuteqareernermit qaammatit arfinillit qaangiunnissaat tikillugu aalajangiisinnaapput, aningaasat naalagaaffiup karsianut pisassanngortitaasimasut tamakkerlugit ilaannaalluunniit utertillugit akilerneqassasut.

Imm. 4. Inatsiseqarnermut ministeri malittarisassiorsinnaavoq inuit, paaqqinniffimmi imaluunniit napparsimmavissuarmi il.il. imm. 2, nr. 3 imaluunniit 4 malillugu inissinneqarsimasut aneernissamut akuerineqartarnissaat pillugit, tamanna isummerfigineqareersimassanngippat. Inatsiseqarnermut ministeri tamatumunnga atatillugu aalajangersaasinnaavoq aalajangiinerit malittarisassat taakku naapertorlugit aalajangiissutaasut pisortatigoortumik oqartussanut qulliunerusunut saqqummiunneqarsinnaassanngitsut.

Suliassap eqqartuussivimmi suliarineqarnera aamma pasisap najuunnera

§ 362. Eqqartuussiviup politiit noqqaassuteqarnerisigut aalajangissavaa pasisaq tigummigallarneqassanersoq imaluunniit periarfissiissutuliiffigineqassanersoq, tigummigallarneqarnissamut taarsiullugu atuuttussanik, tak. §§ 359-361. Aalajangiineq tunngavilersukkatut aalajangiinerussaaq. Pasisaq illersuisumik ivertitsivineqartussaataavoq, tak. § 321, imm. 1, nr. 1.

Imm. 2. Aalajangiisoqartinnagu pasisaq eqqartuussivimmi pasilliut pillugu killisiorneqassaaq oqaaseqarnissaminullu periarfissaqassaaq, taamaassanngilarli pasisaq Kalaallit Nunaanniinngippat imaluunniit eqqartuussisut isumaqarpata sassartitsinissaq immikkut ittunik pissuteqartumik iluaqutaanngitsutut imaluunniit pasisamut ajoqusiissutatut isigineqartariaqartoq.

Imm. 3. Tigummigallagassanngortitsinissaq imaluunniit tamatumunnga taarsiullugu atuutilersussanik periarfissiissutuliinissaq pillugu aalajangiisoqarsimappat, pasisaq eqqartuussivimmi oqaaseqarnissamut periarfissinneqarani, tak. imm. 2, pasisaq eqqartuussivimmut sassartinneqassaaq pasisap nunamut maanga pissunneqarneraniit imaluunniit pasisap sassartinneqarnissaanut akornutaasut atuukkunnaarneranniit nal. akunneri 24-t qangiutsinnagit.

Imm. 4. Eqqartuussiviup tigummigallagassannkortitsinissamik imaluunniit tamatumunnga taarsiullugu periarfissiissutitiliinissamik aalajangiineq sukkulluunniit allannkortissinnaavaa.

Tigummigallagassannkortitsinissaq il.il. pillugu aalajangiineq

§ 363. Eqqartuussivik tigummigallagassannkortitsinissamik imaluunniit tamatumunnga taarsiullugu periarfissiissutitiliinissamik aalajangiiguni aalajangiinermini taassavaa tigummigallagassannkortitsinissaq pillugu aalajangersakkat suut eqqartuussivimmit atorneqarsimanersut, aammalu suliassami pissutsit sorpiaat aalajangiisitsisuusimanersut.

Imm. 2. Pasisaq eqqartuussinermi najuuppat pineqartoq aalajangiinerup imarisaanik ingerlaannaq ilisimatinneqassaaq, tak. imm. 1, aamma aalajangeqqitassannkortitsinissaaneq aalajangeqqitassannkortitsinissamullu piffissarititaasoq pillugit ilitserorneqassaaq.

Imm. 3. Pasisaq eqqartuussinermi najuussimanngippat pineqartoq sapinngisamik piaarnerpaamik imm. 2-mi taaneqartutut ilisimatinneqarlunilu ilitserorneqassaaq.

Imm. 4. Tigummigallagassannkortitsinissaq pillugu aalajangiinerup assilineqarnera noqqaassuteqarneq naapertorlugu pineqartumut sapinngisamik piaarnerpaamik tunniunneqartassaaq.

Tigummigallagassannkortitsinissamut piffissarititaasoq il.il. aamma piffissarititaasumik sivitsuisarneq

§ 364. Pasisap Kalaallit Nunaanniinnginnera eqqaassanngikkaanni eqqartuussisut aalajangiissutiminni tigummigallagassannkortitsinissamut piffissarititap imaluunniit periarfissiissutitiliinissap sivissussisaa aalajangersassavaat. Piffissarititaq sapinngisamik sivikitsuutinneqassaaq sapaatillu akunnerinit sisamanit sivissunerussanani.

Imm. 2. Eqqartuussivik piffissarititamik sivitsuisarsinnaavoq sivissunerpaamilli sapaatit akunneri sisamakkaarlugit. Sivitsuineq pisassaaq aalajangiinikkut tunngavilersorneqartussakkut, taamaassananili pasisap sivitsuinissamut akuersaarluni nalunaarsimappat.

Imm. 3. Taamaattorli pasisamik, tigummigallagaasumik imaluunniit allamik kiffaanngissusiiiasumik periarfissiissutitiligaasimasumik, sassartitsisoqanngitsoorsinnaavoq pineqartup taamaaliornissaq taamaatippagu imaluunniit eqqartuussisut isumaqarpata sassartitsinissaq naleqqutinngitsunik ajornartorsiutitaqassasoq.

Piffissarititamik sivitsuinermik aalajangeqqitassannkortitsineq

§ 365. Piffissarititaasumik sivitsuineq pillugu aalajangiineq, tak. § 364, imm. 2, taamaaliornikkut tigummigallagassannkortitsineq allatulluunniit periarfissiissutitiliineq qaammatit pingasut sinnerlugit sivissussilerneqarsimalluni, aalajangeqqitassannkortinneqarpat aalajangeqqitassannkortitsineq noqqaassuteqarneq naapertorlugu oqaatsitigut suliarineqassaaq.

Imm. 2. Eqqartuussiviup qulliunerup aalajangersinnaavaa aalajangeqqitassannkortitsineq oqaatsitigut suliarineqassasoq ungasianiit attaveqaatinik atuinikkut, tak. § 163, taamatut periaaseqarneq ajornartorsiutit naleqqutinngitsut pinaveersaarniarlugit pisariaqarsorineqarpat.

Imm. 3. Aalajangeqqitassannkortitsineq oqaaseqatigiit siulliit aappaalluunniit malillugit ataasarluni suliarineqarepat eqqartuussiviup qulliunerup aalajangiiffigissavaa, oqaatsitigut suliarinninnissamik kingusinnerusukkut noqqaassuteqarneq akuersarneqassanersoq. § 364, imm. 3-mi aalajangersagaq taamatulli atortuutinneqassaaq.

Tigummigallagassannkortitsinerup il.il. atuukkunnaarnera

§ 366. Tigummigallaganermut imaluunniit tamatumunnga taarsiullugu periarfissiissutitiliinermut piunasqaatit atuukkunnaarpata tigummigallagassannkortitsineq imaluunniit taaneqartutut periarfissiissutitiliineq atorunnaarsinneqassapput, pisariaqassappat eqqartuussisut aalajangiinerisigut.

Eqqartuussisut noqqaassuteqartoqanngikkaluarteq tamatuminnga aalajangiiffiginnissinnaapput. Eqqartuussisut aalajangiinerat tunngavilersugaassaaq.

Imm. 2. Eqqartuussisut isumaqarpata paasiniaaneq naammaginartumik sukkassusilimmik ingerlanneqanngitsoq aamma tigummigallagassanngortitsinerup allatulluunniit malittarisassiinerup ingerlaannarnissaa naleqquttuunngitsoq, tamanna eqqartuussivimmit atorunnaarsinneqassaaq. Eqqartuussisut noqqaassuteqartoqanngikkaluarteq tamatuminnga aalajangiisinnaapput. Eqqartuussisut aalajangiinerat tunngavilersugaassaaq.

Eqqartuussutissap isumaqatigiinniutigineqarnerani tigummigallagassanngortitsineq il.il.

§ 367. Piffissarititaasoq, § 364, imm. 1 imaluunniit 2 malillugu aalajangersarneqarsimasoq, naappat eqqartuussutissap isumaqatigiinniutigineqarnera aallarereersoq, tigummigallagassanngortitsineq imaluunniit tamatumunnga taarsiullugu periarfissiissutitiliineq ingerlaannassaaq sivitsueqqittoqarani, suliassami eqqartuussuteqartoqarnissaa tikillugu.

Imm. 2. Unnerluutigineqartoq eqqartuussutissap isumaqatigiinniutigineqarnissaa sioqqullugu piffissarititaq naappat eqqartuussivimmut noqqaassuteqarsinnaavoq tigummigallagaaneq imaluunniit tamatumunnga taarsiullugu periarfissiissutitiliineq § 362, imm. 4 imaluunniit § 366 malillugit atorunnaarsinneqassasoq, eqqartuussisullu taamaattoqassappat ullut arfineq-marluk qaangiutsinnagit tamatuminnga aalajangiissapput. Eqqartuussisut noqqaassut akueriumanngippassuk unnerluutigineqartoq eqqartuussisut aalajangeereerneranniit siusinnerpaamik ullut 14-it qaangiunneranni noqqaassuteqaqqissinnaavoq.

Imm. 3. § 359, imm. 2 malillugu tigummigallagaaneq apeqquataatinneqarpat atorunnaarsitsisinnaaneq eqqartuussisumit, eqqartuussutissap isumaqatigiinniutigineqarnerani peqataanngitsumit, aalajangiiffigineqassaaq, tak. § 50, imm. 2, taamaassananili § 50, imm. 2-mi oqaaseqatigiit aappaanni piumasagaatit arlaat naammassineqarsimappat. Unnerluutigineqartup noqqaassutaa eqqartuussiviup aalajangiinera malillugu allakkatigut tunngavilersuutit naapertorlugit suliarineqassaaq, eqqartuussisooq eqqartuussutissap isumaqatigiinniutigineqarnerani peqataanngitsoq aalajangiisuussappat.

Eqqartuussutip nalunaarutigineqarnerata kingorna tigummigallagaaneq il.il.

§ 368. Tigummigallagassanngortitsinissamik allatulluunniit periarfissiissutitiliinissamik aalajangiineq eqqartuussutissap nalunaarutaanissaata tungaannaanut sunniuteqartussaavoq.

Imm. 2. Eqqartuussuteqartoqareerpat eqqartuussisut politiit noqqaassuteqarnerat naapertorlugu aalajangissavaat suliareqqitassanngortitsinerusinnaasup suliarineqarnerani imaluunniit eqqartuussutip aallarnisarneqarnissaa tikillugu unnerluutigineqartoq tigummigallaraneqassanersoq, imaluunniit tamatumunnga taarsiullugu periarfissiissutinik aalajangiisooqassanersoq. Eqqartuussisut tigummigallagassanngortitsinissaq imaluunniit tamatumunnga taarsiullugu periarfissiissutitiliinissaq tunngavissaqarsorinngikkaluarlugu taamaattoq politiit noqqaassuteqarnerisigut aalajangiisinnaapput tigummigallagaanissaq imaluunniit taaneqartutut periarfissiissuteqarnissaq atuutiinnassasoq, eqqartuussiviup qulliunerusup aalajangiinissaa tikillugu. Oqaaseqatigiit aappaanni taaneqartutut aatsaat aalajangiisooqarsinnaavoq unnerluutigineqartoq eqqartuussuteqarneq tikillugu tigummigallagassanngortinneqarsimappat imaluunniit tamatumunnga taarsiullugu periarfissiissutinik malittarisassinneqarsimappat. §§ 359, 361, 362, § 363, aamma 366 taamatulli atortuutinneqasapput.

Imm. 3. Eqqartuussut suliareqqitassanngortinneqarpat tigummigallagaanissaq imaluunniit tamatumunnga taarsiullugu periarfissiissuteqarnissaq pillugu kingusinnerusukkut aalajangiinerit eqqartuussiviup qulliunerusup aalajangiinerissavai. § 359, § 361, § 362, imm. 1 aamma 4, § 363, § 364, imm. 1 aamma 2 kiisalu § 366 taamatulli atortuutinneqassapput.

§ 369. Inatsisartunut ilaasortaq kinaluunniit inatsisartut akuerseqqaartinnagit tigummigallagassanngortinneqarsinnaanngilaq, taamaassanili ilaasortaq iliuseqartoq pakasarneqarsimappat.

Tigummigallagassanngortitamik inissiisarneq

§ 370. Tigummigallagassanngortinneqartut isertitsivimmi imaluunniit inissiisarfirmi inissinneqartassapput, eqqartuussisut aalajangiisimannippata § 361 malillugu sakkukinnerumik periarfissiissutiiisoqassasoq imaluunniit § 371 malillugu Danmarkimi Pinerluuteqarsimasunik Isumaginnittoqarfup ataani inissiisarfirmi tarnip nakorsaannit aqunneqartumi inissiisoqassasoq.

Imm. 2. Tigummigallarneqartoq sumiiffimmi, pinerlunermik suliassap sularineqarfīgisaani, ajornannippat inissinniarneqartassaaq.

Imm. 3. Isertitsiviup imaluunniit inissiisarfup avataani inissiisoqarsinnaavoq peqqissutsikkut pissutsit pissutigalugit.

Danmarkimi Pinerluuteqarsimasunik Isumaginnittoqarfup ataani inissiisarfirmi tarnip nakorsaannit aqunneqartumi tigummigallagassanngortitsineq

§ 371. Eqqartuussisut aalajangiiffīgisinnaavaat tigummigallagassanngortinneqartoq Danmarkimi Pinerluuteqarsimasunik Isumaginnittoqarfup ataani inissiisarfirmut tarnip nakorsaannit aqunneqartumut

inissinneqassasoq, pissutissaqartumik pasitsaanneqarpat tigummigallarneqartoq toqutsisimasoq, ujajaasimasoq, kiffaanngissusiiasimasoq, peqqarniitsumik nakuuserluni pinerluuteqarsimasoq, pinerluttulerinermi inatsimmi § 98-imi taaneqartutut ittumik siorasaarisimasoq, pinngitsaaliilluni atoqatiginnissimasoq imaluunniit kinguaassiutitigut ilungersunartumik allatut pinerluuteqarsimasoq imaluunniit ikuallatsisimasoq imaluunniit taaneqartut arlaannik pinerloriaraluarsimasoq, aamma

1) tigummigallarneqartup atugarisai pillugit paasissutissiissutit naapertorlugit aalajangersimasunik pissutissaqarpat isumaqassalluni tigummigallarneqartoq tarnikkut ajoquteqarnini pissutigalugu § 361 malillugu sakkukinnerusumik periarfissiissutisinnegarsinnaanngitsoq imaluunniit § 370 malillugu inissinneqarsinnaanngitsoq, imaluunniit

2) tigummigallarneqartup atugarisai pillugit paasissutissiissutit naapertorlugit aalajangersimasunik pissutissaqarpat isumaqassalluni § 361 malillugu sakkukinnerusumik periarfissiissutiiinissaq imaluunniit § 370 malillugu inissiinissaq pisariaqartumik isumannaatsuunngitsoq.

Imm. 2. Inatsiseqarnermut ministeri malittarisassiorsinnaavoq inuit, Danmarkimi Pinerluuteqarsimasunik Isumaginnittoqarfup ataani tarnip nakorsaannit aqunneqartumi inissiisarfirmiitsitat aneersinnaatitaanissamut il.il. akuerineqartarnerat pillugu, tamatumunnga tunngassutillit isummerfigineqareersimannippata. Inatsiseqarnermut ministeri tamatumunnga atatillugu aalajangersaasinnaavoq aalajangiinerit, malittarisassat taakku naapertorlugit aalajangiinerusut, allaffissornikkut pisortanut qulliunerusunut suliassanngortinneqarsinnaassanngitsut.

Danmarkimi Pinerluuteqarsimasunik Isumaginnittoqarfup ataani inissiisarfirmi tarnip nakorsaannit aqunneqartumi tigummigallagassanngortitsinissap aalajangiiffīgineqartarnera

§ 372. Eqqartuussisut § 371 naapertorlugu inissiinissaq pillugu aalajangiinerat tamanna pillugu immikkoortumik aalajangiissuteqarnikkut aalajangiinerussaaq. Eqqartuussisut § 371 naapertorlugu inissiinissamik aalajangiippata eqqartuussisut taagussavaat aalajangiineri pissutsit aalajangersimasut, § 371-imi piumasagaatit naammassineqarnerannut tunngaviusut.

Imm. 2. Eqqartuussisut aalajangiinerminni inissiinerup sivilissusissaanut piffissarititaasoq aalajangersassavaat. Piffissarititaasoq sapinngisamik sivilitsuussaaq aammalu tigummigallagaatitsinissaq pillugu § 364, imm. 1 imaluunniit 2 malillugu piffissarititaasumiit

sivisunerussanani. §§ 363, imm. 2-4, 364, imm. 2 aamma 3, 365, 366 aamma 368 taamatulli atortuutinneqassapput.

Imm. 3. Inatsiseqarnermut ministeri nalunaarutikkut § 371-imik aamma § 372-imik atorunnaarsitsisinnaavoq.

Immikkoortitaalluni tigummigallagassanngortitsineq

§ 373. Eqqartuussisut politiinit noqqaavigineqarnikkut aalajangersinnaavaat tigummigallarnejartooq inissinneqartunut allanut akuliutitinneqassanngitsoq (immikkoortitaaneq)

1) tigummigallagassanngortitsineq § 359, imm. 1, nr. 2, litra c naapertorlugu aalajangigaasimappat, aamma

2) aalajangersimasunik pissutisaqarluni isumaqartoqarpat tigummigallarnejartup suliassami malersuiniarnermik, aamma inissinneqarsimasut allat aqutugalugit pasineqaqatiminik sunniiniaanermigut imaluunniit allanik siorasaarinermigut imaluunniit allatut iliorluni sunniiniarnermigut, akornusiinissaa pinngitsoortinniarlugu tigummigallagaatitsiinnerneq immiini naammanngitsoq.

Immikkoortitaanissaq pillugu atsikkutigiissaarinissamut piumasaqaatit il.il.

§ 374. Immikkoortitaaneq aatsaat aallarnernejartassaaq imaluunniit ingerlatiinnernejartassaaq

1) tamatumunnga siunertaasoq sakkukinnerusunik periarfissiissutitiliinikkut naammassineqarsinnaanngippat, matumunnga ilanngullugu tigummigallarnejartumik inissinneqarsimasunit allanit aalajangersimasunit allaanerusumut inissiineq imaluunniit allatut iliuuseqarluni tigummigallarnejartup inissinneqarsimasunik taamaattunik peqateqarsinnaajunnaarsinneqarnera imaluunniit allakkanik misissuisalerneq, pulaartunik misissuiffignittarneq imaluunniit pulaartoqarnissamik inerteqquteqarneq

2) akuliunneq, matumunnga ilanngullugu tigummigallarnejartup ukiukinnera, timikkut tarnikkulluunniit sanngiitsuunera imaluunniit inuttut atugarisai pissutugalugit akuliunneq immikkut ittumik artukkiinnermik kinguneqarsinnaasoq, suliassap qanoq ittuuneranut peqqarniissusaanullu aammalu tigummigallarnejartooq pisuutitaassappat pineqaatissiissutissatut ilimagineqarsinnaasumut naleqqutinngitsutut isumaqarfineqanngippat, aamma

3) paasiniaaneq ingerlanneqarpat immikkoortitaalluni tigummigallartitsinermi pisariaqartinnejartutut immikkut sukkassusilimmik, matumunnga ilanngullugu § 343 naapertorlugu uppersaatissatigut isumannaarinissamut periarfissanik atuineq.

Immikkoortitaanerup sivisunerpaaffissaa

§ 375. Immikkoortitaasussanngortitsisoqassanngilaq ataannartumik sapaatit akunnerinik arfineq pingasunit sivisunerusunik, taamaattoq tak. imm. 2.

Imm. 2. Pasilliut inatsisinik unioqutitsinermut immikkut peqqarniissusilimmut tunngasuuppat tigummigallarnejartorlu 18-inik ukioqalereersimappat immikkoortitaasussanngortitsisoqassanngilaq ataannartumik qaammatinit pingasunit sivisunerusunik. Taamaattorli eqqartuussisut qaqutigooortumik akuerisinnaavaat immikkoortitaaneq qaammatit pingasut sinnerlugit sivitsorneqassasoq, malersuiniarnermi soqutigisassat pingaarutillit pissutugalugit immikkoortitaanerup ingerlatiinnernejarnissaa pisariaqartinnejarpat, tigummineqartup tamanna tikillugu immikkoortitaaffigisimasaata sivisussusaa apeqqutaatinnagu.

Immikkoortitaanissamik aalajangiineq

§ 376. Eqqartuussisut immikkoortitaanissamik aalajangiinerat tamanna pillugu immikkoortumik aalajangiinerussaaq. Eqqartuussisut immikkoortitaanissamik aalajangiippata aalajangiinermi pissusiviusut, §§ 373-375-imi immikkoortitaanissamut imaluunniit immikkoortitaanerup ingerlaannarnissaanut piumasaqaatit naammassineqarnerannut tapersersuutaasut, eqqartuussisunit taagorneqassapput.

Imm. 2. Immikkoortitaaneq pillugu eqqartuussisut aalajangiineranni malittarisassat § 362, imm. 2-4-miittut aamma §§ 363-imiittut, 364-imiittut, 366-imiittut kiisalu 368-imiittut taamatulli atortuutinneqassapput. Taamaattorli immikkoortitaanissamik aallartitsinermi akuliunnerup sivirusissusaanut piffissaliussaq siulleq sapaatit akunnerinit marlunnit sivirusunerussanngilaq. Tigummigallarneqartoq 18-it inorlugit ukioqarpat, immikkoortitaanissamut piffissarititaasoq sivirusnerpaamik sapaatit akunneri marlukkaarlugit sivitsorneqartarsinnaavoq.

Immikkoortitaaneq pillugu aalajangeqqitassanngortitsineq

§ 377. Immikkoortitaaneq sapaatit akunneri arfineq-pingasut sinnerlugit sivitsorneqarpat tamatuminnga aalajangeqqitassanngortitsissut noqqaassuteqarnikkut oqaatsitigut suliarineqassaaq. Immikkoortitaaneq pillugu aalajangiineq atortussanngortinneqarpat immikkoortitaanerup ingerlatiinnarneqarnissaanik kingusinnerusukkut aalajangeqqitassanngortitsinerit noqqaassuteqarnikkut taamatulli oqaatsitigut suliarineqassapput, immikkoortitaanerup sivitsorneqarnissaanik aalajangeqqitassanngortitsissummik oqaatsitigut suliarinninnermiit kingullermiit sapaatip akunneri arfineq pingasut sinnerlugit sivitsuinissamik aalajangiisoqarsimassappat. Eqqartuussivik qulliunerusoq isumaqarpat oqaaseqatigiit siulliit imaluunniit aappaat malillugit suliarinninnissaq naleqqutinngitsunik ajornartorsiutitaqassasoq aalajangersinnaavoq aalajangeqqitassanngortitsinermik suliaasaq imatut suliarineqassasoq pasisaq, illersuisoq politiillu suliaasap suliarineqarnerani oqaaseqaateqarsinnaallutik aamma ungasianiit attaveqaatinik atuinikkut suliaasamik malinnaaviginnissinnaallutik, tak. § 163. Oqaaseqatigiinni siullerni imaluunniit aappaanni pineqartuniit allaanerusunik allanik pisoqartillugu eqqartuussiviup qulliunerusup aalajangertassavaa oqaatsitigut suliarinninnissaq pillugu noqqaassuteqarneq akuersarneqassanersoq. Aalajangersagaq § 364, imm. 3-miittoq taamatulli atortuutinneqassaaq.

Tigummigallagaanerup nalaani pissutsit

§ 378. Tigummigallarneqartoq inunnit allaniit immikkoortitaassanngilaq imaluunniit annertunerusutigut killiliiffigineqassanani, tigumminniffiusumi torersaarnissamik isumannaatsuunissamillu allanngutsaaliuinissamut pingaartittariillit saniasigut.

Pulaartoqartarneq aamma anisinnaanermut akuersissut

§ 379. Politiit tigummigallagaatitsinerup siunertarisaa tunngavigalugu tigummigallarneqartup pulaartoqarnissaanut akerliliisinnaapput, imaluunniit piumasarisinnaallugu pulaartoqarneq nakkutigineqartumik pisassasoq. Politiit pulaartoqarnissaq itigartitsissutigippassuk tigummigallarneqartoq tamatuminnga ilisimatinneqartassaaq, eqqartuussisut paasiniaanermut pingaarutillit tunngavigalugit allatut aalajangiisimassanngippata. Tigummigallarneqartup piumasarisinnaavaa pulaartoqarnissamut politiit itigartitsissutaat aammalu nakkutiginninnissamik piumasaqaataat eqqartuussisunut aalajangiiffigisassatut saqqummiunneqassasoq. Tigummigallarneqartup illersuisuni nakkutigisaanngitsumik tamatigut pulaartorisinnaatitaavaa.

Imm. 2. Paaqqinniffimmi aqutsisut politiinut akuersisitsereernikkut tigummigallarneqartup piffissami sivikinnerusumi anisinnaatitaanissaa akuersissutigisinnaavaat.

Allakkanik nakkutilliineq

§ 380. Politiit tigummigallarnejartup allagarsiassai imaluunniit taassuma allagai tiguisussamit tiguneqartinnagit imaluunniit nassiunneqalersinnagit misissorsinnaavaat. Politiit allakkat sapinngisamik piaarnerpaamik tunniuttassavaat imaluunniit nassitutassavaat, imarisaat paasiniaanermut imaluunniit tigumminniffiusumi torersaarnissamik isumannaatsuunissamillu allanngutsaaliuiniarnermut ajoqusiinnassanngippata. Allakkat uninngatinneqarpata uninngatitsiinnarnissamik apeqqut eqqartuussisunut aalajangiiffigisassatut ingerlaannaq saqqummiunneqassaaq. Uninngatitsiinnarnissaaq aalajangiiffigineqarpata nassitsisusooq ingerlaannaq ilisimatinneqassaaq, eqqartuussisut paasiniaanermi pingaartitassat pissutigalugit allatut aalajangiisimassanngippata. Tigummigallarnejartoq eqqartuussivimmik, illersuisumik, inatsiseqarnermut ministerimik, Pinerluuteqarsimasunik Isumaginnittoqarfup pisortaanik, Folketingip Ombudsmandianik aamma Inatsisartut Ombudsmandianik nakkutigisaanngitsumik allaffigineqarteqarsinnaatitaavoq. Inatsiseqarnermut ministeri malittarisassiorsinnaavoq tigummigallarnejartup pisortaqarfinnut allanut imaluunniit inunnut ataasiakkaanut allakkanik matoqqasunik nassitsisinnaatitaanera pillugu.

Piginnaatitaaffitsigut killilersuutinik allanik eqqartuussiviit nakkutilliinerat

§ 381. Politiit aalajangiippata tigummigallagassanngortitsinermi siunertarisaq pissutigalugu tigummigallarnejartup piginnaatitaaffiini allatigut killilersuisooqassasoq tigummigallarnejartup piumasarisinnaavaa killiliissutaasunik ingerlatsiinnarnissamik apeqqut eqqartuussisunut aalajangiiffigisassatut saqqummiunneqassasoq.

Imm. 2. Tigummigallarnejarnerup nalaani qanoq pineqarneq pillugu maalaarutit eqqartuussivimmut saqqummiunneqarsinnaapput.

Tigummigallagassanngortinneqartup paasiniaavigineqartarnera

§ 382. Pinerluuteqarsimasunik Isumaginnittoqarfimmi sulisut atornejassanngillat tigummigallarnejartut kiffaanngissusiarneqarsimasulluunniit allat imaluunniit inuit allat politiit atorfiluunngitsut tigummigallarnejartut paasiniaavigineqarneranni.

Pisortatigoortumik aalajangersakkat

§ 383. Inatsiseqarnermut ministeri imaluunniit inuk inatsiseqarnermut ministerip tamatumunnga piginnaatitaa tigummigallarnejartut qanoq pineqartarnerat pillugu erseqqinnerusunik malittarisassiussaaq, matumunnga ilanngullugit tigummigallarnejartut kisimiititaasut tigummigallarnejartullu politiit isertitsiviinut inissitat.

Kapitali 36

Nalunaaritini isertuussani akuliuffiginnittarneq, alaatsinaattarneq, timikkut akuliuffiginnittarneq, aamma uppersaatissanik ujarlertarneq

Nalunaarutini isertuussani akuliuffiginnittarneq aamma alaatsinaattarneq

Allakkanik ammaasarneq unitsitsisarnerlu

§ 384. Politiiniit noqqaavigineqarneq naapertorlugu eqqartuussisut tunngavilersukkamik aalajangiinikkut aalajangersinnaavaat allakkat nassiussallu allat politiinut, uninngatitsisinnaasunut, ammaasinnaasunut tamakkualu imarisaannik paasisassarsiorfiginnissinnaasunut, tunniunneqartassasut (allakkanik ammaasarneq),

- 1) aalajangersimasunik tunngavissaqarluni isumaqartoqarpap taamaaliornikkut pasisamut imaluunniit pasisamiit nalunaaruteqartoqartartoq, imaluunniit nassitsisoqartartoq,
- 2) akuliunnissaq paasiniaanermut pingaaruteqarlunnartuusorineqarpap, aamma
- 3) paasiniaaneq inatsisinik unioqquitsinermut immikkut peqqarniissusilimmut imaluunniit meeqqat pillugit tiingasulersaarutinut tunngassuteqarpap.

Imm. 2. Politiit nassiussanik il.il. imm. 1-imi taaneqartunik nuutsitsisinnaapput, tamakku imarisaannik politiit paasisassarsiorfiginnissinnaatitaanerap naapertorlugu.

Imm. 3. Politiit noqqaassuteqarneq naapertorlugu eqqartuussisut aalajangersinnaavaat pasisamut pasisamiillu allakkat nassiussallu allat politiinut, uninngatitsisinnaasunut, ammaasinnaasunut tamakkulu imarisaannik paasisassarsiorfiginnissinnaasunut, tunniunneqartassasut, immikkut qulaarnaallisillugu pasitsaanneqarpap nassiussat arsaarinnissutaasariaqartunik imaqartut, imaluunniit pinerlunnikkut arlaanniit, taakku utertinneqarnissaannik piimasaqarsinnaasumiit, tiguneqarsimasut. Aalajangiineq tunngavilersukkamik aalajangiinerussaaq.

Imm. 4. Nassiussat, allakkanik ammaanissaq siunertaralugu uninngatinneqarsimasut, tak. imm. 1, tiguisussatut allassimasumut sapinngisamik piarnerpaamik ingerlateqqinneqartassapput. Nassiussanik ingerlatitseqqiisarnerup unitsinneqarnissaa politiit kissaatigippassuk allakkat uninngatinneqartarnissaannik noqqaassut eqqartuusivimmut tunniunneqassaaq uninngatitsilernermiit nal. akunneri 48-t qaangiutsinnagit. Imm. 1 taamatullu atortuutinneqassaaq.

Oqarasuaatitigut oqaloqatigiinnernik naalaarneq

§ 385. Politiit noqqaassuteqarneq naapertorlugu eqqartuussisut aalajangiinikkut, tunngavilersorneqartussakkut, aalajangiisinnapput politiit oqarasuaatiniit aalajangersimasuniit oqaloqatigiinnernik imaluunniit tamatumunnga assingusumik nalunaarasuaatitigut attaveqaatigiinnernik (oqarasuaatitigut oqaloqatigiinnernik naalaarneq) piffissaliunneqartup ersarinnerusup iluani nalaarsinnaatinneqassasut,

- 1) aalajangersimasunik tunngavissaqarluni isumaqartoqarpap taamaaliornikkut pasisamut imaluunniit pasisamiit nalunaaruteqartoqartartoq,
- 2) akuliunneq paasiniaanermut pingaaruteqarlunnartuusorineqarpap, aamma
- 3) paasiniaaneq inatsisinik unioqquitsinermut immikkut peqqarniissusilimmut, eqqissiviillortitsinermut imaluunniit meeqqat pillugit tiingasulersaarutinut tunngassuteqarpap.

Imm. 2. Politiit oqaloqatigiinnerit il.il. imm. 1-imi taaneqartut immiussinnaavaat, taakku imarisaannik paasisassarsiornerisamat piginnaatitaanertik naapertorlugu.

Nalunaarasuaatit pillugit paasisutissarsiorarneq

§ 386. Politiit noqqaassuteqarneq naapertorlugu eqqartuussisut aalajangiinikkut, tunngavilersorneqartussakkut, aalajangersinnaavaat politiit piffissap erseqqinnerusup iluani paasisutissarsiorsinnaatitaassasut oqarasuaatit imaluunniit attaveqaatit assingusut sorliit oqarasuaammut attaveqaammulluunniit allamut aalajangersimasumut atassuserneqarsimanersut imaluunniit atassuserneqartarsimanersut, naak piginnittoq taamaaliornissamat akuersissuteqarsimanngikkaluartoq (nalunaarasuaatit pillugit paasisutissarsiorneq),

- 1) aalajangersimasunik tunngavissaqarluni isumaqartoqarpap taamaaliornikkut pasisamut imaluunniit pasisamiit nalunaaruteqartoqartartoq,
- 2) akuliunneq paasiniaanermut pingaaruteqarlunnartuusorineqarpap, aamma
- 3) paasiniaaneq inatsisinik unioqquitsinermut immikkut peqqarniissusilimmut, eqqissiviillortitsinermut imaluunniit meeqqat pillugit tiingasulersaarutinut tunngassuteqarpap.

Nalunaarasuaatit pillugit annertusisamik paasisutissarsiorarneq

§ 387. Politiiniit noqqaassuteqarneq naapertorlugu eqqartuussisut aalajangiinikkut, tunngavilersorneqartussakkut, aalajangersinnaavaat politiit piffissap erseqqinnerusup iluani paasisutissarsiorsinnaatitaassasut oqarasuaatit imaluunniit attaveqaatit assingusut sorliit oqarasuaammut attaveqaammulluunniit allamut aalajangersimasumut atassuserneqarsimanersut imaluunniit atassuserneqartarsimanersut, naak piginnittoq taamaaliornissamut akuersissuteqarsimanngikkaluartuq (nalunaarasuaatit pillugit annertusisamik paasisutissarsiorneq),

- 1) akuliunneq paasiniaanermut pingaaruteqarlunnartuusorineqarpat, aamma
- 2) paasiniaaneq inatsisinik unioqqutitsinermut immikkut peqqarniissusilimmut, inuit inuunerisa atugarissaarnerisaluunniit imaluunniit inuiaqatigiit naliliutaasa annertuut navianartorsiortinneqarnerannik kinguneqarsimasumut imaluunniit kinguneqarsinnaasumut tunngassuteqarpat.

Ininik naalaarneq

§ 388. Politiiniit noqqaassuteqarneq naapertorlugu eqqartuussisut aalajangiinikkut, tunngavilersorneqartussakkut, aalajangersinnaavaat politiit oqaloqatigiinnernik oqaaserisanilluunniit § 385-imi taaneqartuniit allaanerusunik atortorissaarutininik atuillutik naalaarsinnaassasut (ininik naalaarneq),

- 1) aalajangersimasunik tunngavissaqarluni isumaqartoqarpat taamaaliornikkut pasisamut imaluunniit pasisamiit nalunaaruteqartoqartartoq,
- 2) akuliunneq paasiniaanermut pingaaruteqarlunnartuusorineqarpat, aamma
- 3) paasiniaaneq inatsisinik unioqqutitsinermut immikkut peqqarniissusilimmut, inuit inuunerisa atugarissaarnerisaluunniit imaluunniit inuiaqatigiit naliliutaasa annertuut navianartorsiortinneqarnerannik kinguneqarsimasumut imaluunniit kinguneqarsinnaasumut tunngassuteqarpat.

Imm. 2. Politiit oqaloqatigiinnernik il.il., imm. 1-imi taaneqartunik, immiussisinnaapput, oqaloqatigiinnerit imarisaannik paasisassarsiorsinnaatitaanertik naapertorlugu.

Atsikkutigiissaarinissamik piumasagaatit il.il.

§ 389. Nalunaarutini isertuussani akuliuttoqartassanngilaq akuliunnermi siunertarisaq, suliassap qanoq ittuunera peqqarniissusaalu naapertorlugu tamanna naleqquttuusorineqanngippat aamma akuliunnerup inunnut eqqugaasunut ajuaallaataasinnaasorineqarneranut akornusersuutaasinnaasorineqarneranullu naleqqiullugu naleqquttuusorineqanngippat.

§ 390. Pasisap inunnut, malittarisassat § 143-miittut naapertorlugit ilisimannittutut nassuiaateqarsinnaanngitsunut, atassuteqarfigninneranut tunngatillugu oqarasuaatinik naalaartoqartassanngilaq, allatut naalaartoqartassanngilaq, allakkanik ammaasoqartassanngilaq allakkanillu uninngatitsisoqartassanngilaq.

Eqqartuussiviup aalajangiinera

§ 391. Eqqartuussiviup aalajangiinermi taagussavai oqarasuaatit normui, sumiiffii, najukkat imaluunniit nassiussat, akuliunnermut tunngasut. Aammattaaq taaneqassapput suliassami pissutsit aalajangersimasut akuliunnermut piumasagaatit naammassineqarsimanerannut tapersiutaasut. Aalajangiineq sukkulluunniit allanngortinneqarsinnaavoq.

Imm. 2. Eqqartuussiviup aalajangiinermi piffissaq akuliunnerup ingerlaffissaa aalajangissavaa. Piffissaq taanna sapinngisamik sivikitsuutinneqassaaq sapaatillu akunneri sisamat sinnissanagit. Eqqartuussivik politiinit noqqaavigneqarnermigut piffissamik sivitsuisarsinnaavoq, sivisunerpaamilli sapaatip akunneri sisamakkaarlugit.

Imm. 3. Akuliunnerup siunertarisaa maangaannassagaluarpap, eqqartuussiviup aalajangiinissaa utaqqineqassappat, politiit akuliunniarlutik aalajangersinnaapput. Taamaattoqassappat politiit sapinngisamik piaarnerpaamik kingusinnerpaamillu akuliunnerup aallarnerneqarneraniit nalunaaquttap akunneri 24-it qaangiutsinnagit suliassaq eqqartuussivimmut saqqummiutissavaat. Eqqartuussivimmit aalajangiiffigineqassaaq akuliunneq akuerineqarsinnaanersoq, kiisalu ingerlatiinnarneqarsinnaanersoq, taamaassappallu piffissami qanoq siviutigisumi ingerlanneqassanersoq, tak. imm. 1, oqaaseqatigiit aappaat pingajuilu, aamma imm. 2. Eqqartuussiviup aalajangiinera tunngavilersugaassaaq. Eqqartuussiviup isumaa malillugu akuliuttoqarsimasussaannikkaluarpap, eqqartuussiviup Inatsiseqarnermut Ministereqarfik tamatuminnaga nalunaarfigissavaa.

Illersuisumik ivertitsineq il.il.

§ 392. Nalunaarutitigut isertuussinermi akuliuttoqarsinnaanersoq eqqartuussivik aalajangiitinnagu akuliunnermi pineqartoq illersuisulernerqassaaq, illersuisorlu oqaaseqaateqarnissamut periarfissaqartinneqassaaq.

Imm. 2. Illersuisoq, imm. 1 malillugu ivertinneqarsimasoq, suliassami eqqartuussinissamik tamanik ilisimatinneqartassaaq taakkunanilu najuussinnaatitaassaaq aammalu paasissutissamik, politiit pissarsiarisimasaannik, paasisaqarsinnaatitaassaaq. Illersuisoq aammattaq piginnaatitaavoq paasissutissarsiat assilineqarnerinik tunineqartarnissaminut. Politiit isumaqarpata paasissutissarsiat immikkut isertuunneqartariaqartut, taamaattumillu taakku assilineqarneri tunniunneqartariaqanngitsut, tamanna pillugu apeqquut illersuisup noqqaassuteqarneratigut politiinit eqqartuussivimmut aalajangiiffigisassanngortinneqassaaq. Illersuisup paasissutissarsiani allanut ingerlateqqissanngilai imaluunniit politiit akuersiseqqaartinnagit akuliuffigineqartoq attavigisassanagu. Illersuisussatut ivertinneqartoq nammineerluni orniguttassaaq.

Imm. 3. Eqqartuussiviup aalajangersinnaavaa illersuisussatut ivertinneqartoq suliassap ingerlanneqarnerani pasisamut kimulluunniit illersuisuusinnaanngitsoq.

Imm. 4. Paasiniaaneq pinerluttulerinermi inatsimmi kapitali 7-imik imaluunniit 8-mik unioqqutitsinermut tunngasuuppat suliassaq Kalaallit Nunaanni Eqqartuussivimmit suliarineqassaaq, illersuisorlu immikkut illersuisartoqatigiinneersuussaaq, oqaaseqatigiit pingajuini taaneqartuniit. Illersuisumik immikkut ittumik illersuisartoqatigiinneersuunngitsumik ivertitsinissamik eqqartuussiviup aalajangiinera eqqartuussivimmut qulliunerusumut aalajangeqqitassanngortinneqarsinnaavoq. Inatsiseqarnermut ministeri Kalaallit Nunaannut tunngatillugu illersuisumik ataatsimik arlalinnilluunniit sulisussarsissaaq, suliassani oqaaseqatigiinni siullerni taaneqartuni ivertinneqarsinnaasunik. Inatsiseqarnermut ministeri illersuisut pineqartut pigaartuusarnissaannut aaqqiissuteqarnissaaq, suleriaannaanissamut akissarsiassaat aammalu apeqquutit isumannaatsuutitsinermut tunngasut pillugit erseqqinnerusunik malittarisassiussaaq, matumunnga ilanngullugu allatsimik ikiorteqarnissap akuersissutigineqartarnera.

Politiinut ikiorsineq

§ 393. Allakkeriviit aamma nalunaarasuaatinut atassusiinissamik neqerooruteqartartut nalunaarasuartaarfiillu nalunaarutitigut isertuussisussaaneq pillugu politiit akuliunneranni ikiorsiisassapput, matumunnga ilanngullugu oqarasuaatitigut oqaloqatigiinnernik il.il. naalaarnissat aaqqiissuullugit, §§ 386-imi aamma 387-imi taaneqartunik paasissutissiillutik kiisalu nassiussamik il.il. unitsitsillutik tunniussisarlutillu.

Imm. 2. Pisut § 386-imi aamma 387-imi taaneqartut saniatigut eqqartuussiviup politiinit noqqaavigineqarnikkut oqarasuaammik attaveqaammilluunniit allamik piginnittuusoq akuersisillugu ingerlatsivinnut il.il. imm. 1-imi taaneqartunut ilisimatitsissutigeqqusinnaavaa attaveqaammut pineqartumut attaveqaatit allat suut attaveqartinneqarnermut..

Imm. 3. § 150, imm. 1-imi aalajangersagaq taamatulli atortuutinneqassaaq imm. 1-imi taaneqartutut pissutissaqarani ikiuutinngitsoortumut, imaluunniit imm. 2 malillugu peqqussutaasunik malinninngitsumut.

Imm. 4. Nalunaarasuaatinut atassusiinissamik neqerooruteqartartut nalunaarasuarterfiillu nalunaarasuaatitigut paasissutissarsiat inatsisinik unioqqutitsinernik paasiniaanermi malersuiniarnermilu atugassiat nalunaarsorlugillu ukioq ataaseq toqqortarisassavaat. Inatsiseqarnermut ministeri taamatut nalunaarsuisarneq toqqortarinninnissarlu pillugit erseqqinnerusunik malittarisassiussaaq.

Imm. 5. Inatsiseqarnermut ministeri nalunaarasuaatinut atassusiinissamik neqerooruteqartartut nalunaarasuarterfiillu nalunaarutininik isertuussisussaananermi iliuseqarnermut atatillugu suliassatigut politiiunut ikiuunnissaat pillugu malittarisassiorsinnaavoq.

Imm. 6. Imm. 4-mi oqaaseqatigiinnik siullernik unioqqutitsineq pinerluttulerinermi inatsit malillugu pineqaatissinneqarnermik kinguneqarsinnaavoq. Ingerlatsiviit il.il. (inuit pisinnaatitaasut pisussaataasullu) pinerlunnerni inatsisitigut akisussaataasinnaapput pinerluttulerinermi inatsisip kapitali 5-iani malittarisassat malillugit.

Imm. 7. Najooqutassani, imm. 4-mi oqaaseqatigiit aappaat aamma imm. 5 naapertorlugit aalajangersarneqarsimasuni, aalajangersarneqarsinnaavoq peqqussutini aalajangersakkanik unioqqutitsineq pinerluttulerinermi inatsit malillugu pineqaatissiissutinik kinguneqarsinnaasoq. Aammattaaq aalajangersarneqarsinnaavoq ingerlatsiviit il.il. (inuit pisinnaatitaasut pisussaataasullu) unioqqutitsinerini ingerlatsivik il.il. pinerluttulerinermi inatsisitigut akisussaataasinnaasoq pinerluttulerinermi inatsimmi kapitali 5-imi malittarisassat malillugit.

Imm. 8. Inatsiseqarnermut ministeri malittarisassiorsinnaavoq nalunaarutitigut isertuussisussaananermi akuliunnerit naammassiniarneranni politiiunut ikiorsiinerup aningaasatigut taartisissutaasinnaanera pillugu.

Qarasaasiakkut paasissutissanik nukinngullugu qulakkeerineq

§ 394. Paasiniaanermut ilaatillugu qarasaasiakkut uppersaatissat pingaaruteqarsinnaatillugit politiiit nalunaarasuaatinik atassusiinissamik neqerooruteqartartunut nalunaarasuarterfinnullu peqqusisinnaapput qarasaasiakkut paasissutissat, matumunnga ilanngullugit angallanermik paasissutissat, nukinngullugit qulakkiissagaat.

Imm. 2. Imm. 1 naapertorlugu nukinngullugu qulakkeerinissamik peqqussuteqarnermi qarasaasiakkut paasissutissat, peqqussuteqarnerup nalunaarutigineqarnerani piffissami toqqortarineqartut, taamaallaat ilaatinneqarsinnaapput. Peqqussuteqarnermi taaneqassaaq paasissutissat suut qulakkeerneqassanersut, aamma piffissami sorlermi qulakkeerneqassanersut (piffissaq qulakkeeriniffiusussaq). Peqqussuteqarneq taamaallaat paasissutissanut, paasiniaanermi pisariaqartutut nalilerneqartunut, killilerneqartassaaq aamma qulakkeerinermi piffissarititaasoq sapinngisamik sivikitsuusassaaq ullunillu 90-iniit sivisunerusinnaanani. Peqqussuteqarneq sivitsorneqarsinnaanngilaq.

Imm. 3. Nalunaarasuaatinut atassusiinissamik neqerooruteqartartut nalunaarasuarterfiillu pisussaaffigaat, imm. 1 malillugu qulakkeerinissamut ilaatillugu, qarasaasiakkut attaveqaqatigiinnermut atatillugu atorineqarsimasut attassuteqaataat imaluunnit kiffartuussinerat, paasiniaanermut pingaaruteqarsinnaasut, nalunaarasuaatinut atassusiinissamik neqerooruteqartartut imaluunniit nalunaarasuarterfiit allat pillugit qarasaasiakkut paasissutissat kinguarsarnagit ingerlateqqiissaallutik.

Imm. 4. Imm. 1-imik aamma 3-mik unioqqutitsineq pinerluttulerinermi inatsit malillugu pineqaatissiissutaasinnaavoq. Ingerlatsivik il.il. (inuit inatsisitigut pisinnaatitaasut pisussaataasullu) pinerluttulerinermi inatsimmi kapitali 5-imi malittarisassat malillugit pinerluttulerinermi inatsisitigut akisussaatinneqarsinnaapput.

Allakkanik ammaanermi il.il. illersuisup peqataasarnera

§ 395. Illersuisoq § 392 malillugu ivertinneqarsimasoq piumasaqarsinnaavoq allakkanik nassiussanillu allanik matoqqasunik ammaaneq najuuffigiumallugu. Taamaassanngilarli ammaanissaq kinguartinneqarsinnaanngippat.

Kalerrisarneq

§ 396. Nalunaarutitigut isertuussisussaannermi akuliunnerup naammassereerneraniit akuliunneq ilisimatitsissutigineqartassaaq, taamaattoq tak. imm. 4. Inuk imm. 2 malillugu ilisimatinneqartussaq suliassami pasisaasimappat aamma tamanna pillugu ilisimatinneqartassaaq kiisalu pasilliut inatsisinik unioqqutitsinermut sumut tunngasuunersoq.

Imm. 2. Kalerrisoqartassaaq

- 1) oqarasuaammik naalaarnermi aamma nalunaarasuaatitigut paasissutissarsinermi oqarasuaammik pineqartumik piginnittumut,
- 2) inimik naalaarnermi inuk sumiiffimmik imaluunniit inimik oqaloqatigiiffiusimasumik imaluunniit oqaaseqarfiusimasumik atuisartumut, aamma
- 3) allakkanik ammaanermi allakkanillu uninngatitsinermi nassitsisuusumut imaluunniit nassiunneqartunik tiguisussamut.

Imm. 3. Kallerriisassaaq eqqartuussivik, § 391 malillugu aalajangiisuusimasoq. Politiit piffissap iliuuseqarfiusussatut akuerisap naaneraniit kingusinnerpaamik ullut 14-it qaangiutsinnagit kalerrisoqannginnissaanik imaluunniit kalerrinissap kinguartikkallarneqarnissaanik noqqaassuteqarsimanngippata kalerrineq pisassaaq sapinngisamik piaarnerpaamik, tak. imm. 4. Kallerriissutip assilineqarnera § 392 malillugu illersuisussanngortitamut nassiunneqassaaq.

Imm. 4. Kallerriinissaq imm. 1-3-mi taaneqartutut paasiniaanermit ajoqutaassappat imaluunniit pissutsit kalerrinissamut akerliuppata eqqartuussivik politiit noqqaavigineqarnikkut aalajangiisinnaavoq kalerrisoqassanngitsoq imaluunniit kalerrinissaq piffissamut erseqqinnerusumik sivissusilikkamut, kingusinnerusukkut sivitsorneqarsinnaasumut, kinguartinneqassasoq. Eqqartuussiviup aalajangiinera tunngavilersugaassaaq. Illersuisoq § 391 malillugu ivertinneqarsimasoq, eqqartuussivik tamanna pillugu aalajangiitinnagu oqaaseqaateqarnissamut periarfissaqartinneqassaaq.

Imm. 5. Nalunaarasuaatinik annertusisamik paasissutissiinikkut nalunaarutitik isertuussisussaannermi akuliunnerup naanerani akuliussimaneq oqarasuaatinik pineqartunik piginnittunut kalerrinneqartassanngilaq.

Nalaatsornikkut nassaat

§ 397. Politiit nalunaarutitik isertuussisussaannermi akuliunnermikkut inatsisinik unioqqutitsineq pillugu paasissutissamik, akuliunnermut tunngavimusimanngitsumik aamma § 384, imm. 1, nr. 3, § 385, imm. 1, nr. 3, § 386, nr. 3, § 387, nr. 2 imaluunniit § 388, imm. 1, nr. 3, naapertorlugu tunngavigineqarsinnaasimanngitsumik, paasisaqarunik paasisaq tamanna inatsisinik unioqqutitsinermik pineqartumik paasiniaanerup ilaatut atorsinnaavaat, kisianni inatsisinik unioqqutitsinermut tunngatillugu eqqartuussivimmi uppersaatit atorsinnaanngilaat.

Imm. 2. Eqqartuussivik aalajangiinikkut, tunngavilersorneqartussakkut, aalajangiisinnaavoq imm. 1 atortuutinneqassanngitsoq

- 1) paasiniaanermi iliutsit allat uppersaatissanik qularnaarinissamut atorsinnaanngippata,
- 2) suliassaq inatsisinik unioqqutitsinermut peqqarniitsumut tunngasuuppat, aamma
- 3) eqqartuussiviup tamanna eqqarsarnartoqartinngippagu.

Suujunnaarsitsisarneq

§ 398. Båndinut immiussat, nuutsitat allatulluunniit issuakkat, akuliuttoqarneratigut politiit ilisimaneqalersimasut, suujunnaarsinneqartassapput, inatsisinik unioqqutitsinermut, akuliunnermut tunngavimusimasumut, arlaat pasillerneqalinngippat imaluunniit unnerluussut kingusinnerusukkut

taamaatinneqarpat. Suujunnaarsitsisoqaraangat illersuisoq, § 392 malillugu ivertitaq, politiinit kalerrinneqartassaaq.

Imm. 2. Paasissutissaatit paasiniaanerup tungaatigut pingaaruteqartuarpata suujunnaarsitsisoqanngitsoorsinnaavoq imaluunniit tamanna piffissami erseqqinnerusumik aalajangikkami kinguartikkallarneqarsinnaavoq. Politiit tamanna pillugu apeqquut eqqartuussivimmut saqqummiutissavaat. Eqqartuussivik tamanna pillugu aalajangiitinnagu illersuisoq, § 392 malillugu ivertitaq, oqaaseqaateqarnissamut periarfissinneqartassaaq. Aalajangiineq tunngavilersukkatut aalajangiinerussaaq. Aalajangersakkat oqaaseqatigiit aappaanniittut atortuutinneqassanngillat paasisanut pinerluttulerinermi inatsimmi §§ 23-35-mik unioqquitsinerit paasinierneqarnerisa ilaatut pissarsiaasunut.

Imm. 3. Oqarasuaammik naalaarnermut, allatut naalaarnermut imaluunniit allakkanik ammaanermut atatillugu pasisap inunnut, § 143-mi malittarisassat malillugit ilisimannittut nassuiaatinneqarsinnaanngitsunut, attaviginninnera akuliuffigineqarsimappat akuliunneq tamanna pillugu paasissutissaatit ingerlaannaq suujunnaarsinneqartassapput. Taamaassanngilarli paasissutissaatit inuup eqqartorneqartup pasisaanissaanut pissutissiippata imaluunniit illersuisutut suliaasaq taassumanga arsaarinnissutaappat, tak. §§ 325-326.

Imm. 4. Aamma politiit suujunnaarsittassavaat paasissutissaatit, nalunaarutigut isertuussisussaannermi akuliunnikkut pissarsiat, paasiniaanerullu tungaatigut pingaaruteqanngitsut.

Alaatsinaanneq

§ 399. Politiit inunnik, imaaliallaannaq tikinneqarsinnaanngitsumiittunik, assiliisinnaapput imaluunniit qinngutit atortorissaarulluunniit alla atorlugu alaatsinaassinnaapput (alaatsinaanneq),

- 1) akuliunneq paasiniaanerup pingaaruteqarluinnartussatut isumaqarfigineqarpat, aamma
- 2) paasiniaaneq inatsisinik unioqquitsinerup, inatsit malillugu inissiisarfirmiittussanngortitsinerup kinguneqarsinnaasumut, tunngasuuppat.

Imm. 2. Tv-ikkut assiliissut ungasianiit aqunneqarsinnaasoq imaluunniit automatiskeq, assiliivik atortorissaarulluunniit alla atorlugu imm. 1-mi taaneqartutut alaatsinaanneq aatsaat pisinnaavoq paasiniaaneq inatsisinik unioqquitsinerup peqqarniitsumut tunngasuuppat.

Imm. 3. Inunnik, inigisaminniittunik imaluunniit inigisap initaasa ilaanniittunik tv-ikkut assiliissut ungasianiit aqunneqarsinnaasoq imaluunniit automatiskeq, assiliivik atortorissaarulluunniit alla assingusoq atorlugu imaluunniit atortorissarut inigisami imaluunniit inigisap initaani atorneqartoq atorlugu alaatsinaanneq aatsaat pisinnaavoq

- 1) aalajangersimasunik pissutissaqarluni isumaqartoqarpat akuliunnikkut suliasami uppernarsaatissanik pissarsisoqarsinnaasoq
- 2) akuliunneq paasiniaanerup aalajangiisumik pingaaruteqartut isumaqarfigineqarpat,
- 3) paasiniaaneq inatsisinik unioqquitsinerup immikkut peqqarniissusilimmut, inuit inuunerisa atugarissaarnerisaluunniit imaluunniit inuiaqatigiit naliliutaasa annertuut navianartorsiortinneqarnerannik kinguneqarsimasumut imaluunniit kinguneqarsinnaasumut, tunngasuuppat.

Imm. 4. Sumiiffimmik imm. 1-3-mi taaneqartutut tikikkuminaatsumiittumik inatsisinik unioqquitsinerup pinerlineqarsimasuunerartup atortagaanik alaatsinaanneq aalajangersakkami matumani malittarisassani pineqanngilaq, pineqartoq taanna alaatsinaannissamut allakkatigut akuersaarpat.

Imm. 5. Alaatsinaattoqassanngilaq akuliunerup siunertaasoq suliasap qanoq ittuunera peqqarniissusaalu aammalu akuliunnerup inummumut inunnulluunniit eqqorneqassasorineqartunut narrunarsaanissaa akornusiinissaa naleqqutinnngitsuusorineqarpat.

Imm. 6. § 390-imi, § 391-imi, § 392-imi, § 396, imm. 1-imi, § 396, imm. 2, nr. 2-mi § 396, imm. 3-4-mi, § 397-imi aamma § 398-imi malittarisassat imm. 2-mi 3-milu eqqartorneqartutut pisunut taamatulli atortuutinneqassapput.

Qarasaasiami paasissutissanik atuaaneq

§ 400. Paasissutissanik tamanut ammatitaanngitsunik qarasaasiami paasissutissaasivimmiittunik programmit atortulluunniit allat atorlugit tigooraasoqarsinnaavoq (qarasaasiami paasissutissanik atuaaneq), 1) aalajangersimasumik pissutissaqarluni isumaqartoqarpat, paasissutissaasivimmiittut pasisamit nr. 3-mi taaneqartutut pinerluuteqassamaanermut atorneqassasut imaluunniit pinerluuteqarsimanermut atatillugu atorneqarsimasut,

2) akuliunneq paasiniaanermut aalajangiisuusumik pingaaruteqartuusorineqarpat aamma

3) paasiniaaneq pinerluttulerinermi inatsimmi kapitali 7-mik imaluunniit 8-mik imaluunniit §§ 65, imm. 1-imik, 66-imi oqaaseqatigiinnik siullernik 67-imik, 69-imik, 71-imik imaluunniit 86-imik piaarluni unioqquitsinermut imaluunniit ikiaroonartut pillugit inatsimmik imaluunniit sakkut pillugit inatsimmik piaarluni unioqquitsinermut peqqarniitsumut tunngassuteqarpat.

Imm. 2. Imm. 1-imi taaneqartutut akuliuttoqassanngilaq akuliunermi siunertaasoq, suliassap qanoq ittuunera peqqarniissusaalu aammalu akuliunnerup inummut inunnulluunniit eqqorneqassasorineqartunut narrunarsaanissaa akornusiinissaalu naleqqutinngitsuusorineqarpat.

Imm. 3. Paasissutissaasivinniititanik tigooraanissaq eqqartuussivimmit aalajangiiffigineqassaaq, tunngavilersorneqartussamik. Aalajangiinermi taaneqassaaq paasissutissaasivik, akuliunermi pineqartoq. Aamma § 391, imm. 1-imi oqaaseqatigiit aappaat pingajuilu kiisalu imm. 2 aamma 3 taamatulli atortuutinneqassapput.

Imm. 4. Akuliussimaneq pillugu kingusinnerusukkut kalerriineq pisassaaq § 396, imm. 1-imi, 3-mi aamma 4-mi malittarisassat malillugit. Inummut paasissutissaasivimmik tigooraavigineqartumik atuisinnaatitaasumut kalerriisoqassaaq. Aamma §§ 390-imi, 392-imi, 397-imi kiisalu 398-imi malittarisassat taamatulli atortuutinneqassapput.

Timimik misissuisarneq

Timimik qimerluuisarneq aamma misissuisarneq

§ 401. Paasiniaanerup ilaatut politiit § 402 aamma §§ 405-407 malillugit pasisap allallu timaannik misissuisinnaapput timip isikkuanik qimerluuinermikkut, assiliivimmik assiliinermikkut, timip pisataasa ilusaannik assigisaannillu ininitsitsilluni naqitsinermikkut kiisalu atisanik pineqartup atugaanik misissuillutik.

Imm. 2. Paasiniaanerup ilaatut §§ 403-407 malillugit pasisap allallu timaat misissorneqarsinnaapput timimik sukumiinerusumik misissuinikkut, matumunnga ilanngullugittaaq timip ammaneri, aaviinernik misissugassanilluunniit allanik assingusunik tigusilluni, tarrarsuilluni assigisaatulluunniit iliorluni.

Pasisap timaanik qimerluuisarneq

§ 402. Politiit, taamaattoq tak. imm. 2 aamma 3, pasisap timaanik aatsaat misissuiffiginnissinnaapput

1) pineqartoq taanna inatsisinik unioqquitsisimanermut, pisortatigoortumik unnerluussutaasussamut, naleqquttumik pissutissaqartumik pasineqarpat, aamma

2) akuliunneq paasiniaanermut pingaaruteqarluinnartutut isumaqarfigineqarpat.

Imm. 2. Kingusinnerusukkut kinaassusersiuinissaq siunertaralugu inussat ipaasiuisoqarsinnaallunilu inummik assiliisoqarsinnaavortaaq, pineqartoq inatsisinik peqqarniitsumik unioqquitsisimanermut naleqquttumik pissutissaqartumik pasineqarpat.

Imm. 3. Tigusarneqartup timaa aamma misissuiffigineqarsinnaavoq § 355, imm. 3 malillugu.

Pasisap timaanik misissuisarneq

§ 403. Pasisap timaa aatsaat misissorneqarsinnaavoq

1) tunngavissaqartumik pasitsaanneqarpat pineqartoq taanna inatsisunik peqqarniitsumik unioqutitsisimasoq aamma

2) akuliunneq paasiniaanermut aalajangiisuusumik pingaaruteqarsorineqarpat.

Imm. 2. Aammattaaq misissugassamik aaviisoqarsinnaavoq tunngavissaqartumik pasitsaanneqarpat pineqartoq taanna inatsisunik unioqutitsisimasoq, iliuusaanut ilaasimallunittaaq imigassartorsimaneq, nakorsaatitorsimaneq imaluunniit ikiaroomartunik sunnertisimaneq.

Imm. 3. Timimik aatsaat misissuisoqarsinnaavoq peqqinnissaqarfinni sulisut peqataatillugit, taakkua isummerfigissavaat akuliunneq peqqissutsip tungaatigut illersorneqarsinnaanersoq, tamatumani isiginiarneqassalluni taamaalionermi anniaataasinnaasut aamma ajoquserneqariataarsinnaaneq kiisalu inuup misissorneqartup qanoq innera.

§ 404. Timip qaavaniit misissugassanik qularnaarluni aaviillunilu pasisap timaanik misissuinissaq pillugu aalajangiineq politinit aalajangiivigineqassaaq.

Imm. 2. Pasisap timaanik allatigut misissuiffiginninnissaq eqqartuussivimmit aalajangiinikkut aalajangiivigineqassaaq, taamaattoq tak. imm. 5. Aalajangiinermi taagorneqassapput suliassami pissutsit aalajangersimasut, akuliunissamut piumasaqaatit naammassineqarnerannut tapersiisuusut. Aalajangiineq qaqugukkulluunniit allannngortinneqarsinnaavoq.

Imm. 3. Akuliunnermi siunertarisaq maangaannassagaluarpat, eqqartuussiviup aalajangiinissaa utaqqineqassagaluarpat politit akuliunniarlutik aalajangiisinnaapput. Taamaassappat politiit sapinngisamik piaarnerpaamik kingusinnerpaamillu nal. akunnerisa 24-t pingasoriarneri qaangiutsinnagit suliassaq eqqartuussivimmut, akuliunnerup akuersissutigineqarnissaanik aalajangiisussamut, saqqummiutissavaat. Aalajangiineq tunngavilersukkamik aalajangiinerussaaq. Tamannali atuutissanngilaq, akuliunnerup kingorna tamatumunnga isumaqataaneq allakkatigut nalunaarutigineqarpat.

Imm. 4. Eqqartuussivik imm. 2 imaluunniit imm. 3-mi oqaaseqatigiit aappaat malillugit aalajangiitinnagu akuliuffigineqartoq oqaaseqaateqarsinnaatitaassaaq. Illersuisoq ivertinneqassaaq, tamanna pasisap noqqaassutigippagu. Pasisaq illersuisulerneqarsinnaanermunik ilitserneqartassaaq.

Imm. 5. Pasisap akuliunnissamut isumaqataanini allakkatigut nalunaarutigippagu, imm. 2-mi taaneqartutut timikkut misissuiffiginninnissaq aamma politiinit aalajangiiffigineqarsinnaavoq. Pasisaq illersuisulerneqarsimappat aamma taanna akuersisimasariaqarpoq.

Pasisaanngitsup timaanik qimerluuisarneq aamma misissuisarneq

§ 405. Inuup pasisaanngitsup timaanik misissuiffiginnittarneq kapitalimi matumani malittarisassani pineqanngilaq, pineqartoq akuliunissamut akuersisimappat. Isumaqaalluni akuersineq sapinngisamik allakkatigut pitinniarneqartassaaq. Isumaqaalluni akuersisoqanngippat timimik misissuisoqassanngilaq, atisaajaqqusisoqarfiusumik. Allatut iliorluni timimik misissuisoqartassaaq imm. 2-4-mi malittarisassat malillugit.

Imm. 2. Inuk pasisaanngitsup timikkut misissuiffigineqarsinnaavoq atisaajarfiusariaqanngitsumik, tamatumani eqqarsaatigineqarlunittaaq assiliivimmik assiliinerit, timip pisataasa ilusaannik ininitsitsilluni naqitsinerit assigisaallu aamma atisanik misissuiffiginninnerit,

1) paasiniaaneq inatsisunik unioqutitsinerit peqqarniitsumut tunngasuuppat, aamma

2) akuliunneq paasiniaanermut aalajangiisuusumik pingaaruteqartuusorineqarpat.

Imm. 3. Imm. 2 malillugu timikkut misissuiffiginninnissamik aalajangiineq eqqartuussiviup aalajangiinerissavaa, tunngavilersorneqartussaaq. § 404, imm. 2, oqaaseqatigiit aappaanni pingajuinilu kiisalu imm. 3-mi aamma 4-mi oqaaseqatigiinni siullerni aalajangersakkat taamatulli atortuutinneqassapput. Toqqaannartumik pinngitsaaliinissamut taarsiullugu pinngitsaaliissutit § 150, imm. 1-mi taaneqartut timikkut misissuiffiginninnissani atorneqarsinnaapput.

Imm. 4. Ilungersunartumik nakuusertoqarluni pinerluuteqartoqarsimatsiaannartoq imaluunniit taamaaliornissamik qunusaarisqarsimatsiaannartoq pinerluffiusimasumik paasiniaanermi kiisalu allatigut paasiniaanermi, najuuttut arlaata sakkumik timimini toqqortaqaqarnera tunngavissaqartumik pasitsaanneqarsimatillugu, politiit inuit sumiiffimmiittut tamaasa atisaat misissuiffigisinnaavaat, sakkumik nassaarnissaq siunertaralugu.

Atsikkutigiissaarinissamik piunasaqaatit

§ 406. Timikkut misissuiffiginnitoqartassanngilaq timimillu misissuisoqartassanngilaq akuliunnermi siunertarisag, unioqutitsinerup suunera peqqarniissusaalu aammalu narrunarsagaanissaq nuanniillioortitaanissarlu akuliunnissamat naleqqiullugit naleqqutinngippata.

Qajassuussinissamik piunasaqaatit

§ 407. Timikkut misissuiffiginneq timimillu misissuineq sapinngisamik pissutsit pisariaqartitsinerat naapertorlugu qajassuurtumik ingerlanneqartassaaq. Akuliunneq, kanngutsaatsuliorfigineqarnertut misigineqarsinnaasoq, inunnit misissuiffigineqartup suaassuseqataanit imaluunniit peqqinnissaqarfimmi sulisunit sapinngisamik isumagineqartassaaq. Akuliunneq taamaattoq atisaajarfiusariaqarpat tamanna misissuiffigineqartup suaassuseqataanit imaluunniit peqqinnissaqarfimmi sulisunit taamaallaat sapinngisamik najuuffigineqartariaqarpoq.

Inuup assinginiq il. il toqqortarinnittarneq

§ 408. Politiit inuup assinginiq toqqortarinnissinnaanngillat, inunnik pasisaasimanngitsunik imaluunniit pinngitsuutitaasimasunik imaluunniit unnerluutigineqarnissaat taamaatinneqarsimasunik kingusinnerusukkut kinaassusersiinissaq siunertaralugu.

Imm. 2. Politiit atortussanik allanik paasissutissanillu allanik, inunntut pasisaasimasunut timikkut akuliunnikkut pissarsiarineqarsimasunik toqqortaqaarsinnaapput.

Imm. 3. Paasissutissat atortussallu akuliunnerit, eqqartuussivimmit § 404, imm. 3-mi oqaaseqatigiit aappaat naapertorlugit akuersissutigiumaneqanngitsut imaluunniit eqqartuussivimmit tunngavissaqarsorineqanngitsut, aqputigalugit pissarsiarineqartut piaarnerpaamik suujunnaarsinneqartassapput.

Uppernarsaatissanik ujaasineq

Uppernarsaatissanik ujaasinerup isumaata imarisaa

§ 409. Politiit §§ 409-416-imi malittarisassat malillugit uppernarsaatissanik ujaasiffigisinnaavaat

- 1) inigisat illumilu init allat, allakkiat uppernarsaatissat, pappiaraatit assigisaallu kiisalu pigisat parnaaqqasut imaat aamma
- 2) pigisat allat kiisalu sumiiffiit illup avataanniittut.

Imm. 2. Uppernarsaatissanik ujaasinermi ujarneqarsinnaapput pigisat ujaarineqartut imaluunniit pigisat suliassap paasiniarneqarneranut pingaaruteqarsinnaasut imaluunniit arsaarinnissutaasariaqartut imaluunniit inummot pinerlunnikkut pigisamik arsaarneqarsimasumut tunniunneqartariaqartut, imaluunniit ujarneqarsinnaavoq pasisaq eqqartuussaasimasorluunniit toqqoqqasoq.

Imm. 3. Sumiiffinnik pigisanilluunniit, politiit imaaliiallaannaq tikinneqarsinnaasunik, misissuinerit §§ 409-416-imi malittarisassaniittut pineqanngillat.

Imm. 4. Inuup timaanik misissuineq aamma pineqartup atisaanik atugaanik misissuineq pillugit atuutissapput malittarisassat §§ 401-408-imiittut. Allakkanik, nalunaarasuaatinik assigisaattullu nassiussanik misissuiffiginneq pillugu atuutissapput §§ 384-398-imi malittarisassat.

Pasisap uppernarsaatissanik ujaasiffigineqarnera

§ 410. Illup initaani, sumiiffinniluunniit allani imaluunniit pigisani, pasisap atugaani, uppernarsaatissanik aatsaat ujaasisoqarsinnaavoq

1) pineqartoq inatsisinik unioqqutitsinermut, pisortatigoortumik unnerluutigisassaataasumut, naapertuuttumik pissuteqartumik pasisaappat, aamma

2) uppernarsaatissanik ujaasineq paasiniaanermut pingaaruteqarlunnartutut isumaqarfigineqarpat.

Imm. 2. § 409, imm. 1, nr. 1-imi taaneqartutut ittumik uppernarsaatissanik ujaasinerni tamatuma saniatigut piumasarineqassaaq suliassaq inatsisinik unioqqutitsinermut, inatsit malillugu inissiisarfirmiittussanngortitaanermik kinguneqarsinnaasumut, tunngassuteqassasoq imaluunniit aalajangersimasumik pissutissaqarluni isumaqartoqassaaq suliassami uppernarsaatissat imaluunniit pigisat, arsaarinnissutaagallarsinnaasut, uppernarsaatissanik ujaasinermin nassaarineqarsinnaasut.

Imm. 3. Pasisap uppernarsaatissanik ujaasiffigineqarnerani allakkatigut nalunaarutininik assigisaannilluunniit nassaartoqarpat, inummiit § 143-mi malittarisassat malillugit suliassami ilisimannittutut nassuaatinneqarsinnaanngisumiit pisunik, taakku uppernarsaatissarnik ujaasiffigineqassanngillat. Aamma atortunut, inummiit § 145-mi pineqartumiit pisunut, tunngatillugu tamanna atuuppoq, atortut taakku paasissutissanik imaqarpata pineqartup § 145 malillugu ilisimannittutut nassuiaateqarfigisussaanngisaaanik.

Pasisaanngitsumi uppernarsaatissanik ujaasineq

§ 411. Illup initaanik, ininik pigisanilluunniit allanik, inuup pasilligaanngitsup atugarisaanik, uppernarsaatissanik ujaasisarnek, taamaattoq tak. imm. 2, aatsaat pisassaaq

1) paasiniaaneq inatsisinik unioqqutitsinermut, inatsit malillugu inissiisarfirmiittussanngortitsinermik kinguneqarsinnaasumut, tunngasuuppat, aamma

2) aalajangersimasumik pissutissaqarluni isumaqartoqarpat suliassami uppernarsaatissat imaluunniit pigisat, arsaarinnissutaagallarsinnaasut, uppernarsaatissanik ujaasinermin nassaarineqarsinnaasut.

Imm. 2. Aammattaq uppernarsaatissanik ujaasisoqarsinnaavoq pineqartup taamatut ujaasinissaq allakkatigut isumaqataaffigippagu imaluunniit pinerluuteqarnerup paasineqarneranut imaluunniit nalunaarutigineqarneranut atatillugu pineqartoq taamaaliortoqarnissaanut isumaqataalluni akuersaarpat.

Imm. 3. Inunni, § 143-mi malittarisassat malillugit suliassami ilisimannittutut nassuiaateqartussaataanngitsuni, pasisap inuullu pineqartup akornanni allakkatigut nalunaarutit assigisaallu kiisalu inuup pineqartup pasisaq pillugu allattugai assigisaallu ujaasiffigineqartassanngillat. Inunni, § 145-mi pineqartuni, uppernarsaatissanik ujaasiffigineqassanngillat atortut, § 145 malillugu inuup pineqartup ilisimannittutut nassuiaateqarfigisussaanngisaaanik paasissutissartallit.

Uppernarsaatissanik ujaasinissaq pillugu aalajangiineq

§ 412. Pigisat inilluunniit § 409, imm. 1, nr. 2-mi taaneqartut, pasisap atugarisai, pillugit uppernarsaatissanik ujaasiffiginninnissaq politiinit aalajangiiffigineqassaaq.

Imm. 2. Pisuni allani uppernarsaatissanik ujaasinissaq eqqartuussivimmit aalajangiiffigineqartassaaq, taamaattoq tak. imm. 5 aamma 6. Aalajangiinermin taagorneqassapput suliassami pissutsit aalajangersimasut, akuliunnermut piunasaqaatit naammassineqarnerannut tapersiisuusut. Aalajangiineq sukkulluunniit allannngortinneqarsinnaavoq.

Imm. 3. Misissuinermin siunertarisaq maangaannartussanngussappat, eqqartuussiviup aalajangiinissaa utaqqineqassappat, politiit aalajangersinnaapput uppernarsaatissanik ujaasisoqassasoq. Inigisap initaanik, sumiiffinnik pigisanilluunniit uppernarsaatissatigut ujaasiffiginiarneqartoq tamatuminnga kissaateqarnerminik saqqummiussippat, politiit sapinngisamik piaarnerpaamik kingusinnerpaamillu nal. akunnerisa 24-it pingasoriarneri naatinngit, suliassamik eqqartuussivimmut akuliunnissamut akuersissutiginnittussamut saqqummiussissappat. Aalajangiineq tunngavilersugaassaaq.

Imm. 4. Eqqartuussivik imm. 3-mi oqaaseqatigiit aappaat malillugit aalajangiilersinnagu inigisap initaanik, sumiiffinnik pigisanilluunniit uppersaatissatigit ujaasiffiginiarneqartoq oqaaseqarsinnaatinnegassaaq. § 344, imm. 2-3 taamatulli atortuutinnegassapput.

Imm. 5. Uppersaatissanik ujaasineq inigisap initaanut, sumiiffinnut pigisanulluunniit pasisap atugarisaanut tunngasuuppat, taannalu uppersaatissani ujaasisoqarnissaanut allakkatigit akuersinermik nalunaarpat uppersaatissanik ujaasinissaq aamma politiit aalajangiiffigissavaat.

Imm. 6. Taamaattorli politiit imm. 2-mi aalajangersagaq apeqqutaatinnagu aalajangersinnaavaat, pinerlunnerup paasineqarneranut imaluunniit nalunaarutigineqarneranut atasumik pinerluffiusumi uppersaatissanik ujaasisoqassasoq, inuk inigisap initaanik, sumiiffinnik pigisanilluunniit atuisinnaatitaasoq pasilligaanngippat aamma pineqartoq taanna ingerlaannaq attavigineqarsinnaanngippat. Taamaassappat pineqartoq piaarnerpaamik uppersaatissanik ujaasineq pillugu ilisimatinnegassaaq.

Atsikkutigiissaarinissamik piumasaqaatit

§ 413. Uppersaatissanik ujaasisoqassanngilaq akuliunnermi siunertarisaq, unioqqutitsinerup suunera peqqarniissusaalu aammalu nikanarsagaanissaq akornusersorneqarnissarlu, misissuinerup kingunerisinnaasaatut ilimagineqarsinnaasut, naleqqutinningsumik akuliunnerussappata. Taamatut naliliinermi pingartinneqartassaartaq uppersaatissanik ujaasineq pigisanik aseruinermik imaluunniit ajoqusiinermik kinguneqassanersoq.

Uppersaatissanik ujaasinerup ingerlanneqarnera

§ 414. Uppersaatissanik ujaasineq pissutsit naapertorlugit sapinngisamik qajassuartumik ingerlanneqartassaaq, sapinngisamik aseruinaaveersaarluni imaluunniit ajoqusiinaaveersaarluni kiisalu akuliunnerup qanoq ilineratigit pinera imaluunniit periuseq atorneqartoq pissutaalluni pisariaqanngitsumik allanut utsataalersinnaveersaarlugu.

Imm. 2. Inuk uppersaatissanik ujaasiffigineqartussaq imaluunniit taassuma qimagusimanerani inuit allat ujaasiffigineqartussami naammattoorneqassappata, pineqartut taakku uppersaatissanik ujaasiniarnermik tamatumunngalu tunngaviusumik ilisimatinnegassapput kajumissaarneqassallutillu ujaasineq najuuffigeqqullugu. Uppersaatissanik ujaasineq eqqartuussiviup aalajangiinera tunngavigalugu pissappat, aalajangiineq noqqaavigineqarnikkut takutinnegassaaq. Uppersaatissanik ujaasineq § 412, imm. 3 malillugu pissappat politiit pineqartoq ilitsersussavaat apeqqummik tamatuminnga eqqartuussivimmut saqqummiussisinnaanerani. Inuup, uppersaatissanik ujaasiffigineqartup, piumasarisinnaavaa inuk, ilisimannittut nammineq toqqakkami, ujaasisoqarnerani najuutissasoq, piffissap imaluunniit paasiniaanerup tungaatigit pissutigisat tamatumunnga akerliussanngippata. Uppersaatissanik ujaasineri siunertarisamit tamanna pisariaqartinneqarpat aamma uppersaatissanik ujaasineq akornusersorneqarpat, politiit aalajangersinnaavaat inuit ujaasiffiusumiittut ujaasisoqarnerani qimagutsinneqassasut.

Imm. 3. Uppersaatissanik ujaasisoqarnerani inunnik najuuttoqanngippat inuup ujaasiffigineqartup illoqatai ajornanngippat marluk imaluunniit ilisimannittut allat marluk ujaasineri najuuteqqullugit aggersarneqassapput.

Imm. 4. Inuk uppersaatissanik ujaasiffigineqartoq ujaasisoqarnerani najuutinngippat politiit pineqartoq taanna tamatuminnga kalerrissavaat. Uppersaatissanik ujaasineq § 412, imm. 3 malillugu ingerlanneqarsimappat politiit pineqartoq taanna apeqqummik eqqartuussivimmut saqqummiussisinnaanera pillugu ilitsersussavaat. Kalerriisoqassaaq immaqalu ilitsersuuteqartoqarsinnaavoq politiit allakkatigit nalunaarummik ujaasiffigisami ilisineratigit.

Isertortumik uppersaatissanik ujaasineq

§ 415. Pasisaq allalluunniit ilisimateqqaarnagit uppersaatissanik ujaasinissaq paasiniaanermut aalajangiisuusumik pingaarteqassappat eqqartuussivik, paasiniaaneq pinerluttulerinermi inatsimmi kapitali 7-mik imaluunniit 8-mik imaluunniit § 65, imm. 1-imik, § 66-imi oqaaseqatigiinnik siullernik, § 67-imik, § 68, imm. 1-2-mik, § 69-imik, § 71-imik imaluunniit § 86-imik piaaraluni unioqutitsinermut imaluunniit ikiaroonartut pillugit inatsimmik imaluunniit sakkut pillugit inatsimmik piaaraluni unioqutitsinermut peqqarniitsumut tunngassuteqarpat, aalajangiisinaavoq § 414, imm. 2-mi oqaaseqatigiit siullerniit sisamaannut, imm. 3-mi aamma 4-mi malittarisassat sanioqqunneqassasut. Taamaassanngilarli inigisap initaanik, sumiiffinnik pigisanilluunniit, inuup § 143-mi malittarisassat malillugit suliassami ilisimannittutut nassuiaasinneqarsinnaanngitsup imaluunniit § 145-mi malittarisassat malillugit nassuiaateqanngitsooqquneqartup, atugaanik uppersaatissanik ujaasinermi. Aalajangiineq tunngavilersugaassaaq.

Imm. 2. § 391, imm. 2-mi aamma 3-mi, § 392-imi kiisalu § 396-imi malittarisassat atortuutinneqassappat imm. 1-imi oqaaseqatigiinni siullerni eqqartorneqartutut pisoqartillugu.

Imm. 3. Eqqartuussiviup aalajangersinnaavaa piffissap imm. 2 malillugu § 391, imm. 2 naapertorlugu aalajangerneqartup iluani uppersaatissanik ujaseqqitaartoqarsinnaasoq. Eqqartuussiviup tamatumunnga atatillugu ujaasinissat amerlassusissaat aalajangissavaa. Taamaasiornissamut immikkut ittunik tunngavissaqarpat eqqartuussiviup aalajangersinnaavaa aalajangersimannngitsumik amerlassusilinnik ujaasisoqarsinnaasoq.

Nalaatsornikkut nassaarisat

§ 416. Politiit uppersaatissanik ujaasinermi paasissutissarsippata inatsisinik unioqutitsisoqarsimasoq, akuliunnermut § 410, imm. 1, nr. 1-imi aamma imm. 2-mi, § 411, imm. 1, nr. 1-imi imaluunniit § 415, imm. 1-imi malittarisassat malillugit tunngaviunngitsumik aammalu tunngavigineqarsinnaanngitsunik, politiit paasissutissarsiaq taanna inatsisinik unioqutitsinermik tamatumunnga paasiniaanerup ilaatut atorsinnaavaat, kisianni inatsisinik unioqutitsineq pillugu eqqartuussivimmi uppersaatitut atorsinnaanagu.

Imm. 2. Eqqartuussiviup aalajangersinnaavaa politiit § 415, imm. 1 naapertorlugu uppersaatissanik ujaasinermi paasissutissarsiaannut imm. 1 atuutinneqassanngitsup

- 1) paasiniaanermi iliuuserisat allat suliassami uppersaatissanik qularnaarinissamut piukkunnangippata,
- 2) suliassaq inatsisinik unioqutitsinermut immikkut peqqarniissusilimmut tunngasuuppat, aamma
- 3) eqqartuussiviup tamanna eqqarsarnartoqartinngippagu.

Kapitali 37

Paasiniaanerup nalaani pinngitsaaliisutaasartut allat

Arsaarinnikkallarnej aamma saqqummiusseqqusineq Arsaarinnikkallarnej

§ 417. Arsaarinnikkallartoqarsinnaavoq

- 1) uppersaatissat qularnaarniarlugit,
- 2) pisortat arsaarinninnissamik, akiliisitsinissamik aamma suliassami aningaasartuutitut piumasqaataat qularnaarniarlugit,
- 3) pinerlineqartup utertitsivigineqarnissamik imaluunniit taarsiivigineqarnissamik piumasqaataat qularnaarniarlugit, aamma
- 4) unnerluutigineqartup suliassamik malersueqqinnissaq pinngitsoortikkaangagu.

Imm. 2. Arsaarinnikkallartarneq pillugu malittarisassani pineqanngillat pigisat, politiinit tiguneqartut, arlaannaannilluunniit pigineqanngitsut imaluunniit pigiumaneqanngitsut kiisalu arlaannaannilluunniit piumasqaateqarfigiumaneqanngitsut.

Imm. 3. Allakkanik assigisaannillu nassiunneqartunik tunniussinermi kiisalu oqarasuaatitigut il.il. atassuteqarnerit pillugit paasissutissiinermi malittarisassat §§ 384-398-imiittut atuutissapput. Tigusarineqartoq § 355, imm. 3 malillugu pigisanik aningaasanillu arsaarneqarsinnaavortaaq.

Pasisamiittunik arsaarinnikkallartarneq

§ 418. Pigisat pasisamit atorneqartut arsaarinnissutaagallarsinnaapput,

1) pineqartoq inatsisinik unioqqutitsinermut, pisortatigoortumik unnerluutigineqartussamut, naleqquttumik pissuteqartumik pasineqarpat aamma

2) pissutissaqarpat isumaqassalluni arsaarinnissutigineqarallartussaq uppernarsaatit atorneqarsinnaasoq imaluunniit arsaarinnissutaasariaqartoq, taamaattorli tak. imm. 2, imaluunniit arlaat, utertinnissaanik piumasqaarsinnaasoq, inatsisinik unioqqutitsinermi arsaarneqarsimappat.

Imm. 2. Pasisap pigisai nalillit arsaarinnissutigineqarallarsinnaapput,

1) pineqartoq inatsisinik unioqqutitsinermut, pisortatigoortumik unnerluussutaasussamut, naleqquttumik pissutissaqartumik pasineqarpat, aamma

2) arsaarinnikkallarnissaq pisariaqarsorineqarpat, pisortat arsaarinnissamik pinerluttulerinermi inatsimmi §166, imm. 1-imi oqaaseqatigiit siulliit, titarnerit aappat aamma imm. 4, § 168, imm. 5, aamma § 170-imi oqaaseqatigiit aappaat malillugit piumasqaataat, akiliisitsinissamik piumasqaataat, suliasamat aningaasartuutitut piumasqaataat imaluunniit pinerlineqartup taarsiivigineqarnissamik piumasqaatai qularnaarniarlugit.

Imm. 3. Pasisap aningaasaataanik pigisaanillu nalilinnik tamakkerlugit ilaannaannilluunniit, matumunnga ilanngullugit pisuussutaatit kingusinnerusukkut pissarsiarisinnaasai, arsaarinnikkallartoqarsinnaavoq inatsisinik unioqqutitsineq peqqarniitsoq pillugu unnerluussissuteqartoqarpat aamma unnerluutigineqartup suliasami malersueqqinnissaq pinngitsoortissimappagu.

Imm. 4. Allakkatigut nalunaarutunik assigisaannilluunniit, inummiit § 143-mi malittarisassat malillugit suliasami ilisimannittutut nassuiaateqarsinnaanngitsumiit pisunik, pasisaq arsaarinniffigineqarallarsinnaanngilaq. Tamannattaq atuuppoq atortunut, inummiit § 145-mi pineqartumiit pisunut tunngatillugu, atortut taakku paasissutissanik imaqarpata pineqartup § 145 malillugu suliasami ilisimannittutut nassuiaateqarfigisassarinnigisaanik.

Pasisaanngitsumiit arsaarinnikkallartarneq

§ 419. Pigisat, inuup pasisaanngitsup atugai, arsaarinnissutigineqarallarsinnaapput inatsisinik unioqqutitsinermik, pisortatigoortumik unnerluutigineqartussamik, paasiniaanerup ilaatut, pissutissaqarpat isumaqassalluni pigisaq taanna uppernarsaatit atorsinnaassasoq, arsaarinnissutaasariaqartoq imaluunniit inatsisinik unioqqutitsinikkut arlaanniit, utertinnissaanik piumasqaarsinnaasumiit, tiguneqarsimasoq. Naliliutit allat, matumunnga ilanngullugit aningaasat, inuup pasisaanngitsup atugai, arsaarinnissutigineqarallarsinnaapput inatsimmik unioqqutitsinermik pisortatigoortumik unnerluutigineqartussamik paasiniaanerup ilaatut, pissutissaqarpat isumaqassalluni naliliutit taakku arsaarinnissutaasariaqartut. § 161 taamatulli atortuutinneqassaaq.

Imm. 2. Inunni, § 143-mi malittarisassat malillugit suliasami ilisimannittutut nassuiaateqarsinnaatitaanngitsuni, pasisap inuullu pineqartup taassuma akornanni allakkatigut nalunaarutit kiisalu taassuma pasisaq pillugu allatugai assigisaallu uppernarsaatissatut arsaarinnissutaagallarsinnaanngillat. Inunni § 145-mi pineqartuniittut atortut, pissutsinik pineqartup § 145 malillugu suliasami ilisimannittutut nassuiaateqarfigisassarinnigisaanik paasissutissartallit, arsaarinnissutigineqarallarsinnaanngillat.

Saqqummiusseqqusineq

§ 420. Inatsisinik unioqputitsinermik, pisortatigoortumik unnerluutigisassaasumik, paasiniaanerup ilaatut eqqartuussiviup inuk pasisaanngitsoq peqqusinnaavaa pigisanik nittaaqqullugu imaluunniit tunniusseqqullugu (saqqummiusseqqusineq), pissutissaqarpit isumaqassalluni pigisaq pineqartup atortagaa uppersaataatit atorsinnaasoq, arsaarinnissutaasariaqartoq imaluunniit inatsisinik unioqputitsinikkut arlaanniit, utertinnissaanik piumasaqarsinnaasumiit, tiguneqarsimasoq.

Imm. 2. Pigisaq eqqartuussiviup saqqummiusseqqusinera malillugu politiinut tunniunneqarpit arsaarinnikkallartarneq pillugu malittarisassat § 419, imm. 1-imiittut taamatulli atortuutinneqassapput.

Imm. 3. Pigisap tunniunneqarnissaa peqqussutigineqarani imm. 1-imi taaneqartut tunngavigalugit politiinut tunniunneqarpit § 423, imm. 5 atortuutinneqassaaq. Tunniussinissaq noqqaassutigineqarpit, tamannalu politiniit akueriومانeqanngippat, politiit sapinngisamik piaarnerpaamik aammalu nal. akunnerisa 24-it pingasoriarlugit qaangiutsinnagit suliassamik eqqartuussivimmuut saqqummiussissapput arsaarinnikkallarnissaq noqqaassutigalugu. Taamaassappat § 422, imm. 3-mi oqaaseqatigiit aappaat aamma imm. 5-imi oqaaseqatigiit siulliit atortuutinneqassapput.

Imm. 4. Uppersaataatissatut saqqummiusseqqusisoqarsinnaanngilaq taamaaliornikkut pissutsit, pineqartup ilisimannittutut nassuiaateqarnissaanut pinngitsoortitsisussat, pillugit paasissutissat saqqummertussaassappata, tak. §§ 142-145.

Imm. 5. Inatsiseqarnermut ministeri malittarisassiorsinnaavoq saqqummiusseqqusinermik naammassinninniutitut pisuni immikkut ittuni aningaasatigut taarsiissuteqarnissaq pillugu.

Atsikkutigiissaarinissamik piumasagaatit il.il.

§ 421. Arsaarinnikkallartoqarsinnaanngilaq imaluunniit saqqummiusseqqusisoqarsinnaanngilaq akuliunneq suliassap qanoq ittuuneranut peqqarniissusaanullu kiisalu akuliunnerup nassatarisinnaasaanik annaasanut imaluunniit akornuserneqarnermut naleqquttuusorineqanngippat.

Imm. 2. Akuliunnermi siunertarisaq sakkukinnerusumik iliuseqarnikkut, matumunnga ilanngullugu qularnaveeqqusiinikkut, anguneqarsinnaappat, akuliuffigineqartoq tamanna pillugu allakkatigut isumaqatigiissusioqatigineqarsinnaavoq.

Imm. 3. Pisortat arsaarinninnissamik pinerluttulerinermi inatsimmi §§ 166, imm. 1-imi oqaaseqatigiit siulliit, titanerit aappaat, 166, imm. 1, oqaaseqatigiit aappaat, 166, imm. 2, oqaaseqatigiit aappaat, 166, imm. 4, 168, imm. 5 aamma § 170-imi oqaaseqatigiit aappaat malillugit piumasagaataat, akiliisitsinissamik piumasagaataat, suliassamut aningaasartuutitut piumasagaataat imaluunniit pinerlineqartup taarsiivigineqarnissamik piumasagaatai qularnaarniarlugit arsaarinnikkallarnermi §§ 618-623-mi malittarisassat taamatulli atortuutinneqassapput.

Eqqartuussisut aalajangiinerat

§ 422. Arsaarinnikkallarnissamik aamma saqqummiusseqqusinermik aalajangiineq politiit noqqaavigineqarneq naapertorlugu eqqartuussiviup aalajangiinerissavaa. Taarsiivigineqarnissamik piumasagaatit qularnaarniarlugit arsaarinnikkallarnissamik noqqaassut aamma pinerlineqartumiit saqqummiunneqarsinnaavoq.

Imm. 2. Aalajangiineq eqqartuussiviup aalajangiineratigut aalajangiinerussaaq, taamaattorli tak. imm. 7. Aalajangiinermi taagorneqassapput suliassami pissusiviusut, akuliunnissamut piumasagaatit naammassineqarsimanerannut tapersiisuusut. Aalajangiineq sukkulluunniit allanngortinneqarsinnaavoq.

Imm. 3. Akuliunnermi siunertarisaq maanngaannartussanngussappat, eqqartuussiviup aalajangiinissaa utaqqineqassappat, politiit arsaarinnikkallarnissamik aamma saqqummiusseqqusinissamik aalajangiiffinnissinnaapput, taamaattoq tak. imm. 4. Akuliuffigineqartoq tamatumunnga noqqaassuteqarpit politiit sapinngisamik piaarnerpaamik kingusinnepaamillu nal. akunneri 24-t

pingasoriarlugit naatinnagit suliassamik eqqartuussivimmut saqqummiussissapput, akuliunnissap akuerineqarsinnaanerani aalajangiisussamut. Aalajangiineq tunngavilersugaassaaq.

Imm. 4. § 418, imm. 3 malillugu aatsaat arsaarinnikkallarnissaq pisinnaavoq eqqartuussiviup aalajangeereerneratigut. Tamannattaq atuuppoq allagaatinik naqitanik imaluunniit tusarnaagassianik isiginnaagassianilluunniit tusagassiormermi akisussaassuseqarneq pillugu inatsimmi pineqartunik arsaarinnikkallarnermi, taakku imarisaannut akisussaaffiginninnerup atuutsinniarneqarnissaanut tunngatillugu.

Imm. 5. Eqqartuussivik imm. 3, oqaaseqatigiit aappaat malillugit aalajangiilersinnagu akuliuffiginiarneqartoq oqaaseqarsinnaatitaassaaq. § 344, imm. 2 aamma 3 taamatulli atortuutinneqassapput.

Imm. 6. Eqqartuussivik § 420 malillugu saqqummiusseqqusinermik peqqussuteqarnissaq pillugu aalajangiilersinnagu pigisamik atuisoq oqaaseqarsinnaatitaassaaq. § 344, imm. 2 aamma 3 taamatullu atortuutinneqassapput.

Imm. 7. Arsaarinnikkallarnissaq pillugu aalajangiineq politiit aalajangiinerissavaat, akuliuffiginiarneqartoq tamatumunnga isumaqataanerminik allakkatigut nalunaaruteqassappat.

Arsaarinnikkallarnissamik aamma saqqummiusseqqusinermik naammassinnineq

§ 423. Politiit arsaarinnikkallartuussapput. Eqqartuussiviup aalajangiinera tunngavigalugu arsaarinnikkallartoqassappat aalajangiineq noqqaassuteqarnikkut akuliuffigineqartumut takutinneqassaaq. Arsaarinnikkallarneq § 422, imm. 3-mi malittarisassaq malillugu pissappat politiit pineqartumut ilitersuissapput tamatumunnga eqqartuussivimmut saqqummiussinnaanera pillugu.

Imm. 2. Politiit isumagissavaat saqqummiusseqqusinermik aalajangiinerup naammassineqarnissaa inummut akuliuffiginiarneqartumut saaffiginninnikkut. Eqqartuussiviup aalajangiinera noqqaavigineqarnikkut pineqartumut takutinneqassaaq. Pineqartoq pissutissaqarani peqqussutaasunik malinnikkumanngippat § 150, imm. 1-imi aalajangersagaq taamatulli atortuutinneqassaaq.

Imm. 3. Atortut inunniit, § 145-mi pineqartuniit, arsaarinnissutigineqarallarata pineqartup piumasarisinnaavaa atortunik taakkuninnga misissuataareqqaarneq eqqartuussivimmit ingerlanneqassasoq. Eqqartuussiviup misissuataarinerani § 422, imm. 5-imi oqaaseqatigiit siulliit taamatulli atortuutinneqassapput. Siullermeersumik misissuataarinissap tungaanut atortut politiit paarineqassapput.

Imm. 4. Eqqartuussiviup aningaasaatinik aningaasaatilluunniit ilaannik arsaarinnikkallarnissaq aalajangiiffisimappagu, tak. § 418, imm. 3, politiit isumagissavaat aningaasaatinik uninngasussanngortitanik aqutsisussamik nakkutilliisumik ivertitsisoqarnissaa. Aalajangiineq unnerluutigineqartumut nalunaarutigineqassaaq § 137-mi malittarisassat malillugit.

Imm. 5. Pigisat, arsaarinnikkallarnernup imaluunniit tunniusseqqusinernup nassatarisaanik politiit tiggummarineqalersut, sapinngisamik piaarnerpaamik allatorneqassapput nalunaaqutsersorneqarlutillu. Politiit noqqaavigineqarnermikkut pigisat tigungerinut uppernarsaasiisassapput.

Inuinnaat arsaarinnikkallarsinnaatitaanerit

§ 424. Kikkulluunniit inatsisinik unioqquitsisumik imaluunniit unioqquitsinermut attuumassutilimmik naammattoorsit politiitulli arsaarinnikkallarsinnaatitaapput, tak. § 422, imm. 3. Arsaarinnissutaasut sapinngisamik piaarnerpaamik politiitun tunniunneqassapput qanga arsaarinnikkallartoqarsimanera arsaarinnikkallarnermullu tunngavisoq paasissutissiisutigineqarluni. Politiit suliassaq eqqartuussivimmut saqqummiutissavaat § 422, imm. 3-mi oqaaseqatigiit aappaat naapertorlugit, arsaarinnissutaagallartut inummut arsaarneqartumut nal. akunneri 24-t pingasoriarlugit naatinnagit tunniunneqarsimassanngippata, imaluunniit taanna arsaarinnikkallarnermut isumaqataalluni allakkatigut nalunaarsimassanngippat, tak. 422, imm. 7.

Arsaarinnikkallarnerup inatsisitigut sunniutai

§ 425. § 418, imm. 1, aamma 419, imm. 1-imi oqaaseqatigiit siulliit malillugit arsaarinnikkallarnerup nassatarissaanik isumaqatigiissut imaluunniit akiligassaqarfigisap malersuina aqputigalugu arsaarinnissutaagallartunik atuisoqarsinnaanngilaq, akuliunnerup siunertaanut akerliusunik.

Imm. 2. § 418, imm. 2, aamma 419, imm. 1-imi oqaaseqatigiit aappaat malillugit arsaarinnikkallarnerup, § 425, imm. 2, naleq. imm. 3, malillugu aalajangiisoqarnissaa tikillugu, pigisanik arsaarinnikkallarnerutulli inatsisitigut sunniuteqarpoq, tak. §§ 678-688.

Imm. 3. § 418, imm. 3 malillugu arsaarinnikkallarnerup kingunerisaanik unnerluutigineqartoq pisuussutaatinik atuisinnaatitaanngilaq. Unnerluutigineqartumut piunasaqaatinut tunngatillugu akiligassat, arsaarinnikkallarnerup pillugu aalajangiineq sioqqullugu akiligassaasut kisimik, akiligassaqarfigineqartumit akileqquneqarsinnaapput.

Arsaarinnikkallarnerup atuukkunnaarnera

§ 426. Suliassap naammassineqarnissaa tikillugu arsaarinnikkallarnerup tamakkiisumik ilaannakuusumilluunniit atorunnaarsinneqarnissaaq noqqaassut inummit, tamatumani soqutigisalimmit, eqqartuussivimmuut saqqummiunneqarsinnaavoq. Eqqartuussivik aalajangiissaaq, inuit aalajangiissummik soqutigisaqartut, oqaaseqaateqarsinnaatitaareerpata. Aalajangiineq tunngavilersugaassaaq.

§ 427. § 418, imm. 1 aamma § 419, imm. 1-imi oqaaseqatigiit siulliit malillugit arsaarinnikkallarnerup nassatarisaatut atuisinnaatitaannginneq kingusinnerpaamik atorunnaartassaaq suliassaq eqqartuussutikkut, assuarliummik taamaatitsinikkut imaluunniit unnerluussummik taamaatitsinikkut naammassivinneqaraangat, taamaattoqassananili arsaarinnissutigineqarallartut arsaarinnissutigineqarpat. Isumaqatigiinngissutigineqarpat arsaarinnissutaagallartut kimut utertinneqassasut eqqartuussivik noqqaavigineqarnikkut tamatuminna aalajangiiffiginissinnaavoq. Aalajangiineq tunngavilersugaassaaq

Imm. 2. Pigisat nalillit, § 418, imm. 2, imaluunniit § 419, imm. 1-imi oqaaseqatigiit aappaat malillugit arsaarinnissutigineqarallarsimasut imaluunniit § 421, imm. 2 malillugu qularnaveeqquusiussaasimasut, pinnerlineqartup taarsiissutissatigut piunasaqaataanik naammassinninniutitut atorneqqaartassapput, tamannalu pereerpat pisortat suliassami aningaasartuutitigut akileqqusaannut, tulliullugu pinnerluttulerinermi inatsimmi § 166, imm. 1-imi oqaaseqatigiinni siullerni, titarnerit aappaat aamma oqaaseqatigiit aappaat kiisalu imm. 4, § 168, imm. 5, aamma § 170-imi oqaaseqatigiit aappaat malillugit arsaarinnissamik piunasaqaatinut, kingullertullu akiliisitsissutissatigut piunasaqaatinut. Eqqartuussivik naammassinninnaanerup allatut tulleriinnilersorneqarnissaa pillugu qaqutigootumik aalajangiisinnaavoq.

Imm. 3. Pigisat nalillit piunasaqaatinik imm. 2-mi taaneqartunik naammassinninnissamut atorneqarnissaat pillugu aalajangiineq noqqaavigineqarneq naapertorlugu tunngavilersukkatut aalajangiinerussaaq. Aamma taamaassaaq aalajangiinerup qanoq paasineqarnissaa pillugu kingusinnerusukkat nalornisooruteqartoqassappat. Aalajangiineq inatsisitigut sunniuteqarpoq eqqartuussiviup saniatigut akiliisitsiniarsinnaatitaasut allat qularnaveeqqutitut sillimasiussinerattulli, tak. § 614, imm. 4. Suliassaq assuarliutaasup taamaatinneqarneranik imaluunniit pinngitsuutitaanermik inaarneqassappat arsaarinnikkallarnerup atorunnaassaaq.

Imm. 4. Eqqartuussivik pinnerlunnermik suliassap sularineqarnerani taarsiivigineqarnissamik piunasaqaat pillugu aalajangiissuteqarumanngippat, tak. § 334, imm. 2, tamatumunnga atatillugu eqqartuussiviup aalajangersinnaavaa piunasaqaatinut taakkununga qularnaarluni arsaarinnikkallarnerup taarsiivigineqarnissamik apeqqutip naammassineqarnissaaq tungaanut atuussinnaassuseqaannassasoq, tak. § 425, imm. 2, tamatumani naatsorsuutigineqarluni sapaatit akunneri sisamat qaangiutsinnagit

saqitsaannermik suliassiisoqarsimassasoq imaluunniit Nakuuserfigineqarsimasut Taartisinnissaannik Aalajangiisarneq pillugu inatsit naapertorlugu qinnuteqaammik tunniussisoqarsimassasoq. Tamatuma kingorna taarseeqqusissutit annertussilerneqassappata eqqartuussiviup pinerlunermik suliassami eqqartuussuteqartup, pinerlineqartumiit noqqaavigineqarnermigut, aalajangersinnaavaa taarseeqqusissutit naliliutit arsaarinissutigineqarallarsimasut iluanaarutitaannit tamakkiisumik ilaannakuusumilluunniit matussuserneqassasut, aammalu matussusiinissaq pisortat arsaarinninnissamik, akiliisitsinissamik kiisalu suliassamut aningaasartuutunik akiliinissamik piumasqaataanniit salliutinneqarluni pissasoq. Taamatut aalajangiineq inatsisitigut sunniuteqassaaq akiliisitsiniaanermut pisortat eqqartuussivimmiit allaaneruset allat qularnaveeqqutitut sillimmasiussisarnerattulli, tak. § 614, imm. 4. Suliassaq sularineqassaaq pinerluttulerinermi eqqartuussisarnerut.

Imm. 5. § 418, imm. 3 malillugu arsaarinnikkallarneq atorunnaassaaq unnerluutigineqartup akiliisitsinniaaneq pinngitsoortinniarsariunnaarpagu, aalajangersimasumik pissuteqarluni isumaqartoqanngippat unnerluutigineqartup akiliisitsiniaaneq pinngitsoortinniaqqissinnaassagaa. Arsaarinnikkallarnerup atorunnaarneranik aalajangiineq eqqartuussiviup aalajangiinerissavaa.

Assinik qimerloortitsisarneq, kinaassusersisitsisarneq aamma ujaasisarneq

Pasisap assinginik qimerloortitsisarneq

§ 428. Pasisap assingi politiit avaqqullugit inunnut aatsaat qimerloortinneqarsinnaapput

- 1) pineqartoq inatsisinik unioqqutitsinermi, pisortatigoortumik unnerluutigisassaataasumi, naleqquttumik pissutissalimmik pasilligaappat, aamma
- 2) akuliunneq paasiniaanermut pingaaruteqarluinnartussatut isumaqarfigineqarpat.

Imm. 2. Assinik qimerloortitsinissamik politiit aalajangiisuussapput.

Pasisaanngitsut assinginik qimerloortitsineq

§ 429. Inuup pisisaanngitsup assingi politiit avataasigut inunnut aatsaat qimerloortinneqarsinnaapput § 430-mi imaluunniit § 431-mi malittarisassat malillugit.

§ 430. Pinerlineqartut ilisimannittullu allat akuersaarnerminnik, ajornanngippat allakkatigut, nalunaarsimannngitsut assinginik aatsaat qimerloortitsisoqarsinnaavoq,

- 1) paasiniaaneq inatsisinik unioqqutitsinermut peqqarniitsumut tunngasuuppat, aamma
- 2) akuliunneq paasiniaanermut pingaaruteqarluinnartussatut isumaqarfigineqarpat.

Imm. 2. Eqqartuussiviup assinik qimerloortitsinissaq aalajangiiffigissavaa. Aalajangiinermi taagorneqassapput suliassami pissusiviusut, akuliunnissamut piumasqaatit naammassineqarnerannik tapersiisuusut. Aalajangiineq sukkulluunniit allannngortinneqarsinnaavoq.

Imm. 3. Misissuinermi siunertarisat maangaannartussanngussappata, eqqartuussiviup aalajangiinissaa utaqqineqassappat assinik qimerloortitsinissaq politiit aalajangiiffigineqarsinnaavoq. Akuliuffigineqartussap tamanna noqqaassutigippagu politiit sapinngisamik piaarnerpaamik kingusinnerpaamillu nal. akunneri 24-t pingasoriarlugit qaangiutsinnagit suliassaq eqqartuussivimmut saqqummiutissavaat, akuliunnissap akuerineqarsinnaaneranik aalajangiisussamut. Aalajangiineq tunngavilersukkatut aalajangiinerussaaq.

Imm. 4. Eqqartuussivik imm. 2 imaluunniit 3 malillugu aalajangiilersinnagu akuliuffigineqartussaq oqaaseqaateqarsinnaatitaassaaq.

Assinik assiisivinnersunik qimerloortitsineq

§ 431. Assinik, kingusinnerusukkat kinaassusersiinissaq siunertaralugu politiit pigineqareersunik, tak. § 408, pisut imm. 1, § 428-mi imaluunniit § 430-mi eqqartorneqartut avataasigut aatsaat

nittaasoqartassaaq paasiniaaneq inatsisunik unioqutitsinermut peqqarniitsumut tunngasuuppat, assilineqarsimasorlu

1) ukiut kingullit tallimat iluini inatsisunik unioqutitsinermut peqqarniitsumut pisuutitaasimappat imaluunniit

2) ukiut kingullit qulit iluini inatsisunik unioqutitsinermut immikkut peqqarniissusilimmut pisuutitaasimappat.

Imm. 2. Assinik qimerloortitsinissamik aalajangiineq politiit aalajangiinerissavaat.

Atsikkutigiissaarinissamik piunasaqaatit il.il.

§ 432. Assit §§ 428-431-mi malittarisassat naapertorlugit qimerloortinneqarsinnaanngillat akuliunnermi siunertarisaq, suliassap suussusaa peqqarniissusaalu aamma ajuallatsitsinissaq akornusiinissarlu eqqorneqartumut tuttussaasorineqartoq akuliunnermut naleqqiullugit naleqqutinngippata.

Imm. 2. Inatsiseqarnermut ministeri assinik qimerloortitsinermi periaasissat pillugit erseqqinnerusunik malittarisassiussaaq.

Kinaassusersisitsineq

§ 433. Inuk pasisaq politiit avaqqullugit inunnut allanut aatsaat qimerloortinneqarsinnaavoq (toqqaannartumik kinaassusersisitsineq)

1) pineqartoq inatsisunik unioqutitsinermut, pisortatigoortumik unnerluutigisassaasumut, pissutissaqarluartumik pasilligaappat, aamma

2) akuliunneq paasiniaanermut pingaaruteqarluinnartutut isumaqarfigineqarpat.

Imm. 2. Taamaattorli pasisaq inunnut arlalinnut kinaassusersiugassanut ilaatillugu politiit avaqqullugit inunnut allanut qimerluugassanngortinneqarsinnaavoq, pineqartoq inatsisunik unioqutitsinermut peqqarniitsumut pissutissaqarluartumik pasineqarpat.

Imm. 3. Pasisamik toqqaannartumik kinaassusersisitsineq imaluunniit inuit arlallit akornanniit kinaassusersisitsineq pisut, imm. 1-imi aamma 2-mi eqqartorneqartut, avataatigut pisinnaavoq pineqartoq tamatumunnga isumaqataalluni akuersisimappat. Akuersineq sapinngisamik allakkatigut pisassaaq.

Imm. 4. Pasisamik toqqaannartumik kinaassusersisitsisoqassanngilaq imaluunniit inuit arlallit akornanniit kinaassusersisitsisoqassanngilaq akuliunnermi siunertarisaq, suliassap suussusaa peqqarniissusaalu aamma ajuallatsitsinissaq akornusiinissarlu eqqorneqartumut tuttussaasorineqartoq akuliunnermut naleqqiullugit naleqqutinngippata.

Imm. 5. Pasisamik imm. 1-3-mi taaneqartut kinaassusersisitsineq pillugu aalajangiinerit politiit aalajangiinerissavaat.

Imm. 6. Inatsiseqarnermut ministeri inuit arlallit akornanniit kinaassusersisitsisarnermi periaasissat pillugit erseqqinnerusunik malittarisassiussaaq.

Ujartuineq

§ 434. Politiit inuup isikkumigut ilisarnarnaataanik imaluunniit paasissutissanik allanik, pinerluuteqarsorisap kinaassusersineqarnissaanut atorsinnaasunik, aatsaat tamanut saqqummiisinnaapput

1) pineqartoq inatsisunik unioqutitsinermut, pisortatigoortumik unnerluutigisassaasumut, pissutissaqarluartumik pasilligaappat, aamma

2) tamanut saqqummiussineq paasiniaanermut pingaaruteqarluinnartuuserineqarpat, matumunnga ilanngullugu pineqartup kinaassusersineqarnissaa imaluunniit inatsisunik suli allatigut unioqutitsinissamik pitsaaliuinissaq.

Imm. 2. Pinerluuteqarsorisap assinganik tamanut aatsaat saqqummiussisoqarsinnaavoq pissutissaqartumik pasitsaanneqarpat, pineqartoq inatsisinik peqqarniitsumik unioqqutitsisimasoq.

Imm. 3. Taamaattorli imm. 1-imi aamma 2-mi taaneqartutut tamanut saqqummiussisoqassanngilaq, akuliunnermi siunertarisaq, suliassap suussusaa peqqarniissusaalu aamma ajuallatsitsinissaq akornusiinissarlu eqqorneqartumut tuttussaasorineqartoq akuliunnermut naleqqiullugit naleqqutinngippata.

Imm. 4. Imm. 1-imi 2-milu taaneqartutut tamanut saqqummiussinissamik aalajangiineq politiit aalajangiinerissavaat.

§ 435. Immikkut pasitsaassisoqarpat inuk, kinaassusaa politiit ilisimaneqartoq, inatsisinik peqqarniitsumik unioqqutitsisimasoq politiit pineqartumik ujartuisinnaapput aviisit, radio, isiginnaarutit aqutigalugit imaluunniit allatut iliornikkut pisortatigoortumik ujartuisinnaallutik, tamanna eqqartuussisutigit malersuinissamat aalajangiisuusumik pingaaruteqartuusorineqarpat imaluunniit taamatulli peqqarniitsigisumik inatsisinik unioqqutitseqqinnissaq pinaveersaartinniarlugu.

Imm. 2. Imm. 1-imi taaneqartutut ujartuinerni paasissutissiissutigineqarsinnaapput pasisap pinerluutaa aammalu pasisap kinaassusaa, matumunnga ilanngullugit aqqa, atorfia najugaalu. Ujartuinermi pineqartup assinganik tamanut aamma saqqummiussisoqarsinnaavoq.

Imm. 3. Ujartuisoqassanngilaq akuliunnermi siunertarisaq, suliassap suussusaa peqqarniissusaalu aamma ajuallatsitsinissaq akornusiinissarlu eqqorneqartumut tuttussaasorineqartoq akuliunnermut naleqqiullugit naleqqutinngippata.

Imm. 4. Ujartuinissamik aalajangiineq politiit aalajangiinerissavaat.

Inummik misissuinerit

§ 436. Pasisap inuttut atugarisai pillugit paasissutissat pasisap qanoq pineqaatissinneqarnissaata aalajangiiffiginissaanut pingaaruteqarsorisat pissarsiarineqassapput. Pasisap inuttut atugarisai pillugit erseqqinnerusumik misissuineq (inummik misissuineq) nalinginnaasumik pisassaaq piumasaaqasiinikkut inissiisarfimmiittussanngortitsinngikkallarnermiit sunnuteqarnerusumik pineqaatissiissuteqarnissaq apeqqutaatinneqarsinnaaleraangat.

Imm. 2. Pasisaq eqqarsartaatsimigut misissugassanngortinneqartassaaq tamanna suliassap aalajangiiffiginissaanut pingaaruteqartuusorineqarpat, tamatumunngalu atatillugu akornusiinissaq aningaasartuutillu suliassap suussusaanut peqqarniissusaanullu naleqqiullugit naleqqutinngitsuusorineqanngippata. Pasisaq tigummigallagaappat imaluunniit misissortinnissamat ersarissumik akuersaanngippat tamanna aatsaat pisinnaavoq eqqartuussiviup aalajangiineratigit. Aalajangiineq tunngavilersukkatut aalajangiinerussaaq.

Imm. 3. Pisariaqarsorineqarpat pasisap napparsimmavissuarmut Kalaallit Nunaanniittumut avataniittumulluunniit imaluunniit paaqqinniffimmut tamatumunnga assingisumut allamut unitsinneqarluni eqqarsartaatsimigut misissorneqassasoq, tamatumunnga eqqartuussivik aalajangiissaaq. §§ 362- 366 taamatulli atortuutinneqassapput.

Imm. 4. Pasisaq akuersissuteqanngippat qanigisaminut inuinnarnulluunniit allanut saaffiginnikkut inuttut atugarisani pillugit paasissutissarsiortoqarsinnaasoq aatsaat taamaaliortoqarsinnaavoq, tamanna suliassap aalajangiiffiginiarneranut aalajangiisuusumik pingaaruteqarpat aammalu eqqartuussiviup tamatumunnga aalajangeereerneratigit. Eqqartuussiviup aalajangiinera tunngavilersukkatut aalajangiinerussaaq.

Imm. 5. Inatsiseqarnermut ministeri inummik misissuisarneq pillugu erseqqinnerusunik malittarisassiussaaq.

Unnerluussut

§ 437. Unnerluutigisassangortitsineq pisassaaq unnerluussissut politiit sanasimasaat atsiorsimasaallu aqqutigalugu.

Imm. 2. Unnerluussissutip makku imarissavai:

- 1) eqqartuussiviup, suliaassiissuteqarfiusup aqqa,
- 2) unnerluutigineqartup aqqa, najugaa aamma inuttut normua, aamma
- 3) pissutsit unnerluutiginnissutaasut pillugit paasissutissat.

Imm. 3. Imm. 2, nr. 3 malillugu paasissutissiineq makkuninnga ilaqassaaq:

- 1) malittarisassaq, unioqqutinneqarneragaq,
- 2) pinerluutaasup malittarisassaq malillugu taaguutaa,
- 3) pineqaatissiinissamut inatsisitigut tunngavigisaq,
- 4) pissutsit unnerluutiginnissutaasut naatsumik nassuiarneqarnerat, piffissaq, sumiiffik, eqqugaq, pinerlunnermi periaaseq pissutsillu allat naammaginartumik erseqqissumillu nassuiaateqarnissamut pisariaqarsorineqartut taagorlugit, aamma
- 5) pissutsit, suliaasap suliarineqarnerani pineqaatissiissutissamik aalajangiinissamut tunngatillugu patsisiginiarneqartussaasut.

Imm. 4. Allanik imaluunniit tulliutitamik unnerluussuteqartoqarsinnaavoq.

Imm. 5. Unnerluussissut uppersaatissanik, saqqummiunnialersaakkanik, imaluunniit apeqqutit inatsisinut tunngassutillit pillugit nassuiaammik imaqaassanngilaq.

§ 438. Unnerluussissut oqaatsit unnerluutigineqartup paasisinnaasai atorlugit allagaassaaq imaluunniit nutserneqarsimassaaq.

§ 439. Inatsisartunut ilaasortaq kinaluunniit Inatsisartut isumaqataallutik akuerseqqaartinnagit unnerluutigineqarsinnaanngilaq, taamaassanani ilaasortaq iliuuseqaleruttortoq pakasarneqarsimappat.

Imm. 2. Inatsisartuni oqaaserisimasaminut inatsisartunut ilaasortaq kinaluunniit Inatsisartut isumaqataallutik akuerseqqaartinnagit tamatuma silataani akisussaatinniarneqarsinnaanngilaq.

Akiliisitsissutissat eqqartuussinertaqanngitsumik akuersissutaasarnerat aamma arsaarinnissuteqartarneq

§ 440. Politiit isumaqarpata iliuuserisimasaq akiliisitsissuteqarnermik imaluunniit arsaarinnissuteqarnermik taamaallaat kinguneqassasoq unnerluussissut pasisamut nassiuunneqarsinnaavoq maluginiaqqusissutit allallugu pasisaq, taanna pisuulluni nassuerpat taamatullu aalajangiisoqarnissaanik kissaateqarpat, nalunaarsinnaasoq eqqartuussinertaqanngitsumik akiliisitsissut maluguniaqqusissummi annertussusiligaq piffissaliinerup nalequttup iluani akilerumagini aammalu arsaarinnissuteqarnissaq akuersaarsinnaagunarini.

Imm. 2. Pasisaq nalunaarpat suliaasap taamatut aalajangiiffiginissaa kissaatiginnikkini imaluunniit pasisaq nalunaaruteqanngivissorpat, unnerluussissut tamatuminnaga maluginiaqqusissutitalerlugu eqqartuussivimmut tunniunneqassaaq.

Unnerluussissut

§ 441. Politiit unnerluussissummik eqqartuussivimmut tunniussissapput. Tunniussisoqarnerani suliaasap eqqartuussivimmi aallarnerneqassaaq.

Imm. 2. Unnerluussissutip eqqartuussivimmut tunniunneqarneranut peqatigitillugu unnerluutigineqartoq aamma nassinneqassaaq. Unnerluussissut nalunaarutigineqassaaq eqqartuussivimmi eqqartuussutissap isumaqatigiinniutigineqarnissaanut aggeqqusissummut

peqatigitillugu, kingusinnerpaamillu eqqartuussutissap isumaqatigiinniutigineqarnissaa sapaatip akunneranik ataatsimik sioqqullugu.

Imm. 3. Nukinginnartunik pisoqartillugu eqqartuussiviup imm. 2-mi piffissarititatur aalajangiqaq sanioqquassinnaavaa, unnerluutigineqartumik qajassuussinissamut tamanna naleqquttuursorineqarpat.

Unnerluussissummik allannguuteqartitsineq

§ 442. Politiit eqqartuussutissaq isumaqatigiinniutigineqalersinnagu unnerluussissuteqarneq annertusiniarpasuk, pinerlunnerit unnerluussissummi eqqaaneqartuniit allaanerusut ilanngullugit, imaluunniit unnerluussissummi taagorneqartunut naqqiissuteqarniarunik, tamanna pisariaqarpoq unnerluussissummik ilasamik imaluunniit nutaamik tunniussaqaarnikkut nalunaarutiginnikkullu.

Imm. 2. Eqqartuussutissap isumaqatigiinniutigineqarnerani eqqartuussisut akuersinerisigut unnerluussisut annertusineqarsinnaavoq pinerluutaassimasut allat ilanngunneqarlutik, unnerluutigineqartoq akuersippat, imaluunniit pisimasoq, ilanngussassatur apeqqutaatinneqartoq, eqqartuussutissap isumatigiinniutigineqarnerata nalaani piliarineqarsimappat.

Imm. 3. Annertusitsineq pissaaq eqqartuussisut aalajangiinerat malillugu unnerluussissummut ilassusiinikkut imaluunniit eqqartuussisut suliassanik allassimaffimmut allattuinnikkut. Aamma tamanna atuuppoq iluarsiissutinut, eqqartuussutissap isumaqatigiinniutigineqarnerani politiit unnerluussissummi iluarsiissutaannut.

Imm. 4. Unnerluussisutip annertusisinniarneqarnera unnerluutigineqartumit isumaqataaffigineqanngippat pineqartumut nutaamik suliassiissuteqartoqartariaqarpoq.

Uppernarsaatissat allattorsimaffiat il.il.

§ 443. Unnerluussissummik tunniussaqaarnermut peqatigitillugu eqqartuussivimmut tunniunneqassapput suliassami uppernarsaatissatur allakkiat taakkualuunniit nuutsinneqarneri kiisalu ilisimannittut suliassap sularineqarnerani uppernarsaatinneqartussat uppernarsaatissallu patsisiginiarneqassamaartut allattorsimaffiat.

Imm. 2. Uppernarsaatissat allattorsimaffiat oqaatsit unnerluutigineqartup paasisinnaasai atorlugit sananeqassaaq imaluunniit nutserneqarsimassaaq.

§ 444. Unnerluutigineqartoq illersuisoqarpat politiit unnerluussisut, uppernarsaatissat allattorsimaffiat suliassamilu allakkiaatit illersuisumut nassitutissavaat taakkua eqqartuussivimmut nassiuinnerinut peqatigitillugu. Illersuisoq unnerluussisutip tiguneqarnerani eqqartuussivimmit aatsaat ivertinneqassappat eqqartuussiviup illersuisumut nassitutissavai unnerluussisutip, uppernarsaatissat allattorsimaffiata kiisalu suliassami allakkiaatit nuutsinneqarneri.

Misissueqqinnerit il.il.

§ 445. Unnerluutigineqartoq taassumaluunniit illersuisua politiinut noqqaassuteqarsinnaavoq misissueqqittoqassasoq imaluunniit uppernarsaatinik pissarsiniartoqassasoq. Taamatut noqqaassuteqarneq politiit tamakkiisumik ilaannakortumilluunniit akuersaarumassanngippasuk, aammalu noqqaassut eqqartuussutissaq isumaqatigiinniutigineqalersinnagu saqqummiunneqarsimappat eqqartuussisut apeqqut pillugu immikkoortumik aalajangiissuteqassappat. Aamma taamaassaaq politiit uppernarsaat saqqummiukkusutaat illersuisup akerliuffigippagu.

§ 446. Misissueqqittoqarnissamik imaluunniit uppernarsaatissamik piniartoqarnissamik noqqaassut politiit, unnerluutigineqartup illersuisullu tungaanniit sapinngisamik saqqummiunneqartariaqarpoq eqqartuussutissaq isumaqatigiinniutigineqalersinnagu aammalu ima sioqqutsitigisumik noqqaasoqartassaaq uppernarsaatissanik pissarsiornissamut naammattumik

piffissaqartoqartitsissalluni, matumunnga ilanngullugu ingammik eqqarsaatigineqarlunittaaq ilisimannittuusinnaasunut aggeqqusissummik nalunaarutiginninnissaq.

Imm. 2. Taamatut pisoqanngippat, kisiannili ilisimannittoq imaluunniit uppersaatissaq piareersimappat, uppersaat tamatigut saqqummiuneqarsinnaassaaq.

Imm. 3. Politiit imaluunniit unnerluutigineqartoq uppersaasiissuteqarusuppata, illuatungerisamut piffissaalluartillugu ilisimatitsissutigineqarsimanngitsumik, eqartuussisut aalajangiiffigissavaat suliassaq kinguartikkallarnejassanersoq. Suliassaq aatsaat kinguartikkallarnejassannaavoq eqqartuussisut naliliippata uppersaasiissuteqarnissaq illuatungerisap uppersaatissanik allanik pissarsiorusulernissaanut naleqquttumik tunngavissiisq, tamannalu pisinnaassanngitsq eqqartuussutissaq isumaqatigiinniutigineqartillugu.

Imm. 4. Uppersaatissaq eqqartuussutissamik isumaqatigiinniartissatut aalajangikkap nalaani saqqummiuneqarsinnaanngippat eqqartuussisut aalajangiiffigissavaa suliassaq kinguartinneqassanersoq imaluunniit suliassaq uppersaatissanik saqqummiussisoqarani aalajangiiffigineqassanersoq. Tamatuma naliliivigineqarnerani ingammik soqutiginiarneqartassaaq isumaqartoqartariaqarnerisq uppersaatissamik saqqummiussinissaq suliassap inernissaanut annertuumik pingaaruteqarsinnaassanersoq.

Kapitali 39

Suliassamik eqqartuussivimmi suliarinnittarneq

Piareersaaneq

§ 447. Eqqartuussisut piareersaataasumik ataatsimiinnissamut immikkut ittumut aggersaasinnaapput, tamanna pisariaqartutut nalilernerqarpat, illuatungeriit suliassami pissusiviusunut aammalu pissutsinut inatsisinut tunngassutilinnut isummernerisa paasineqarnissaa siunertarineqarluni, matumunnga ilanngullugu pissutsit suut assortorneqannginnersut aamma suut uppersaasiissuteqarfigneqassanersut kiisalu eqqartuussutissap isumaqatigiinniutigineqarnissaata aqqissuunneqarnissaa. Eqqartuussineq matooqqasuuvoq. § 466 taamatulli atortuutinneqarpoq.

Imm. 2. Imm. 1 malillugu piareersaataasumik ataatsimiinnermi uppersaatissanik § 465-imut naapertuuttumik saqqummiisoqarsinnaavoq unnerluutigineqartoq imaluunniit taassuma illersuisua najuuppat. Eqqartuussinerup ilaa tamanna tamanut ammasuuvoq.

§ 448. Matut matuneqarnissaat, issuaaqqusinnginneq, atinik taaseqqusinnginneq pillugu aamma ilisimannittumik killisiuisoqartillugu unnerluutigineqartup inimiit eqqartuussiviusumiit qimagunnissaanik eqqartuussutissap isumaqatigiinniutigineqarnissaa sioqqullugu aalajangiisoqarsinnaavoq, tamanna politiinit, illersuisumit imaluunniit ilisimannittumit noqqaassutigineqarpat.

§ 449. Eqqartuussisut politiinik, unnerluutigisamik illersuisumillu aggersaasassapput piffissaq sumiiffissarlu eqqartuussutissamik isumaqatigiinniuteqarfissaq taallugit.

Imm. 2. Eqqartuussisut aalajangissavaat, ilisimannittut suliassami eqqartuussinissamut siullermut aggersarneqassanersut.

Unnerluutigineqartup najuunnissaa

§ 450. Unnerluutigineqartup, tigusaqqanngitsup, inatsisinut naapertuuttumik aggersarneqarnermi kingorna eqqartuussivimmut nammineq ornigunnissani pisussaaffigaa.

Imm. 2. Unnerluutigineqartoq kiffaanngissusiagaasimappat politiit taassuma eqqartuussiviliaannissaa isumagissavaat.

§ 451. Inatsimmi allatut aalajangiisoqarsimangippat, unnerluutigineqartoq eqqartuussutissap isumaqatigiinniutigineqarnera tamaat eqqartuussivimmi nammineq najuuttussaavoq suliassami eqqartuussutissap aalajangiiffigisassanngortinneqarnera tikillugu. Eqqartuussisulli siulittaasuata, unnerluutigineqartoq nassuiaateqareerpat, unnerluutigineqartup eqqartuussivimmiit qimagunnissaa akuerisinnaavaa.

§ 452. Unnerluutigineqartoq inatsisinut naapertuuttumik aggersarneqaraluarluni takkutinnitsoorpat eqqartuussisut aalajangersinnaavaat, unnerluutigineqartoq tigusarinqassasoq eqqartuussivimmi sassartitaanissaq siunertaralugu.

Imm. 2. Unnerluutigineqartoq takkutinnitsoorpat pissutissaqavilluni takkutinnitsoornissaq nalunaarutigiginagu imaluunniit unnerluutigineqartoq nassuiaateqarumangippat tamatumunnga taarsiullugu eqqartuussisut suliassaq sularisinnaavaat unnerluutigineqartoq nassuersimasutut naatsorsuutigalugu, sulissarlu uppersaasiisoqanngikkaluortoq aalajangiiffigalugu. Aatsaalli taamaattoqassaaq suliassaq sularineqartillugu akiliisitsinissamiit, arsaarinnissuteqarnissamiit, biilersinnaanermut allagartaajarneqarnissamiit taarsiissuteqarnissamiillu allaanerusunik pineqaatissiissuteqarnissaq pillugu apeqqut pineqanngikkaangat, aamma suliassaq unnerluutigineqartumut immikkut sunnuteqartumik pingaaruteqanngikkaangat. Eqqartuussut unnerluussisummi maluginiaqqusissuteqarnikkut sananeqarsinnaavoq.

Imm. 3. Unnerluutigineqartoq imm. 2 malillugu takkutinnitsoortutut eqqartuunneqarpat pineqartup taassuma suliassamik nangitseqqinnissaq noqqaassutigisinnaavaa. Noqqaassut eqqartuussisunut, eqqartuussuteqarsimasunut, saqqummiunneqartassaaq kingusinnerpaamik eqqartuunneqartup eqqartuussummik nalunaarfigineqarneraniit ullut 14-it qaangiutsinnagit. Nangititsinissaq itigartitsissutigineqarpat, apeqqut Immikkut Ittumik Eqqartuussivimmuut Maalaaruteqarfigineqarsinnaasumut saqqummiunneqarsinnaassaaq eqqartuussisut itigartitsinermik aalajangiinernaniit sapaatit akunneri sisamat qaangiutsinnagit.

Imm. 4. Eqqartuussaasimasoq eqqartuussutip isumaqatigiinniutigeqqinneqarnerani takkutinnitsoorpat suliassaq eqqartuussisunit unitsinneqassaaq, siusinnerusukkullu eqqartuussutaasoq atuuttussaataaassaaq.

§ 453. Unnerluutigineqartoq eqqartuussutissap isumaqatigiinniutigineqarnerata aallartinnerani imaluunniit ingerlanerani takkutinnitsoorpat, tamanna § 452, imm. 2-mut ilaanani, aamma pineqartoq taanna ingerlaanaq eqqartuussiviliaanneqarsinnaanngippat suliassaq kinguartinneqassaaq, eqqartuussisut aalajangiinngippata eqqartuussutissaq tamakkiisumik ilaannakortumilluunniit isumaqatigiinniutigineqassasoq imm. 2 aamma 3 naapertorlugu.

Imm. 2. Unnerluutigineqartoq inatsisit malillugit aggersaasoqaraluarloq aamma pissutissaqavilluni agginngitsoornissani nalunaarutigiginagu takkutinnitsoorpat eqqartuussisut aalajangersinnaavaat ilisimannittut, misissuisarlutillu naliliisartut, takkussimasut, killisiorneqassasut, tamanna unnerluutigineqartumik qajassuussinissamut naapertuuppat, aamma killisiuinissamik kinguartitsinissaq ornigussimasunut annertuumik akornusersuutaassappat imaluunniit tamanna suliassap sivisuumik kinguartinneqarnissaanik kinguneqartussaassappat. Unnerluutigineqartorli illersuisoqarpat aatsaat killisiuisoqarsinnaavoq illersuisoq ornigussimappat.

Imm. 3. Eqqartuussutissamik isumaqatigiinniarneq ingerlanneqarsinnaavoq, unnerluutigineqartorlu najuutinngikkaluortoq eqqartuussuteqartoqarsinnaavoq eqqartuussisut unnerluutigineqartup najuunnissaa pisariaqarsorinngippassuk,

- 1) nalilerneqarpat akiliisitsinissamiit, arsaarinnissuteqarnissamiit, biilersinnaanermut allagartaajartinnissamiit imaluunniit taarsiissuteqarnissamiit allaanerusumik kinguneqartitsisoqassasoq,
- 2) unnerluutigineqartoq isumaqataasimappat suliassaq najuutsinnani sularineqarlunilu aalajangiiffigineqassasoq,
- 3) eqqartuussisut naliliippata suliassamik sularininneq unnerluutigineqartup pinngitsuutitaaneranik qularutissaanngitsumik kinguneqartussaasoq,

4) unnerluutigineqartoq suliassap aallartinnerani najuussimagaluarluni eqqartuussisunit akuerineqarani eqqartuussivimmik qimatsisimatillugu, imaluunniit

5) unnerluutigineqartoq unnerluussissut nalunaarutigineqareersoq qimaasimagaangat.

Imm. 4. Unnerluutigineqartoq illersuisoqarpat suliassaq aatsaat imm. 3 malillugu suliarineqarsinnaavoq, illersuisoq najuuppat. Pisuni imm. 3-mi nr. 1-imi eqqartorneqartuni aammattaq piumasaaqaataavoq unnerluutigineqartoq eqqartuussutissamik isumaqatigiinniarnissamut aggersaanermi ilisimatinneqarsimassasoq pissutissaqavilluni nalunaarani takkutinnitsoornissap kingunerisinnaagaa unnerluutigineqartoq pissutsinut, unnerluussissummi pineqartunut, eqqartuunneqartoq, matumani ilisimatitsissutigineqassallunittaaq akiliisitaanissamik, arsaarinnissuteqarnissamik, biilersinnaanermut allagartaajaanissamik imaluunniit taarsiissuteqarnissamik piumasaaqateqartoqartoq.

Eqqartuussaasimasup najuunnissaa

§ 454. Pineqaatissiissutaasimasup allangortinnissaa pillugu suliassani eqqartuussaasimasoq nammineerluni eqqartuussivimmi suliassap suliarineqarnera tamakkerlugu najuunnissaminut piginnaatitaavoq. Tamannali atuutinngilaq

1) pineqaatissiissutaasimasup allangortinneqarnissaa pillugu innersuussut isumaqatigiissutaappat,

2) eqqartuussaasimasup nammineerluni najuunnissaa pisariaqarsorineqanngippat, imaluunniit

3) eqqartuussaasimasoq allanik pissuteqartumik, aamma peqqissutsikkut atugarisat pissutigalugit, eqqartuussivimmi najuussinnaanngitsutut isumaqarfigineqartariaqarpat.

Imm. 2. Pisuni imm. 1-imi nr. 2-mi aamma 3-mi eqqartorneqartuni eqqartuussisut aalajangersinnaavaat eqqartuussaasimasoq ungasianiit attaveqaatinik atuinikkut eqqartuussinermi peqataassasoq, tak. § 466.

Unnerluussisup aamma illersuisup najuunnissaat

§ 455. Unnerluussisoq eqqartuussutissap isumaqatigiinniutigineqarnera tamaat najuutissaaq, suliassap eqqartuussutissanngortinneqarnissaa tikillugu. Unnerluutigineqartoq illersuisoqarpat tamanna taassumunngattaq atuuppoq.

Imm. 2. Unnerluussisoq eqqartuussutissamik isumaqatigiinniuteqarnerup aallartinnerani imaluunniit ingerlanerani takkutinnitsoorpat suliassaq kinguartinneqassaaq. Aamma taamaassaaq unnerluutigineqartoq illersuisoqartillugu, taassuma takkutinnitsoornerani, taamaattoqassanngilarli illersuisumik, suliassaminik ingerlaannaq isumaginnilersinnaasumik, ivertitsinissaq pissutsit ajornartinnigpassuk.

Killisiuinerit

§ 456. Unnerluutigineqartoq eqqartuussivimmut orniguttoq imaluunniit sassartinneqartoq apereqqaarneqartassaaq aqqa, ulloq inunngorfia najugaalu kiisalu allat, unnerluutigineqartup kinaassusaanik qularnaarinissamut pisariaqarsorineqartut pillugit.

Imm. 2. Unnerluutigineqartup unnerluussissummik aammalu taassuma oqaaseqaateqarnissamut pissusaatitaannginneranik ilisimatinneqareerneratigut unnerluutigineqartup unnerluussisutaasumut qanoq isumaqarfiginninnera aammalu unnerluutigineqartup oqaaseqarumasinnaanera eqqartuussisut apeqqutigissavaat. Oqaaseqartarumappat unnerluutigineqartoq politiit suliassaq pillugu apersoqqaarneqassaaq tamannalu pereerpat illersuisumit. Politiit, illersuisoq imaluunniit eqqartuussisunut ilaasut allanik apeqquteqaqqissinnaapput.

§ 457. Unnerluutigineqartoq akissuteqarumanngitsoq pinngitsaalineqassanngilaq. Taamatut akissuteqarumannginneq suliassap kinguartinneqarneranik nassataqarsinnaappat imaluunniit

illersuiniarnermut ajornakusoortitsippat eqqartuussisut unnerluutigineqartoq tamatuminnga paasitissavaat.

Imm. 2. Unnerluutigineqartoq eqqissisimasumik ataqqinassusilimmillu oqaluffigineqartassaaq. Apeqqutaasut aalajangersimasuussapput, erseqqissuullutik aammalu ima paasinartigisumik apeqqutigineqartassapput unnerluutigineqartup ersarissumik paasissallugu suna akuersaarnerlugu imaluunniit suna misiutiginerlugu. § 346, imm. 2-4, aamma § 347 taamatulli atortuutinneqassapput.

§ 458. Eqqartuussisut aalajangersinnaavaat unnerluutigineqartup ini eqqartuussiviusoq qimassagaa ilisimannittup imaluunniit unnerluutigineqataasup killisiorneqarnerani, immikkut tunngavissaqarpat isumaqassalluni taamaattoqanngippat nassuitsumik nassuiaasoqarsinnaanngitsoq.

Imm. 2. Unnerluutigineqartoq imm. 1 malillugu aalajangiinerup kingunerisaatut imaluunniit § 141, imm. 5 naapertorlugu ilisimannittumik imaluunniit unnerluutigineqataasumik killisiuinnermut najuussimanani eqqartuussiviup initaanut iseqqikkuni ilisimatinneqassaaq qimagusimanermini kina nassuiaateqarsimasoq. Unnerluutigineqartoq tamatuma saniatigut nassuiaatigineqartunik ilisimatinneqassaaq, nassuiaataasooq unnerluutigineqartumut tunngassuteqarpat. Eqqartuussisut aalajangissavaat nassuiaataasut unnerluutigineqartoq nammineq nassuiaateqalersinnagu imaluunniit nassuiaateqareerneratigut issuarneqassanersut.

§ 459. Ilisimannittunik aggersaanerit killisiuinerillu pisassapput kapitali 12-imi aalajangersakkanut naapertuuttumik.

§ 460. Eqqartuussisut killisiorneqartumut apeqquteqartassapput, tamanna ilumoortup paasineqarnissaa anguniarlugu sukkulluunniit tunngavissaqartinneqaraangat.

§ 461. Nassuiaatit, killisiuinermi nassuiaatigineqartut, eqqartuussisut suliaannik allassimaffimmut issuarneqartassapput oqaatsit, nassuiaanermi atorneqartut, atorlugit. Tamannali sanioqqunneqarsinnaavoq taamaasiornissaaq pisariaqarsorineqarlunilu illersorneqarsinnaasorineqarpat. Nassuiaataasunik pineqartumut atuffanneqartassaaq kajumissaarneqassallunilu nassuiaatit eqqortumik issuarneqarsimanersut oqaaseqaateqaqqullugu. Nassuiaat, eqqartuussisut suliaannik allassimaffimmi issuarneqarneratut itsillugu eqqartuussinermi peqataasunut, oqaatsinik issuaanermi atorneqartunik paasinninngitsunut, nutserneqartassaaq.

Imm. 2. Eqqartuussisut suliaannik allassimaffimmi nassuiaatinik issuaanermi tamatuma naammaginantumik peqqissaassuseqartumik allanneqarsimanera pingaartumik qularnaarniartariaqarpoq, taamaasilluni nunatta eqqartuussisuuneqarfiata eqqartuussut suliareqqitassanngortinneqassappat paasisinnaaniassammagu suna tunngavigalugu aalajangiisoqarsimanersooq.

§ 462. Ilisimannittut ataasiakkaat tamarmik immikkut nassuiaateqareernerit aammalu allatigut uppernarsaasiissuteqartoqareernerit tamaasa unnerluutigineqartoq nassuiaateqarsinnaatitaavoq, uppernarsaat taamaasiornissamut tunngavissiissappat.

Uppernarsaatissanik saqqummiussisarneq

§ 463. Politiit unnerluutigineqartorlu taassumalu illersuisua tamarmik uppernarsaatissanik saqqummiussisinnaapput.

Imm. 2. Eqqartuussisut uppernarsaatissanik, suliassamut sunniuteqassanngitsutut nalilerneqartunik, saqqummiussinissaaq pinngitsoortissinnaavaat.

Imm. 3. Eqqartuussisut kajumissaarutigisariaqarpaat uppernarsaatissanik, suliassap aalajangiiviginiarnissaani annertuumik pingaaruteqartussaasorineqartunik, saqqummiussisoqarnissaaq, pingaartumillu eqeersimaarfigniarartariaqarpaat uppernarsaatissat unnerluutigineqartumut iluaqutaassasorineqartut saqqummiunneqarnissaat.

§ 464. Uppernarsaatissanik saqqummiussineq pisassaaq eqqartuussutissap isumaqatigiinniutigineqarnerani. Arlaat uppersarneqarsimanersoq uppersarneqarsimannginnersorluunniit pillugu aalajangiinermi uppersaatissat eqqartuussutissap isumaqatigiinniutigineqarnerani saqqummiunneqartut taamaallaat tunngavigineqartassapput, taamaattoq tak. §§ 465 aamma 466, imm. 2 aamma 3.

§ 465. Eqqartuussutissap isumaqatigiinniutigineqarnerani uppersaatissanik saqqummiussinissaq immikkut ajornartorsiutissartaqassappat imaluunniit aningaasartuutaassappat imaluunniimmi immikkut illuinnartunik pissutissaqartoqarpit eqqartuussisut aalajangersinnaavaat uppersaatissanik saqqummiussinissaq tamarmi ilaannaaluunniit pissasoq suliassap piareersarneqarnerani, tak. § 447, imm. 2.

§ 466. Eqqartuussisut aalajangersinnaavaat unnerluutigineqartoq eqqartuussinerni peqataassasoq ungasianiit attaveqaatit assiliartallit atorlugit, unnerluutigineqartup nammineerluni eqqartuussivimmi najuunnissaa pisariaqassanngippat. Taamaassappat oqaaseqatigiit siulliit malillugit eqqartuussisut aalajangiineranni aamma illersuisoq, eqqartuussinermi unnerluutigineqartup sumiiffigisaani peqataasussaq, pineqassaaq, taamaassananili illersuisoq tamatumunnga taarsiullugu nammineerluni eqqartuussivimmut ornigunnissaa eqqartuussisunit eqqarsarnartoqartinneqanngippat. Unnerluutigineqartup illersuisullu eqqartuussinermi peqataasinnaanerat pillugu aamma §§ 128 kiisalu 163 atuutissapput.

Imm. 2. Ungasianiit attaveqaatit assiliartallit atorlugit unnerluutigisamik killisiuisoqarsinnaanngippat, eqqartuussisut imm. 1-imi oqaaseqatigiinni siullerni piumasaqaatit assingi tunngavigalugit aalajangersinnaavaat unnerluutigineqartoq tamatumunnga taarsiullugu sumiiffimmi naleqqunnerpaasorineqartumi killisiorneqarnissaminut aggersarneqassasoq.

Imm. 3. Ungasianiit attaveqaatit atorlugit ilisimannittunik killisiuisinnaanermi aammalu ilisimannittunik eqqartuussisoqarfiup najugaqarfigineqartup avataanut nassuiaateqariartoqqusineri § 141 atuutissaaq.

§ 467. Allagartat uppersaatissat, inatsisunik unioqqutitsinermut pissutaatinniarneqartut imaluunniit unioqqutitsinikkut pissarsiarineqarsimasut imaluunniit atorneqarsimasut imaluunniit taamatut iliuuseqarnissamut atorneqartussaasimasut, imaluunniit iliuusaasimasumik imaluunniit unnerluutigineqartup tamatumunnga attuumassuteqarneranik paasissutissiisut atuarneqassapput, tamanna uppersaasiinissamit pisariaqartinneqarpat.

Imm. 2. Aammattaaq allagartat uppersaatissat makku eqqartuussutissap isumaqatigiinniutigineqarnerani uppersaatitut atorneqarsinnaallutillu atuarneqartassapput:

1) uppersaatissanik ujaasinerit, arsaarinnikkallarnerit, misissuinerit aamma misissuisartut naliliisartullu sulineri, eqqartuussutissap isumaqatigiinniutigineqarnerata avataani pisimasut pillugit eqqartuussisut suliannik allassimaffimmut allattukkat kiisalu misissuisartuniit naliliisartuniillu eqqartuussivimmut nalunaarutit.

2) nassuiaatinik, unnerluutigineqartup pasilliutaasoq pillugu killisiorneqarnermini nassuiaatigisimasaanik, eqqartuussisut suliannik allassimaffinni issuaanerit, imaattoqartillugu

a) unnerluutigineqartoq maanna nassuiaateqarumangippat,

b) unnerluutigineqartup nassuiaatai siusinnerusukkat nassuiaataaniit allaaneruppata, imaluunniit

c) unnerluutigineqartoq takkutinnngitsoorpat, eqqartuussutissamillu isumaqatigiinniarneq § 453, imm. 3, malillugu ingerlanneqarpat.

3) nassuiaatinik, ilisimannittut aamma misissuisartut naliliisartullu nassuiaatigisimasaanik, eqqartuussisut suliannik allassimaffinni issuaanerit, imaattoqartillugu

a) pineqartut taakkua toqusimappata allanilluunniit pissuteqartumik killisioqqinneqarsinnaanngippata,

b) pineqartut taakkua eqqartuussivimmi allami, suliassamik sularinniffiunngitsumi, killisiorneqarsimappata, tak. § 466, imm. 2,

c) pineqartut taakkua unnerluutigineqartoq najuutsinnagu killisiorneqarsimappata, tak. § 453, imm. 2,
d) pineqartut taakkua nassuiaataat siusinnerusukkut nassuiaataanniit allaaneruppata, imaluunniit
e) ilisimannitoq maannakkut nassuiaateqarumangippat, pinngitsaaliissutinillu atuisoqartariaqangippat imaluunniit iluatsinngitsumik atuisoqarsimappat.

4) Kunngikkormiut, naalagaaffiit aallartitaasa allalluunniit, eqqartuussisutigoortumik malersorniarneqarsinnaangitsut, nassuiaataat nalunaarutaallu pillugit eqqartuussisut suliaannik allassimaffinnut ilassuteqaatit, pineqartut taakkua eqqartuussutissap isumaqatigiinniutigineqarnerani eqqartuussivimmuut ornigussimangippata.

5) Nalunaarutit ilisimannittutullu nassuiaatit, pisortatigoortumik suliassaqtartitaaneq naapertorlugu suliaasimasut, matumunnga ilanngullugit unnerluutigineqartup siusinnerusukkut pinerluuteqarluni eqqartuussutisarisimasaasa assilineqarneri.

Imm. 3. Pisut imm. 1-imi 2-milu taaneqartut avataasigut allakkiat uppernarsaatissat, nalunaarutini ilisimannittutullu nassuiaatinik imallit, aatsaat uppernarsaatitut atorneqarsinnaapput eqqartuussisut taamaasiornissamut qaqutigoortumik akuersippata. Unnerluutigineqartup siusinnerusukkut inuusaasia pillugu nalunaarutit eqqartuussivik avaqqullugu pineqarsimasut qaqugukkulluunniit atorneqartassanngillat.

§ 468. Unnerluutigineqartup, ilisimannittut imaluunniit misissuisartut naliliisartullu nassuiaataannik eqqartuussisut suliaannik allassimaffinniittunik issuaanerit, maannakkut nassuiaatigineqartut siornatigut nassuiaatigineqarsimasunut naapertuutinnimmata, aatsaat atuarneqartassapput pineqartoq killisiorneqarnermut tunngasunik ataqatigiissunik oqaaseqaateqarnissaminut periarfissinneqareerpat aamma apeqqutiniq, pineqartup nassuiaateqarnera pissutigalugu apeqqutigineqartariaqartunik, apereqqittoqareeraangat.

§ 469. Eqqartuussisut inunnik, pequtiniq ininillu misissuiffiginnissinnaapput, tamanna suliassap paasisaqarfigineqarnissaanut pisariaqarsorineqarpat. Misissuineq inunnit, eqqartuussutissap isumaqatigiinniutigineqarnerani najuuttussanit, najuuffigineqartassaaq.

Eqqartuussinissaq sioqqullugu aamma eqqartuussisoqarnerani suliassamik kinguartitsineq

§ 470. Kinaluunniit, kinguartitsinissamik kissaateqartoq, eqqartuussisunut sapinngisamik piaarnerpaamik ilisimatitsisassaaq. Tamanna pereeraangat eqqartuussisunit aalajangiiffigineqartassaaq suliassaq kinguartinneqassanersoq.

§ 471. Eqqartuussutissap isumaqatigiinniutigineqarnerani uppernarsaatissamik saqqummiussinissaq, suliassamik kinguartitsiffiusariaqartoq, pillugu apeqqummik saqqummertoqarpat eqqartuussisut aalajangiisassapput suliassaq kinguartinneqassanersoq, eqqarsaatigiutugalugu uppernarsaatissaaq qanoq pingaaruteqartigisutut isumaqarfigineqartoq.

Eqqartuussutissamik isumaqatigiinniuteqarneq

§ 472. Eqqartuussutissamik isumaqatigiinniuteqarneq aallarnerneqartassaaq paasisutissiissutigineqarluni suliassaq suna eqqartuussisunit suliarineqassasoq. Tamatuma kingorna unnerluussisut atuarneqassaaq unnerluutigineqartorlu § 456, imm. 2 naapertorlugu ilitserorneqassaaq. Eqqartuussisut unnerluussisoq qinnuigisinnaavaat suliassaq pingaarnersiorlugu saqqummiuteqqullugu (saqqummiussineq). Tamanna pereerpat uppernarsaatissanik saqqummiussineq tulliusassaaq, tak. §§ 464-468.

Imm. 2. Uppernarsaatissanik saqqummiussineq naammassippat unnerluussisoq siulliulluni tulleralugulu illersuisoq kiisalu unnerluutigineqartoq uppernarsaatissatigut saqqummiussinermi angusat suliassamilu apeqqutit inatsisinut tunngassutillit (naggataarutaasumik tunngavilersuuteqarneq) pillugit

oqaaseqaateqarnissaminnut periarfissineqassapput. Suliassap eqqartuussutissanngortinneqarnissaa sioqqullugu eqqartuussisut siulittaasuata unnerluutigineqartoq erseqqissumik aperissavaa sulii allatigut ilassutissaqarnersoq.

§ 473. Eqqartuussutissamik isumaqatigiinniuteqarneq naggaserlugu eqqartuussisut suliassami eqqartuussuteqassapput. Eqqartuussisut qaqutigootumik aalajangiisinaapput unnerluutigineqartup pisuuneranik apeqqut siulliullugu suliarineqarlunilu aalajangiiffigineqassasoq.

Imm. 2. Suliassap aalajangiiffigineqarnissaa pillugu eqqartuussisut siunersioqatigiittarnerannut tunngatillugu kapitali 9-mi aalajangersakkat atuutissapput.

§ 474. Eqqartuussutissamik isumaqatigiinniuteqarneq naammassereeraangat eqqartuussisut sapinngisamik piaarnerpaamik aalajangiisassapput. Suliassaq eqqartuussutissanngortinneqarpat eqqartuussisut tusarliuttassavaat eqqartuussut qaqugu nalunaarutigineqassanersoq. Eqqartuussut ulloq taanna nalunaarutigineqarsinnaanngippat sapaatit akunneri marluk qaangiutsinnagit nalunaarutigineqartassaaq.

Imm. 2. Pissutsit immikkut ittut tamanna pisariaqartippassuk eqqartuussisut aalajangersinnaavaat imm. 1-imi piffissarititamik sanioqqutitsisoqassasoq. Aalajangiinermi eqqartuussisut pissutsit piffissarititaasumik malinninnginnissamut pissutaasut oqaatigisassavaat.

Imm. 3. Eqqartuussut nalunaarutigineqartassaaq eqqartuussutip inerneranik eqqartuussinermi atuaanikkut. Nalunaaruteqarnermi unnerluutigineqartoq najuutinngippat politiit eqqartuussutip allassimaffiata assileneqarneranik unnerluutigineqartumut nassiussissapput. Suliassaq § 453, imm. 3 naapertorlugu unnerluutigineqartumit najuuffigineqarani suliarineqarlunilu aalajangiiffigineqassappat, aalajangiinerup assileneqarnera unnerluutigineqartumut nalunaarutigineqassaaq.

Akiliisitsissuteqarnissamik eqqartuussivikkoortumik akuersissutiginnittarneq

§ 475. Suliassaq inatsisinik unioqqutitsinermut, akiliisitsinermik imaluunniit arsaarinnissuteqarnissamik taamaallaat kinguneqassanngatinneqartumut, tunngassuteqarpat eqqartuussisut, unnerluutigineqartup pisuunera qularutigissallugu tunngavissaqarsorineqartinnagu politiillu tamatumani isumaqataallutik nalunaarpata, akiliisitsissutissatut aalajangerneqartunik akiliinikkut imaluunniit arsaarinnissuteqarnissamut akuersaarnikkut unnerluutigineqartoq suliassap aalajangiiffigineqarnissaanut piginnaatissinnaavaat.

Imm. 2. Aalajangiinissatut neqeroorutaasoq unnerluutigineqartumit akuerineqarpat, tamanna eqqartuussisut suliaannik allassimaffimmut allanneqassaaq. Taamatut aalajangiineq eqqartuussutitulli sunnuteqassaaq.

Eqqartuussut

§ 476. Eqqartuussut unnerluutigineqartumik pineqaatissiilluniluunniit pinngitsuutitsissaaq.

Imm. 2. Eqqartuussisut pisimasumut, unnerluussissummut ilaatinneqanngitsumut, eqqartuussuteqarsinnaanngillat.

Imm. 3. Akerlianik eqqartuussisunut ajornartinneqanngilaq pisimasumik unnerluutiginnissutaasumik aalajangersakkamut allamut, unnerluussisussaataasut atorniagaanniit allaanerusumut, tunngatitsinissaq, soorluttaaq eqqartuussisut pissutsit taaneqanngitsut (piffissap qanoq ilinera aamma sumiiffik il.il.) inatsisinik unioqqutitsinermut attuumassutillit tungaasigut unnerluussummik sanioqqutitsisinnaasut. Taamaattoqartassaarli aatsaat eqqartuussisut qularatik naliliippata unnerluutigineqartoq aamma unnerluussummik taamatut saneqquataarisogarnerani imminut illersornissaminut naammattumik piginnaatitaasimassasoq. Eqqartuussisut taamaattoqarsorinngikkuniku imaluunniit tamatuma tungaatigut qularunik eqqartuussinissamut allaanerusunik tunngavissinissaq isummerfiginialersinnagu

illuatungeriit oqaaseqaateqarnissaanut periarfissisavaat, pissutsillu naapertorlugit suliassaq kinguartissavaat piffissami, illersorniarnissap isumagineqarnissaanut pisariaqartinneqartumi.

§ 477. Unnerluutigineqartoq eqqartuunneqassappat, eqqartuussisut eqqartuussummut tunngavilersuutitut taagussavaat

- 1) pissutsit, uppernarsarneqartutut isigisat aammalu eqqartuussuteqarnermut tunngavigineqartut,
- 2) malittarisassaq unioqqutinneqarsimasoq,
- 3) pineqaatissiinermut inatsisitigut tunngavigisaq, aamma
- 4) pissutsit, pineqaatissiissutissamik toqqaanermi sivisussusiliinermilu pingaartinneqartut.

Imm. 2. Unnerluutigineqartoq pinngitsuutinneqarpat, eqqartuussisut eqqartuussummut tunngavilersuutitut taagussavaat

- 1) pissutsit, eqqartuussuteqarnissamut piumasqaataasut aammalu amigaataasutut imaluunniit uppernarsarneqanngitsutut isigineqartut, imaluunniit
- 2) pissutsit pinerluttulerinermi inatsisitigut akisussaaffiliinngitsut aammalu atuuttutut isigineqartut, kiisalu
- 3) inatsisip aalajangersagartai atorneqarsimasut.

§ 478. Eqqartuussut oqaatsinut unnerluutigineqartup paasisinnaasaanut allanneqartassaaq imaluunniit nutserneqartassaaq.

Suliareqqitassanngortitsisarneq pillugu ilitsersuineq

§ 479. Unnerluutigineqartoq eqqartuussummik suliareqqitassanngortitsinissamut piginnaatitaanerani ilitsersorneqartassaaq. Ilitsersuisoqartassaaq eqqartuussutip nalunaarutigineqarnerani, unnerluutigineqartoq najuuppat, taamaanngippallu eqqartuussummik kingusinnerusukkut ilisimatitsissuteqarnikkut imaluunniit eqqartuussutip nalunaarutigineqarnerani, tak. § 474, imm. 3. Eqqartuussisut suliaannik allassimaffimmut allanneqassaaq eqqartuussinermi unnerluutigineqartup najuuffigisaani ilitsersuisoqarsimappat.

Imm. 2. Illersuisoq, suliasamik eqqartuussivimmi suliarinninnermi unnerluutigineqartumut ikiuussimasoq, pisussaaffeqarpoq unnerluutigineqartoq Kalaallit Nunaata Eqqartuussisuuneqarfianut suliareqqitassanngortitsinissamut piginnaatitaanerani ilitsersussallugu, tak. § 434, aamma unnerluutigineqartoq taamaaliornissaanik ikiorsissallugu.

Kapitali 40

Suliassamut aningaasartuutit

§ 480. Pinerlunnernik suliassani, pisortatigoortumik malersorneqartussaasuni, suliassamik suliarinninnermi naammassinninnermilu aningaasartuutit naalagaaffiup karsianit akilerneqartussaapput.

Imm. 2. Taamaattorli unnerluutigineqartoq pisuutitaappat, taamaasiornissamut immikkut ittunik pissutissaqartoqartillugu eqqartuussutikkut aalajangerneqarsinnaavoq unnerluutigineqartup aningaasartuutaasimasut pisariaqartut tamakkerlugit ilaannaalluunniit pisortanut taarsissagai.

Kapitali 41

Avammut oqaaseqartarneq il.il.

§ 481. Kinaluunniit, atorfini naapertorlugu pinerlunnernik suliassamik suliassaqartoq, suliassaq aalajangiiffigineqartinnagu imaluunniit taamaatiinnarneqartinnagu eqqartuussinerup avataatigut pisuunermut apeqqut pillugu avammut oqaaseqaateqartussaangilaq.

§ 482. Eqqartuussinermi isumaqatigiinniutaasunik avammut issuaaneq piviusorsioruullunilu ilumoortuussaaq.

Imm. 2. Kinaluunniit piaaraluni avammut imaluunniit amerlasuunut siaruaattussanik oqaatsitigut allakkatigulluunniit, piaaraluni imaluunniit mianersuaalliorujussuarluni

- 1) suliassamik pineqaatissiissutaasussamik, suli inaarutaasunik aalajangiiffigineqanngitsunik imaluunniit taamaatiinnarneqanngitsunik, pingaarutilitsigut eqqunngitsunik paasisutissiisoq,
- 2) suliassap paasinarsarneqarnissaanik akornusersuisoq imaluunniit
- 3) suliassami pineqaatissiissutaasussami inaarutaasunik eqqartuussuteqartoqartinnagu oqaaseqaateqartoq, eqqartuussisunut imaluunniit eqqartuussisooqataasunut suliassap aalajangiiffigineqarnissaanut tunngatillugu illersorneqarsinnaanngitsunik sunniiniutaasinnaasunik, pineqaatissinneqarsinnaavoq pinerluttulerinermi inatsit malillugu.

§ 483. Suliassap politiit paasiniarneqartup tamanut ammasunik eqqartorneqannginnissaa naalagaaffinnut allanut pingartitassanit pisariaqartinneqarpat suliassap tamakkiisunik ilaannakortumilluunniit avammut ammasunik eqqartorneqarnissaata inerteqqutaanera politiit eqqartuussisunut aalajangeeqqusinnaavaat. Apeqqut matoqqasunik suliarineqarlunilu aalajangiineq nalunaarutigineqassaaq. Eqqartuussisut aalajangiinerat tunngavilersugaassaaq.

Imm. 2. Aalajangiineq atorunnaassaaq unnerluussisuteqartoqarpat imaluunniit unnerluussut taamaatinneqarpat. Suliarli inunnut arlalinnut tunngassuteqarpat aalajangiineq atuutsiinnarneqarsinnaavoq, paasiniaanerup tamanut tunngasup naammassineqarnissaa tikillugu.

Imm. 3. Inatsiseqarnermut ministeri erseqqinnerusunik malittarisassiussaaq eqqartuussisut aalajangiineri qanoq tusagassiutinut aalajangersagaq una malillugu nalunaarutigineqartassasut.

Imm. 4. Inerteqqummik unioqqutitsineq pinerluttulerinermi inatsit malillugu pineqaatissiissutaasinnaavoq.

§ 484. Kinaluunniit, pinerluttulerinermi inatsimmi atoqatigiinnikkut pinerluuteqarnernik malittarisassanik unioqqutitsineq pillugu suliassamik eqqartuinnermut atatillugu imaluunniimmi suliassap taamaattoq eqqarsaatigalugu, pinerlineqartup aqqanik, atorfianik najugaqarfianilluunniit imaluunniit allatut iliornikkut pineqartup kinaassusaanik tamanut saqqummiussisoq pineqaatissinneqarsinnaavoq pinerluttulerinermi inatsit malillugu.

Imm. 2. *Imm. 1* akornutaassanngilaq politiit pinerlineqartup kinaassusaanik saqqummiussinissaannut, tamanna suliassap paasiniarneqarnissaa pissutigalugu pisariaqassappat imaluunniimmi tamanut soqutiginaatilittut isumagineqarnissaa tunngavissaqarpat. Taamaattorli pinerlineqartup assinginik qimerloortitsinermi §§ 430 aamma 432 atortuutinneqassappat.

§ 485. Kinaluunniit, pinerlunnermik suliassamik imaluunniimmi suliassap taamaattup siunertarineqarneranut eqqartuinnermut atatillugu, eqqartuussisooqataasup peqataasup aqqanik, atorfianik najugaqarfianilluunniit avammut saqqummiussisoq imaluunniit allatut iliornikkut pineqartup taassuma kinaassusaanik avammut saqqummiussisoq pineqaatissinneqarsinnaavoq pinerluttulerinermi inatsit malillugu.

Kapitali 42

Pinerluttulerinermi inatsisitigut malersuineq pissutigalugu taarsiissuteqartarneq

§ 486. Kinaluunniit, pinerluttulerinermi inatsisitigut malersuiniarnerup ilaatut tigusarineqarsimasoq imaluunniit tiggummigallagaasimasoq, tamatumuuna ajoqusigaanerminut taarsiivigineqartussaavoq, unnerluussut taamaatiinnarneqassappat imaluunniit unnerluutigineqartoq pinngitsuutitaassappat. Taarsiissuteqartoqassaaq aningaasarsiornikkut ajoqusiinnermut kiisalu anniaateqarnermut,

narrujuummisitaanermut, ajoqusigaanermut akornusigaanermullu imaluunniit atorfigisamik atugarisanilluunniit aseruinermut.

Imm. 2. Naak imm. 1 malillugu taarsiissuteqarnissamut piumasaqaatit naammassineqanngikkaluartut taarsiissuteqartoqarsinnaavoq, kiffaanngissusiianeq, suliassap ingerlanerani atorneqarsimasoq, malersuinerup inerneranut naleqqiullugu naapertuutinngippat imaluunniit tamanna allat immikkut itut tunngavigalugit naleqquttuosorineqarpat.

Imm. 3. Taarsiissutissat annikillilerneqarsinnaapput imaluunniit itigartitsissutigineqarsinnaapput pasisaq nammineq tigusarinninnermut imaluunniit tigungmigallagassanngortitsinermut pissutissiisimappat.

§ 487. Pasisaq, pinerluttulerinermi inatsisitigut malersugaanerup ilaatut pinerlunnernik suliarinnitarneq malillugu allatigut akuliuffigineqarsimasoq, taarsiivigineqarsinnaavoq § 486-imi malittarisassat malillugit.

§ 488. Inummut, pasisaasimanngitsumut, pinerluttulerinermi inatsisitigut malersuinerup ilaatut akuliunneq aallarnerneqarsimappat taarsiissuteqartoqarsinnaavoq, tamanna naleqquttuosorineqarpat.

§ 489. Kinaluunniit inissiisarfimmiitsitaasimasoq imaluunniit pinerluttulerinermi inatsisitigut allatut pineqaatissineqarsimasoq taarsiivigineqartussaavoq § 486-imi malittarisassat malillugit, suliareqqitassanngortitsineq imaluunniit suliassamik nangitseqqiineq pineqaatissiisutaasup atorunnaarneranik kinguneqarpat. Sakkukillisaavigineqarnermi taarsiissuteqartoqassaaq, eqqartuussaanerup kingunerisaa naammassineqarsimasoq suliareqqitassanngortitsinerup imaluunniit suliassamik nangitseqqiinerup kingorna eqqartuussutaasussamiit sakkortuneruppat.

Imm. 2. Taarsiissutissat itigartitsissutaasinnaapput imaluunniit ikilineqarsinnaapput eqqartuunneqarsimasoq nammineq suliassap ingerlanneqarnerani pissusilersornermigut eqqartuussaanerminut pissutissiisimappat.

§ 490. Politimesteri §§ 486-489 naapertorlugit taarsiivigineqarnissamik piumasaqaatit pillugit aalajangiiffiginnittuussaaq. Inatsiseqarnermut ministeri aalajangersaasinnaavoq suliassat erseqqinnerusumik taagukkat rigsadvokatimut imaluunniit inatsiseqarnermut ministerimut aalajangiiffigisassatut saqqummiunneqassasut. Inummiit, pasisaasimasumiit, piumasaqaatit saqqummiunneqartassapput malersorneqarnerup atuukkunnaarneranik pasilligaasup nalunaarfigineqareerneraniit imaluunniit inaarutaasumik eqqartuussutip nalunaarutaaneraniit kingusinnerpaamik qaammatit marluk qaangiutsinnagit. Eqqartuussutip oqaatigineqarnerani pasisaq nammineq najuussimanngippat piffissarititaq naatsorsorneqassaaq eqqartuussutip taassumunnga nalunaarutigineqarneraniit aallartittumik, eqqartuussut nalunaarutigineqartussaasimappat. Allaniit piumasaqaatit saqqummiunneqartassapput akuliunnerup atorunnaarneraniit kingusinnerpaamik qaammatit marluk qaangiutsinnagit.

Imm. 2. Piffissarititaq imm. 1-imi taaneqartoq qaangiutereersoq piumasaqaammik saqqummiussisoqarpat piumasaqaat suliarineqartarsinnaavoq, qaangiineq utoqqatsissutissaqarsorineqarpat.

Imm. 3. Taarsiivigineqarnissamik piumasaqaatit pillugit politimesterip aalajangiinerinik maalaarutit rigsadvokatimit suliarineqartassapput. Rigsadvokatip maalaarummik aalajangiiffiginninnera inatsiseqarnermut ministerimut maalaarutigineqarsinnaanngilaq.

Imm. 4. Taarsiivigineqarnissamik piumasaqaatit pillugit rigsadvokatip suliarinneqqaartuulluni aalajangiinerinik maalaarutit inatsiseqarnermut ministerimit suliarineqartassapput.

Imm. 5. Taarsiivigineqarnissamik piumasaqaatit pillugit aalajangiinernik maalaaruteqarnissamut piffissarititaq sapaatit akunnerinik sisamanik sivisussuseqassaaq, maalaaruteqartup aalajangiinernik nalunaarfigineqarneraniit. Piffissarititaasup taassumap qaangiutereernerani maalaaruteqartoqarpat maalaarut suliarineqassaaq, piffissarititamik qaangiineq utoqqatsissutissaqartutut isigineqarpat.

Imm. 6. Imm. 3-5-imi aalajangersakkat taamatulli atortuutinneqassapput, suliassanik ingerlatsinermut inatsit aamma tamanut saqqummiussisussaataaneq pillugu inatsit malillugit allagaatinik paasisassarsiortarneq pillugu aalajangiinerni.

§ 491. Taarsiivigineqarnissamik piumasaqaat rigsadvokatip imaluunniit inatsiseqarnermut ministerip maalaarummik aalajangiiffiginninneratigut akuersarneqanngippat taarsiivigineqarnissamik qinnuteqaateqartoq itigartitaanerup nalunaarutigineqarneraniit kingusinnerpaamik qaammatit marluk qaangiutsinnagit kissaateqarsinnaavoq piumasaqaat eqqartuussivimmu, pinerlunnermik suliassamik aalajangiiffiginnittuusimasumut, saqqummiuneqassasoq. Suliassaq politimesterimit eqqartuussivimmu saqqummiunneqassaaq. Pinerlunnermik suliassaq eqqartuussivimmit aalajangiiffigineqarsimannngippat politimesterip taarsiivigineqarnissamik piumasaqaat sumiiffimmi pinerlunnerni suliassanik ingerlatsinikkut iliuuseqarnissamik aalajangiiffiusimasumi eqqartuussisunut imaluunniit taarsiivigineqarnissamik qinnuteqaateqartup eqqartuussisoqarfittut najugaani eqqartuussivimmu suliassannortissavaa.

Imm. 2. Taarsiivigineqarnissamik qinnuteqaateqartumiit noqqaassuteqarneq naapertorlugu pineqartoq illersuisulernerqartassaaq.

Imm. 3. Taarsiivigineqarnissamik suliassaq pinerlunnernik eqqartuussisarnertulli suliarineqassaaq. Taamaattorli eqqartuussisut taarsiivigineqarnissamik piumasaqaat, pasisaasimannngitsumiit saqqummiussaq, suliariumannngissinnaavaat piumasaqaat pinerlunnermik eqqartuussisarnertulli naleqquttumik suliarineqarsinnaanngippat. Pinerlineqartoq nammineq piumasaminik tamatuma kingorna piumasaqaateqarsinnaavoq saqitsaanermik suliassiissuteqartarneq pillugu malittarisassat malillugit.

Imm. 4. Suliassaq suliarineqassaaq eqqartuussisooqataasartut peqataatillugit, taamaattoqassannngilarli suliassap, inatsisinik unioqqutitsinermut tunngassutillip eqqartuussisooqataasartut peqataatillugit aalajangiiffigineqartussaannngitsup imaluunniit aalajangiiffigineqartussaasimannngikkaluartup, malitsigisaanik taarsiivigineqarnissamik piumasaqaat saqqummiunneqarpat.

§ 492. Taarsiivigineqarnissamik piumasaqaat kingornunneqartarpoq tamatuminnaga malittarisassat nalinginnaasut malillugit, taamaattorli imaasillugu aningaasaqarnerup tunngaatiguunngitsaq ajoqusigaanermut taartisisinneqarnissamik piumasaqaatit kingornunneqartassallutik, tamanna § 430-imi malittarisassanut naapertuuttumik saqqummiunneqarpat.

§ 493. Taarsiivigineqarnissamik piumasaqaatit, taarsiissuteqartarnermik malittarisassat nalinginnaasut tunngavigalugit pasisaasunit, eqqartuunneqarsimasunit allanilluunniit pinerluttulerinermi inatsisitigut malersuineq tunngavigalugu suliassiissutigineqartut, noqqaavigineqarnikkut suliarineqartassapput kapitalimi matumani malittarisassat malillugit.

Immikkoortoq VI

Ingerlateqqitassannngortitsisarneq aamma nangititsisarneq

Kapitali 43

Saqitsaanernik ingerlateqqitassannngortitsisarneq aamma nangititsisarneq

Suliareqqitassannngortitsineq

§ 494. Eqqartuussutit, najukkami eqqartuussivimmit imaluunniit Kalaallit Nunaanni Eqqartuussivimmit eqqartuussutigineqarsimasut illuatungiliuttumit, eqqartuussummi piumasaqaatiminik tamakkiisumik taperserneqarsimannngitsumit, Kalaallit Nunaata Eqqartuussisuunneqarfianut suliareqqitassannngortinneqarsinnaapput. Suliareqqitassannngortitsineq pisinnaavoq

allanguuteqartitsinissaq, atorunnaarsitsinissaq imaluunniit suliamik najukkami eqqartuussivimmu utertitsinissaq siunertaralugu.

Imm. 2. Suliareqqitassanngortitsinermi ilanngunneqarsinnaapput aalajangiinerit, suliassap suliareqarnerani aalajangiinerusut, inatsisikkut allatut aalajangiisoqarsimanngippat.

Imm. 3. Illuatungiliuttoq suliareqqitassanngortitsinermik taamaatitsinnaavoq, eqqartuussutip oqaatigineqareernerata kingorna.

§ 495. Kinaluunniit, najuutinngitsoortutut eqqartuunneqartoq, aatsaat eqqartuussummik suliareqqitassanngortitsinnaavoq suliassap suliareqarnerani kukkuluttornerit patsisissaatillugit.

Imm. 2. Eqqartuussutip, suliassap eqqartuussivimmu eqqortumut saqqummiunneqarsimannginnera imaluunniit piffissaq eqqorlugu eqqartuussivimmu imaluunniit eqqartuussivimmu ingerlatitseqqiviusartumut saqqummiunneqarsimannginnera pissutigalugu eqqartuussisut suliassamik itigartitsissuteqarfigisaat, aalajangeqqitassanngortitsinikkut aatsaat eqqartuussivimmu qulliunerusumut suliassiissutigineqarsinnaapput.

Imm. 3. Suliassamut aningaasartuutit pillugit aalajangiinerit eqqartuussivimmu qulliunerusumut aalajangeqqitassanngortitsinikkut aatsaat immikkut suliassanngortinneqarsinnaapput.

Suliareqqitassanngortitsinissamut piffissarititaq

§ 496. Suliareqqitassanngortitsinissamut piffissarititaq eqqartuussutip oqaatigineqarneraniit sapaatit akunnerinik sisamanik sivilissuseqarpoq, tak. § 237 aamma § 132.

Suliareqqitassanngortitsinermik il.il. aallarniineq

§ 497. Suliareqqitassanngortitsineq pissaaq suliareqqitassanngortitsissummik piffissaq suliareqqitassanngortitsivissaq qaangiutsinnagu tuniussinikkut, ilanngunneqassalluni nuutsinneqarnera ataaseq nunatta eqqartuussisuunneqarfiata pissaa.

Imm. 2. Suliareqqitassanngortitsissutip imarissavai:

- 1) eqqartuussutip, suliareqqitassanngortitap, taaneqarnera,
- 2) suliareqqitassanngortitsisup aamma suliareqqitassanngortinneqartup aqqi najugaallu, aamma najugaq nalunaarutiniq suliareqqitassanngortitsisumut suliareqqitassanngortinneqartumullu nassitsiviusinnaallunilu nalunaarutiginniffiusinnaasoq,
- 3) suliareqqitassanngortitsisup oqarasuaatigisinnaasaata telefaxerisinnaasaatalu normui,
- 4) suliareqqitassanngortitsisup piumasaqaataa,
- 5) suliareqqitassanngortitsisup piumasaqaammut tunngavigisaasa allaaserineqarnerat, aamma
- 6) allakkiat uppersaatissat allatigullu uppersaatissat, suliareqqitassanngortitsisup patsisiginiagaasa eqqartuussivimmilu siuliani patsisaatinneqarsimanngitsut, allaaserineqarnerat.

Imm. 3. Eqqartuussutip, suliareqqitassanngortinneqartup, assileneqarnera suliareqqitassanngortitsissummumut ilanngunneqassaaq. Aammattaaq ilanngunneqassapput allakkiatigut uppersaatissat imm. 2, nr. 6-imi taaneqartut, ataatsimik assilinerterlugit, taakku suliareqqitassanngortitsisup pigissappagit.

Imm. 4. Suliareqqitassanngortitsisov noqqaassuteqarnikkut suliareqqitassanngortitsissutip suliarinissaanut nunami maani eqqartuussivinni tamani pisariaqarneratut ikiorserneqarsinnaatitaavoq.

§ 498. Nunatta Eqqartuussisuunneqarfiata eqqartuussivik, eqqartuussuteqarsimasov, suliareqqitassanngortitsineq pillugu ilisimatissavaa suliallu pappiarartaanik nassiusseqqussavaa.

§ 499. Suliareqqitassanngortitsissutip nalunaarutigineqareernerata kingorna suliareqqitassanngortitsisup suliassaq unitsissinnaanngilaa, suliareqqitassanngortinneqartoq eqqartuussutip atuuttassanngortinneqarnissaanik piumasaqaammiit allaanerusumik piffissarititaq

eqqorlugu piumasaqaateqarsimappat, aamma suliareqqitassanngortinneqartup suliareqqitassanngortitsinerup sularineqarnissaa kissaatigippagu.

Suliareqqitassanngortitsineq kingusinaartoq

§ 500. Suliareqqitassanngortitsineq, piffissarititap qaangiutereerneratigut pisoq, nunatta eqqartuussisuuneqarfianit itigartitsissutigineqassaaq.

Imm. 2. Taamaakkaluartoq eqqartuussutit oqaatigineqarneraniit ukioq ataaseq tikillugu suliareqqitassanngortitsisoqarnissaa nunatta eqqartuussisuuneqarfiata qaqutigootumik akuerisarsinaavaa. Nunatta eqqartuussisuuneqarfia akuersippat suliareqqitassanngortitsissut tunniunneqartassaaq illuatungiusup akuersinermik ilisimatinneqareerneraniit sapaatit akunneri sisamat qaangiutsinnagit. § 524-mi aalajangersakkat taamatulli atortuutinneqassapput piffissarititap qaangiutereerneratigut suliareqqitassanngortitsinissamut akuerineqarnissamik qinnuteqaatinik sularinninnermi. Nunatta Eqqartuussisuuneqarfiata aalajangiinera Eqqartuussiviit Qullersaannut aatsaat suliassanngortinneqarsinnaavoq § 526-mi malittarisassat malillugit

Kinguartitsissutaasinnaasutut sunniuteqarneq

§ 501. Suliareqqitassanngortitsineq, suliareqqitassanngortitsinissamut piffissarititaasup qaangiutinnginnerani pisoq, kinguartitsigallarnermik sunniuteqartassaaq, inatsimmi allatut aalajangiisoqarsimangippat imaluunniit tamanna eqqartuussivimmit, aalajangiinera suliareqqitassanngortitaasumit imaluunniit nunatta eqqartuussisuuneqarfianit aalajangerneqarsimassappat.

Suliareqqitassanngortitsissut amigaatilik

§ 502. Suliareqqitassanngortitsissutit piumasaqaatit § 497, imm. 2-miittut naammassisimangippagit imaluunniit paasiuminaappat amigaateqarpalluunniit nunatta eqqartuussisuuneqarfia suliareqqatassanngortitsissumut saaffiginissaaq, taannalu amigaatinik iluarsiinissaminut sivikinnerusumik piffissaliivigineqarsinnaavoq.

Imm. 2. Amigaatit iluarsineqarsinnaangippata imaluunniit suliareqqitassanngortitsisoq piffissaliussap qaangiutinnginnerani taamaaliorumangippat suliassaq nunatta eqqartuussisuuneqarfiata itigartitsissutigissavaa.

Suliareqqitassanngortitsinermik piareersaaneq

§ 503. Suliareqqitassanngortitsissut suliareqqitassanngortitamut nalunaarutigineqassaaq, ilitersuutitalerlugu taanna piffissap aalajangersimasup iluani qanoq iliorsinnaasoq suliassami nammineq soqutigisani isumaginiarlugit. Eqqartuussisut tamanna ilutigalugu aalajangissavaat akissutitut allakkiaq eqqartuussinermi saqqummiunneqassanersoq imaluunniit eqqartuussivimmut tunniunneqassanersoq.

Imm. 2. Suliareqqitassanngortitaq piffissaliussaq qaangiutsinnagu ornigunnaniiluunniit akissuteqaateqangippat naatsorsuutigineqassaaq suliareqqitassanngortitaq eqqartuussutit atuuttussanngortinneqarnissaanik piumasaqaateqarsimasoq. Suliareqqitassanngortinneqartoq suliareqqitassanngortitsissutit nalunaarutigineqarneranut atatillugu tamatuminnaga ilisimatinneqassaaq. Eqqartuussiviup suliareqqitassanngortitsisoq kalerrissavaa akissutitut allakkiamik piffissaq eqqorlugu tunniussisoqangippat.

§ 504. Suliareqqitassanngortitamiit akissutitut allakkiaq imarissavai:

- 1) suliareqqitassanngortitap aqqa najugaalu – aamma najugaq nalunaarutiniq suliareqqitassanngortinneqartumut nassitsiviusinnaallunilu nalunaarutiginniffiusinnaasoq,
- 2) suliareqqitassanngortitap oqarasuaatigisinnaasaata telefaxerisinnaasaatalu normui
- 3) suliareqqitassanngortitap piumasaqaataa,
- 4) suliareqqitassanngortitsisup piumasaqaammut tunngavigisaasa allaaserineqarnerat, aamma
- 5) allakkiat uppersaatissat allatigullu uppersaatissat suliareqqitassanngortinneqartup patsisiginiagaasa, eqqartuussivimmilu siuliani patsisaatinneqarsimannngitsut, allaaserineqarnerat.

Imm. 2. Allakkiatigut uppersaatissat, imm. 1, nr. 5-imi taaneqartut, ataatsimik assilinerterlugit akissutitut allakkiamut ilanngunneqassapput, suliareqqitassanngortitamit pigineqarpata.

§ 505. Nunatta Eqqartuussisuuneqarfiata aalajangissavaa eqqartuussinerit arlallit ingerlanneqassanersut imaluunniit illuatungiliuttoq eqqartuussiviup piffissaliussaata iluani suliassami allakkianik sulii allanik tunniussaqaassanersoq, imaluunniit suliareqqitassanngortitsinermik piareersaaneq naamassineqassanersoq suliarlu eqqartuussutissanngorlugu ingerlaannaq piffissaliivigineqassanersoq.

Imm. 2. Nunatta Eqqartuussisuuneqarfiata aalajangersinnaavaa eqqartuussutissamik isumaqatigiinniuteqarneq piareersaataasumik ataatsimiinermut uiggiussatut ingerlanneqassasoq, tamanna illuatungeriit isumaqataaffigippassuk imaluunniit suliassaq naammattumik paasinarsarneqarsimasorineqarpat pissutsillu tamatumunnga akerliunngippata.

Piumasaqaatit, tunngavilersuutit uppersaatillu nutaat

§ 506. Piumasaqaatit tunngavilersuutillu, siullermeersumik eqqartuussineri atuutsinniarneqarsimannngitsut, illuatungiliuttoq akerliutillugu taamaallaat nunatta eqqartuussisuuneqarfiata akuersineratigut naatsorsuutigineqarsinnaapput. Taamatut akuersisoqarsinnaavoq

- 1) piumasaqaatit tunngavilersuutillu pineqartut siusinnerusukkut saqqummiunneqarsimannnginnerat utoqqatsissutissallittut isigineqarpat,
- 2) illuatungiliuttoq soqutigisaminik isumaginninnissaminut periarfissaqarluarpat, imaluunniit
- 3) tunngavissaqarpat isumaqassalluni akuersiumannnginneq illuatungiuliuttumut naleqqutinngitsunik annaasaqataasinnaasoq.

Imm. 2. Illuatungiliuttoq akerliliissuteqanngikkaluartoq nunatta eqqartuussisuuneqarfiata saqqummiukkumannngissinnaavai piumasaqaatit tunngavilersuutillu, siullermeersumik eqqartuussineri atuutsinniarneqarsimannngitsut, nunattalu eqqartuussisuuneqarfiata pissutsinut siullermeersumik eqqartuussineri atuussimannngitsunut isummertariaqalerneranik kinguneqartut.

Imm. 3. Suliareqqitassanngortitsinermik piareersaaneq naammassineqarpat eqqartuussutissallu isumaqatigiinniutigineqarnissaa qaqugu sumilu pissasoq aalajangerneqareerpat eqqartuussiviup akuersinissaq itigartitsissutigisinnaavaa, naak illuatungiliuttoq akerliliissuteqanngikkaluartoq, piumasaqaatit tunngavilersuutillu nutaat suliareqqitassanngortitsinermi siusinnerusukkut saqqummiunneqarsimasariaqaralarpata.

§ 507. Uppersaatissat saqqummiunneqarsinnaapput, siullermeersumik eqqartuussineri saqqummiunneqarsimannngikkaluarlutik.

Imm. 2. Illuatungeriit tamarmik immikkut piareersaaneq naammassineqartinnagu illuatungerisaminut eqqartuussivimmullu nalunaaruteqassapput allakkiat uppersaatissat uppersaatissallu allat suut saqqummiutsikkusunnerlugit. Uppersaatit, piffissap tamatuma kingornatigut nalunaarutigineqartut, aatsaat eqqartuussisut akuersinerisigut saqqummiunneqarsinnaapput.

Takkutinngitsoorneq

§ 508. Suliareqqitassanngortitsisoq suliareqqitassanngortitarlu eqqartuussinermut, tamarmik aggersarneqarfigisaminut, ornigutinnitsoorpata suliassaq nunatta eqqartuussisuuneqarfiata unitsissavaa. Aamma taamaassaaq illuatungeriit nunatta eqqartuussisuuneqarfiata aalajangiinera malillugu suliassami allakkiamik tunniussaqaanngitsoorpata.

§ 509. Suliareqqitassanngortitsisoq eqqartuussinermut, aggersarneqarfigisaminut, takkutinngitsoorpat imaluunniit suliareqqitassanngortitsisoq nunatta eqqartuussisuuneqarfiata aalajangiinera malillugu suliassami allakkiamik tunniussaqaanngitsoorpat suliareqqitassanngortitsineq nunatta eqqartuussisuuneqarfiata itigartitsissutigissavaa. Itigartitsinerli aatsaat pisinnaavoq suliareqqitassanngortitsisoq periarfissamik tamatumunnga paasitineqarsimappat.

Imm. 2. Suliareqqitassanngortinneqartoq eqqartuussutip atuuttussanngortinneqarnissaaniit allaanerusunik piumasaqaateqarpat suliassap sularineqarnera ingerlatiinnarneqassaaq suliareqqitassanngortinneqartulli noqqaassuteqarnera malillugu, aalajangigassanngortinneqassalluni allakkatigut paasissutissaatit pigineqartut kiisalu suliareqqitassanngortinneqartup uppersaasiissutai oqaatsitigullu ilanngussai aallaavigalugit. Suliareqqitassanngortinneqartoq suliassamik piareersaanerup nalaani takkutinngitsoorpat tamatumunnga taarsiullugu nunatta eqqartuussisuuneqarfiata, suliareqqitassanngortitamit noqqaavigineqarluni, akuerisinnaavaa suliassaq aalajangiivigineqassasoq allakkatigut paasissutissaatit pigineqartut aamma suliareqqitassanngortitamiit allakkatigut ilanngussat aallaavigalugit.

Imm. 3. Suliassami eqqartuussineqaqqissappat, suliareqqitassanngortitsisoq tamatumunnga aamma aggersarneqassaaq.

Imm. 4. Suliareqqitassanngortinneqartup piumasaqaatini annertusisimappagu imaluunniit tunngavilersuutini, siullermeersumik eqqartuussinermi patsisiginiarneqarsimanngitsunik, saqqummiussaqaarpat suliassap imm. 2 malillugu aalajangiiffigineqarnerani tamanna kisiat isiginiarneqarsinnaavoq, piumasaqaat allanngortinneqarsimappat imaluunniit tunngavilersuut eqqartuussinermi, suliareqqitassanngortitsisup orniguffigisaani, imaluunniit suliassami allakkiami, suliareqqitassanngortitsisumut nalunaarutigineqarsimasumi, saqqummiunneqarpat. Aammattaaq uppersaatinik, suliareqqitassanngortitsisumut eqqartuussineq taassuma orniguffiginngisaa sioqqullugu ilisimatitsissutigineqarsimasunik, taamaallaat saqqummiussisoqarsinnaavoq.

§ 510. Suliareqqitassanngortinneqartoq eqqartuussinermut takkutinngitsoorpat imaluunniit nunatta eqqartuussisuuneqarfiata aalajangiinera naapertorlugu suliassami allakkiamik tunniussaqaanngitsoorpat, suliassamik suliarneq ingerlatiinnarneqassaaq suliassarlu aalajangigassanngortinneqassaaq allakkatigut paasissutissiat pigineqartut kiisalu suliareqqitassanngortitsisup uppersaasiissutai oqaatsitigullu ilanngussai aallaavigalugit. Suliareqqitassanngortinneqartoq suliassap piareersarneqarnerani takkutinngitsoorpat nunatta eqqartuussisuuneqarfiata, suliareqqitassanngortitamit noqqaavigineqarluni, tamatumunnga taarsiullugu akuerisinnaavaa suliassaq aalajangiivigineqassasoq allakkatigut paasissutissaatit pigineqartut aamma suliareqqitassanngortitsisumiit allakkatigut ilanngussat aallaavigalugit.

Imm. 2. Suliassami eqqartuussineqaqqissappat, suliareqqitassanngortinneqartoq tamatumunnga aamma aggersarneqassaaq.

Imm. 3. Suliareqqitassanngortitsisup piumasaqaatini annertusisimappagu imaluunniit tunngavilersuutini, siullermeersumik eqqartuussinermi patsisiginiarneqarsimanngitsunik, saqqummiussaqaarpat suliassap imm. 1 malillugu aalajangiiffigineqarnerani tamanna kisiat isiginiarneqarsinnaavoq, piumasaqaat allanngortinneqarsimappat imaluunniit tunngavilersuut eqqartuussinermi, suliareqqitassanngortinneqartup orniguffigisaani, imaluunniit suliassami allakkiami, suliareqqitassanngortitsisumut nalunaarutigineqarsimasumi, saqqummiunneqarpat. Aammattaaq uppersaatinik, suliareqqitassanngortinneqartumut eqqartuussineq taassuma orniguffiginngisaa sioqqullugu ilisimatitsissutigineqarsimasunik, taamaallaat saqqummiussisoqarsinnaavoq.

§ 511. Illuatungiusoq eqqartuussinermut ornigutinngitsoorpat imaluunniit illuatungiusoq suliassami allakkiamik piffissaq eqqorlugu tunniussaqaanngitsoorpat, tamanna aatsaat itigartitsinermik imaluunniit najuutinngitsoornermi eqqartuussummik kinguneqarsinnaavoq, illuatungiusoq periarfissamik tamatuminna ilisimatinneqarsimappat.

§ 512. Nunatta Eqqartuussisuuneqarfiata aalajangersinnaavaa najuutinngitsoorneq imaluunniit suliassami allakkianik tunniussinngitsoorneq §§ 508-510 malillugit sunniuteqassanngitsoq, pingaartumik najuutinngitsoorneq imaluunniit iliuseqaanngitsoornissaq pissutissaqavilluni takkutinnngitsoornerusoq isumaqarfigineqatariaqarpat imaluunniit pissutsinik utoqqatsissutaasinnaasunik pissuteqarpat, imaluunniit illuatungiusoq suliassap kinguartinneqarnissaanik kissaateqarsimatillugu.

§ 513. Piffissaq eqqorlugu suliareqqitassanngortitsineq, unitsinneqarsimasoq imaluunniit itigartitsissutaasimasoq, nunatta eqqartuussisuuneqarfiata akuersineratigut suliarineqaleqqisinnaavoq, tamanna suliareqqitassanngortitsisup noqqaassutigippagu eqqartuussinermiit, suliassamik unitsitsiffiusumiit imaluunniit itigartitsiffiusumiit, kingusinnerpaamik sapaatip akunneri marluk qaangiutsinnagit.

Suliareqqitassanngortitsinernik sularinnittarneq pillugu malittarisassat allat

§ 514. Aamma saqitsaannernik suliassanik sularinninneq pillugu kapitalini 14-16-imi aamma 19-21-mi malittarisassat taamatulli nunatta eqqartuussisuuneqarfiani atortuutinneqassapput.

Imm. 2. Taamaattorli nunatta eqqartuussisuuneqarfiata aalajangersinnaavaa illuatungeriit nassiuutissagaat suliassami allakkiat taartigeeqatigiissutaasimasut assilineri aalajangersumik amerlassusillit aamma uppersaatissatut allakkiat, eqqartuussutissap isumaqatigiinniutigineqarnerani patsisiginiarneqartut, taakkuluunniit ilaasa assilineri, eqqartuussutissap isumaqatigiinniutigineqarnissaa kingusinnerpaamik ullunik 14-inik sioqqullugu. Assilineqartut piffissaliussaq eqqorlugu nassiuunneqanngippata najuutinngitsoorneq pillugu malittarisassat taamatulli atortuutinneqassapput.

Eqqartuussiviit Qullersaannut suliareqqitassanngortitsineq

§ 515. Eqqartuussutit, Kalaallit Nunaata Eqqartuussisuuneqarfianit eqqartuussutigineqarsimasut, suliareqqitassanngortinneqarsinnaanngillat. Taamaattorli Suliareqqitassanngortitsinissamik Aalajangiisartut, tak. danskit eqqartuussisarnermik inatsisaanni kapitali 1 a, Eqqartuussiviit Qullersaannut suliareqqitassanngortitsinissaq akuerisinnaavaat, suliassaq tunngaviusumik pingaaruteqartuuppat.

Imm. 2. *Imm. 1* malillugu suliareqqitassanngortitsinissamut akuerineqarnissamik qinnuteqaat eqqartuussutip nalunaarutigineqarneraniit kingusinnerpaamik sapaatit akunneri arfineq-pingasut qaangiutsinnagit nunap eqqartuussisuuneranut tunniunneqassaaq, taassumalu qinnuteqaat oqaaseqaateqarfigalugulu Suliareqqitassanngortitsinissamik Aalajangiisartunut ingerlatitseqqissavaa. Qinnuteqaat aamma Suliareqqitassanngortitsinissamik Aalajangiisartunut toqqaannartumik nassiuunneqarsinnaavoq, taakkualu taamaassappat nunap eqqartuussisuunera suliassaq pillugu oqaaseqaammik piniarfigissavaat. Aalajangiisartut qaqutigooortumik akuersissutigisinnaavaat qinnuteqaat piffissaliussamiit taaneqartumiit kingusinnerusukkut tunniunneqarpat, kisianni eqqartuussutip oqaatigineqarneraniit kingusinnerpaamik ukioq ataaseq qaangiutsinnagu.

§ 516. Suliareqqitassanngortitsinerup Eqqartuussiviit Qullersaanni sularineqarneranut tunngatillugu aamma danskit eqqartuussisarnermik inatsisaanni malittarisassat atortuutinneqassapput, pissutsit assigiinnginnerisa nassatarisaannik allannguutitalerlugit.

Aalajangeqqitassanngortitsineq

§ 517. Aalajangiinerit, eqqartuussivimmit imaluunniit Kalaallit Nunaanni Eqqartuussivimmit aalajangiinerusut, Kalaallit Nunaata Eqqartuussisuuneqarfianut aalajangeqqitassanngortinneqarsinnaapput, inatsisikkut allatut immikkut ittumik aalajangiisoqarsimanngippat.

Imm. 2. Aalajangeqqitassanngortitsineq kikkunnilluunniit, aalajangiinerup imarisaani pineqartunit, aallarneqarsinnaavoq.

Imm. 3. Matut matuneqarnissaat pillugu aalajangiinerit aamma aalajangeqqitassanngortinneqarsinnaapput inunnit

1) § 145-mi pineqartunit, aamma

2) eqqartuussinermi, eqqartuussisut apeqqummik suliarinniffigisaanni, najuussimasunit imaluunniit inummit nr. 1-imi taaneqartutut tusagassiutiniit taakkunarpianiit sinniisuuffigineqarsimasumit.

Imm. 4. § 191, imm. 2 malillugu ilaannakuusumik aalajangiinerit suliassami inaarutaasumik aalajangiinissamut atatillugu aatsaat nunatta eqqartuussisuuneqarfianut saqqummiunneqarsinnaapput, taamaattoqassanngilarli aalajangiineq naammassineqarsinnaappat imaluunniit nunatta eqqartuussisuuneqarfia ilaannakuusumik aalajangiinerup immikkut saqqummiunneqarnissaanik akuersippat. Taamatut akuerineqarnissamik qinnuteqaat nunatta eqqartuussisuuneqarfianut tunniunneqassaaq § 518 malillugu piffissaliussaq qaangiutsinnagu. Akuersisoqarpat suliassaq nunatta eqqartuussisuuneqarfianut § 519-imut naapertuuttumik saqqummiunneqassaaq, illuatungiliuttup akuerineqarneraniit sapaatit akunneri sisamat qaangiutsinnagit.

Imm. 5. Suliassami eqqartuussuteqartoqareernerata kingorna, suliassap suliarineqarnerani aalajangiinerit, illuatungiliuttumit aalajangeqqitassanngortinneqarsinnaanngillat.

Imm. 6. Nunatta Eqqartuussisuuneqarfiata aalajangeqqitassanngortitaq aallarneqareersoq unitsissinnaavaa, apeqqut aalajangiinermi pineqartoq suliassamik kingusinnerusukkut suliareqqitassanngortitsinermi ilanngunneqarsinnaappat.

Aalajangeqqitassanngortitsinissamut piffissarititaq

§ 518. Aalajangeqqitassanngortitsinissamut piffissarititaq ullormiit aalajangiiffiusumiit sapaatit akunnerinik marlunnik sivilissuseqassaaq.

Imm. 2. Aalajangiisoqareersimappat, aalajangeqqitassanngortitsisoq najuutsinnagu, pineqartorlu piffissamik aalajangiiffiusussamik siumut nalunaarfigineqarsimanani, aalajangeqqitassanngortitsinissamut piffissarititaq naatsorsorneqassaaq ulloq aalajangiinermik nalunaarutip pineqartumut annguffigisimasaatut isumaqarfigineqartoq aallarnefigalugu.

Aalajangeqqitassanngortitsinermik aallarniineq

§ 519. Aalajangeqqitassanngortitsisoqassaaq eqqartuussivimmut, suliassamik aalajangeqqitassanngortitamik aalajangiisimasumut, aalajangeqqitassanngortitsinissamut piffissarititaq qaangiutsinnagu oqaatsitigut noqqaassuteqarnikkut imaluunniit aalajangeqqitassanngortitsineq pillugu allakkiamik assilinerlammik tunniussaqaarnikkut.

Imm. 2. Aalajangeqqitassanngortitsinermik allakkiap imarissavai aalajangeqqitassanngortitsisup piumasqaataa, pisariaqassappallu oqaatigineqassapput aalajangeqqitassanngortitsisup piumasqaataanut tunngaviusut. Aalajangeqqitassanngortitsineq oqaatsitigut saqqummiunneqarpat paasissutissat tamakku eqqartuussisut suliaannik allassimaffimmut allanneqassapput.

Imm. 3. Aalajangiineq allanngortinneqarpat, tak. § 110 imaluunniit § 150, imm. 2, eqqartuussiviup aalajangeqqitassanngortitsissut nunatta eqqartuussisuuneqarfianut erninnaq nassiutissavaa.

Nassiunneqartunut ilanngunneqassapput:

1) eqqartuussisut suliaannik allassimaffiup assilineqarnera aalajangeqqitassanngortitsinermut oqaatsitigut saqqummiunneqarsimasumut imaluunniit aalajangeqqitassanngortitsinermik allakkiamut tunniunneqarsimasumut tunngasoq,

- 2) aalajangiinerup, aalajangeqqitassanngortinneqartup, allassimaffiata assilineqarnera, aamma
3) suliassap pappiarartai, aalajangeqqitassanngortitsinermut pingaaruteqarsinnaasut.

Imm. 4. Eqqartuussivik aalajangeqqitassanngortitsinermut nalunaarummik ilanngussaqaarsinnaavoq.

Imm. 5. Aalajangeqqitassanngortitsineq tunngavilersuutitik uppersaatinillu nutaanik taperserineqaarsinnaavoq.

Aalajangeqqitassanngortitsineq kingusinaartoq

§ 520. Aalajangeqqitassanngortitsineq, piffissarititap qaangiutereerneratigut pisoq, nunatta eqqartuussisuuneqarfianit itigartitsissutigineqassaaq.

Imm. 2. Nunattali Eqqartuussisuuneqarfia qaqutigoortumik akuersisinnaavoq aalajangeqqitassanngortitsisoqarsinnaasoq aalajangiinermiit qaammatit arfinillit angullugit iluini. Akuersisoqarpat aalajangeqqitassanngortitsineq aallarnerneqassaaq illuatungiliuttup akuersinermik tigusaqarneraniit kingusinnerpaamik sapaatip akunneri marluk qaangiutsinnagit Piffissaliussap qaangiutereernerani aalajangeqqitassanngortitsinissamut akuerineqarnissamik qinnuteqaatip suliarineqarnerani aalajangersakkat § 524-miittut taamatulli atortuutinneqartassapput.

Kinguartitsissutitut sunniuteqarneq

§ 521. Aalajangeqqitassanngortitsineq kinguartitsissutitut sunniuteqassanngilaq, inatsimmi allatut aalajangiisoqarsimanngippat imaluunniit tamanna aalajangerneqarpat eqqartuussivimmit, aalajangiinera aalajangeqqitassanngortitaasumit, imaluunniit nunatta eqqartuussisuuneqarfianit.

Aalajangeqqitassanngortitsissummik allatigut suliarinninneq

§ 522. Nunatta Eqqartuussisuuneqarfiata illuatungeriit nalunaarfigissavai aalajangeqqitassatut suliassaq tiguneqarsimasoq, aamma eqqartuussiviup § 519, imm. 4 malillugu nalunaarutaata imarisai pillugit.

§ 523. Illuatungeriit piginnaatitaapput allakkatigut oqaaseqaatiminnik nunatta eqqartuussisuuneqarfianut nassitsinissamut. Nunatta eqqartuussisuuneqarfia taamaasiornissamut piffissaliissaaq, taamaalilluni suliassami suli aalajangiisoqarsimanngippat aatsaat oqaaseqaatit, piffissaliussap taassuma kingornagut tiguneqartut, naatsorsuutigineqassallutik.

Imm. 2. Eqqartuussisut naliliippata illuatungiusoq suliassami allakkatigut oqaasertaliorsinnaanngitsoq, nunatta eqqartuussisuuneqarfia aalajangiisinnaavoq illuatungiusoq eqqartuussivimmut, naleqqunnerpaasorineqartumut, taarsiullugu aggersarneqassasoq oqaatsitigut oqaaseqaateqariartorluni.

Imm. 3. Nunatta Eqqartuussisuuneqarfia paasissutissanik amerlanernik imaluunniit nalunaarutitik illuatungeriinniit imaluunniit eqqartuussivimmiit, aalajangiisuusimasumiit, piniarsinnaavoq. Illuatungeriit arlaanniit noqqaavigineqarnikkut taamaaliortoqarnerani aamma aalajangerneqaarsinnaavoq aalajangeqqitassatut suliassami atugassatut uppersaataissanik saqqummiisoqassasoq.

§ 524. Nunatta Eqqartuussisuuneqarfia aalajangiisassaaq allakkatigut paasissutissat takkussimasut tunngavigalugit, matumunnga ilanngullugit illuatungeriit imaluunniit ilisimannittut suliassami aalajangeqqitassanngortitamit atugassatut nassuiaataannut il.il. pillugit eqqartuussisut suliannik allassimaffiusinnaasut. Nunatta Eqqartuussisuuneqarfiata aalajangiinera tunngavilersugaassaaq.

Imm. 2. Tamanna immikkut ittunik tunngavissaqaarsorineqartillugu nunatta eqqartuussisuuneqarfiata aalajangersinnaavaa suliassaq aalajangeqqitassanngortitaq oqaatsitigut suliarineqassasoq.

§ 525. Suliassap suliarineqarnerani aamma suliareqqitassanngortitsineq pillugu malittarisassat atortuutinneqassapput, pissutsit assigiinnginnerisa nassatarisaannik allannguutitalerlugit.

Eqqartuussiviit Qullersaannut aalajangeqqitassanngortitsineq

§ 526. Aalajangiinerit Kalaallit Nunaata Eqqartuussisuuneqarfiata aalajangiiffigisimasai aalajangeqqitassanngortinneqarsinnaanngillat. Taamaattorli Suliareqqitassanngortitsinissamik Aalajangiisartut, tak. danskit eqqartuussisarnermik inatsisaanni kapitali 1 a, akuersissuteqarsinnaapput Eqqartuussiviit Qullersaannut aalajangeqqitassanngortitsisoqassasoq, suliassaq apeqqutinut pingaarutilinnut tunngasuuppat.

Imm. 2. Imm. 1 malillugu aalajangeqqitassanngortitsinissamut akuerineqarnissamik qinnuteqaat Kalaallit Nunaanni eqqartuussisuunermut tunniunneqartassaaq aalajangiisoqarneraniit kingusinnerpaamik sapaatit akunneri sisamat qaangiutsinnagit, taamaattoq tak. § 518, imm. 2. Nunap eqqartuussisuunera qinnuteqaat pillugu oqaaseqaateqassaaq taannalu Suliareqqitassanngortitsinissamik Aalajangiisartunut ingerlateqqillugu. Qinnuteqaat aamma Suliareqqitassanngortitsinissamik Aalajangiisartunut toqqaannartumik nassiunneqarsinnaavoq, taamaassappat taanna suliassami oqaaseqaammik nunap eqqartuussisuuneranut piniassaaq. Aalajangiisartut qaqutigoortumik akuersissuteqartarsinnaapput qinnuteqaat piffissaliussatut taaneqartumiit kingusinnerusukkut tunniunneqarpat, kingusinnerpaamilli aalajangiisoqareerneraniit qaammatit arfinillit qaangiutsinnagit.

§ 527. Aalajangeqqitassanngortitap Eqqartuussiviit Qullersaanni sularineqarneranut tunngatillugu aamma atuutissapput malittarisassat danskit eqqartuussisarnermik inatsisaanniittut, pissutsit assigiinnginnerisa nassatarisaannik allannguutitalerlugit.

Kalaallit Nunaata Eqqartuussisuuneqarfianut immikkut ittumik suliareqqitassanngortitsisarneq

§ 528. Eqqartuussiviit Qullersaata qaqutigoortumik akuerisarsinnaavaa eqqartuussutit, najukkami eqqartuussivimmit imaluunniit Kalaallit Nunaanni Eqqartuussivimmit eqqartuussutigineqarsimasut, Kalaallit Nunaata Eqqartuussisuuneqarfianut suliareqqitassanngortinneqassasut § 500, imm. 2-mi ukiumik ataatsimik piffissarititatus taaneqartup qaangiutereerneratigut,

- 1) ilimanarluinnartutut isigineqarpat suliassaq qinnuteqaateqartup kukkussutiginngisaaq eqqunngitsumik paasissutissiissutigineqarsimasoq, aamma suliassaq suliareqqitassanngortitsinerup kingorna allaanerujussuarmik inerneqassasoq,
- 2) qularutigineqarsinnaanngitsutut isigineqarpat qinnuteqaateqartoq aatsaat tamaasiornikkut annertuunik annaasaqatsaaliorneqarsinnaassasoq, aamma
- 3) pissutsit suliareqqitassanngortitsinissamut tunngavissaqartitsilluinnarpata.

§ 529. Eqqartuussiviit Qullersaata piumasaqaatit § 528, imm. 1, nr. 1-3-mi taaneqartut tungavigalugit qaqutigoortumik akuerisarsinnaavaa eqqartuussiviup imaluunniit Kalaallit Nunaanni Eqqartuussiviup aalajangiinera, qaammatinik arfinilinnik piffissarititap § 520, imm. 2-mi eqqaaneqartup qaangiutereerneragut, Kalaallit Nunaata Eqqartuussisuuneqarfianut aalajangeqqitassanngortinneqassasoq.

Eqqartuussiviit Qullersaannut immikkut ittumik suliareqqitassanngortitsisarneq

§ 530. Kalaallit Nunaata Eqqartuussisuuneqarfiata eqqartuussutaata Eqqartuussiviit Qullersaannut suliareqqitassanngortinneqarnissaa Suliareqqitassanngortitsinissamik Aalajangiisartunit § 515 malillugu itigartitsissutigineqarsimappat imaluunniit § 515, imm. 2-mi oqaaseqatigiit aappaanni taamatut qinnuteqaammik tunniussinissamut ukiumik ataatsimik piffissarititaasoq qaangiutereersimappat, Eqqartuussiviit Qullersaata piumasaqaatit § 528, imm. 1, nr. 1-3-mi taaneqartut tungavigalugit qaqutigoortumik akuerisarsinnaavaa eqqartuussut Eqqartuussiviit Qullersaannut suliareqqitassanngortinneqassasoq.

§ 531. Kalaallit Nunaata Eqqartuussisuuneqarfiata aalajangiineranik Eqqartuussiviit Qullersaannut aalajangeqqitassanngortitsinissaq Suliareqqitassanngortitsinissamik Aalajangiisartunit § 526 malillugu itigartitsissutigineqarsimappat imaluunniit § 526, imm. 2-mi oqaaseqatigiit aappaat malillugit taamatut qinnuteqaammik tunniussinissamut qaammatinik arfinilinnik piffissarititaasoq qaangiutereersimappat, Eqqartuussiviit Qullersaat piomasaaqatit § 528, imm. 1, nr. 1-3-mi taaneqartut tunngavigalugit qaqutigoortumik akuersisarsinnaavoq aalajangiineq Eqqartuussiviit Qullersaannut aalajangeqqitassanngortinneqassasoq.

Eqqartuussiviit Qullersaannut immikkut ittumik nangititseqqiisarneq

§ 532. Eqqartuussiviit Qullersaat qaqutigoortumik akuersisinnaavoq suliassaq Eqqartuussiviit Qullersaannit aalajangiiffigineqarsimasoq nangeqqinneqassasoq, piomasaaqatit § 528, imm. 1, nr. 1-3-mi taaneqartut naammassineqarsimappata.

Immikkut ittumik ingerlatitseqqitassanngortitsisarneq nangeqqiisarnerlu pillugit aalajangersakkat allat

§ 533. Eqqartuussiviit Qullersaannit aalajangerneqartassaaq §§ 528-532 malillugit akuerineqarnissamik qinnuteqaat qanoq suliarineqartassasoq, aamma suliassamik suliarinneqqinnermi inatsisip malittarisassai nalinginnaasut sanioqqunneqassanersut.

Imm. 2. Akuersisoqaraangat Eqqartuussiviit Qullersaata imaluunniit eqqartuussiviup, suliassamik suliarinnittuusup, noqqaasoqarneratigut aalajangertassavaa eqqartuussutaasimasup imaluunniit aalajangiissutaasimasup sunniutai unitsikkallarneqassasut. Taamatut aalajangiineq qularnaveeqqusiinissamik piomasaaqatitalerneqarsinnaavoq.

Imm. 3. Immikkut ittumik ingerlatitseqqitassanngortitsisinnaatitaanermik nangeqqiisnaatitaanermillu taamaatitsineq pituttuisuunngilaq.

Kapitali 44

Pinerlunnernik suliassanik ingerlateqqitassanngortitsisarneq aamma nangititsisarneq

Suliareqqitassanngortitsineq

§ 534. Eqqartuussutit, eqqartuussivimmit imaluunniit Kalaallit Nunaanni Eqqartuussivimmit eqqartuussutigineqarsimasut, unnerluutigineqartumit imaluunniit unnerluussisussaataitaasunit Kalaallit Nunaata Eqqartuussisuuneqarfianut suliareqqitassanngortinneqarsinnaapput. Unnerluutigineqartoq imminut iluaquserniarluni suliareqqitassanngortitsisinnaavoq, unnerluussisussaataitaasulli unnerluutigineqartumut iluaqutaasussamik ajoqusiisussamillu suliareqqitassanngortitsisinnaapput.

Imm. 2. Suliareqqitassanngortitsineq suliassamik tamanna sioqqullugu suliarinnissimanermut aamma suliassap suliarineqarnerani aalajangiinernut tunngasuusinnaavoq.

Imm. 3. Unnerluussisussaataitaasut imaluunniit unnerluutigineqartup suliareqqitassanngortitsineq eqqartuussutip nalunaarutigineqarnerata kingorna tunuartissinnaavaa.

Imm. 4. Nunatta eqqartuussisuuneqarfia eqqartuussuteqartinnagu suliareqqitassanngortitsineq aallarneriigaq unitsinneqarsinnaavoq. Suliareqqitassanngortitsissut tunuartinneqarpat, eqqartuussutissaq Nunatta Eqqartuussisuuneqarfiani isumaqatigiinniutigineqalereersoq, taamaakkaluartoq nunatta eqqartuussisuuneqarfia § 548, imm. 2, nr. 1-3 malillugit misiliissaaq.

§ 535. Unnerluutigineqartoq 18-it inorlugit ukioqarpat unnerluutigineqartumut iluaqutissatut suliareqqitassanngortitsineq angajoqqaatut oqartussaassusilimmit aallarnerneqarsinnaavortaaq.

Imm. 2. Unnerluutigineqartoq toqukkut qimagussimappat, tamannali pitinnagu kiffaanngissusiaasumik pineqaatissinneqarsimalluni, unnerluutigineqartup aapparisa, aapparisaatut inooqatigisaa, kinguaariinni siulitigut kinguaatigulluunniit ilaqutaasoq imaluunniit qatanngutaasoq unnerluutigineqartoq sinnerlugu eqqartuussummik suliareqqitassanngortitsisinnaavoq. Aamma unnerluuissisussaataasut pisuni taama ittuni unnerluutigineqartumut iluaqusiisussamik suliareqqitassanngortitsisinnaapput.

Suliareqqitassanngortitsinissamut piffissarititaq

§ 536. Suliareqqitassanngortitsinissamut piffissarititaq ullormiit eqqartuussuteqarfiusumiit ullunik 14-inik sivilisussuseqassaaq. Taamaattorli eqqartuussutip nalunaarutigineqarnissaa peqqussutaasimappat unnerluutigineqartumut tunngatillugu piffissarititaasoq naatsorsorneqartassaaq nalunaarutiginninnermiit aallarnertumik.

Imm. 2. Eqqartuussut suliareqqitassanngortinneqarsimappat aamma illuatungiusoq suliareqqitassanngortitsisinnaavoq, tamanna pissappat illuatungerisap suliareqqitassanngortitsinermik nalunaarfigineqarneraniit ullut 14-it qaangiutsinnagit.

§ 537. Unnerluuissisussaataasut unnerluutigineqartumut iluaqutaasussamik suliareqqitassanngortitsisinnaapput, suliareqqitassanngortitsinissamut piffissarititaq qaangiutereeraluartoq. Suliareqqitassanngortitsineq taamaattoq akornuserneqassanngilaq, aamma unnerluutigineqartup suliareqqitassanngortitsinermik taamaatitsineragut.

Suliareqqitassanngortitsinermik aallarniineq il.il.

§ 538. Unnerluutigineqartup tungaaniit suliareqqitassanngortitsineq pisassaaq oqaatsitigut imaluunniit allakkatigut noqqaassuteqarnikkut, eqqartuussivimmuut aalajangiisuusimasumut imaluunniit politiinut kommuneqogedimulluunniit suliareqqitassanngortitsisinnaanermut piffissarititaasup qaangiutinnginnerani saqqummiunneqartussamik.

Imm. 2. Eqqartuussut nalunaarutigineqartussaappat, unnerluutigineqartoq nalunaarutiginnittuusumut oqaatsitigut noqqaassuteqarluni suliareqqitassanngortitsisinnaavoq. Taamatut pisoqassappat tamanna nalunaarutiginnissummumut oqaaseqaatitit allanneqassaaq. *Imm.* 3 taamatulli atortuutinneqassaaq.

Imm. 3. Unnerluutigineqartup suliareqqitassanngortitsissutaata tiguneqarnerani paasiniarneqassaaq unnerluutigineqartup nunatta eqqartuussisuuneqarfianut suna piumasaqaatigineeraa, ilanngullugu oqaatigineqassalluni piumasaqaat unnerluutigineqartup pisuuneranut uppersaatinik naliliinissamut tunngassuteqarnersoq.

Imm. 4. Unnerluutigineqartup suliareqqitassanngortitsissutaa unnerluuissisussaataasunut imaluunniit eqqartuussinermi, unnerluuissisussaataasut sinniisuutitaqarfisaaanni, saqqummiunneqarsimanngippat eqqartuussivik suliareqqitassanngortitsineq pillugu unnerluuissisussaataasunut sapinngisamik piaarnerpaamik ilisimatitsissuteqassaaq.

§ 539. Unnerluuissisussaataasut unnerluutigineqartup suliareqqitassanngortitsissutaa tigugunikku suliareqqitassanngortitsissummik sapinngisamik piaarnerpaamik sanassapput, unnerluutigineqartumut nalunaarutigineqartussamik.

Imm. 2. Suliareqqitassanngortitsissutip imarissavai:

- 1) eqqartuussutip suliareqqitassanngortinneqartup taaneqarnera,
- 2) unnerluutigineqartup suliareqqitassanngortitsissutaa nunattalu eqqartuussisuuneqarfianut piumasaqaata pillugit paasissutisat, ilanngullugu oqaatigineqarluni unnerluutigineqartup pisuuneranut uppersaatinik naliliiffigininnissaq piumasaqaammumt ilaanersoq,
- 3) ilisimatitsissutigineqassaaq unnerluuissisussaataasut eqqartuussummik suliareqqitassanngortitsinersut, aamma unnerluuissisussaataasut nunatta eqqartuussisuuneqarfianut

piumasaqaataat, ilanngullugu oqaatigineqarluni unnerluutigineqartup pisuuneranut uppersaatinik naliliiffiginninnissaq piumasaqaammut ilaanersoq, aamma

4) unnerluutigineqartumut nalunaarut, unnerluutigineqartoq imaluunniit taassuma illersuisua suliassap nunatta eqqartuussisuuneqarfiani qaqugu suliareqarnissaanik kingusinnerusukkut ilisimatinneqarumaarnissaat pillugu.

Imm. 3. Suliareqqitassanngortitsissut taassumaluunniit assilineqarnera oqaatsinut unnerluutigineqartup paasisinnaasaanut allanneqarsimassaaq.

Imm. 4. Unnerluussisussaataasut nunatta eqqartuussisuuneqarfianut eqqartuussivimmullu, aaljangiisuusimasumut, suliareqqitassanngortitsissutip assilineqarnerinik nassiussissapput.

§ 540. Unnerluussisussaataasuniit suliareqqitassanngortitsineq pisassaaq suliareqqitassanngortitsissuteqarnikkut, unnerluutigineqartumut suliareqqitassanngortitsinissamut piffissarititaasup qaangiutinginnerani nalunaarutigineqartussamik, taamaattoq tak. § 537. § 539, imm. 3 aamma 4 taamatulli atortuutinneqassapput.

Imm. 2. Suliareqqitassanngortitsissutip imarissavai:

- 1) eqqartuussutip suliareqqitassanngortinneqartup taaneqarnera,
- 2) unnerluussisussaataasut suliareqqitassanngortitsissutaa nunattalu eqqartuussisuuneqarfianut piumasaqaata pillugit paasissutisat, ilanngullugu oqaatigineqarluni unnerluutigineqartup pisuuneranut uppersaatinik naliliiffiginninnissaq piumasaqaammut ilaanersoq, aamma
- 3) unnerluutigineqartumut nalunaarut, unnerluutigineqartoq imaluunniit taassuma illersuisua suliassap nunatta eqqartuussisuuneqarfiani qaqugu suliareqarnissaanik kingusinnerusukkut ilisimatinneqarumaarnissaat pillugu.

Imm. 3. Suliareqqitassanngortitsissutip nalunaarutigineqarnerani unnerluutigineqartumi sapinngisamik paasiniarneqartassaaq taassuma eqqartuussut suliareqqitassanngortinneraa, aamma piumasaqaat suna nunatta eqqartuussisuuneqarfianut piumasaqaatiginneraa, ilanngullugu oqaatigineqarluni unnerluutigineqartup pisuuneranut uppersaatinik naliliiffiginninnissaq piumasaqaammut ilaanersoq. Tamakku pillugit paasissutissiisoqarpat nalunaarutiginnittup tamakku suliareqqitassanngortitsissummut ingerlaanaq allasavai. Aamma nalunaarutiginninnerni ilitersuisoqassaaq § 596, imm. 2 malillugu suliareqqitassanngortitsinissamut periarfissaq tamatumunngalu piffissarititaasooq pillugit.

§ 541. Unnerluutigineqartup eqqartuussut, unnerluussisussaataasuniit suliareqqitassanngortinneqareersimasoq, suliareqqitassanngortippagu tamannalu pippat suliareqqitassanngortitsinerup nalunaarutigineqareernerata kingorna, tak. § 540, unnerluussisussaataasut suliareqqitassanngortitsissummut ilassuteqaammik sapinngisamik piaarnerpaamik sanassapput, unnerluutigineqartumut nassiunneqartussamik. Ilassuteqaat imaqaassaaq unnerluutigineqartup nunatta eqqartuussisuuneqarfianut suliareqqitassanngortitsinera piumasaqaataalu pillugit paasissutissanik, ilanngullugu oqaatigineqarluni piumasaqaammut ilaanersoq unnerluutigineqartup pisuuneranut uppersaatinik naliliiffiginninnissaq. § 539, imm. 3 aamma 4 taamatulli atortuutinneqassapput.

Suliareqqitassanngortitsineq kingusinaartooq

§ 542. Suliareqqitassanngortitsineq, suliareqqitassanngortitsinissamut piffissarititaasup qaangiutereerneratigut pisoq, nunatta eqqartuussisuuneqarfianit itigartitsissutigineqassaaq, taamaattoq tak. § 537.

Imm. 2. Taamaattorli suliareqqitassanngortitsinissaq nunatta eqqartuussisuuneqarfianit akuerineqarsinnaavoq,

- 1) suliareqqitassanngortitsisup ilimanarnerulersippagu pineqartoq pissutsinik suliareqqitassanngortitsinermut tapersiutaasunik aatsaat kingusinnerusukkut ilisimatinneqarsimasoq, imaluunniit

2) piffissarititamik qaangiineq pissutsinik pineqartup pisuussutiginnisaanik pissuteqarsimatillugu.

Imm. 3. Imm. 2-mi taaneqartutut pisoqartillugu suliareqqitassanngortitsineq aallarnerneqartassaaq, suliareqqitassanngortitsisup suliareqqitassanngortitsinermut pissutaasumik ilisimannilerneraniit, imaluunniit pissutsit piffissarititamik qaangiisitsisimasut atuukkunnaarneranniit, ullut 14-it qaangiutsinnagit. Suliareqqitassanngortitsinerup aallarnernerani piffissamik qaangiinermut pissutaasoq paasisutissiissutigineqassaaq.

Suliareqqitassanngortitsinermik itigartitsinerit allat

§ 543. Unnerluutigineqartup suliareqqitassanngortitsinera nunatta eqqartuussisuuneqarfiata itigartitsissutigisinnaavaa suliareqqitassanngortitsissut pissutsit unnerluutigineqartup atugaasa nassatarisaannik nalinginnaasumik taassumunnga nalunaarutigineqarsinnaasimangippat.

Imm. 2. Nunatta Eqqartuussisuuneqarfia unnerluutigineqartumit noqqaavigineqarnikkut aalajangersinnaavoq suliareqqitassanngortitsinermik, imm. 1 malillugu itigartitsissutaasimasumik, sularinninneq nanginneqassasoq, unnerluutigineqartup uppersarsarpagu nalinginnaasumik nalunaarutiginnissinnaannginneq pissutsinik, unnerluutigineqartumut tutsinniarneqarsinnaanngitsunik, pissuteqartoq. Unnerluutigineqartup tamatuminnga noqqaassutaa saqqummiunneqassaaq suliareqqitassanngortitsinerup itigartitsissutaanissaanik nunatta eqqartuussisuuneqarfiata aalajangiineraniit kingusinnerpaamik ullut 14-it qaangiutsinnagit. Taamaattorli § 542, imm. 2 taamatulli atortuutinneqassaaq suliareqqitassanngortitsinissamik noqqaassutitut, piffissap tamatuma kingornatigut tiguneqartussanut. Suliareqqitassanngortitsineq itigartinneqarpat tamatuminnga apeqqut Immikkut Ittumik Eqqartuussivimmut Maalaaruteqarfigineqarsinnaasumut saqqummiunneqarsinnaavoq aalajangeqqitassanngortitsisarneq pillugu malittarisassat malillugit. Immikkut Ittumik Eqqartuussiviup Maalaaruteqarfigineqarsinnaasup aalajangiinera inaarutaasumik aalajangiineruvoq suliareqqitassanngortinneqarsinnaanilu.

§ 544. Nunatta Eqqartuussisuuneqarfiata noqqaavigineqarnermigut imaluunniit nammineerluni sulissuteqarnermigut suliassaq, suliareqqitassanngortitsineqarsimasoq, tamakkiisumik ilaannakuusumilluunniit itigartitsissutigisinnaavaa tunngavilersuutigalugu,

1) piffissarititat imaluunniit periaatsit, suliareqqitassanngortitsinissamut aalajangersarneqarsimasut, eqqortinneqarsimangitsut, imaluunniit

2) suliareqqitassanngortitsisoq suliareqqitassanngortitsinissaminut piginnaatitaanngitsoq.

Imm. 2. Eqqartuussut pinngitsuutitsisusooq unnerluussisussaataasunit suliareqqitassanngortinneqarpat nunatta eqqartuussisuuneqarfiata noqqaavigineqarnermigut imaluunniit nammineerluni sulissuteqarnermigut suliassaq suliareqqitassanngortinneqarsimasoq tamakkiisumik ilaannakortumilluunniit itigartitsissutigisinnaavaa tunngavilersuutigalugu,

1) suliassaq pisortatigoortumik unnerluussutaasussaanngitsoq,

2) pisimasoq, unnerluutiginnissutaasoq, pinerlunnerunngitsoq, imaluunniit

3) pinerluttulerinermi inatsisitigut akisussaatisinissaq pisoqalisoorikkut atorunnaarsimasoq.

Imm. 3. Imm. 1 aamma 2 malillugit itigartitsineq pissaaq suliareqqitassanngortitsisoq oqaatsitigut allakkatigulluunniit oqaaseqarsinnaatitaareerpat. Aalajangiineq tunngavilersukkamik aalajangiinerussaaq.

Kinguartitsissutaasinnaasutut sunniutissat

§ 545. Suliareqqitassanngortitsisoqarpat, suliareqqitassanngortitsinissamut piffissarititaasoq qaangiutsinnagu, eqqartuussut eqqartuussamut suliareqqitassanngortitsinermi pineqartumut naammassinninnianeqarsinnaanngilaq.

Imm. 2. Suliareqqitassanngortitsisoqarpat suliareqqitassanngortitsinissamut piffissarititaasup qaangiutereerneratigut, tak. § 503, nunatta eqqartuussisuuneqarfiata noqqaavigineqarnermigut

aalajangersinnaavaa naammassinninniaaneq kinguartikkallarnejassasoq imaluunniit unitsineqassasoq. Taamaattoqartassarli suliareqqitassanngortitsineq § 542 malillugu akuerineqarpat.

Pinngitsaaliinikkut akuliunnernik ingerlatsiinnarnissaq

§ 546. Eqqartuussivik siullermeeriffiusumik eqqartuussinermi eqqartuussuteqarnermut peqatigitillugu aalajangiisimappat unnerluutigineqartoq tigummigallagaaginnassasoq imaluunniit § 361 malillugu periarfissiissutinik allanik malitassineqassasoq, nunatta eqqartuussisuuneqarfiata suliaassiissummik tigusaqaruni piaarnerpaamik isummerfigissavaa periarfissiissutissiisimaneq suliaassiissutip suliarineqarnerani ingerlatiinnarneqassanersoq, tak. § 368, imm. 3. Tamatuma ingerlatiinnarnissaanik aalajangiineq sukkulluunniit allannngortinneqarsinnaavoq.

Nunatta eqqartuussisuuneqarfiata misiliinissaata annertussusissaa il.il.

§ 547. Unnerluutigineqartup pisuuneranut uppersaaitit naliliiffigineqarnissaat suliareqqitassanngortitsinermit ilaasutut isumaqarfineqartarpoq, suliareqqitassanngortitsissummit allanik saqqummersoqanngippat.

§ 548. Unnerluutigineqartup pisuuneranut uppersaaitit naliliiffigineqarnissaat suliareqqitassanngortitsinermit ilaappat nunatta eqqartuussisuuneqarfiani nutaarluinnarmik suliarinnittoqassaaq.

Imm. 2. Pissutsinik imm. 1-imi taaneqartut avataanniittunik pisoqartillugu misiliinissaq illuatungeriit piunasaqaataannut killilerneqartassaaq. Taamaakkaluartoq nunatta eqqartuussisuuneqarfiata nammineeqluni misissortassavaa,

- 1) inatsit unnerluutigineqartumut ajoqusiisumik eqqunngitsumik atorneqarsimanersoq,
- 2) pineqaatissiisutaasimasooq naleqqutinngitsumik sakkortussuseqarnersoq,
- 3) suliaassap suliarineqarneranut malittarisassaaq pingaarutilik, unnerluutigineqartup illersorneqarnissaanik siunertaqartoq, sumiginnarneqarsimanersoq ima sunniutilimmik, eqqartuussutaasimasup eqqortuunera qularutigineqartutut isigineqartariaqalerluni,
- 4) unnerluutigineqartup pisuuneranut uppersaaitinik naliliiffiginninnermi qularutissaanngitsumik kukkuluttortoqarsimanersoq ima sunniutilimmik, eqqartuussutaasimasup eqqortuunera qularutigineqartutut isigineqartariaqalerluni.

§ 549. Eqqartuussut, unnerluutigineqartunut arlalinnut tunngasoq imaluunniit unioqquitsinerit arlalinnut unnerluutigineqartumit ataatsimit piliarineqarsimasunut tunngasoq, unnerluutigineqartumut ataasiinnarmut arlalialunnlluunniit imaluunniit inatsisinik unioqquitsinerit ilaannaannut tunngatillugu suliareqqitassanngortinneqarpat, nunatta eqqartuussisuuneqarfiata pisimasut suliareqqitassanngortitsinermit pineqartut unnerluutigineqartumut pineqartumut iluaqusiiniutitut isiginiarsinnaavai, aamma suliaassap ilaata suliareqqitassanngortinneqanngitsup suliarineqarnerani.

§ 550. Unnerluutigineqartoq kisimi suliareqqitassanngortitsisimappat pineqaatissiisoqarsinnaanngilaq siullermeeriffiusumik eqqartuussinermi pineqaatissiisutaasimasumiit sakkortunerusumik.

Pasisap illersorneqarnera

§ 551. Pasisaq taassumalu illersorneqarnissaa pillugit kapitali 32-mi malittarisassat atortuutinneqassapput.

Pinerlineqartup inatsisitigut inissisimanera

§ 552. Pinerlineqartup inatsisitigut inissisimaneranut tunngatillugu kapitali 33-mi malittarisassat atortuutinneqassapput.

Suliassamik suliareqqitassanngortinneqarsimasumik piareersaaneq

§ 553. Suliareqqitassanngortitsinermik nalunaarut unnerluutigineqartumut nalunaarutigineqareerpat unnerluussisussaataasut suliareqqitassanngortitsinermik nalunaarut nunatta eqqartuussisuuneqarfianut tunniutissavaat, matumunnga ilanngullugit suliassami allakkiat tamakkualuunniit assilineqarneri kiisalu ilisimannittut, suliassap sularineqarnerani sassartinneqartussat, allattorsimaffiat uppernarsaatitullu atugassat aamma patsisiginiarneqartussat.

Imm. 2. Uppernarsaatit allattorsimaffiat taassumaluunniit assilineqarnera oqaatsinut unnerluutigineqartup paasisinnaasaanut allanneqarsimassaaq.

§ 554. Unnerluutigineqartoq illersuisumik sinniiseqarpat politiit suliareqqitassanngortitsinermik nalunaarut, uppernarsaatissat allattorsimaffiat suliassamilu allagaatit assilineqarneri illersuisumut nassiuutigalugit nunatta eqqartuussisuuneqarfianut nassiuutissavaat. Illersuisoq nunatta eqqartuussisuuneqarfianit suliareqqitassanngortitsinermik nalunaarutip il.il. tiguneqarnerani aatsaat ivertinneqarpat, nunatta eqqartuussisuuneqarfiata allakkiat pineqartut illersuisumut nassiuutissavai.

Illuatungeriit najuunnissaat

§ 555. Unnerluutigineqartoq eqqartuussinermi peqataasinnaatitaavoq.

§ 556. Pisuni, unnerluutigineqartup kisimi suliareqqitassanngortitsivigisaani, aamma suliareqqitassanngortitsineq unnerluutigineqartup pisuuneranut uppernarsaatiniq naliliiffiginninnissamut tunngasuutillugu, nunatta eqqartuussisuuneqarfiata suliareqqitassanngortitsineq itigartitsissutigisinnaavaa, unnerluutigineqartoq aggeqqusissummik nalunaarfigineqaraluarluni pissutissaqavilluni ornigutinngitsoornissamik nalunaarani takkutinngitsoorpat sularlu unnerluutigineqartoq najuutsinnagu iluaqutaasumik sularineqarsinnaasorineqanngippat.

Imm. 2. Nunatta Eqqartuussisuuneqarfiata suliareqqitassanngortitsineq imm. 1-imi taaneqartutut itigartitsissutigisinnaavaattaaq, unnerluutigineqartumik aggeqqusineq unnerluutigineqartup atugarisaasa nassatarisaannik pisarnertut taassumunnga nalunaarutigineqarsinnaasimanngippat.

Imm. 3. Nunatta Eqqartuussisuuneqarfia unnerluutigineqartumit noqqaavigineqarnikkut aalajangersinnaavoq suliareqqitassanngortitsinerup, imm. 1 malillugu itigartitsissutaasup, sularineqarnera nanginneqassasoq, unnerluutigineqartup uppernarsarpagu takkutinngitsoorneq pissutissaqavissumik pisimasoq, unnerluutigineqartup sioqqutsilluni nunatta eqqartuussisuuneqarfianut kalerriutigisinnaasimannngissaanik imaluunniit aggeqqusissut unnerluutigineqartumut piffissaalluartillugu ilisimatitsissutaasimannngimmat. § 543, imm. 2-mi oqaaseqatigiit aappaanniit sisamaannut taamatulli atortuutinneqassapput.

Imm. 4. Nunatta Eqqartuussisuuneqarfia unnerluutigineqartumit noqqaavigineqarnikkut aalajangersinnaavoq suliareqqitassanngortitsinermik, imm. 2 malillugu itigartitsissutaasimasumik, sularinninneq nanginneqassasoq, unnerluutigineqartup uppernarsarpagu pissutsit, unnerluutigineqartup pisuussutiginnngisai, pissutaallutik pisarnertut nalunaarutiginnittoqarsinnaasimannngitsoq. § 543, imm. 2-mi oqaaseqatigiit aappaanniit sisamaannut taamatulli atortuutinneqassapput.

§ 557. Unnerluutigineqartup pisuuneranut uppernarsaatit naliliiffigineqarnissaat suliareqqitassanngortitsinermut ilaangippat, unnerluutigineqartoq najuutinngikkaluartoq suliassaq sularineqarsinnaavoq

Uppernarsaatissanik saqqummiussineq

§ 558. Nunatta Eqqartuussisuuneqarfiani killisiuinernut allatigullu uppernarsaatinik saqqummiussinernut §§ 456-469 taamatullu atortuutinneqassapput.

Imm. 2. Tamatuma saniatigut ilisimannittut aamma misissuisartut naliliisartullu suliassap siullermeersumik suliareqarnerani nassuiaataannik eqqartuussisut suliaannik allassimaffimmi issuakkat uppernarsaatitut atorneqarsinnaapput, illuatungeriit arlaannaalluunniit killisiueqqittoqarnissaanik eqqartuussutissaq isumaqatigiinniutigineqalersinnagu noqqaassuteqarsimangippat.

Eqqartuussummik atorunnaarsitsineq

§ 559. Suliassamik sularinninnermi malittarisassanik sumiginnaaneq imaluunniit kukkusumik atuineq eqqartuussutip suliareqqitassannortinneqartup atorunnaarsinneqarneranik kinguneqartussaangilaq, isumaqartoqartariaqangippat malittarisassamik pineqartumik malinninneq suliassap allatut inerineqarneranik kinguneqarsinnaasimagaluartoq.

Imm. 2. Suliassamik sularinninnermi malittarisassanik, unnerluutigineqartoq piinnarlugu aalajangersagaasunik, sumiginnaaneq imaluunniit kukkusumik atuineq eqqartuussutip suliareqqitassannortitap unnerluutigineqartumut ajoqusiisussamik allanguuteqarnissaanik kinguneqarsinnaangilaq.

§ 560. Nunatta Eqqartuussisuuneqarfia isumaqarpat aalajangiineq suliareqqitassannortinneqarsimasoq allannortinneqassasoq, nunattali eqqartuussisuuneqarfiata piviusut tunngavigalugit eqqartuussinissaanut piumasaqaatit atuunnatik, nunatta eqqartuussisuuneqarfiata eqqartuussut atorunnaarsissavaa. Atorunnaarsitsinermut tunngavigisaq suliamik sularinninnermik, eqqartuussummi tunngavigineqartumik, tamakkiisumik ilaannakuusumilluunniit eqquippat nunatta eqqartuussisuuneqarfiata sularinnissimaneq taanna tamakkiisumik ilaannakuusumilluunniit atorunnaarsissavaattaq. Nunatta Eqqartuussisuuneqarfiata suliassaq eqqartuussivimmuut siullermeeriffiusumik sularinniffiusumut suliareqartussannorlugu utertissavaa. Pisariaqassappat nunatta eqqartuussisuuneqarfiata eqqartuussutaanit ersersinneqassaaq suliamik sularinneqqinneq immikkoortumit sorlermit aallarnerneqassanersoq.

Imm. 2. Nunatta Eqqartuussisuuneqarfia suliassamik utertitsisimappat unnerluussisussaataasut, unnerluussutertik tunuartissimangikkunikkku, piaarnerpaamik siullermeeriffiusumik eqqartuussinermi eqqartuussisunut saqqummiuteqqissavaat. Eqqartuussiviup siullermeeriffiusumik eqqartuussisimasup pisariaqarsorigunikkku aalajangersinnaavaat sularinninneq immikkoortumiit nunatta eqqartuussisuuneqarfiata eqqartuussutaani taaneqartumiit siusinnerusumiit nanginneqassasoq. Nutaamik eqqartuussuteqartoqalersinnagu illuatungeriit oqaaseqaateqarnissamut periarfissinneqassapput. Unnerluutigineqartoq kisimi suliareqqitassannortitsisimappat siusinnerusukku eqqartuussutaasumiit sakkortunerusumik pineqaatissiisoqarsinnaangilaq, § 580 malillugu nangititsinissamut piumasaqaatit naammassineqarsimassangipata.

Suliassamik suliareqqitassannortinneqarsimasumik sularinnittarneq pillugu aalajangersakkat allat

§ 561. Aamma pinerlunnernik suliassanik sularinnittarneq pillugu immikkoortoq V taamatulli nunatta eqqartuussisuuneqarfiani atortuutinneqassaaq allannguutitalerlugu, kapitalimi matumani aalajangersarneqartunik, imaluunniit pissutsit assigiinnginnerisa nassatarisaannik.

Ingerlatitseqqitassannortitsisarneq pillugu ilitsersuineq

§ 562. Illersuisoq, suliassap suliareqqitassannortinneqarsimasup ingerlanneqarnerani unnerluutigineqartumut ikiuussimasoq, pisussaavoq unnerluutigineqartoq ilitsersussallugu

eqqartuussivimmut qulliunerusumut suliareqqitassanngortitsinissamut akuerineqarnissamik qinnuteqartariaqarnersoq, tak. § 564, aammalu unnerluutigineqartoq tamatuminnga ikiussallugu.

Suliassamut aningaasartuutit

§ 563. Suliassap sularineqarnerani aningaasartuutit akilerneqartarnerannut tunngatillugu § 480 taamatulli nunatta eqqartuussisuuneqarfiani atortuutinneqassaaq.

Imm. 2. Nunatta eqqartuussisuuneqarfiata misiliineranut ilaassapput aningaasartuutit pillugit aalajangiinerit, siullermeeriffiusumik sularinninnermi aalajangiiffigineqarsimasut, aalajangiineq suliareqqitassanngortitsineq pillugu suliassap inernissaanut qanoq apeqqutaatiginera naapertorlugu imaluunniit suliareqqitassanngortitsinermi immikkut ilanngunneqarsimappat.

Eqqartuussiviit Qullersaannut suliareqqitassanngortitsineq

§ 564. Eqqartuussutit, Kalaallit Nunaata Eqqartuussisuuneqarfianit eqqartuussutaasimasut, suliareqqitassanngortinneqarsinnaanngillat. Taamaattorli Suliareqqitassanngortitsinissamik Aalajangiisartut, tak. danskit eqqartuussisarnermik inatsisaanni kapitali 1 a, Eqqartuussiviit Qullersaannut suliareqqitassanngortitsisoqarnissaanik akuersisinnaapput, suliassaq apeqqutinut tunngavissiiusumik pingaarutilinnut tunngassuteqarpat imaluunniit tamanna pissutsinit immikkut ittunit taperserneqarpat.

Imm. 2. Suliareqqitassanngortitsinissamut akuerineqarnissamik qinnuteqaat eqqartuussutip nalunaarutigineqarneraniit sapaatit akunneri sisamat qaangiutsinnagit Kalaallit Nunaanni eqqartuussisuunermut tunniunneqartassaaq, taassuma qinnuteqaat oqaaseqaateqarfiggisavaa Suliareqqitassanngortitsinissamillu Aalajangiisartunut ingerlateqqillugu. Eqqartuussut nalunaarutigineqassappat eqqartuunneqartumut tunngatillugu piffissarititaasoq eqqartuussutip nalunaarutigineqarneraniit naatsorsorneqartassaaq. Qinnuteqaat aamma Suliareqqitassanngortitsinissamik Aalajangiisartunut toqqaannartumik nassiunneqarsinnaavoq, taamaassappat taakkua suliassaq pillugu eqqartuussisuunermut oqaaseqaammik piniassapput. Aalajangiisartut qaqutigoortumik akuersisinnaapput qinnuteqaat piffissaliussatut taaneqartumiit kingusinnerusukkut, kingusinnerpaamilli eqqartuussutip nalunaarutigineqarneraniit ukioq ataaseq qaangiutsinnagu, nassiunneqassasoq.

Imm. 3. Politikkikkut peqatigiiffinnik atorunnaarsitsineq pillugu suliassat tamatigut Eqqartuussiviit Qullersaannut suliassanngortinneqarsinnaapput.

§ 565. Suliassap suliareqqitassanngortitap Eqqartuussiviit Qullersaanni sularineqarneranut tunngatillugu atuutissapputtaaq danskit eqqartuussisarnermik inatsisaanni malittarisassat, pissutsit assigiinnginnerisa nassatarisaannik allannguutitalerlugit.

Aalajangeqqitassanngortitsineq

§ 566. Aalajangiinerit, najukkami eqqartuussivimmit imaluunniit Kalaallit Nunaanni Eqqartuussivimmit aalajangiinerusut, Kalaallit Nunaata Eqqartuussisuuneqarfianut aalajangeqqitassanngortinneqarsinnaapput, inatsisikkut allamik immikkut aalajangiisoqarsimangippat.

Imm. 2. Aalajangeqqitassanngortitsineq aallarnerneqarsinnaavoq kikkunnit tamanit, aalajangiinerup imarisaani pineqartunit. Tamatuma saniatigut inuit, § 145-mi pineqartut, matut matuneqarnissaannik aalajangiinernik, issuaaqusaannginnernik aternillu taaseqqusinnginnernik aalajangiinerit pillugit aalajangeqqitassanngortitsisinnaapput. Taamaattorli matut matuneqarnissaannik aalajangiinerit aatsaat aalajangeqqitassanngortinneqarsinnaapput aalajangeqqitassanngortitsisoq eqqartuussinermi, eqqartuussisut apeqqummik sularinniffigisaanni, najuussimappat imaluunniit oqaaseqatigiit aappaanni taaneqartutut inummik allamik tusagassiutiniit taakkorpianiit sinniseqarsimappat.

Imm. 3. Aalajangiinerit, eqqartuussutip isumaqatigiinniutigineqarnerani imaluunniit taassuminnga piareersaannermi aalajangiinerusut, aalajangeqqitassanngortinneqarsinnaanngillat, taamaattoqarsinnaallunili

- 1) aalajangeqqitassanngortitsineq inatsimmi immikkut ittumik tunngavissaqarpat,
- 2) aalajangiineq suliassamik kinguartitsigallarnermut, itigartitsinermut imaluunniit atorunnaarsitsinermut tunngassuteqarpat,
- 3) aalajangiineq tigummigallagassanngortitsinissamut imaluunniit periarfissiissutinut, tamatumunnga taarsiullugu atortinneqartussanut, arsaarinnikkallarnissamut, uppersaatissanik ujarlerfiginninnissamut imaluunniit pinngitsaaliinikkut akuliunnernut assingusunut tunngasuuppat,
- 4) aalajangiineq suliassami aningaasartuutunik akiliisussanngortitsippat imaluunniit eqqartuussivimmi pissusilersornerlunnermut akileeqqusissummik akiliisussanngortitsippat,
- 5) aalajangiineq suliassami illuatungiunngitsumut aalajangiineruppat,
- 6) aalajangiineq eqqartuussutissap isumaqatigiinniutigineqarneranut toqqaannartumik attuumassuteqanngippat, imaluunniit
- 7) aalajangiineq apeqqummut, suliassap sularineqarneranut aalajangiisuusumik pingaarutilimmut, tunngasuuppat imaluunniit annertuumik tunngavissiisumik pingaaruteqarpat.

Imm. 4. Suliassami eqqartuussuteqartoqarnerata kingorna aalajangiinerit, suliassap sularineqarnerani aalajangiinerusut, illuatungiusumit aalajangeqqitassanngortinneqarsinnaanngillat.

Imm. 5. Nunatta Eqqartuussisuuneqarfiata suliareqqitassanngortitsineq aallarneriigaq atorunnaarsissinnaavaa, apeqqut aalajangiinermi pineqartoq suliassap kingusinnerusukkut suliareqqitassanngortinneqarnerani ilanngunneqarsinnaappat.

Aalajangeqqitassanngortitsinissamut piffissarititaasoq

§ 567. Aalajangeqqitassamik suliassiinissamut piffissarititaasoq ullormiit aalajangiiffiusumiit ullunik 14-inik sivissuseqassaaq.

Imm. 2. Aalajangiisoqarsimappat, aalajangeqqitassanngortitsisoq najuutinngitsoq, pineqartorlu piffissaliussamik aalajangiiffiusussamik sioqqutsilluni ilisimatinneqarsimanani, piffissarititaasoq naatsorsorneqassaaq ulloq, aalajangiineq pillugu nalunaarutip pineqartumut annguffiatut ilimagineqartoq, aallarnerfigalugu.

Aalajangeqqitassanngortitsinermik aallarniineq

§ 568. Aalajangeqqitassanngortitsisoqartassaaq eqqartuussivimmut aalajangeqqitassanngortitamik aalajangiisimasumut, tamatumunnga piffissarititaasoq qaangiutsinnagu oqaatsitigut noqqaassuteqarnikkut imaluunniit allakkiamik aalajangeqqitassanngortitsissummik ataatsimik assilinerlammik tunniussaqaarnikkut.

Imm. 2. Allakkiap aalajangeqqitassanngortitsissutip imarissavai aalajangeqqitassanngortitsisup piunasaqaataa pisariaqassappallu piunasaqaammut tungavigisaq. Aalajangeqqitassanngortitsineq oqaatsitigut saqqummiunneqarpat paasissutissat tamakku eqqartuussisut suliaannik allassimaffimmut allanneqassapput.

Imm. 3. Aalajangiineq allanngortinneqassanngippat, tak. § 110 aamma § 150, imm. 2, eqqartuussiviup suliassaq nunatta eqqartuussisuuneqarfianut erninnaq nassiutissavaa. Nassiunneqartunut ilanngunneqassapput:

- 1) eqqartuussisut suliaannik allassimaffik aalajangeqqitassanngortitsinermit oqaatsitigut saqqummiunneqartumut imaluunniit allaganngorlugu tunniussamut tunngasoq,
- 2) aalajangiinerup, aalajangeqqitassanngortitap, allassimaffiata assilineqarnera, aamma
- 3) suliassap pappiarartai (immaqa assilineqarneri) allat, aalajangeqqitassanngortitsinermit pingaaruteqarnerat naapertorlugu annertussusilerlugit.

Imm. 4. Eqqartuussivik aalajangeqqitassanngortitsineq pillugu nalunaarummik ilanngussisinnaavoq.

§ 569. Pasisap tungaaniit aamma aalajangeqqitassanngartitsisoqarsinnaavoq, piffissarititaasoq qaangiutsinnagu tamatuminnga noqqaassummik saqqummiussinikkut imaluunniit allakkiamik aalajangeqqitassanngartitsissummik tunniussaqaarnikkut, assilineqarnera ataaseq politiit imaluunniit kommuneqogedip pissaa ilanngullugu. § 568, imm. 2-mi oqaaseqatigiit siulliit tamatumani taamatulli atortuutinneqassapput. Aalajangeqqitassanngartitsineq oqaatsitigut saqqummiunneqarpat, tiguneqarnera pillugu nalunaarsuummik sanasoqassaaq, matumunnga ilanngullugit aalajangeqqitassanngartitsisup piomasqaataa pisariaqassappallu piomasqaammut tunngavigisaq. Tigusaqartoqarnerata kingorna allakkiaq aalajangeqqitassanngartitsissut imaluunniit nalunaarsuusiaq eqqartuussivimmut aalajangiisuusimasunut erniinnaq nassiunneqassaaq. § 568, imm. 3 aamma 4 tamatuma kingorna taamatulli atortuutinneqassapput.

Aalajangeqqitassanngartitsineq kingusinaartoq

§ 570. Aalajangeqqitassanngartitsineq, piffissarititaasup qaangiutereerneratigut pisoq, nunatta eqqartuussisuunneqarfianit itigartitsissutigineqassaaq.

Imm. 2. Taamaattorli nunatta eqqartuussisuunneqarfiata aalajangeqqitassanngartitsinissaq akuerisinnaavaa piomasqaatit § 542, imm. 2-miittut naammassineqarsimappata. § 542, imm. 3-mi aalajangersagaq taamatulli atortuutinneqassaaq.

Kinguartitsissutitut sunniuteqarneq

§ 571. Aalajangeqqitassanngartitsineq kinguartitsigallarnermik sunniuteqassanngilaq, inatsimmi allatut aalajangiisoqarsimanngippat, imaluunniit tamanna eqqartuussivimmit, aalajangiinera aalajangeqqitassanngartinneqartumit, imaluunniit nunatta eqqartuussisuunneqarfianit aalajangerneqanngippat.

§ 572. Aalajangiinernik aalajangeqqitassanngartitsineq, taamaaliornermi nalunaarutini isertuussisusaanermi akuliuttarneq pillugu, tak. § 396, imaluunniit paasisutissaatit taamatut akuliunnikkut pissarsiaasut suujunnaarsinneqartarnissaat pillugu nalunaaruteqartussaalluni, tak. § 398, kinguartitsigallarnermik sunniuteqartassapput.

Suliassap aalajangeqqitassanngartitap allatigut sularineqarnera

§ 573. Nunatta Eqqartuussisuunneqarfiata illuatungeriit nalunaarfigissavai suliassaq aalajangeqqitassanngartinneqartoq tiguneqarsimasoq aamma eqqartuussiviup § 568, imm. 4 malillugu nalunaarutaata imarisai pillugit.

§ 574. Nunatta Eqqartuussisuunneqarfiata aalajangeqqitassanngartitsissut ingerlaannaq itigartitsissutiginnippagu illuatungeriit nunatta eqqartuussisuunneqarfianut allakkatigut oqaaseqaatinik nassiussaqaarsinnaatitaapput.

Imm. 2. Nunatta Eqqartuussisuunneqarfiata aalajangersinnaavaa pasisaq allaluunniit aalajangeqqitassanngartitsissummi peqataasoq, suliassami allakkatigut oqaasertalersuisinnaasorineqanngitsoq, eqqartuussivimmut, naleqqunnerpaasorineqartumut, aggersarneqassasoq oqaaseqaatissaminik oqaatsitigut saqqummiussiartorluni.

Imm. 3. Nunatta Eqqartuussisuunneqarfiata suliassami illuatungeriit imaluunniit eqqartuussivik, aalajangiisuusimasoq, paasisutissanik imaluunniit nalunaarutiniq amerlanernik piniarfigisinnaavaa. Nunatta Eqqartuussisuunneqarfiata taamaaliornermini aalajangiiffigisinnaavaa uppernarsaatiniq suliassami aalajangeqqitassami atugassanik saqqummiussisoqassasoq.

§ 575. Nunatta Eqqartuussisuuneqarfia allakkatigut paasissutissat tiguneqarsimasut tunngavigalugit aalajangiissaaq, matumunnga ilanngullugit eqqartuussisut suliaannik allassimaffiit assilineqarneri illuatungeriit imaluunniit ilisimannittut aalajangeqqitassatut suliasamat atugassatut nassuiaatigisimasinnaasaannik il.il. imallit. Aalajangiineq tunngavilersorneqarsimassaaq.

Imm. 2. Immikkut ittunik pissutissaqartoqartillugu nunatta eqqartuussisuuneqarfiata aalajangersinnaavaa suliasaq oqaatsitigut suliarineqassasoq.

§ 576. Aalajangeqqitassanngortitsinerup suliarineqarnerani aamma atortuutinneqassapput suliareqqitassanngortitsineq pillugu malittarisassat, pissutsit assigiinnginnerisa nassatarisaannik allannguutitalerlugit.

Eqqartuussiviit Qullersaannut aalajangeqqitassanngortitsineq

§ 577. Aalajangiinerit, Kalaallit Nunaata Eqqartuussisuuneqarfianit aalajangiinerusut, aalajangeqqitassanngortinneqarsinnaanngillat. Taamaattorli Suliareqqitassanngortitsinissamik Aalajangiisartut, tak. danskit eqqartuussisarnermik inatsisaanni kapitali 1 a, Eqqartuussiviit Qullersaannut aalajangeqqitassanngortitsinissaq akuersissutigisinnaavaat, aalajangeqqitassanngortitsissut apeqqutinut tunngavissiisumik pingaarutilinnut tunngassuuppat imaluunniit taamaaliornissamat immikkut ittunik pissutissaqarpat.

Imm. 2. Imm. 1 malillugu aalajangeqqitassanngortitsinissamat akuerineqarnissamik qinnuteqaat nunap eqqartuussisuuneranut aalajangiisoqareerneraniit kingusinnerpaamik sapaatit akunneri sisamat qaangiutsinnagit nassiunneqassaaq, taanna qinnuteqaat pillugu oqaaseqaateqarlunilu qinnuteqaat Suliareqqitassanngortitsinissamik Aalajangiisartunut ingerlateqqissavaa. Qinnuteqaateqartoq najuutsinnagu aalajangiisoqarsimappat, pineqartorlu aalajangiinissamat piffissarititaasoq pillugu sioqquutsisumik nalunaarfigineqarani, piffissarititaasoq naatsorsorneqassaaq ulloq, aalajangiinerup pineqartumut annguffigisimasaatut ilimagineqarsinnaasoq, aallarnerfigalugu. Qinnuteqaat aamma Suliareqqitassanngortitsinissamik Aalajangiisartunut toqqaannartumik nassiunneqarsinnaavoq, taamaassappat taakkua nunap eqqartuussisuunera suliasami oqaaseqaammik piniarfigissavaat. Aalajangiisartut qaqutigoortumik akuersissuteqartarsinnaapput qinnuteqaat piffissaliussatut taaneqartumiit kingusinnerusukkut, kisiannili aalajangeereernermiit ukioq ataaseq qaangiutsinnagu, nassiunneqarsimappat.

§ 578. Aalajangeqqitassanngortitsissutip Eqqartuussiviit Qullersaanni suliarineqarneranut tunngatillugu aamma danskit eqqartuussisarnermik inatsisaanni malittarisassat atortuutinneqassapput, pissutsit assigiinnginnerisa nassatarisaattut allannguutitalerlugit.

Nangeqqiineq

§ 579. Nangeqqiititsisoqarsinnaanngilaq suliareqqitassanngortitsinissamat periarfissat tamakkerneqareersimatinnagit, imaluunniit suliareqqitassanngortitsineq naammassineqareersinnagu.

Imm. 2. Eqqartuussutip naammassineqarsimanera nangeqqiinissamat akornutaanngilaq.

§ 580. Suliasaq eqqartuussuteqarfiusimasoq, unnerluutigineqartup pinngitsuutitaaffigisimasaa, unnerluussisussaataitasut noqqaassuteqarnerisigut nangitinneqarsinnaavoq

1) unnerluutigineqartoq kingusinnerusukkut nassuerpat, tamatuma kingorna isumaqartoqartariaqarluni unnerluutigineqartoq pinerlussimasoq

2) uppernarsaatunik allanik saqqummertoqarsimappat, tamatuma kingorna isumaqartoqartariaqarluni unnerluutigineqartoq pinerlussimasoq,

- 3) ilisimannittoq imaluunniit misissuisartooq imaluunniit naliliisartooq suliassap sularineqarnerani ilumuunngitsumik nassuiaateqarsimappat imaluunniit nalunaaruteqarsimappat, pissutsillu malillugit pissutissaqavissorineqarpat tamanna pinngitsuutitsinermut pissutaaqataasimasooq,
- 4) allakkiat uppersaatissat peqquserluutit imaluunniit peqquserlunnikkut allanngortitikkat suliassap sularineqarnerani atorneqarsimappata, pissutsillu malillugit pissutissaqavissorineqarpat tamanna pinngitsuutitsinermut pissutaaqataasimasooq,
- 5) unnerluutigineqartoq inuilluunniit, atorfik imaluunniit pisortatigoortumik suliassaqtitaaneq naapertorlugu suliassap sularineqarnerani peqataasimasut, suliassap qanoq inerneqarnissaa sunniiviginiarlugu pinerluuteqarsimappata, pissutsillu malillugit pissutissaqavissorineqarpat tamanna pinngitsuutitsinermut pissutaaqataasimasooq.

§ 581. Unnerluutigineqartoq eqqartuussutaasimasumiit annertunerujussuarmik pinerluuteqarsimaneragaappat unnerluussisusaatitaasumiit noqqaavigineqarnikkut nangititsisoqarsinnaavoq piumasaaqatit § 580-imi taaneqartutut assingi tunngavigalugit..

§ 582. Eqqartuussivikkut malersuineq unnerluussisuteqartoqarnerata kingorna taamaatinneqarpat, suliassamilu eqqartuussuteqartoqarani, aatsaat unnerluussisuteqartoqarsinnaavoq,
1) piumasaaqatit § 580-imiittut naammassineqarsimappata,
2) uppersaatissanik nutaanik pingaarutilinnik kingusinnerusukkut saqqummersoqarpat, imaluunniit
3) piumasaaqatit § 315, imm. 1-imiittut naammassineqarsimappata.

§ 583. Suliassaq eqqartuussuteqarfigisimasaq, unnerluutigineqartup pisuutinneqarfigisimasaa, eqqartuussaasimasumit imaluunniit unnerluussisusaatitaasumit noqqaavigineqarnikkut nanginneqarsinnaavoq,
1) paasissutissanik nutaanik pissarsisoqarpat, suliassap sularineqarnerani pigineqarsimasuugunik pinngitsuutitsinermik imaluunniit sakkukinnerujussuarmik sunniuteqartumik pineqaatissiinermik kinguneqarsimasinnaasorineqartunik.
2) pissutsinik § 580, nr. 3-5-imi taaneqartutut ittunik atuuttoqarpat, pissutsillu naapertorlugit pissutissaqavissappat isumaqassalluni tamanna eqqartuussaannermut pissutaaqataasimasinnaasooq, imaluunniit
3) pissutsinik immikkut ittunik atuuttoqarpat, unnerluutigineqartup pisuuneranut uppersaatit eqqunngitsumik naliliivigineqarsimanerannik ilimanarnerulersitsisunik.

Imm. 2. Aalajangersakkat § 535, imm 1-imi 2-milu oqaaseqatigiinnilu siullerniittut taamatulli atortuutinneqassapput nangitassanngortitsinissaq pillugu noqqaassuteqarsinnaatitaanermi.

§ 584. Eqqartuussisut imaluunniit unnerluussisusaatitaasut pissutsinik, eqqartuussaasimasumut allanulluunniit eqqartuussaasimasooq sinnerlugu nangititsinissamik noqqaassuteqarnissamut pissutissaqalersitsisorineqarsinnaasunik, ilisimasaqalerunik eqqartuussisut imaluunniit unnerluussisusaatitaasut pineqartoq tamatuminnga ilisimatittariaqarpat.

§ 585. Nangitassanngortitsinissamik apeqqut Immikkut Ittumik Eqqartuussivimmit Maalaaruteqarfigineqarsinnaasumit aalajangiiffigineqassaaq, tak. danskit eqqartuussisarnermik inatsisaanni § 1 a.

Imm. 2. Nangititsinissamik noqqaassuteqartoqartassaaq allakkatigut qinnuteqaatikkut, nunap eqqartuussisuuneranut tunniunneqartussakkut. Eqqartuussisuuneq noqqaassut pillugu oqaaseqaateqassaaq qinnuteqaallu Immikkut Ittumik Eqqartuussivimmut Maalaaruteqarfigineqarsinnaasumut ingerlateqqillugu. Qinnuteqaat aamma toqqaannartumik nassiunneqarsinnaavoq, taamaassappat Maalaaruteqartarfik eqqartuussisuunermit suliassaq pillugu oqaaseqaammik piniassaaq.

Imm. 3. Qinnuteqaammi taaneqassapput eqqartuussut nangitinniagaq aamma pissutsit, qinnuteqaammut tapersiutaasut, aamma uppernarsaatit, suliassap allatut inerneqarsimasariaqaraluarnernanik kinguneqartitsisinnaasorineqartut.

Imm. 4. Eqqartuussaasimasoq inuillu, § 583, imm. 2 malillugu nangititsinissamik noqqaassuteqarsinnaasut, qinnuteqaatip sananeqarnerani nunami maani eqqartuussivimmit sumiluunniit imaluunniit politiinit kommuneqogedimilluunniit noqqaassuteqarneq naapertorlugu ikiorserneqarsinnaatitaapput.

§ 586. Pissutsini, § 583, imm. 1, nr. 3-mi pineqartuni, nangititsinissamik qinnuteqaat saqqummiunneqareersimassaaq eqqartuussuteqartoqarneraniit kingusinnerpaamik ukiut tallimat qaangiutsinnagit. Eqqartuussaasimasoq eqqartuussutip nassatarisaatut kiffaanngissusiiagaasimappat, nangititsinissamik qinnuteqaat tamatigut saqqummiunneqarsinnaavoq iperagaanermiit ukiut marluk tikillugit.

§ 587. Nangititsinissamik qinnuteqaateqarneq eqqartuussutip naammassinninniarneqarnerata kinguartinneqarneranik imaluunniit kipitinneqarneranik nassataqassanngilaq, Immikkut Ittumik Eqqartuussiviup Maalaaruteqarfigineqarsinnaasup tamanna aalajanginngippagu. Taamaattoqassaartaq §§ 580-581 malillugit nangititsinissamik aalajangiisoqaraangat. § 583 malillugu nangititsinissamik aalajangiisoqarpat naammassisitsiniaaneq kinguartinneqassaaq imaluunniit kipineqassaaq, eqqartuussaasimasoq tamatuminnga noqqaassuteqarpat.

§ 588. Immikkut Ittumik Eqqartuussivik Maalaaruteqarfigineqarsinnaasooq aalajangiisnaavoq nangititsinissamik qinnuteqaat ingerlaannaq itigartitsissutigineqassasoq,

1) § 586 malillugu piffissarititaasooq eqqortinneqanngippat,

2) qinnuteqaammi nangititsinissamut inatsit malillugu tunngaviginiagaq taaneqarsimanngippat, imaluunniit

3) pissutsit uppernarsaatissalluunniit patsisiginiakkat erseqqissumik pingaaruteqanngippata.

§ 589. Nangititsinissaq § 588 malillugu ingerlaannaq itigartitsissutigineqanngippat Immikkut Ittumik Eqqartuussiviup Maalaaruteqarfigineqarsinnaasup illuatungiusooq noqqaassummik ilisimatissavaa, taamatuttaaq illuatungiusooq pisariaqarneratut annertutigisumik periarfissinneqassaaq allakkatigut imaluunniit oqaatsitigut oqaaseqaateqarnissamut.

Imm. 2. Immikkut Ittumik Eqqartuussivik Maalaaruteqarfigineqarsinnaasooq aalajangiisnaavoq paasissutissanik amerlanerusunik suliassamut atugassanik piniartoqassasoq. Uppernarsaasiineq pisinnaavoq, matumunnga ilanngunneqarluni unnerluutigisamik imaluunniit eqqartuunneqarsimasumik immaqalu ilisimannittunik killisiuineq, Immikkut Ittumik Eqqartuussivimmi Maalaaruteqarfigineqarsinnaasumi imaluunniit eqqartuussivimmi naleqqunnerpaasorineqartumi allami. Aamma pinerlunnernik suliassanik paasiniaasarneq paasissutissiisarnerlu pillugit malittarisassat nalinginnaasut taamatulli atortuutinneqassapput.

Imm. 3. Immikkut Ittumik Eqqartuussivik Maalaaruteqarfigineqarsinnaasooq illersuisumik ivertitsisnaavoq unnerluutigineqartup imaluunniit eqqartuussaasimasup ikiortissaanik. Suliassaq oqaatsitigut isumaqatigiinniutigineqarpat illersuisumik tamatigut ivertitsisoqartassaaq.

§ 590. Immikkut Ittumik Eqqartuussivik Maalaaruteqarfigineqarsinnaasooq aalajangiinikkut, tunngavilersorneqartussakkut, aalajangiisassaaq nangititsinissamik noqqaassut akuersaarneqassanersoq. Noqqaassut akuersaarneqarpat aalajangiinerup imarissani taaneqassaaq eqqartuussutissaq isumaqatigiinniutigineqaaqqissasoq.

Imm. 2. Eqqartuussaasimasoq toqusimappat Immikkut Ittumik Eqqartuussiviup Maalaaruteqarfigineqarsinnaasup eqqartuussutissamik isumaqatigiinniuteqartoqaaqqitsinnagu

nangititsinissamik noqqaassut tunuartissavaa imaluunniit eqqartuussuteqassaaq, eqqartuussummik pineqartumik atorunnaarsitsisumik.

§ 591. Immikkut Ittumik Eqqartuussiviup Maalaaruteqarfigeqarsinnaasup aalajangiineri inaarutaasumik aalajangiinerupput suliareqqitassanngortinneqarsinnaanatillu.

§ 592. Eqqartuussutissamik isumaqatigiinniuteqaqqinneq pissaaq eqqartuussivimmi, suliassami siornatigut eqqartuussuteqarsimasumi. Suliarinninnermi atuutissapput eqqartuussivimmi pineqartumi suliassamik suliarinnitarneq pillugu malittarisassat nalinginnaasut.

Imm. 2. Eqqartuussisoq imaluunniit eqqartuusseqataasartoq kinaluunniit, suliassap siornatigut suliarineqarnerani peqataasimasoq, suliassap aammaarluni suliarineqarnerani peqataaqqussaanngilaq.

Imm. 3. Nangititsinissaq § 583 naapertorlugu aalajangiunneqarpat eqqartuussut nutaq eqqartuussummiit siullermiit allaanerussuteqassanngilaq eqqartuussaasimasumut ajoqutaasussamik. Nangititsinissaq § 580 imaluunniit § 581 naapertorlugu aalajangiunneqarsimappat immikkoortunut, nangititsinissamut tunngavilersuutinut ilaasunut, taamaallaat tunngatillugu unnerluutigineqartumut imaluunniit eqqartuussaasimasumut ajoqutaasinnaasumik allaanerussuteqartitsisoqarsinnaavoq.

Immikkoortoq VII

Pinerlunnernik suliassani eqqartuussutininik naammassinninneq

Kapitali 45

Pinerlunnernik suliassani eqqartuussutininik naammassinninneq

Naammassinninnerit aallarnerneqartarnerat il.il.

§ 593. Pinerlunnernik suliassani eqqartuussutininik aamma akiliisitsissutissanik akuersissutigisanik imaluunniit arsaarinninnermik naammassinninnissaq politiit isumagineqassaaq.

Imm. 2. Akiliisitsissutit aningaasallu, arsaarinnissutaasut, kiisalu suliassamut aningaasartuutit, § 480, imm. 2 malillugu eqqartuussamut akiligassanngortitaasut, akilersinniarneqarsinnaapput qularnaveqqutit sillimmasiussinikkut aamma akissarsianik allatigullu aningaasanik pisassanik ilanngaasarnertigut, tak. kapitali 46-48.

Imm. 3. Politiit ajoquserneqartumut noqqaassuteqartoqarneratigut ikiuuttassapput taarsiissutissanik, pinerlunnernik suliassaq tunngavigalugu pisassanngortitanik, akileeqqusillutik akiliisitsiniaallutillu.

Pinngitsaaliissutit akiliisitsissutit

§ 594. Eqqartuussutini, pisortanut pisussaaffimmik equutsitsisussatut eqqartuussaasoqarfiusimasuni, eqqartuussisut akiliisitsissutissanik pinngitsaaliissutit ingerlaavartumik akilertagassanik aalajangersaasinnaapput (pinngitsaaliissutit akiliisitsissutit). Pinngitsaaliissutit akiliisitsissutit akilersinniarneqartassapput malittarisassat akiliisitsinernut atuuttut assingi malillugit, tak. § 593, imm. 2.

Imm. 2. Pinngitsaaliissutit akiliisitsissutit naalagaaffiup karsiata pisassarai, inatsisini allani allatut aalajangiisoqarsimangippat.

Eqqartuussutit qanoq paasineqartarnerat

§ 595. Eqqartuussutip qanoq paasineqarsinnaanera politiit eqqartuunneqartullu isumaqatigiinngissutigilerpassuk, taamaattoq tak. pinerluttulerinnermi inatsimmi § 246, imm. 1, nr. 2,

tamatuminnga apeqquq eqqartuussaasimasup noqqaassuteqarneratigut saqqummiunneqartassaaq eqqartuussivimmuq, siullermeeriffiusumik suliarinninnermi eqqartuussuteqartuusimasumut. Suliassamik eqqartuussivimmuq saqqummiussineq kinguartitsigallarnermik sunniuteqartussaangilaq, politiit imaluunniit eqqartuussivik allatut aalajangiisimangippata.

Imm. 2. Isumaqatigiinngissutaappat inuk, politiit pineqaatissiisummik naammassinninnialersaarfigisaat, ilumut tasaanersoq eqqartuussaasimasooq, suliassaq tamanut ammasumik eqqartuussinnermi, pineqartup najuuffigisaani, suliarineqassaaq. Aalajangiineq eqqartuussutikkut aalajangiinerussaaq, kapitali 44-mi malittarisassat malillugit suliareqqitassanngortinneqarsinnaasoq.

Imm. 3. Pisuni allani eqqartuussiviup aalajangertassavaa suliassaq oqaatsitigut imaluunniit allakkatigut suliarineqassanersoq. Eqqartuussivik aalajangiilersinnagu illuatungeriit oqaatsitigut imaluunniit allakkatigut oqaaseqaateqarnissaminnut periarfissaqartinneqassapput. Aalajangiineq tunngavilersukkatut aalajangiinerussaaq. Aalajangiineq kapitali 44-mi malittarisassat malillugit aalajangeqqitassanngortinneqarsinnaavoq.

Naammassinninnissamut piffissarititaq

§ 596. Pinerlunnermik suliassami eqqartuussut naammassinninniarneqarsinnaangilaq suliareqqitassanngortitsisarneq pillugu piffissarititaq qaangiutereertinnagu, imaluunniit eqqartuussaq politiillu suliareqqitassanngortitsinissamik taamaatitsereersinnagit. Eqqartuussut suliareqqitassanngortitaq ingerlaannaq naammassinninniarneqarsinnaavoq.

Imm. 2. Eqqartuussaasimasooq eqqartuussuteqarnerup kingorna tigummigallagaappat, tak. § 368, eqqartuussut naammassinninniarneqalissaaq paasineqarniariarpat eqqartuussut inaarutaasuusoq.

Imm. 3. Pinerlunneq pillugu eqqartuussummik suliareqqitassanngortitsinissamut piffissarititaq qaangiutereersoq suliareqqitassanngortitsinissamut Kalaallit Nunaata Eqqartuussisuunekarfia akuersissappat, tak. § 542, eqqartuussummik naammassinninniaasinnaaneq atorunnaassaaq. Naammassinninniaaneq aallarereersimappat kipitinneqassaaq.

Immikkoortoq VIII

Pinngitsaaliinikkut naammassinninneq

Kapitali 46

Eqqartuussutininik naammassinninniaasussaataasut

§ 597. Eqqartuussivik inuinnaat aningaasatigut piunasaqaataannik naammassinninniaasuusaaq, taamaattoq tak. imm. 2, aamma pigisanik nuunneqarsinnaasunik pinngitsaaliinikkut tuniniaasuusaaq.

Imm. 2. Kalaallit Nunaanni Naalakkarsuisut eqqartuussutininik naammassinninniaasartussanik aalajangersimasumik amerlassusilinnik ivertitsissapput piunasaqaatinik § 598, imm. 2-mi aamma imm. 3-mi pineqartunik akiliisitsiniaasartussanik.

Imm. 3. Politit akiliisitsissutininik arsaarinninnissamillu piunasaqaatinik kiisalu piunasaqaatinik allanik aningaasaanngitsunik naammassinninniaasussaapput, tak. §§ 628-633.

Imm. 4. Kalaallit Nunaanni Eqqartuussiviup pigisanik arsaarinnissuteqarallarneq, inerteqqutit aammalu atorneqarsinnaasunik qularnaveeqqusiisarneq pillugit suliassat suliarisassavai aammalu illuutininik, umiarsuarnik nalunaarsukkanik, silaannakkoortininik nalunaarsukkanik, aalisarsinnaatitaanermut pisinnaatitaaffinnik kiisalu pappiaqqanik nalilinnik, tak. pappiaqqanik nalilinnik niuerneq pillugu inatsimmi § 2, pinngitsaaliinikkut tuniniaasuusassaaq.

Imm. 5. Politimesteri inunnik allanik politiit atorfiliunngitsunik imm. 3 naapertorlugu eqqartuussutininik naammassinninniaasartussanik piginnaaniliisinnaavoq.

Kapitali 47

Pinngitsaaliinikkut naammassinninniaaneq

Pinngitsaaliinikkut naammassinninniaanermut tunngavissaq

§ 598. Pinngitsaaliinikkut naammassinninniaaneq pisinnaavoq makku tunngavigalugit

- 1) eqqartuussutit aalajangiinerillu Kalaallit Nunaanni eqqartuussiviit imaluunniit pisortat oqartussaataasa allat eqqartuussutigisimasaat imaluunniit aalajangiinerisimasaat, taakkualu aalajangiineri inatsit naapertorlugu naammassiniarneqarsinnaasut,
- 2) isumaqatigiisitsinerit pisortat oqartussaataannut nr. 1-imi taaneqartunut isumaqatigiissutaasimasut, aamma isumaqatigiisitsinerit aappariilertarneq aappariigunnaartarnerlu pillugit Kalaallit Nunaanni inatsit naapertorlugu atugassarititat isumaqatigiinniutaaneranni isumaqatigiissutigineqarsimasut,
- 3) eqqartuussutit, aalajangiissutit aalajangiinerillu eqqartuussivinnit imaluunniit pisortat oqartussaataannit naalagaaffiup ilaata sinneraniittunit eqqartuussutaasimasut imaluunniit aalajangiinerusimasut, aalajangiineri pinngitsaaliinikkut tassani naammassiniarneqarsinnaasut, aamma isumaqatigiinnerit pisortatut oqartussaataannut pineqartunut isumaqatigiissutaasimasut,
- 4) qularnaveeqqusiilluni taarsigassarsinermi allagartat, pigisanik qularnaveeqqusiinermut aamma ajunaaruteqartitsinnginnissamik allagartanut tunngassuteqartillugit, taamaallaalli akiitsut annertussusaat aammalu piffissap akileereerfissap atuutilersimanera akiitsulimmit nassuerutigineqarsimatillugu imaluunniit pissutsinit erseqqissumik takuneqarsinnaatillugu,
- 5) akiitsut akilerneqareertussat pillugit eqqartuussinertaqanngitsumik allaganngorlugit isumaqatigiisitsinerit, isumaqatigiissutaasumi erseqqissumik aalajangerneqarsimagaangat tamanna naammassinninniaanermut tunngaviutinneqarsinnaasoq,
- 6) akiitsut allagartaat, nr. 5-imi pineqanngitsut, naammassinninniaanermut tunngaviutinneqarsinnaasoq allagartami erseqqissumik aalajangerneqarsimagaangat,
- 7) akiitsukkanut uppernarsaatit, akiitsukkat pillugit inatsisitigut piumasaqaatinut tunngasuuppata, aammalu checkit, utertitseqqussutitut tunngasuuppata, aamma
- 8) eqqartuussivimmi aalajangiinerit, isumaqatigiissutit imaluunniit nunat tamalaat akornanni pisussaaffiit allat naapertorlugit naalagaaffiup ilaani allami naammassinninniarneqarsinnaasut.

Imm. 2. Pinngitsaaliinikkut naammassinninniaaneq aammattaaq pisinnaavoq aningaasatigut piumasaqaatinut makkununga tunngatillugu:

- 1) taarsigassarsiat uterteqquneqartut imaluunniit illuummik pigisanilluunniit nuunneqarsinnaasunik qularnaveeqqusiussaqaarluni pisortaniit taarsigassarsiat erniaat,
- 2) ininik attartornermut akiliutissat aammalu kiassarnermut, sarfamut, imermut eqqaavilerinermullu akiliutissat pisortaniit akileqquneqartut
- 3) Inatsisartut inatsisaat imaluunniit Inatsisartut peqqussutaat naapertorlugu pisortanut akileraarutissat akitsuusiussassallu,
- 4) pilersuutitut akilersuutit, Kalaallit Nunaanni pisortaqaarfimmit aalajangerneqarsimasut, akileqqusat,
- 5) Akilersuutininik akilersuinissamik piumasaqaatit, Danmarkimi statsforvaltningimit imaluunniit Savalimmiuni rigsombudsmandimit aalajangersakkat,
- 6) akileraarutitigut akitsuusiussatigullu piumasaqaatit, naalagaaffiup ilaani allami pinngitsaaliinikkut naammassinninniarneqarsinnaasut,
- 7) § 627 malillugu aningaasat taarsiissutissat
- 8) piumasaqaatit, Kalaallit Nunaata avataani oqartussaasunit aalajangiinerit naapertorlugit pilersimasut, Namminersornerullutik Oqartussat nunami allami oqartussaasoq isumaqatigiissuteqarfialugu taamatut ikiorsiinissamik pisussaataappata.

Imm. 3. Aningaasatigut piumasaqaatit aammattaaq pinngitsaaliinikkut naammassiniarneqarsinnaapput, tamanna suliassaqaarfii Namminersornerullutik Oqartussanut atasut pillugit inatsisartut inatsisaasigut imaluunniit inatsisartut peqqussutaasigut aalajangersarneqarsimappat.

Imm. 4. Aammattaaq piumasaqaatit, naalagaaffiup ilaani allami pilersinneqartut tassanilu inatsisit atuuttut naapertorlugit qularnaveeqqusiissuteqarfiusinnaasut, pillugit qularnaveeqqutissatut arsaarinnittoqarsinnaavoq.

Imm. 5. Aamma pinngitsaaliinikkut naammassinninniaaneq atortinneqarsinnaavoq kimulluunniit pisassaminut sallunaveeqqutaatilimmut.

Imm. 6. Imm. 1, nr. 4-7-imi taaneqartunik pisoqartillugu kikkulluunniit, allakkiamut atsiormikkut akiitsulittut, akiliussisussamaataasut imaluunniit qularnaveeqqusiisutut imminnut pisussanngortissimasut, naammassinninniaavigineqarsinnaapput.

§ 599. Eqqartuussutit naammassinninniarneqarsinnaapput suliareqqitassanngortitsinissamut piffissarititaasoq, suliareqqitaassanngortitsisoqarani, qaangiussimappat, tak. § 496, taamaassananili eqqartuussivik eqqartuussuteqarsimasoq imaluunniit nunatta eqqartuussisuuneqarfia suliassami suliareqqitassanngortitami allatut aalajangiisimappat. Suliareqqitassanngortitsineq taamaasiornissamut piffissarititaasoq qaangiutereersoq akueritinniarneqarpat nunatta eqqartuussisuuneqarfiaata aalajangersinnaavaa naammassinninniaanissaq kinguartinneqassasoq.

Imm. 2. Aalajangiinerit ingerlaannaq naammassinninniarneqarsinnaapput, aalajangiinermi allatut aalajangiisoqarsimangippat.

Imm. 3. Isumaqaatigiisitsinikkut isumaqaatigiissutit, § 598, imm. 1, nr. 2-mi taaneqartut, naammassinninniarneqarsinnaapput piumasaqaat akilerneqareersimasussaappat, taamaattoqassananili isumaqaatigiisitsinikkut isumaqaatigiissummi allatut aalajangiisoqarsimappat.

Imm. 4. Allakkiatigut uppersaatissat § 598, imm. 1, nr. 4-7-mi taaneqartut tunngavigalugit piffissaq naammassinninniaavissaq ullormiit, akiliutissamik akiliiffissaagaluamiit aallarnersumik ullunik 14-inik sivissuseqassaaq, taamaassananili allagartani allatut aalajangiisoqarsimappat. Taamaattorli naammassinninniaanissamut piffissarititaasoq ulluinnarnik sisamanik sivikinnerusoq isumaqaatigiissutigineqarsinnaangilaq.

Imm. 5. Angajoqqaatut oqartussaassuseqarneq imaluunniit meeqqamik najorteqarsinnaatitaaneq pillugu aalajangersakkat, eqqartuussutikkut aalajangiivigisat imaluunniit eqqartuussivimmit imaluunniit statsforvaltningemimit imaluunniit rigsombudsmandimit akuerineqarsimasut, ingerlaannaq naammassinninniarneqarsinnaapput, taamaassananili aalajangiinermi naammassisinniarneqartumi allatut aalajangersaasoqarsimappat.

Imm. 6. Piumasaqaatit § 598, imm. 2 imaluunniit 3 naapertorlugit naammassinninniarneqarsinnaasut pillugit piffissaq naammassinninniaavissaq naammassinninniaanermik suliassamik ilisimatinneqareernermit ullunik arfineq-marlunnik sivissuseqassaaq, tak. § 604.

§ 600. Pinngitsaaliinikkut naammassinninniaanissamik noqqaassut aatsaat tunniunneqarsinnaalissaaq § 599-imi taaneqartut piffissarititat qaangiutereernerisigut. Piumasaqaatinut § 599, imm. 6-imi pineqartunut tunngatillugu noqqaassut siusinnerpaamik tunniunneqarsinnaalissaaq ullup piffissaq eqqorlugu akiliiffissap kingulliup aqaguaniit.

Imm. 2. Taamaattorli eqqartuussutinik naammassinninniaasartup aalajangersinnaavaa piffissarititaasut suli naanngikkaluartut piumasaqaat naammassiniarneqassasoq, akiitsulik tamatumunnga isumaqataappat imaluunniit ilimagisariaqarpat taamaaliunngikkaanni piumasaqaatinut matussusiisitsisinnaaneq ajornerujussuanngussasoq. Aamma taamaassaaq eqqartuussut suliareqqitassanngortinneqarsimappat. Piumasaqaat naammassinninniaanissamut piffissarititaasoq qaangiutsinnagu naammassinninniarneqassappat eqqartuussutinik naammassinninniaasartup allattaaviinut allanneqassaaq sooq taamaasiornissamut piumasaqaatit naammassineqarsorineqartut, taamaassanngilarli akiitsulik tamatumunnga isumaqataappat. Naammassinninniaanissaq qularnaveeqqusiisoqareersimanissamik piumasaqaatitalerneqarsinnaavoq.

Periaasissaq

§ 601. Pinngitsaaliinikkut naammassinninniaanissamik noqqaassut eqqartuussiveqarfiit ukua arlaanni eqqartuussutininik naammassinninniaasartumut tunniunneqarsinnaavoq:

- 1) eqqartuussisoqarfimmut akiitsullip najugaqarfigisaanut, tak. §§ 203 aamma 208-210,
- 2) akiitsullip inuussutissarsiutigalugu sullivimmik ingerlatsiveqarfianut,
- 3) aningaasatigut piumasaqaatit, qularnaveeqqutissatut sillimmasiussuteqarfigeqqusat, qularnaveeqqusiissutaasa sumiiffiannut,
- 4) piumasaqaatinik aningaasaanngitsunik allanik naammassinninniaanermi pigisap sumiiffigisaanut.

Imm. 2. Eqqartuussutininik naammassinninniaasartut arlaannaalluunniit imm. 1 malillugu piginnaaneqanngippat imaluunniit siusinnerusukkut naammassinninniaasimanermi piumasaqaat tamarmiisoq matussuserneqarsinnaasimanngippat, naammassinninniaanissamik noqqaassut eqqartuussisoqarfimmi, akiitsullip najorallagaani imaluunniit naapinneqarfigisinnaasaani imaluunniit pigisanik naliluteqarfigisaani, eqqartuussutininik naammassinninniaasartumut saqqummiunneqassaaq. Pinngitsaaliinikkut naammassinninniaanissamik noqqaassuteqarnermut atatillugu eqqartuussutininik naammassinninniaasartumi allami, noqqaassummik tunniussivigineqarsimanngitsumi, iliuuseqartoqassappat noqqaassummik nutaamik eqqartuussutininik naammassinninniaasartumut taassumunnga tunniussisoqassaaq.

Imm. 3. Noqqaassut eqqartuussutininik naammassinninniaasartumut allamut imm. 1-imi aamma 2-mi pineqanngitsumut saqqummiunneqarsinnaavoq naammassinninniaasinnaaneq annertuumik ajornerulissanngippat.

Imm. 4. Pinngitsaaliinikkut naammassinninniaanissamik noqqaassummut ilanngunneqartassapput paasissutissat, suliaasap suliarinissaanut pisariaqartinneqartut. Inissiaatileqatigiiffik pisortanit pigineqartoq imaluunniit qularnaveeqqusiissutitalinnik taarsigassarsisitsisarfik qularnaveeqqusiissutitut allagartaq naapertorlugu illuutip qularnaveeqqutitut sillimmasiunneqarnissaanik kissaateqarpat, piumasarisaq uppersarsaaserneqarsinnaavoq akiligassaqarfigisamiit akiliisitsiniummik akilerneqarsimanngitsumik kingullermik saqqummiinikkut. Pinngitsaaliinikkut naammassinninnissamik noqqaassut illup B-normuanik, sumiiffigisaanik suussusaanillu paasissutissanik imaqassaaq. Eqqartuussutininik naammassinninniaasartuq paasissutissat allakkiallu uppersarsaatissat piumasarineqartut pissarsiarineqarnissaannut piffissamik aalajangersaasinnaavoq.

Imm. 5. Eqqartuussutininik naammassinninniaasartuq pinngitsaaliinikkut naammassinninniaasinnaavoq eqqartuussisoqarfiup avataani, taamaasiornissamut immikkut ittunik pissutissaqarsorinarpat.

§ 602. Eqqartuussutininik naammassinninniaasartuq § 601, imm. 1-3-mi malittarisassat malillugit piginnaaneqanngikkuni imaluunniit pinngitsaaliinikkut naammassinninniaanissamut naammattunik tunngavissaqanngippat imaluunniit allakkiaat uppersarsaatissat paasissutissallu § 601, imm. 4-mi taaneqartut amigaataappata, eqqartuussutininik naammassinninniaasartup noqqaassut itigartitsissutigisinnaavaa noqqaassuteqartorlu tamatuminnga ilisimatillugu.

Imm. 2. Paasissutissanit pigineqartunit takuneqarsinnaappat eqqartuussutininik naammassinninniaasartuq kina piginnaaneqartoq, suliaasap tamatumunnga taarsiullugu naammassinninniaasartumut taassumunnga innersuussutigineqarsinnaavoq.

§ 603. Akiligassaqarfigisaq, aningaasatigut piumasaqaatimi matussusertinnissaanut naammattumik qularnaveeqqusiinikkut sillimmasiussivigineqarsimanngitsoq, naammassinninniaanermiit kingullermiit aatsaat qaammatit arfinillit qaangiunneranni pinngitsaaliinikkut naammassinninniaanissamik noqqaassuteqarsinnaavoq, qularnaveeqqutitut sillimmasiussinissaq siunertaralugu (qularnaveeqqutitut sillimmasiussineq). Aamma eqqartuussutininik naammassinninniaasartup akiitsullip qularnaveeqqutissatut arsaarinniffigineqarnissaa itigartitsissutigisinnaavaa, nalunngereeruniuk qaammatit kingulliit arfinillit ingerlaneranni iluatsinngitsumik naammassinninniaasoqareersimasoq.

Imm. 2. Imm.1 atortuutinneqassanngilaq piumasagaatinut § 598, imm. 2-mi aamma 3-mi pineqartunut. Piumasagaatinut allanut tunngatillugu imm. 1 atortuutinneqassanngilaq, akiitsullip qularnaveeqqutitut sillimmasiunneqarsinnaasunik naliliuteqarnera naleqquttumik tunngavissalimmik ilimagineqarpat, imaluunniimmi taamatut iliuuseqarfiginninnissamut pissutsinik immikkut ittunik atuuttoqarpat.

§ 604. Eqqartuussutinik naammassinninniaasartuq naammassinninniaanerp qaqugu sumilu pinissaannik aalajangersaasassaaq ajornanngippallu tamanna akiitsulimmut ilisimatitsissutigisassavaa. Eqqartuussutinik naammassinninniaanermik suliassaq naammassinninniaasartup allaffiata avataani ingerlanneqassappat, nalunaaqutaq sumilu pinissaa ima aalajangerluarsimatigisumik oqaatigineqassapput taassuma sulinerminik aqqissuussineranut akornutaasussaajunnaarlugit. Ilisimatitsissuteqarneq pisinnaavoq eqqartuussutinik naammassinninniaanissamut aggeqqusissutikkut, tak. imm. 3.

Imm. 2. Ilisimatitsinngitsoortoqarsinnaavoq eqqartuussutinik naammassinninniaasartup akiliisitsiniaanissap akiitsulimmut nalunaaruteqaqqaarani ingerlanneqarnissaa eqqarsanartoqartinnippagu, imaluunniit ilimagisariaqarpat taamaasiunngikkaanni matussusiisitsinissaq annertuumik ajorseriassasoq. Pisuni kingullertut taaneqartuni taamatut isumaqarnermut tunngavigisat eqqartuussutinik naammassinninniaasartup allattaaviinut allanneqartassapput, eqqartuussutinillu naammassinninniaasartup naammassinninniaanissaq qularnaveeqquseereernissamik piumasagaatitersinnaavaa.

Imm. 3. Eqqartuussutinik naammassinninniaasartuq nammineq aalajangikkaminik piffissaliinikkut akiitsulimmik aggersaasinnaavoq, tamanna eqqartuussisoqarfimmi, akiitsullip najugaqarfigisaani imaluunniit najorallagaani imaluunniit inuussutissarsiutigalugu sullivimmik ingerlataqarfigisaani pissappat. Aggeqqusissummi akiitsulik peqquneqarsinnaavoq nammineerluni ornigutissasoq. Aggeqqusissut kalerriissummik takkutinngitsoornerullu kingunerisassai pillugit paasissutissanik imaqassaaq.

Imm. 4. Akiitsulik aggeqqusissummik inatsisinut naapertuuttumik nalunaarfigineqaralarluni takkutinngitsoorpat, pissuteqavissumik takkutinngitsoornini nalunaarutiginagu, ilisimannittunik pinngitsaaliisarneq pillugu § 150 taamatulli atortuutinneqassaq, taamaattoq tak. imm. 5. Aamma taamaassaaq akiitsulik nammineerluni orniguteqqusaagaluarluni takkutinngitsoorpat. Eqqartuussutinik naammassinninniaasartup tamatumunnga taarsiullugu suliassaq ulloq taanna imaluunniit aqaguani akiitsullip najugaani imaluunniit inuussutissarsiummik ingerlatsiveqarfiani il.il. naammassiniarsinnaavaa.

Imm. 5. Eqqartuussutinik naammassinninniaasartup ilimagineruguniuk naammassinninniaanermi piumasagaatip tamakkiisumik ilaannakortumilluunniit matussuserneqarnissaa anguneqarsinnaanngitsoq, akiitsullip politiitit agguunneqarnissaa (politiit sassartitsisarnerat), tak. § 150, imm. 1, nr. 2, nalinginnaasumik aalajangiiffiginiartariaqanngilaa. Aamma taamaassaaq taamatut iliuuseqarnissaq piumasagaataasut annertussusaannut naleqqiullugu naapertuussorineqanngippat.

Imm. 6. Akiitsulik peqatigiiffiuppat, ingerlatsiviuppat assigisaattulluunniit ittuuppat, peqatigiiffiup ingerlatsiviulluunniit pisortaa imaluunniit ingerlatsisua imaluunniit, tamanna pisariaqassappat, siulersuisuni ilaasortaq aggersarneqassaaq siuliini taaneqartut malittarisassat malillugit, pineqartoq eqqartuussisoqarfimmi najugaqarpat imaluunniit najorallagaqarpat imaluunniit peqatigiiffik ingerlatsivilluunniit tassani najugarisatut eqqartuussisoqarfeqarpat imaluunniit inuussutissarsiutigalugu sullivimmik eqqartuussisoqarfimmiit tassannaanniit ingerlataqarpat.

Imm. 7. Eqqartuussutinik naammassinninniaasartup akiligassaqarfigisap naammassinninniaanermi najuunnissaa pisariaqarsorippagu, taanna ataatsimiinnissamut aggersarneqarsinnaavoq. Aggeqqusissut takkutinngitsoornerup kingunerisassaanik paasissutissartaqassaaq. Akiligassaqarfigisap takkutinngitsoorpat suliassaq eqqartuussutinik naammassinninniaasartup itigartitsissutigisinnaavaa.

Imm. 8. Eqqartuussutinik naammassinninniaasartuq suliassaqarnermini ilisimannittumik najuutsitsisinnaavoq, naliliiniartoqassappat akiliisitsisarnermut eqqartuussivimmuut ikiuussinnaasumik.

Iisimannittumut akissarsiarititassat naalagaaffiup karsianit akilerneqassapput malittarisassat Domstolsstyrelsimit aalajangersarneqartut malillugit.

§ 605. Eqqartuussutininik naammassinninniaanermi suliassaq ingerlanneqarsinnaavoq akiitsulik ornigutinnikkaluartuq imaluunniit naapinneqarsinnaanngikkaluartuq. Taamaattorli akiliisitsiniartartut allaffianni qularnaveeqqutissatut aatsaat arsaarinninniartoqarsinnaavoq suut arsaarinnissutaanissaat qularutiginaagu aalajangersarneqarsinnaappat.

Imm. 2. Eqqartuussutininik naammassinninniaaneq akiitsullip orniguffiginngisaanik imaluunniit napinneqarfiginngisaanik pissappat, naammassinninniaasartup aappaasoq, aapparissatut inooqataasoq inulluunniit 18-ileereersimasoq alla najuuttoq akiitsullillu atugarisaanik ilisimaarinnittuosorineqartuq kajumissaassavaa naammassinninniaanermi akiitsullip soqutigisaanik isumaginninniaqqullugu.

Imm. 3. Eqqartuussutininik naammassinninniaasartup akiitsullip nammineq najuunnissaa kissaatiginartikkuniku suliassamik kinguartitsigallarsinnaapput.

§ 606. Pinngitsaaliinikkut naammassinninniaaneq ingerlanneqalersinnagu eqqartuussutininik naammassinninniaasartup akiitsulimmut imaluunniit taassuma soqutigisaanik isumaginnittumut kajumissaarutigisassavaa piumasagaatit nammineq kajumissutsimik isumaqatigiissuteqarnikkut naammassiniarneqassat.

Imm. 2. Akiligassaqarfigisap pisassami naafferartumik akilersorneqarnissaat itigartitsissutigisinnaanngilaa.

§ 607. Akiitsulik paasissutissanik, eqqartuussutininik naammassinninniaasartup naammassinninniaanissap ingerlanneqarnissaanut pisariaqartitaanik, paasissutissiisassaaq. Aningaasatigut piumasagaatinik naammassinninniaanermi akiitsullip nammineq inoqutimilu aningaasatigut atugarisatik taamaalilluni paasissutissiisutigisassava. Eqqartuussutininik naammassinninniaasartuq akiitsullip eqqortunik oqalunnissaanik peqqussuteqartassaaq ilisimatitsissutigisassavaalu eqqunngitsunik nalunaaruteqarnermi pinerluttulerinerne inatsit malillugu akisussaaffiligaasoqarsinnaasoq. Akiitsulik piumasarineqartutut paasissutissiiumanngippat § 150 taamatulli atortuutinneqassaaq. Tamatuminnga Kalaallit Nunaanni Eqqartuussivik aalajangiisuusassaaq, eqqartuussutininik naammassinninniaasussatut piginnaatitaasimaguni, taamaanngippallu najukkami eqqartuussivik aalajangiisuusaaq.

Imm. 2. Akiitsulik imaluunniit taassuma soqutigisaanik isumaginnittoq, tak. § 605, imm. 2, piginnaatitaassaaq pigisanik nalilinnik qularnaveeqqutissatut arsaarinnissutaasussanik toqqartuinissamut. Taamaattorli aningaasaani tamatigut qularnaveeqqutissatut arsaarinnittoqarsinnaavoq. Piumasagaatinut qularnaveeqqutikkut isumannaallisakkani qularnaveeqqusiussaaq tamatigut arsaarinnissutaasinnavaoq. Akiitsullip piumasarisinnaanngilaa pigisamik aalaakkaasumik (illumik), pigisanik nalilinnik akiitsortaqaareersunik, pigisanik nalilinnik nalingi nalorninaatilinnik imaluunniit pigisanik nalilinnik toqqortariuminaatsunik tuniniaruminaatsunilluunniit qularnaveeqqutissatut arsaarinnittoqassasoq, allanik aammalu qularnaveeqqutissatut arsaarinnissutaanissamut piukkunnaateqarnerusunik naliluteqarsimassaguni. Eqqartuussutininik naammassinninniaasartup aamma aalajangertassavaa pigisat nalillit suut qularnaveeqqutissatut arsaarinnissutaasannarsut, tamatumani misissortassavaa akiitsullip taassumalu inoqutaasa pinngitsoorsinnaanersaasa ajornanngippat kisimik arsaarinnissutaasinnaanissaat.

Imm. 3. Eqqartuussutininik naammassinninniaasartuq akiitsullip illuata initaanik toqqorsiviinillu kiisalu inuttaanik nammineramik misissuiffiginissinnaavoq, taamatut misissuinissaaq pinngitsoorneqarsinnaanngippat pinngitsaaliissummik nammassinninnissaaq naammassiniarlugu. Akiliisitsiniaasartuq qularnaveeqqummik arsaarinniniarnermut atatillugu eqqartuussivimmit piginnaatitaatinani akiitsullip inuttaa misissuiffiginnaanngilaa. Akiliisitsiniaasartuq taamatut piginnaatitaanissamik eqqartuussivimmut qinnuteqarsinnaavoq qularnaveeqqutitut sillimmasiussinissaaq sioqqullugu ingerlanneranilu. Eqqartuussutininik naammanninniaasartuq pinngitsaaliinikkut

naamassinnissaq anguniarlugu piginnaanermik pisariaqartumik atuisinnaavoq. Politiit tamatumani noqqaavigineqarnikkut eqqartuussutininik naamassinninniaasartuutitanut allanut ikiuuttassapput.

Imm. 4. Eqqartuussutininik naamassinninniaasartup illuatungeriit, suliassamik ingerlatsinerimi najuussimangitsut, qanoq pisoqarneranik ilisimatittassavai.

Imm. 5. Eqqartuussutininik naamassinninniaasartuq illuatungiusup, eqqartuussissuserisumit ikiorserneqanngitsup, soqutigisaminik isumaginninnissaanut pisariaqartumik ilitersuisassaaq.

§ 608. Eqqartuussutininik naamassinninniaasartuq suliassamik kinguartitsisinnaavoq,

1) eqqartuussutissaq, aalajangiiffiginissaa naamassinninniaanerup qanoq inerneqarnissaanut sunnuteqartussa, eqqartuussivimmi imaluunniit allaffissornikkut pisorta qarfimmi suli ingerlanneqarpat, imaluunniit

2) pissutsininik immikkut ittunik allanik atuuttoqarpat.

Imm. 2. Akiligassa qarfigisap naamassinninniarnissaa pissutigalugu eqqartuussutininik naamassinninniaanerup kinguartinneqarnissaa nangaanartoqartinneqarpat eqqartuussutininik naamassinninniaasartup tamatumunnga taarsiullugu qularnaveeqqutissanik arsaarinninniarnissaa piumasaaqatitallersinnaavaa akiligassa qarfigisaa qularnaveeqqusiissaaq, imaluunniit aalajangersinnaavaa pigisanik nalilinnik, qularnaveeqqutitut sillimmasiunneqarsimasunik, pinngitsaaliinikkut tuniniaasoqarsinnaassanngitsoq, aalajangersimasumik aalajangiisoqareersinnagu imaluunniit piffissaliussaaq naareertinnagu. Taamatut piffissaliussaaq ajornanngippat sivitsorneqarsinnaavoq.

§ 609. Illuatungiusut arlaat imaluunniit inuk alla politiit imaluunniit eqqartuussutininik naamassinninniaasartup pinngitsaaliinikkut naamassinninniaaneranut akerliliissuteqarpat, imaaliinnarlugu itigartitsissutaasinnaanngitsumik, eqqartuussutininik naamassinninniaasartup pingitsaaliissummik naamassinninniaanissamik noqqaassut itigartitsissutigissavaa suliarlugu eqqartuussivimmut suliassiissutigalugu. Aamma taamaassaaq eqqartuussutininik naamassinninniaasartup pinngitsaaliinikkut naamassinninniaanissamat tunngavissaqarnera qularutigippagu. Suliassaaq eqqartuussivimmut aamma suliassiissutigineqartassaaq eqqartuussutininik naamassinninniaasartuq akerliussummik itigartitsissuteqarsimagaluartorluunniit. Suliassaaq sularineqassaaq saqitsaannernik suliassat pillugit malittarisassat malillugit, taamaassananili eqqartuussivik aalajangiippat eqqartuussutininik naamassinninniaaneq sularineqassaaq immikkoortumi matumani malittarisassat malillugit.

Imm. 2. Naamassinninniaanissamat tunngavigisaa najukkami eqqartuussivimmi imaluunniit Kalaallit Nunaanni Eqqartuussivimmi akerliliissute qarfigineqarpat aammalu uppersaasiinerup, eqqartuussutininik naamassinninniaasartumut uppersaasiinerusinnaasup, kingorna, tak. imm. 3 aamma 4, pinngitsaaliinikkut naamassinninniaanissaaq eqqarsarnartoqartinneqarpat akiligassa qarfigisap noqqaassutaa eqqartuussutininik naamassinninniaasartup malikkumassanngilaa.

Imm. 3. Eqqartuussutit aalajangiissutillu eqqortuunerannut akerliliissutit aamma eqqartuussivikkoortumik isumaqatigiissutigitinneqarsimasanut akerliliissutit, eqqartuussutit ingerlatsinerannut tunngassutillit, pinngitsaaliissutit naamassinninniaasoqarnerani atortuutinniarneqarsinnaanngillat.

Imm. 4. Akiitsut allagartaat checkillu pillugit akerliliissutit aatsaat atortuutinniarneqarsinnaapput,

1) pinngitsaaliinikkut naamassinninniaanissaaq pillugu noqqaassuteqartoq tamatumani isumaqataappat,
2) akerliliissutit akiitsut allagartaata imaluunniit checkip aqqissugaaneranut imarisaanullu tunngassuteqarpat imaluunniit akiitsut allagartaat checkillu pillugit inatsimmi piumasaaqatitnut allanut tunngassuteqarpat akiitsut allagartaanik checkinillu atuisinnaatitaaneq atuutsinniarlugu,

3) akerliliissummi pineqarpat akiitsulik atsiorami nammineersinnaatitaasimangitsoq imaluunniit niaqulaarneq, matumunnga ilanngullugit puiguttormik sakkortuumik nappaateqarneq imaluunniit tarnikkut amigaateqarneq, silaqassutsikkut qaangiuttartumik paatsiveeruttarneq assigisaattulluunniit piginnaasatigut amigaateqarneq pissutigalugu silatusaartumik iliorsinnaasimangitsoqarsimasooq,

atsiorneq peqquserluutaasumik atsiorneruppat, akiitsukkanut uppersaartip checkillu atsiorneqarnerisa kingorna imarisaat peqquserlunnikkut allannortinneqarsimappata imaluunniit akiitsut allagartaat checkiluunniit akiitsulik sinnerlugu naammaginartumik piginnaassusiliinertaqanngitsumik atsiorneqarsimappata, imaluunniit

4) akerliliissut pisisartumit saqqummiunneqarpat aammalu pineqartut tassaappata akiitsukkanut uppersaart pisinermi isumaqatigiissuteqarnermut atasumik atorveqarsimasoq, tak. atuisartunik isumaqatigiissutit ilaat pillugit inatsimmi § 1, imm. 2-4, imaluunniit checki, atuisartunik isumaqatigiissuteqarnermut atatillugu akiligassarsinermi atorveqarsimasoq.

Imm. 5. Eqqartuussutininik naammassinninniaasartoq uppersaartinik, annertussusaat suussusaallu naapertorlugit imaluunniit allat immikkut ittut tunngavigalugit saqitsaanermik suliasap nalinginnaasup suliarineqarnerani saqqummiunneqartariaqartunik, saqqummiusseqqusinngissinnaavoq.

Imm. 6. Eqqartuussutininik naammassinninniaasartup aalajangiinera noqqaassuteqarneq malillugu tunngavilersugaassaaq.

§ 610. Eqqartuussutininik naammassinninniaanermik suliasaq nangitinneqarsinnaavoq illuatungeriit tamanna pillugu isumaqatigiippata, imaluunniit eqqartuussutininik naammassinninniaasartup tamanna pisariaqarsorippagu, pingaartumik pissutigalugu

1) akiitsullip inuulluunniit allap noqqaassutigimmagu qularnaveeqqutitut sillimmasiussinissaq atorunnaarsinneqassasoq, tunngavilersuutigalugu tamanna inuup allap pisinnaatitaaneranut akerliusoq,

2) qularnaveeqqutitut sillimmasiussanik pisussap noqqaassutigimmagu qularnaveeqqusiuunneqartunik tunniussinissaq, toqqortarinninnissaq imaluunniit aqutsiviginninnissaq pillugu

aalajangiisoqaqittariaqartoq, tak. §§ 614, imm. 2, nr. 4, aamma 618, imm. 2-4,

3) qularnaveeqqutitut sillimmasiussanik pisussap piumasarisimmamagu pigisanik nalilinnik § 616-imi taaneqartunik sukumiisumik nalunaarsuisoqassasoq imaluunniit qularnaveeqqutitut sillimmasiunneqartunik naliliisoqassasoq,

4) akiitsulik eqqartuussutininik naammassinninniaanermi najuussimanngimmat, taassumalu maanna noqqaassutigimmagu piginnaatitaaffimminik §§ 618, imm. 1, aamma 619-623 malillugit atuisinnaatitaassalluni, imaluunniit

5) akiitsullip aalajangersumik oqaatigeqqummagu qularnaveeqqutissatut sillimmasiussineq atorunnaarsinneqarsimasoq, pissutsit qularnaveeqqutissatut sillimmasiussisoqarnerata kingorna pisut nassatarisaannik, imaluunniit pinngitsaaliinikkut naammassinninniaanissamut tunngavigisaq eqqartuussutikkut atorunnaarsinneqarsimammat imaluunniit atuussinnaassuseqanngitsutut nalunaarutigineqarsimammat.

§ 611. Kinaluunniit pisassanik imaluunniit piumasaqaatinik, tunngaveqanngitsutut paasisanik, pinngitsaaliinikkut naammassinninniaanissamik noqqaassuteqartoq illuatungerisap annaasaqaataanut taarsiissutininik narrujuummisitaanermullu taartisiassanik akiliissaaq. Aamma akiligassaqaarfigisaq taamatulli akisussaaffeqassaaq, eqqartuussutininik naammassinninniaasartoq pinngitsaaliinikkut naammassinninniaanissamut iliuuseqarsimappat taamaaliornissamut piumasaqaatit atuutinngitsut, tamannalu akiligassaqaarfigisamut avoqqaarliutaasinnaappat. Eqqartuussutininik naammassinninniaasartoq illuatungiusumut pinngitsaaliinikkut iliuuseqarnissamik aalajangiisimappat taamaaliornissamut piumasaqaatit atuutinngitsut, imaluunniit naammassinninniaaneq kukkunikkut inummut allamut pisimappat pineqartoq taanna eqqartuussutininik naammassinninniaasartumiit taarsiivigineqarsinnaatitaavoq aamma taartisisinneqarsinnaatitaavoq oqaaseqatigiit siulliit naapertorlugit annertussuseqartunik.

Imm. 2. *Imm. 1* naapertorlugu piumasaqaatit najukkami eqqartuussivimmut saqqummiunneqartassapput piffissamiit pineqartup piumasaqaatiminik atuutsitsinialersinnaaneraniit kingusinnerpaamik qaammatit marluk qaangiunneranni. Eqqartuussivik tunngavilersukkamik aalajangiissaaq. Najukkami eqqartuussiviup aalajangiinissaq Kalaallit Nunaanni Eqqartuussivimmut innersuussutigisinnaavaa, tak. § 56.

Imm. 3. *Imm.* 2 malillugu aalajangiinerit illuatungeriinnit aamma Domstolsstyrelsimit aalajangeqqitassanngortinneqarsinnaapput.

§ 612. Saqitsaannernik suliassat pillugit aalajangersakkat, matumunnga ilanngullugit innersuussisarneq, itigartitsisarneq, inuup pingatsiuttup suliassami ilanngussinnaatitaanera, eqqartuussissuserisumik aamma eqqartuussinermi sinniisitut pisinnaatitamik ivertitsisarneq kiisalu suliassanut aningaasartuutit, eqqartuussutinik naammanninniaanermik suliassani taamatulli atortuutinneqassapput, atortuutinneqassallutittaaq eqqartuussutinik naammassinninniaanermik suliassanik, akertiliiissutinik imaluunniit illuatungerisamiit piumasaqaammik saqqummiussiviusunik, suliaqarnermi.

Imm. 2. Inatsiseqarnermut ministerimik isumaqatiginninniarnepur kingorna inatsisartut inatsisaatigut imaluunniit inatsisartut peqqussutaatigut aalajangersarneqarsinnaapput suliassani, Namminersornerullutik Oqartussanut ataaniittuni, pisassanik akiliisitsiniartarnermik ilassutitut aalajangersakkat pisariaqartut.

Qularnaveeqqutitut sillimmasiussineq

§ 613. Aningaasanik piumasaqaatit naammassiniarneqartassapput akiitsullip pisuussutaataanik ima annertutigisunik qularnaveeqqutitut sillimmasiussaqaarnikkut, eqqartuussutinik naammassinninniaasartup naliliinera naapertorlugu piumasaqaatip kiisalu akiliisitsiniaanermi aamma pigisanik nalilinnik, qularnaveeqqutitut sillimmasiuneqarsimasunik, akitsorterussinissaq tikillugu toqqortarinninnermut aningaasartuutit matussuserneqarnissaannut pisariaqarsorineqartunik.

Imm. 2. Pinngitsaaliinikkut naammassinninnissamik noqqaassut piumasaqaatip ilaannaanut killilerneqarsinnaavoq, taamaattoqassananili eqqartuussutinik naammassinninniaasartuq isumaqarpat piumasaqaammik avitsinissaq akiitsullip soqutigisaanut akertilisoq.

Imm. 3. Eqqartuussutinik naammassinninniartartup qularnaveeqqutissatut sillimmasiussassat naliliiffigissavai, tamanna illuatungeriit arlaannit piumasarineqarpat imaluunniit naliliinissaq eqqartuussutinik naammassinninniaasartumit pisariaqarsorineqarpat.

Imm. 4. Naliliinissami immikkut paasisimasalimmik ikiorteqarnissaq pisariaqarpat eqqartuussutinik naammassinninniaasartup aalajangissavaa illuatungeriit arlaata kiap naliliinermi aningaasartuutissat akilerallasanerai imaluunniit inaarutaasumik akilissanerai. Naliliisitsinissaq piumasaqaatitalerneqarsinnaavoq aningaasartuutissanut tamanna sioqqullugu qularnaveeqqusiisoqassasoq.

Imm. 5. Eqqartuussutinik naammassinninniaasartup allattaavimminut pigisat nalillit qularnaveeqqutitut sillimmasiunneqartussat allattortassavai. Naliliisoqarsimappat naliliinerup annertussusaa ilanngullugu taaneqassaaq.

§ 614. Eqqartuussutinik naammassinninniaasartup aningaasatigut piumasaqaatit naammassinninniarsinnaavai akiitsullip pisuussutaataanik qularnaveeqqutitut sillimmasiussinikkut, siunissamili pissarsiassai pinnagit. Qularnaveeqqutitut sillimmasiussisoqarsinnaavoq, naak pigisat nalillit akiitsoqarfigineqareeraluartut.

Imm. 2. Eqqartuussutinik naammassinninniaasartup taamaalilluni

- 1) akiitsulik aningaasaataanik arsaarsinnaavaa taakkulu akiligassaqaarfigisamut tunniullugit,
- 2) akiitsulik aningaasatigut pisasaanik, matumunnga ilanngullugit sulinikkut akissarsiassat, arsaarsinnaavaa taakkulu akiligassaqaarfigisamut tunniullugit,
- 3) illu qularnaveeqqutitut sillimmasiussinnaavaa, pinngitsaaliinikkut tuniniaanissaq siunertaralugu,
- 4) pigisanik nuunneqarsinnaasunik pigisanillu nalilinnik allanik qularnaveeqqutitut sillimmasiussaqaarsinnaavoq pinngitsaaliinikkut tuniniaanissaq siunertaralugu aammalu noqqaassuteqarneq naapertorlugu akiitsulik pigisanik nalilinnik tamakkuninnga

atuisinnaajunnaarsissinnaavaa. Tuniniaaneq siusinnerpaamik pisinnaavoq qularnaveeqqutitut sillimmasiussinnermiit sapaatit akunnerisa sisamat qaangiunneranni.

Imm. 3. Piumasaqaatit arlaliusut pigisami nalilimmi ataatsimi qularnaveeqqutissartallit tulleriiaarnerat qularnaveeqqutitut sillimmasiussinissamik noqqaassutip qanga tunniunneqarsimaneraniit aalajangerneqartassaaq, taamaattoq tak. imm. 4, piumasaqaatit ilaata ataatsip arlallilluunniit salliutinneqartussaataanerani allatut tulleriiaarinissamat sunniuteqassanngippat. Noqqaassutilli ullup ataatsip ingerlanerani takkussimasut naligiissinneqassapput.

Imm. 4. Pigisaaq nalilik ataaseq eqqartuussivimmit pinnani eqqartuussutinik naammassinninniaasartunit allanit qularnaveeqqutissatut sillimmasiunniarneqarpat, sillimmasiussinissap tulleriiaarinnermi inissinnissaa naatsorsorneqartassaaq sillimmasiussinerup qanga pinera tunngavigalugu.

Imm. 5. Imm. 3 aamma 4 atortuutinneqassanngillat pigisamik aalaakkaasumik (illumik), umiarsuarnik silaannakkoortatinilluunniit nalunaarsukkanik kiisalu aningaasaateqarfimmi naliliutinik qularnaveeqqutissatut sillimmasiussinnermi, tak. pappiaqqanik nalilinnik il.il. niuerneq pillugu inatsimmi § 59, imm. 2.

Imm. 6. Pigisanik nuunneqarsinnaasunik, taamaallaat pinnagit umiarsuit silaannakkoortatillu nalunaarsukkat, qularnaveeqqutitut sillimmasiussineq atorunnaartassaaq qularnaveeqqusiussinnermiit ukiup ataatsip qaangiunneratigut, taamaattoqassananili qularnaveeqqusiussamik pisassalik tamanna sioqqullugu piumasaqarsimappat pinngitsaaliinikkut tuniniaasoqassasoq imaluunniit suliareqqitassanngortitsinikkut, aalajangeqqitassanngortitsinikkut imaluunniit pingatsiuttup pisassaqaarneratigut taamaaliornissaminut akornuserneqarsimappat. Taamaassappat akornutaasup atuukkunnaarneraniit sapaatit akunnerisa arfineq-pingasut qaangiunneranni qularnaveeqqusiussatut sillimmasiussineq atorunnaassaaq. Taamaassaattaq aningaasaateqarfimmi naliliutinik, tak. pappiaqqanik nalilinnik niuerneq il.il. pillugit inatsimmi § 59, imm. 2, aammalu aningaasatigut pisassamik qularnaveeqqutitut sillimmasiussinnermi, pisassanut tunngatillugu pigisat nuunneqarsinnaasut akiitsoqarfigineqarnerinut uppersaammik allatulluunniit allakkiamik uppersaasiisoqarsimappat, taakku immikkut ittuussusiisa nassatarisaannik akiitsulik pisassaqaarnermut allagartaq naapertorlugu allagartamik piginnittup saniatigut allamat akiliinermigut akiliisussaajunnaarsinneqassanani.

§ 615. Akiitsulik pigisanik nalilinnik qularnaveeqqutitut sillimmasiusaasunik atuisinnaatitaanngilaq, sillimmasiussamik pisassalimmut ajoqusiisinnaasumik. Eqqartuussutinik naammassinninniaasartup qularnaveeqqutissatut sillimmasiussinerup inatsisitigut kingunerisassai akiitsulimmut ilisimatitsissutigisassavai, matumunnga ilanngullugu ilisimatitsissutigalugu oqaaseqatigiinnik siullernik unioqqutitsineq pinerluttulerinnermi inatsisitigut akisussaataaneramik nassataqarsinnaasoq. Akiitsulik najuutinngippat ilisimatitsissuteqarneq tamanna pisinnaavoq allakkatigut nalunaaruteqarnikkut imaluunniit akiitsulik sinnerlugu orniguttunut oqaatsitigut ilisimatitsissuteqarnikkut.

§ 616. Pigisamik aalaakkaasumik (illumik) qularnaveeqqutissatut arsaarinninnermi, pinngitsaaliinikkut naammassinninnissamik noqqaassummi allatut allassimasoqartinnagu, pigisat nuunneqarsinnaasut illumut atasut ilaapputtaaq, tak. qularnaveeqqutit pillugit inatsimmi § 2. Pisattanik ataasiakkaanik allattuinnissaaq aatsaat pisariaqartassaaq akiligassaqaarfigisaaq tamatuminnaga noqqaassuteqarsimappat. Qularnaveeqqutitut sillimmasiussat atortunik ilaqarpata aamma taama ittutigut pigisat nalillit, kingusinnerusukkat pigisamat ilanngunneqartussat, qularnaveeqqutitut sillimmasiussinnermi ilaatinneqartassapput. Oqaaseqatigiit siullerniit pingajuinut taamatulli atortuutinneqassapput umiarsuarnik imaluunniit silaannakkoortammik nalunaarsukkamik qularnaveeqqutissatut sillimmasiussinissami.

§ 617. Pisassat, pigisat nuunneqarsinnaasut akiitsoqarfigineqarnerinut allagartanut attuumassuteqartut, akiligassaqaarfigisamat tunniunneqartassapput, allagartaq taanna tunniullugu imaluunniit eqqartuussutinik naammassinninniaasartumut paarisassanngortillugu. Pisassannik allamik tunniussineq

pisassaaq, pisassat naapertorlugit tamakkiisumik ilaannaakortumilluunniit akiligassaqarfigisamut akiliinissamik akiitsulimmut ilisimatitsissuteqarnikkut.

§ 618. Qularnaveeqqutitut sillimmasiussisoqassanngilaq pigisanik nalilinnik, akiligassallip taassumalu inoqutaasa pilimaniangitsumik angerlarsimaffeqarnissaannut inuuniarnermillu pilimaniangitsumik attassiinnarnissaannut pisariaqarsorineqartunik. Akiitsulik pigisani nalilinni taamaattuni qularnaveeqqutitut sillimmasiussinissamik atuussinnaasumik akuersisinnaanngilaq.

Imm. 2. Pigisanik nuunneqarsinnaasunik qularnaveeqqutitut sillimmasiussinermi eqqaartuussutinik naammassinninniaasartup aalajangersinnaavaa akiitsulik pigisanik nalilinnik, qularnaveeqqutitut sillimmasiunneqarsimasunik, arsaarneqassanngitsoq, taassuma eqqortittuarpagu naafferartumik akilersuinissaq pillugu aaqqiineq, eqqartuussutinik naammassinninniaasartumit aalajangersarneqarsimasoq akiitsulimmillu akuersissutigineqarsimasoq. Naafferartumik akilersuinissamik aaqqiineq ukioq ataaseq sinnerlugu sivisussulernerneqarsinnaanngilaq, taamaassinnaallunili akiligassaqarfigisaaq tamatumani isumaqataasimappat.

Imm. 3. Akiitsullip naafferartumik akilersuinissamik eqqartuussutinik naammassinninniaasartup aalajangersagaa akiitsullillu isumaqataaffigisimasaa eqqortittuarpagu eqqartuussutinik naammassinninniaasartup aalajangersinnaavaa illumik, akiitsulimmit taassumaluunniit inoqutaanit inigineqartumik, qularnaveeqqutitut sillimmasiussinissaq illumik pinngitsaaliinikkut tuniniaanissamut piginnaatitsissanngitsoq.

Imm. 4. Imm. 2 aamma 3 atortuutinneqassanngillat qularnaveeqqusiussaqaarluni taarsigassarsinermi allagartaq pigisami nalilimmi pineqartumi qularnaveeqqusiussitalik tunngavigalugu qularnaveeqqutitut sillimmasiussinermi.

§ 619. Qularnaveeqqutitut sillimmasiussisoqarsinnaanngilaq aningaasani pisassani, pisassaqartup nammineq saniatigut allanut akileqquneqarsinnaanngitsuni.

Imm. 2. Qularnaveeqqutitut sillimmasiussisoqarsinnaanngilaq pilersuutitut akilersuutisiassanik piumasaaqatini, aappariinneq pillugu aamma meeqqat inatsiseqartitaanerit pillugu inatsiseqarneq naapertorlugu pisassarisaasuni.

Imm. 3. Qularnaveeqqutitut sillimmasiussisoqarsinnaanngilaq soraarnerussutisiassani imaluunniit ikiorsiissutisiassani allatulluunniit pisortaniit imaluunniit aningaasaateqarfittut pilersitaniit allatulluunniit ikiuniutitut suliffeqarfinniit pisassani, ullormiit aningaasanik tunniullugit akileeqqusiffiusinnaasumiit qaammatit pingasut qaangiutereersimangippata. Inatsisini allani eqqartuussisutigut malersorneqarsinnaatitaannginneq pillugu malittarisassat tamatumani attorneqassanngillat.

Imm. 4. Qularnaveeqqutitut sillimmasiussisoqarsinnaanngilaq akissarsiassani suli tunniunneqanngitsuni allatulluunniit nammineerluni sulinikkut akissarsiatut akiliutaasussani, ullormiit piffissap akissarsiorfiusup imaluunniit akiliutaasussanik katersiffiusup naaffigisaaniit ullut arfineq-marlunnit amerlanerusut qaangiutereersimangippata.

Imm. 5. Immikkoortumik qularnaveeqqutitut sillimmasiussisoqarsinnaanngilaq illumik attartornermi akiliutissanik piumasaaqatini, piumasaaqatip akilerneqarfissaa qaangiutereersimatinnagu.

§ 620. Innarluuteqarneq imaluunniit pilersuisigisamik annaasaqarneq pillugu taartisiassanik imaluunniit tamatumunnga atatillugu taartisariatitanik qularnaveeqqutitut sillimmasiussisoqarsinnaanngilaq, aningaasat ajoquserup imaluunniit inuup pilersuisigisaminik annaasaqarsimasup pisassarippagit. Aningaasalli tunniunneqareersimappata arsaarinnittoqarsinnaavoq, taamaattoqassananili aningaasat taakku aningaaserivimmi imaluunniit sparekarsimi kontomut immikkoortumut toqqornerisigut allatulluunniit iliorluni akiitsullip naliliutaaniit allaniit erseqqissumik immikkoortitaasimappata. Aamma taamaassaaq aningaasaatit erniaannut iluanaarutisiassartaannullu tunngatillugu.

Imm. 2. Aningaasaanngitsutigut ajoquserneqarnermut taartisariatitassatut piumasaaqatinik, imm. 1-

imi pineqanngitsunik, aatsaat qularnaveeqqutitut sillimmasiussisoqarsinnaavoq aningaasat tunniunneqareerpata.

Imm. 3. Sulinikkut iluanaarutissanik annaasaqarnermi taarsiivigineqarnissamik piunasaqaatinik qularnaveeqqutitut sillimmasiussisoqarsinnaanngilaq ullormiit aningaasat akileqquneqarsinnaaffigisaanniit ullut arfineq-marlunniit amerlanerusut qaangiuteriinnippata.

Imm. 4. Taamaattorli aningaasat piunasarissallu imm. 1-imi aamma 2-mi taaneqartut qularnaveeqqutitut sillimmasiunneqarsinnaapput, piunasarissat taakkualu annertussusaat eqqartuussivinniit akuersissutigineqarnerisa imaluunniit annertussusilerneqarnerisa kingorna, akiitsulik taamaaliornissamut akiligassanik naammassisitsiniaasoqarnerani akuersisimappat, imaluunniit akiitsullip pigisaq nalilik piunasarissamut, qularnaveeqqutitut sillimmasioqqusanut, qularnaveeqqusiussimanngippagu.

§ 621. Tunissutinik arsaarinnittoqarsinnaanngilaq, tunisisup tunissutinik tunniussisoqarnerani aalajangersimappagu tunnissutinik arsaarinnittoqarsinnaassanngitsaq. Aamma tunissutit taama ittut erniaattut iluanaarusiassartaasigullu tigusanik ullormiit akilerneqarfigisaanniit qaammatit arfinillit qaangiutsinnagit qularnaveeqqutitut sillimmasiussisoqarsinnaanngilaq.

Imm. 2. Pigisanik nalilinnik, akiitsullip piunasarissat imm. 1-imi taaneqartut tunngavigalugit pissarsiarissimasaanik, qularnaveeqqutitut sillimmasiussisoqarsinnaanngilaq, pissarsineq piunasaqaatillu inuit amerlanersaannut tunngatillugu assigiimmik aqqissuussinerup ilagippatigik aqqissuussinermilu siunertarisanik pingaartitsinissaq qularnaveeqqutissatut arsaarinninnissamut pingaarutilimmik akerliussappat.

Imm. 3. Taamaattorli pigisanik nalilinnik imm. 1-imi aamma 2-mi taaneqartunik qularnaveeqqutitut sillimmasiussisoqarsinnaavoq akiitsulik taakkuninnga akornuteqanngitsumik atuisinnaatitaappat, imaluunniit akiitsullip atuinera akornuserniarlugu iliusissanik naammaginartunik aalajangersaasoqarsimanngippat.

Imm. 4. Tunissutisissup taakkuninnga atuisinnaatitaannginnera pillugu piunasaqaatit qularnaveeqqutitut sillimmasiussinermut ilaatinneqartutut isumaqarfigineqassapput, pissutsit pillugit allatut allassimasoqanngippat.

§ 622. Pigisat, akiitsulimmut inuttut imaluunniit akiitsullip inoqutaanut immikkut ittumik pingaarutillit, qularnaveeqqutitut sillimmasiunneqarsinnaanngillat, sillimmasiunneqarsinnaallutilli pigisat taakku ima naleqartigippata akiligassaqaarfigisap piunasaqaataanik naammassinninniaanerup avataaniitinneqarnissaat naleqquttuosorineqarani.

Imm. 2. Atortunik ikiuutinik, timikkut amigaateqarneq nappaateqarnerluunniit pissutigalugu pinngitsoorneqarsinnaanngitsunik, qularnaveeqqutitut sillimmasiussisoqarsinnaanngilaq.

§ 623. Aningaasat, inunnut innuttaasut sinnerlugit suliaasaqartitaasunut, ilisimannittunut imaluunniit misissuisartunut naliliisartunullu aningaasartuutitut taartisariatitatut suliaasarititaasumillu suliaqarnerup akornusersuutaaneranut taartisariatitatut tunniunneqareersut, qularnaveeqqutitut sillimmasiunneqarsinnaanngillat.

§ 624. Piunasarissat pisolalisoornissaat kipitinneqarsinnaavoq qularnaveeqqutitut sillimmasiussinissaq pillugu noqqaassummik tunniussaqaarnikkut, akiligassaqaarfigisap tunngavissaqanngitsumik kinguarsaanani qularnaveeqqutitut sillimmasiussisoqarnissaa qinnutigippagu.

Akissarsianik allatullu tunniullugit akilerneqartussanik ilanngartuineq

§ 625. Aningaasat tunniunneqartussat, akiitsullip pisassai, uninngatinneqarnerisigut aningaasatigut piunasarisanik pinngitsaaliinikkut naammassinninniaasoqarsinnaavoq pisassanut § 598, imm. 2, nr. 1-imi, 2-mi 4-mi, 5-imi 6-imilu pineqartunut tunngatillugu kiisalu tamanna suliaasani

Namminersornerullutik Oqartussat suliarisassaanni inatsisartut inatsisaasigut imaluunniit inatsisartut peqqussutaasigut aalajangersarneqarsimatillugu. Ilanngartuisoqarsinnaavoq aningaasani tunniunneqartussani tamani, matumunnga ilanngullugit sulinikkut akissarsiassat kiisalu tunisassianik tunisaqarnermi pissarsiassat. Oqaaseqatigiit siulliit malillugit pinngitsaaliinikkut naammassinninniaaneq taamatuttaaq pisinnaavoq pinerluttulerinermi inatsimmi § 128-mi pineqartut akiliisitsissutissatigut piumasarianut tunngatillugu.

Imm. 2. Akiitsullip akileraarutit ilanngaatigereerlugit pisassaasa pingajorarterutaat sinnerlugit arlaannaatigulluunniit ilanngaasoqarsinaangilaq. Taamaattorli akissarsianik allatullu akilerlugit tunniunneqartussanik ilanngartuinissaq pillugu aalajangiinermi akiitsulik taassumalu inoqutai inuuniutissanik pisariaqartunik pissaqartinneqartassapput.

Imm. 3. Piumasarisat arlaliusut pillugit ilanngartuisoqassappat aningaasat ilanngaatissat eqqartuussutinik naammassinninniaasartup erseqqinnerusumik aalajangigai malillugit agguataarneqassapput. Pilersuinermit akilersuutit inuit ataasiakkaat piumasarisat siulliullugit naammassiniarneqassapput. Aamma agguataarinermi eqqartuussutinik naammassinninniaasartuq aalajangersinnaavoq piumasarisat, akiitsulimmut imaluunniit akiitsullip inoqutaasa inuuniarnerannut aalajangiisuusumik pingaarutillit, siulliullugit naammassiniarneqartassasut..

Imm. 4. Kalaallit Nunaanni akileraarutitigut akitsuusiussatigullu piumasarisat ilanngartuutiginissaat naammassiniarnissaallu pillugit atortuutinneqartassapput tamakku pillugit inatsisini immikkut ittuni aalajangersakkat.

§ 626. Pilersuinermit akilersuutinik ilanngartuinikkut akilersueqquisinnaajunnaartoqassaaq, tamanna pillugu noqqaassut imaluunniit akilersuinissamut malittarisassat atuuttut malillugit akilersuutinik siumoortumik akiliisarnissamik noqqaassut akilersuutit akilernneqareerfissaanniit ukioq ataaseq qaangiutsinnagu saqqummiunneqanngippat.

Imm. 2. Piumasarisanic ilanngartuisoqarsinnaangilaq akileereerfissap ukiut tallimat qaangereersimappagit.

§ 627. Kinaluunniit, ilanngartuinissamik peqqussummik tigusaqarsimasoq, taarsiissuteqartussaataivoq, peqqussutaasoq malinneqanngippat. Taarsiissutissat akilersinniarneqarsinnaapput kapitalimi matumani malittarisassat malillugit, tak. § 598, imm. 2, nr. 7.

Aningaasatigut piumasarisaniit allaanerusunik pinngitsaaliinikkut naammassinninniaaneq

§ 628. Pisussaaffilikkap illu qimassappagu imaluunniit taassuminnga atuisinnaatitaasumut tunniussappagu imaluunniit pisussaaffiligaq pigisamik aalajangersimasumik tunniussaqaassappat, eqqartuussutinik naammassinninniaasartuq sapinngisamik pisussaaffiup naammassineqarnissaanik pinngitsaaliissuteqassaaq, pisussaaffiligaq illuaniit anisillugu imaluunniit pisussaaffiligaq pigisamik arsaarlugu. Pisussaaffiligaq allakkiamik uppersarsaammik tunniussaqaassappat imaluunniit atsiussappat, eqqartuussutinik naammassinninniaasartuq tamatumunnga isumaginnissinnaavoq, pisussaaffilikkap nammineq suliaatut atsiugaatulluunniit sunniuteqartussamik.

§ 629. Kinaluunniit aningaasaanngitsumik allamik akileeqquneqarpat eqqartuussutinillu naammassinninniaasartup piumasarineqartoq taanna § 628 malillugu naammassitissinnaanngikkuniuk suliaasaq eqqartuussivimmut suliaasangortissavaa. Eqqartuussisut pisassallip naammassinninnissami soqutigisaa aningaasanngorlugu naliliiffigisinnaavaat imaluunniit akuerisinnaallugu pisassallip pisussaaffilikkap iliuusissai suliarissagai imaluunniit allanut suliaritissagai.

Imm. 2. Aningaasat, imm. 1 malillugu eqqartuussisut aalajangiinerat naapertorlugu pisassalimmut pisassarititassat, qularnaveeqqutitut sillimmasiussinikkut akilersinniarneqarsinnaapput.

§ 630. Pisussaaffiligaq arlaannik ilaginnagaqassappat taanna eqqartuussutininik naammassinninniaasartumit sapinngisamik unioqquutisisinnaveersaarneqassaaq aamma pisassallip piginnaatitaaneranut akerliusutut iliuusaasut suujunnaarsinneqassapput.

§ 631. Angajoqqaatut oqartussaassuseqarneq aammalu meeqqamik najorteqarsinnaatitaaneq pillugit aalajangersakkat naammassiniarneqarsinnaapput pinngitsaaliinikkut akiliisitsissuteqartarnermik atuinikkut imaluunniimmi pissaanermik atuinikkut. Eqqartuussutininik naammassinninniaasartuq naammassinninniaanermi periaasissaminik toqqaaniarnermi piumasaqartup noqqaassutaanik pinngitsoorani malinnittussaangilaq. Naammassinninniaaneq pisinnaassanngilaq meeqqap tarnimigut timimigulluunniit peqqissusaa tamatumuuna navianartorsiorujussuartinneqassappat. Nalornisooruteqarnerni eqqartuussutininik naammassinninniaasartuq naammassinninniaanermik kinguartitsisinnaavoq immikkut paasisimasallip nalunaarutaanik piniartoqareernissamut.

Imm. 2. Eqqartuussutininik naammassinninniaasartuq inummik nakerisarsiortuunngitsumik aggersaasinnaavoq, immaqa kommunip sinniisuutitaanik, suliaassap suliarineqarnerani meeqqamut iluaqusiissutissanik isumaginnittussamik. Eqqartuussutininik naammassinninniaasartuq pissutsit naapertuutigalugit meeqqamik tunniussinissaq imaluunniit najorteqarsinnaatitaaneramik ingerlassinissaq pillugu piffissami sivikinnerusumi kinguartitsigallarsinnaavoq.

Imm. 3. Pinngitsaaliinikkut akiliisitsisarneq atorneqassappat suliaassaq najukkami eqqartuussivimmut saqqummiunneqassaaq, tassani ullormoortumik imaluunniit sapaatip akunneranoortumik akiliisitsissutininik, meeqqap tunniunneqarnissaa tikillugu akilerneqartartussanik, aalajangiiffiginnittoqassaaq. Meeqqamilli najorteqarsinnaatitaaneramik ingerlatsinissaq pillugu aalajangersakkanik naammassinninniaanermi ataasiaannartumik akiliisitsissutissanik aalajangiisoqarsinnaavoq, piffissami erseqqinnerusumik taasami najorteqarsinnaatitaaneramik atuinissaq pillugu aalajangersagaq malinneqanngippat akilerneqartussanngortussanik.

Erniinnaartumik naammassinninniaanerit

§ 632. § 628-mi taaneqartutut pigisatigut piumasarisat eqqartuussutininik naammassinninniaasartumit pinngitsaaliinikkut naammassiniarneqarsinnaapput pisarnertut pinngitsaaliinermi tunngavigisassanik atuinnikkaluarluni eqqartuussutininik naammassinninniaasartup sulissuteqarneratigut, pisassallip akiliisitsisarnermut eqqartuussivimmi uppernarsarsinnaappagu imaluunniit qularutissaajunnaarsippagu pisussaaffilimmiit pisassaqlarluni.

Imm. 2. Imm. 1 taamatulli atortuutinneqassaaq eqqartuussutininik naammassinninniaasartup ikiuunnissaa pisariaqaleraangat angajoqqaatut oqartussaassutsimik sernissuisuusooqartitsinermillu atortitsiniarnermi kiisalu meeqqap najorallagassaanut tunngatillugu isumaginninnermi ataatsimiititaliap aalajangiinerinik atortitsiniaanerme. Naammassinninniaaneq pisassaaq § 631 malillugu.

§ 633. Pisassallip piumasaqaataanut akerliliissutininik saqqummiussisoqarpat, pisassallilu pisassaqlarluni allakkiatut uppernarsaatissatigut imaluunniit illuatungiusup nassuiaateqarneratigut uppernarsaasersinnaanngippagu, eqqartuussutininik naammassinninniaasartuq noqqaassutip suliarinissaanik itigartitsissaaq. Pisassallip pisinnaatitaanini qularutissaajunnaarsissinnaappagu aammalu pisassallip naammassinninniaanissaa pillugu naammassinninniaanissap naammassillugu suliarineqarnissaata itigartitsissutigineqarnissaa eqqarsarnartoqartinneqarpat, eqqartuussutininik naammassinninniaasartup suliaassaq naammassisinnaavaa piumasaqaatigalugu pisassalik qularnaveeqqusiissasoq, akiitsullip taamaasiornikkut ajoquserneqarsinnaaneranut. Qularnaveeqqusiissutit tunniunneqassapput eqqartuussutininik naammassinninniaasartup piffissaliussaa qaangiutsinnagu suliaasiisoqanngippat imaluunniit aalajangeqqitassanngortitsisoqanngippat.

Imm. 2. Eqqartuussutininik naammassinninniaasartup qaqutiguussimik akuerisarsinnaavaa imm. 1- imi taaneqartuniit allaanerumik uppernarsaatissanik saqqummiisoqassasoq.

Imm. 3. Eqqartuussutunik naammassinninniaasartup inissiamit attartukkamiit attartortumik anisitseqqussissut itigartitsissutigisinnaavaa, attartortut taassumaluunniit inoqutai tamatumuuna inissaaruttussanngussappata aammalumi pissutsit anisitseqqussissutip naammassiniarnissaanut akerliuppata.

Kapitali 48

Pinngitsaaliinikkut tuniniaaneq

Aalajangersakkat nalinginnaat

Pinngitsaaliinikkut tuniniaanissami tunngavigisassat

§ 634. Kapitalimi matumani pineqarput

- 1) § 614, imm. 2, nr. 3 aamma 4 malillugit qularnaveeqqutitut sillimmasiussineq tunngavigalugu pinngitsaaliinikkut tuniniaanerit,
- 2) qularnaveeqqusiisarneq pillugu inatsimmi § 5 a malillugu pigisanik nalilinnik qularnaveeqqusiussanik pinngitsaaliinikkut tuniniaanerit, aamma
- 3) pigisanik nalilinnik, qularnaveeqqusiussanik toqusup qimataaneersunik imaluunniit akiliisinnaajunnaartup pigisaneersunik, tuniniaanerit.

Pinngitsaaliinikkut tuniniaanissamik noqqaassut

§ 635. Pinngitsaaliinikkut tuniniaanissamik noqqaassut tunniunneqartassaaq eqqartuussutunik naammassinninniaasartumut, tuniniaanermik ingerlatsisussamut, tak. § 597, imm. 1 aamma 4, aamma § 601. Noqqaassut allaganngorlugu suliassaaq paasissutissartaqassaarlu suliassap sularinissaanut pisariaqartinneqartunik, aammalu qularnaveeqqutitut sillimmasiussinerup sularineqarnerata assilineqarneranik ilanngussisoqassaaq. Tuniniaanermi periaasissanik siunnersuuteqartoqarsinnaavoq. Akiitsulik ingerlatsiviuppat aammattaaq ilanngunneqassaaq ingerlatsivik sinnerlugu atsiorsinnaatitaanermut uppernarsaatip assilineqarnera Erhvervs- og Selskabsstyrelsenimeersaq.

Piffissaq pinngitsaaliinikkut tuniniaalerfissaq

§ 636. Eqqartuussutunik naammassinninniaasartup sianigissavaa qularnaveeqqutitut sillimmasiussineq pillugu aalajangiinermik piffissaq aalajangeqqitassanngortitsivissaq, tak. § 706, qaangiutereertinnagu tuniniaasoqannginnissaa. Qularnaveeqqutitut sillimmasiineq pillugu aalajangiinerup aalajangeqqitassanngortitaaneranut uppernarsaatissanik saqqummiussisoqarpat pinngitsaaliinikkut tuniniaanissaaq aalajangeqqitassanngortitsissutip sularineqarnerani unitsikkallarneqassaaq.

Imm. 2. Eqqartuussutunik naammassinninniaasartoq piffissami siusinnerusumi pinngitsaaliinikkut tuniniaanissamik aalajangiisinnaavoq, qularnaveeqqutitut sillimmasiussaasut asiujasuuppata imaluunniit piffissap aalajangeqqitassanngortitsivissap naanissaanut uninngatinnerisigut nalikillerujussuassappata.

Kalerrisarneq

§ 637. Pinngitsaaliinikkut tuniniaasitsisoqalersinnagu eqqartuussutunik naammassinninniaasartup pisassallit ilisimaneqartut tamaasa, pigisamut nalilimmut tunngatillugu pisinnaatitaanerat imaluunniit pisussaaffii tuniniaanermi sunnerneqassasorineqartut, kalerrissavai.

Nalunaarut

§ 638. Eqqartuussutininik naammassinninniaasartuq §§ 646-mut, 647-mut aamma 660-imut naapertuuttumik pinngitsaaliinikkut tuniniaasitsinissap nalunaarutaanissaanik aalajangiiffiginnaasaaq.

Aningaasartuutit

§ 639. Pinngitsaaliinikkut tuniniaanermi aningaasartuutit tuniniaaqquisup akiligassarai. Taakku pinngitsaaliinikkut tuniniaanermi akissatut neqeroorutaasup avataatigut pisisumit inaarutaasumik akilerneqassapput – taamaattorli pinngitsaaliinikkut tuniniaanissaq pillugu piumasarisani aningaasat annerpaaffissaattut taaneqartunut killilerlugit. Eqqartuussutininik naammassinninniaasartup aalajangersinnaavai tuniniaaqquisup aningaasartuutaasussanut qularnaveeqquusiinissaa taakkualu annertussusissaat suussusissaallu.

Tuniniaanermut iluaqutaasussatut iliuusissat

§ 640. Eqqartuussutininik naammassinninniaasartuq tuniniaanermut iluaqutaasussanik sukkulluunniit aalajangersaasinnaavoq. Pinngitsaaliinikkut tunisaqarneq pisassaaq annerpaamik akiliiumasumut.

Pinngitsaaliinikkut tuniniaanissami naammassisassat

§ 641. Eqqartuussutininik naammassinninniaasartup qularnaartassavaa pisiumallutik nalunaaruteqartut pinngitsaaliinikkut tuniniaanermut piumasaqaatinik ilisimatinneqartarnissaat.

Piginnaatitaanerit atorunnaarnerat

§ 642. Pinngitsaaliinikkut tuniniaaneq kapitalimut matumunnga naapertuuttumik pisimappat, piginnaatitaaffiit ilisimaneqanngitsut, nalunaarsorneqanngitsut, pinngitsaaliinikkut tuniniaasoyalersinnagu atortinniarneqarsimanngitsut, eqqunngitsumik tunngavillit tamarnik atorunnaassapput, allap piginnittuusinnaanera eqqaassanngikkaanni.

Imm. 2. Pisisoq tuniniaanermi piumasaqaatinik naammassinnissimappat pigisap nalilik pillugu piginnaatitaaffiit matussuserneqanngitsut atorunnaassapput. Eqqartuussutininik naammassinninniaasartup isumagissavaa tamatuma eqqaamasassatut allanneqarnissaa, piginnaatitaaffiit nalunaarsorneqarsimappata.

Inuttut piumasaqaatinik ikililerineq

§ 643. Qularnaveeqquusiussamik imaluunniit qularnaveeqqutitut sillimmasiissummik pisassalik, pinngitsaaliinikkut tuniniaaneq aqqutigalugu pigisamik nalilimmik, pisassaminut tamakkiisumik matussusiinngitsumik akiliilluni tigusaqarsimasoq piumasaqaatimi sinnerinik nammineq inuttut pisassamisut akiitsulimmut allanulluunniit akileeqqusippat, eqqartuussiviup pisassat ikilisissinnaavai, pigisap nalillip tunineqarnerani allatulluunniit iliornikkut kingusinnerusukkut uppernarsineqarpat tigusermi akigititaq pigisap nalillip nalinganut piffissami pisiffiusumi naleqqussimanngitsoq. Suliassaq suliassiissutaassaaq sularineqassaarluni saqitsaanermik suliassanik sularinninneq pillugu malittarisassat malillugit.

Pinngitsaaliinikkut tuniniaanermi akigititamik agguataarineq

§ 644. Pinngitsaaliinikkut tuniniaaneq naammassiniariarpat eqqartuussutininik naammassinninniaasartup sanassavaa pinngitsaaliinikkut tunisaqarnerani akigititap soqutiginnittut tamarmiusut akornanni agguataarneqarnissaanut missingersuut. Missingersuussiaq pisassalinnut nassiussunneqassaaq kajumissaarutigineqarluni akerliliissutissaqartoqaruni eqqartuussutininik

naammassinninniaasartup piffissaliussimasaa qaangiutsinnagu akerliliissummik
saqqummiussisoqassasoq. Piffissaliussaq qaangiutsinnagu missingersuussiamut
akerliliissuteqartoqanngippat pinngitsaaliinikkut tunisaqarnermi akigititaq tamanna naapertorlugu
agguataarneqassaaq, akiliutit takkussuunnerat naapertorlugu.

Imm. 2. Piffissaliussaq qaangiutsinnagu akerliliissutinik saqqummiussisoqarpat eqqartuussutinik
naammassinninniaasartuq soqutiginnittunik akerliliissuteqartunik ataatsimiigiaqqusissaaq.
Eqqartuussutinik naammassinninniaasartup pinngitsaaliinikkut tunisaqarnermi akigititap
agguataarneqarnissaa aalajangiinikkut, tunngavilersorneqartussakkut, aalajangiiffigissavaa.

Akerliliissutit

§ 645. Pinngitsaaliinikkut tuniniaanissamik suliassap sularineqarnerani illuatungeriioqqaartut
qularnaveeqqutitut sillimasiussinerup inatsisinut naapertuuttuunera pillugu imaluunniit tuniniaanissaq
sioqqullugu isumaqatigiissutit inatsisitigut pisussaaffiliisut inatsisinut naapertuuttuunerat pillugit
akerliliissuteqarsinnaanngillat.

Pigisanik nuunneqarsinnaasunik pinngitsaaliinikkut tuniniaaneq

Nalunaaruteqarneq

§ 646. Pigisanik nuunneqarsinnaasunik pinngitsaaliinikkut tuniniaanissaq minnerpaamik sapaatip
akunnera ataaseq sioqqullugu nalunaarutigineqartassaaq, qularnaveeqqummik pisassalinnut
pisassalinnullu allanut ilisimaneqartunut allagaqarnikkut kiisalu najugarisami atuagassiaq
siammaannerpaasartuq kiisalu aviisi nuna tamakkerlugu saqqummersartuq minnerpaamik ataaseq
aqqutigalugu allagarsiinikkut. Najugarisami piukkunnartumik atuagassiaqanngippat nalunaarut
kommunip allagarsiisarfiagut tamanit takuneqarsinnaanngorlugu nalunaarutigineqassaaq.
Eqqartuussutinik naammassinninniaasartuq naliliippat pigisap nuunneqarsinnaasup
qularnaveeqqusiunneqarsimasup nalinga aviisimi nuna tamakkerlugu saqqummersartumi
nalunaaruteqarnermi aningaasartuutitut naleqqutinnigitsuusoq, aviisikkut nalunaaruteqarnissamik
piumasaqaat tassani pinngitsoorneqarsinnaavoq.

Imm. 2. Pigisap nuunneqarsinnaasooq asiujasuuppat, naleerutiasuuppat imaluunniit toqqortarineranut
atasumik aningaasartuutissat naleqqutissanngippata eqqartuussutinik naammassinninniaasartuq
sivikinnerusumik piffissaliilluni pinngitsaaliinikkut tuniniaasitsisinnaavoq.

§ 647. Nalunaarummi erseqqissumik eqqorluartumillu taaneqassapput piffissaq sumiiffillu
pinngitsaaliinikkut tuniniaavissaq kiisalu pigisat tuniniarneqartussat nalinginnaasumik taaguutaat
allanneqassaaq, pigisat immikkut naleqarnerit erseqqissarlugit.

Pinngitsaaliinikkut tuniniaanissamut naammassisassatut piumasaqaatit

§ 648. Akiligassaqarfigisaaq, pinngitsaaliinikkut tuniniaanissamik noqqaassuteqarsimasooq, tuniniaaneq
pillugu piumasaqaatiliussaaq, taassuma ilaatigut imarissavai tuniniaanermi periaasissaq,
akisussaaffiginninneq, pisinermi akigititap akilerneqarnissaa immaqalu minnerpaatut akeq, taakkulu
eqqartuussutinik naammassinninniaasartumut akuersissutigisassanngorlugit nassitutissavai.
Eqqartuussutinik naammassinninniaasartup misissortassavaa pinngitsaaliinikkut tuniniaanermut
naammassisassatut piumasaqaatit pigisap nalillip nalinganut tunineqarsinnaanerannullu naleqqiullugit
naleqquttuunersut.

Akigiumasamik allakkatigut neqerooruteqarneq

§ 649. Allakkatigut neqerooruteqarnermi eqqartuussutininik naammassinninniaasartup akiitsulik kajumissaassavaa neqeroorutaasuninik ammarterinermin najuuteqqullugu.

Tamanut ammasumik akitsorterussineq

§ 650. Tamanut ammasumik akitsorterussinikkut eqqartuussutininik naammassinninniaasartop pigisanik ataasiakkaanik tuniniaassaaq. Eqqartuussutininik naammassinninniaasartop naliliiguni akitsorterusseqqinnikkut annertunerujussuarinik neqerooruteqartoqarnissaq anguneqarsinnaasoq, aalajangiisinnaavoq aappassaaneersumik naggataarutaasumillu akitsorterussisoqassasoq.

Imm. 2. Akiitsulik aningaasartuutissanut qularnaveeqqutissanik ingerlaannaq akiliinermigut akitsorterussineq pillugu ataatsimiinnermi akitsorterusseqqittoqarnissaanik piumasaqarsinnaavoq, aningaasartuutissat taakku annertunerusumik neqerooruteqartoqarneratigut matussuserneqassanngippata. Taamatorpiaq iliorsinnaavoq pisassalik kinaluunniit, akiliutissatut neqerooruteqarinnikkut tamakkiisumik matussusiivigineqanngitsoq.

Illumik, umiarsuarmik silaannakkoortatinillu pinngitsaaliinikkut tuniniaaneq

Akiligassalimmik ilitsersuineq

§ 651. Eqqartuussutininik naammassinninniaasartop allakkatigut ilitsersuusiamik akiitsulimmut nassiussissaaq. Ilitsersuusiap imarissavai eqqartuussinermi sinniisitut pisinnaatitamik ivertitsivigineqarnissamut periarfissaqarneranik aamma illup nammineq kajumissutsimik tuniniarneqarsinnaanerani paasissutissat. Akiitsulik eqqartuussutininik naammassinninniaasartumut imaluunniit eqqartuussivimmut saaffiginissinnaavoq ilitsersuusiap erseqqinnerusumik itisileriffigineqarnissaa pillugu. Illu akiitsulimmit taassumaluunniit ilaqutaanit najugarineqarpat eqqartuussutininik naammassinninniaasartup kommunalbestyrelsi pinngitsaaliinikkut tuniniaanissamik noqqaassut pillugu ilisimatissavaa.

Eqqartuussinermi nammineq sinnerluni pisinissaatitamik ivertitsineq

§ 652. Eqqartuussutininik naammassinninniaasartop pinngitsaaliinikkut tuniniaanissap suliarineqarnerani sukkulluunniit akiitsulik eqqartuussivimmi sinniisitut pisinnaatitassaanik ivertitsivigisinnaavaa. Akiitsullip inuttut atugarisai pissutigalugit eqqartuussinermi sinniisimik ivertitsinissaq pisariaqartinneqassappat ivertitsinermi aningaasartuutit eqqartuussutininik naammassinninniaasartup erseqqinnerusumik aalajangiinera malillugu tamakkiisumik ilaannakuusumilluunniit naalagaaffiup karsianit inaarutaasumik akilernerqarsinnaapput. Pisuni allani eqqartuussutininik naammassinninniaasartup akiitsulik imaluunniit pinngitsaaliinikkut tuniniaaneq naammassineqassappat taamatut tuniniaanermi pisisoq pisinermi akiusup saniatigut naalagaaffiup karsiata aningaasartuutaanut taarsiisuteqartussanngortissavaa. Eqqartuussinermi sinniisitut pisinnaatitap akissarsiassai aningaasartuutinullu taartisiassai pillugit nammineq aningaasartuutiginnisamik eqqartuussisulersuusisarnermi malittarisassat assingi atortinneqassapput, tak. kapitali 21.

Piareersaataasumik ataatsimiinneq

§ 653. Eqqartuussutininik naammassinninniaasartup akiitsulik pisassallillu tamaasa piareersaataasumik ataatsimiinissamut aallaaviusumik aggersassavai, oqaloqatigiissutissanngorlugi illup tuniniarnerani periaasissaq piumasaqaatillu. Isumaqtigiinnginnermi eqqartuussutininik naammassinninniaasartup tuniniaariaasissaq aalajangiiffigissavaa. Eqqartuussutininik naammassinninniaasartup misissussavaa illu isumannaatsumik naliliiffigineqarsimanersoq. Akitsorterussisoqassappat tamatuma qaqugu pinissaa piareersaataasumik ataatsimiinnerup naammassilernerani sapinngisamik aalajangerniarneqartassaaq.

Imm. 2. Tuniniaasartup tuniniaareernissaanut imaluunniit akiitsullip nammineq tuniniaareernissaanut kinguartitsigallartoqassappat, tak. §§ 654 aamma 655, orniguttut tuniniaasartup tuniniaanissaanut piffissarititaasup qaangiuffissaa imaluunniit nammineerluni tuniniaanissamat piffissarititaasoq pillugu ilisimatinneqassapput, tamannalu ilutigalugu aalajangiiffiusumik ataatsimiinissamat aggersarneqarsinnaapput, tak. 656.

Tuniniaasartumik ikiorteqarluni tuniniaaneq

§ 654. Pisuni immikkut ittuni eqqartuussutininik naammassinninniaasartup aalajangersinnaavaa piffissami erseqqinnerusumik aalajangerneqartumi tuniniaasartutut piginnaatitaasoq tuniniaassasoq, ilanngullugu aalajangersinnaallugu neqerooruteqartoq neqeroorutiminit qanoq sivistigisumik pituttorsimaneqassasoq. Tuniniaasartumut akissarsiarititassat eqqartuussutininik naammassinninniaasartumit annertussusilerneqassapput. Taakku akiitsulimmit akilerneqassapput imaluunniit pinngitsaaliinikkut tuniniaaneq naammassineqarpat pisisumit pisinermi akigititamiit siuumoortumik akilerneqassapput.

Nammineq tuniniaaneq

§ 655. Eqqartuussutininik naammassinninniaasartup pisuni immikkut ittuni akiitsulik pinngitsaaliinikkut tuniniaanissap pinngitsoortinniarnissaanut sapaatip akunneri sisamat tikillugit piffissaliivigisinnaavaa. Pissutsit immikkut ittut tamatumunnga tunngavissaqartitsippata eqqartuussutininik naammassinninniaasartuq piffissaliussamik sivitsuisinnaavoq.

Imm. 2. Eqqartuussutininik naammassinninniaasartup pinngitsaaliinikkut tuniniaanissaq kinguartissinnaavaa akiitsullip, akiligassaqaqfigisap pinngitsaaliinikkut tuniniaanissamik noqqaassuteqartup imaluunniit qularnaveeqqummik pisassallip, illumut neqerooruteqartitsiniarnissaq kissaatigissappagu.

Aalajangiiffiusumik ataatsimiinneq

§ 656. Aalajangiiffiusumik ataatsimiinnermi eqqartuussutininik naammassinninniaasartup neqeroorutit takkussimasut akuersaarsinnaavai imaluunniit aalajangiisinnaavoq akitsorterussinissaq qaqugu sumilu pissasoq. Eqqartuussutininik naammassinninniaasartup neqeroorutit akiitsullip akuersaarumangisai imaluunniit neqeroorutit akiligassanut tamarmiusunut matussusiisnaanningsut akuersaarsinnaanngilai.

Akiligassalimmik illumiit qimagutsitsisarneq

§ 657. Eqqartuussutininik naammassinninniaasartup aalajangiiffigissavaa akiitsulik qaqugu illumiit nuussasoq. Eqqartuussutininik naammassinninniaasartup attartornermi akiliutissaq akiitsullip akiligassaa annertussusilissavaa.

Imm. 2. Pinngitsaaliinikkut tuniniaanissaq pillugu noqqaassut pineqaraangat akiitsulik immaqalu atuisut illumik pisiuallutik soqutiginnittunut qimerluuataarisinnaatitsissapput.

Illumi atortulersuutit

§ 658. Pinngitsaaliinikkut tuniniaanissamik noqqaassummi pigisat nuunneqarsinnaasut illumut atasut ilanngunneqarsimanngippata imaluunniit taakku ilaannaat ilanngunneqarsimappata § 637 malillugu ilisimatitsissut tamanna pillugu paasissutissanik imaqaassaq aamma qularnaveeqqummik aamma qularnaveeqqutissatut arsaarinnissutaasunik pisassallip pinngitsaaliinikkut tuniniaanerup tamakkuninnga ilaqartitaanissaanik piunasaqaateqarsinnaanera pillugu paasissutissanik. Atortulersuutit allattorsimaffiat

eqqartuussutiniik naammassinninniaasartumut tunniunneqassaaq illullu pinngitsaaliinikkut tuniniagaaneranut ilanngullugit nalunaarutigineqassaaq.

Tamanut ammasumik akitsorterussineq

§ 659. Pinngitsaaliinikkut tuniniaanissaq tamanut ammasumik akitsorterussinikkut pissappat akitsorterussineq ingerlanneqassaaq piumasagaatit, Kalaallit Nunaanni Eqqartuussivimmi eqqartuussisup aalajangersarsimasai, sapinngisamik tunngavigalugit, tak. § 668. Tuniniaanissamik noqqaassuteqartoq isumasioqatigalugu aammalu tuniniaanerup sapinngisamik pitsaanerpaamik angusaqarfiunissaa pissutigalugu eqqartuussutiniik naammassinninniaasartoq aalajangiisinaavoq piumasagaatit sanioqqunneqassasut.

Akitsorterussinissap nalunaarutigineqarnera

§ 660. Akitsorterussinissaq eqqartuussutiniik naammassinninniaasartup erseqqinnerusumik aalajangiinera malillugu nalunaarutigineqassaaq. Nalunaarutip imarissavaa allakkatigut neqerooruteqarnissamik oqaatsitigut annertusisinneqarsinnaasumik kajummiissarut. Allakkatigut neqeroorut eqqartuussutiniik naammassinninniaasartumit tiguneqareersimassaaq kingusinnerpaamik pinngitsaaliinikkut tuniniaanissamut sap. akunnerani ulloq suliffiusoq kingulleq.

Pinngitsaaliinikkut tuniniaanissamik noqqaassummik utertitsineq

§ 661. Akiligassaqarfisap, pinngitsaaliinikkut tuniniaanissamik noqqaassuteqarsimasup, noqqaassutini tunuartissavaa akiitsullip pinngitsaaliinikkut tuniniaasoqalersinnagu akilerpagit piumasagaataasut tamaasa, akiligassaqarfisap illumini qularnaveeqquteqarneratigut qularnaarneqarsimasut kiisalu pinngitsaaliinikkut tuniniaanissap suliarineqarnerani aningaasartuutit.

Assigiinngiaartunik akiitsoqarneq

§ 662. Illu pisataalu assigiinngitsunik akiitsortaqarpata, eqqartuussutiniik naammassinninniaasartup aalajangersinnaavaa taakku pinngitsaaliinikkut tuniniaanermi ataatsimoortillugit tuniniarneqassasut, imaluunniit illu immikkoortillugu tuniniarneqassasoq, qularnaveeqqusiussat ilaasa assigiinngitsunik akiitsortaqarnerat pissutigalugu.

Imm. 2. Pinngitsaaliinikkut tuniniaaneq akitsorterussinikkut pissappat, qularnaveeqqutit ilai assigiinngitsunik akiitsortallit immikkuutaarlugit tuniniarlugit suaarutigineqaaqqaassapput tamannalu pereerpat ataatsimoortillugit. Annerpaamik neqeroorutilik eqqartuussutiniik naammassinninniaasartup akuerissavaa. Ataatsimoortunut neqeroorutaasut immikkoortillugit suaarutigineqartunit annertuneruppata imaluunniit naligiippata ataatsimoortumik neqeroorutaasut akuerineqassapput.

Imm. 3. Ataatsimoortitatut pinngitsaaliinikkut tunisisoqassappat, pinngitsaaliinikkut tuniniaanermi akiusoq agguataarneqassaaq qularnaveeqqusiussap ilaasa assigiinngitsunik akiitsortallit nalingi naapeertorlugit, eqqartuussutiniik naammassinninniaasartup naliliinera aqqutigalugu annertussusilerneqarsimasut.

Pisussaaffiit illumut tunngasut

§ 663. Illu piginnittumut immikkut piumasagaatitaqarpat, atuinissamut piginnaatitsissutitaqarpat, soraarnerussutisiatigut inuunerlu naallugu tuniuttakkatigut assigisaasigulluunniit pisussaaffeqarpat, illup tuniniarnerani nalinganut sunniutilinnik, eqqartuussutiniik naammassinninniaasartup aalajangersinnaavaa illu pinngitsaaliinikkut tuniniaanikkut tunineqassasoq, siuliinisut taaneqartutut nammagassatigut pisussaaffittaqartinnagu.

Imm. 2. Pinngitsaaliinikkut tuniniaaneq akitsorterussinikkut pissappat, illu siulliullugu suaarutigineqassaaq nanertuusiussap tiginissaanut pisussaaffittalerlugu. Tamanna sioqqullugu piunasaqaatinut salliusussaatitanut matussusiiinnaasunik neqerooruteqartoqanngippat illu taamatut pisussaaffittalernagu suaarutigineqassaaq.

Imm. 3. Illu imm. 1-imi taaneqartutut nanertuusiussaq ilanngunnagu tunineqassappat, taakku aningaasannortinneqassapput inatsisini malittarisassat nalinginnaasut malillugit imaluunniit eqqartuussutinik naammassinninniaasartup naliliinera malillugu.

Imm. 4. Pisassalik pisassalinnit kingullinnortitanit salliutillugu pinngitsaaliinikkut tuniniaanermi akigititamit matussusiivigineqarsinnaatitaavoq, taakku naammannerisa annertussusaat naapertorlugu. Aningaasat pinngitsaaliinikkut tuniniaanermi iluanaarutisianit akilerneqassapput, tak. § 644, aammalu suliaasiinermut ernialinneqartartunik qaqugukkulluunniit atuuttunik ernialersorneqassapput piffissamiit pinngitsaaliinikkut tuniniaaviumiit akiliisoqarnissaa tikillugu.

Neqeroorummik akuersissutiginnineq

§ 664. Neqeroorutigineqartup akuersarneqarsinnaanera eqqartuussutinik naammassinninniaasartup aalajangiiffigissavaa.

Imm. 2. Ataatsimiinerup imaluunniit pinngitsaaliinikkut tuniniaanerup ingerlanerani neqerooruteqartoqarpat, eqqartuussutinik naammassinninniaasartup akueriumasaanik, ataatsimiinermilu peqataasut akerliliissuteqanngippata, akuersarneq kingusinnerusukku akerlilerneqarsinnaanngilaq.

Imm. 3. Neqeroorutaasumut akerliliissummik saqqummiussisoqarpat ornigussimasut piginnaatitaassapput sapaatit akunneri sisamat qaangiutsinnagit pitsaanagerusumik neqerooruteqarnissamut. Pitsaanagerusumik neqerooruteqartoqanngippat eqqartuussutinik naammassinninniaasartup atuuttussannortitsinera kingusinnerusukku assortorneqarsinnaanngilaq.

Pinngitsaaliinikkut tuniniaaqinneq

§ 665. Pinngitsaaliinikkut tuniniaanissaq pillugu ataatsimiinnermi imaluunniit pinngitsaaliinikkut akitsorterussinermi neqerooruteqartoqanngippat, akiitsoqarfinnut tamanut matussusiiinnaasunik, imaluunniit neqeroorutaasoo akiitsulimmit akuersarneqarsinnaanngippat, aammalu pisassallit § 664, imm. 3 malillugu pitsaanagerusumik neqeroortitsinissamik noqqaassuteqanngippata tamanut ammasumik akitsorterussinikkut pinngitsaaliissummik tuniniaaqinnissaq ullut 14-it qaangiutsinnagit noqqaassutigineqarsinnaavoq. Akiitsulik imaluunniit qularnaveeqqummik pisassalik taamatut akitsorterussinissamik noqqaassuteqartoq taamaaliornermi aningaasartuutissanut ingerlaanaq qularnaveeqqusiissaaq.

Imm. 2. Eqqartuussutinik naammassinninniaasartup imm. 1 malillugu pinngitsaaliinikkut tuniniaaqinnissaq annertunerujussuarnik neqerooruteqarfiusinnaasoriguniuk aalajangersinnaavaa, pinngitsaaliinikkut tuniniaaqinnermi aningaasartuutissat naalagaaffiup karsiata akilissagai.

Imm. 3. Imm. 1 malillugu pinngitsaaliinikkut akitsorterussineq eqqartuussutinik naammassinninniaasartup aalajangiinera malillugu nalunaarutigineqassaaq, tak. § 660.

Akitsorterussinerni piginnittuunermut uppernarsaammik allagartaliuussisarneq

§ 666. Pinngitsaaliinikkut tuniniaanermi pisisoo piunasaqaatinik naammassinnissimappat eqqartuussutinik naammassinninniaasartoo pinngitsaaliinikkut tuniniaanermi pisisup piginnittuunaneranut allagartamik pisisumut inummulluunniit taama ittumik pissarsinnaatitaasumut tunniussaqaassaaq. Eqqartuussutinik naammassinninniaasartup isumagissavaa pinngitsaaliinikkut tuniniaanermi piginnittuulersup piginnittuunermut allagartaata nalunaarsorneqarnissaa, tak. § 642. Nalunaarsuisoqareerpat piginnittuunermut allagartaq Akileraartarnermut Pisortaqarfinnut nassinneqassaaq.

Isumaqatigiinnginneq

§ 667. Pinngitsaaliinikkut tuniniaanissamut atasumik isumaqatigiinngittoqalerpat tamatuminna apeqqtu eqqartuussutunik naammassinninniaasartumit aalajangiiffiqeqassaaq, tunngavilersorneqartussamik.

Malitassiatut naammassisassat

§ 668. Kalaallit Nunaanni Eqqartuussivimmi eqqartuussisoq pinngitsaaliinikkut tuniniaasarneq pillugu malitassiatut naammassisassanik aalajangersaasinnaavoq.

Umiarsuit aamma silaannakkoortaait

§ 669. Umiarsuarnik silaannakkoortaatinillu nalunaarsukkanik kiisalu aalisarsinnaatitsissutunik umiarsuarnik tunisinermut atatillugu tuniniarneqartunut pinngitsaaliissummik tuniniaanermi §§ 651-668 taamatulli atortuutinneqassapput.

Kapitali 49

Qularnaveeqqusiussaq atorneqarsinnaasooq

§ 670. Akiitsullip akiliisarnini sumiginnarpagu imaluunniit illup qularnaveeqqusiunneranut allagartaq naapertorlugu allatigut annertuumik sumiginnaappat, qularnaveeqqusiussamik pisassalik eqqartuussutunik naammassinninniaasartup sulissuteqarneragut illumik atuisussanngortitaasinnaavoq, illumik ingerlatsinikkut isertitat aqqutigalugit piumasaaqatimi matussuserneqarnissaa siunertaralugu.

Imm. 2. Qularnaveeqqummik pisassallip pisinnaatitaanera piginnittuusup qularnaveeqqusiinnermut allagartaataanit imaluunniit ajunaaruteqartitsinnginnissaq pillugu allagartaataanit taparserneqarpat, akiitsut annertussusaat, akilerneqarnissaannullu piffissaliussaq akiitsulimmit uppersarneqassapput imaluunniit pissutsinit erseqqissumik takuneqarsinnaassallutik.

Imm. 3. Akiliutissanik sumiginnaanerup nassatarisaanik qularnaveeqqusiussamik atuilersinnaaneq pisinnaanngilaq qularnaveeqqummik pisassallip qularnaveeqqusiisumut sumiginnaaneq pissutigalugu illumik atuisinnaalernermik allakkatigut nalunaaruteqareerneraniit sapaatip akunneri marluk qaangiutereersinnagit.

§ 671. Qularnaveeqqummik pisassallip noqqaassutaanit takuneqarsinnaassaaq illu tamakkerlugu immaqalu aamma illumut atortulersuutit, qularnaveeqqusiisarneq pillugu inatsimmi § 2, imm. 2-mi taaneqartut, noqqaassummut ilaatinneqarnersut. Eqqartuussutunik naammassinninniaasartup pigisat nalillit, qularnaveeqqummik pisassalimmut atugassanngortitassat nalunaarsussavai.

Imm. 2. Qularnaveeqqummik pisassallip, illumik atuilernissamik noqqaassuteqartup, illumi qularnaveeqqutunik pisassalit allat kommunilu, illup inissisimaffigisaa, illumik atuisussatut tigusinermik kalerrissavai. Qularnaveeqqummik pisassallip, eqqartuussummik naammassinninniaanermiit kingusinnerpaamik ullut 14-it qaangiunneranni, eqqartuussutunik naammassinninniaasartumut nassiuutissavaa kikkut kalerrinneqarsimanerannut allattorsimaffik.

Imm. 3. Suliassanik suliarinnittarneq pillugu aamma §§ 632-mi aamma 633-mi aningaasaanngitsutigut piumasaaqatit allanik pinngitsaaliinikkut naammassinninniaasarneq pillugu malittarisassat taamatulli atortuutinneqassapput. Qularnaveeqqusiisooq illumik atuilernissaq siunertaralugu tigusinermik ilisimatinneqartassaaq imaluunniit eqqartuussutunik naammassinninniaanissamut aggersarneqassalluni, eqqartuussutunik naammassinninniaasartup pingaarutilitsigut sianigisassat pissutigalugit suliassaq taamatut nalunaaruteqarani suliarineqartariaqarsorissanngippagu. Qularnaveeqqusiisumut ilisimatitsineq

imaluunniit aggersaaneq nalinginnaasumik pisassaaq, pisussaq sivikinnerpaamik ullunik arfineq-marlunnik sioqqullugu, tamannalu qularnaveeqqusiisumut nalunaarutigineqartassaaq. Qularnaveeqqusiisooq taamatut nalunaarfigineqanngippat, qularnaveeqqummik pisassallip sapinngisamik piaarnerpaamik suliassap naammassinninniaavigineqarnissaa qularnaveeqqusiisumut ilisimatitsissutigissavaa, tak. imm. 2, oqaaseqatigiit aappaat.

§ 672. Suliassaq suliarineqalersinnagu qularnaveeqqummik pisassalik qularnaveeqqutip sulissutiginerata nassatarisinnaasaatut taarsiissutissatigut piumasaqaataasinnaasunut qularnaveeqqusiisaaq. Eqqartuussutinik naammassinninniaasartup qularnaveeqqusiussasat annertussusissaat suussusissaallu aalajangiiffigissavai.

Imm. 2. Qularnaveeqqusiussat eqqartuussutinik naammassinninniaasartumit atorneqarsinnaalersinneqassapput, eqqartuussutinik naammassinninniaasartooq imaluunniit pigisanik agguaassisarnermut eqqartuussivik illumilu qularnaveeqqummik pisassallit allat naatsorsuutinik tigusaqarneranniit sapaatit akunneri arfineq-pingasut qaangiukkaangata, tak. § 676, imm. 1, taarsiivigineqarnissamik piumasaqaammik eqqartuussutinik naammassinninniaasartumut saqqummiussisoqaranilu, imaluunniit akiitsulik imaluunniit pigisanik agguaassisarnermut eqqartuussivik qularnaveeqqummillu pisassallit allat tamatumani isumaqataappata. Eqqartuussutinik naammassinninniaasartooq taarsiissutissat pillugit aalajangiissaaq, tunngavilersorneqartussamik.

Imm. 3. Eqqartuussutinik naammassinninniaasartup suliassamik suliarinninnissaq piumasaqaatit alersinnaavaa qularnaveeqqummik pisassalik innersuussuteqaqqullugu inummik, pigisamik nalilimmik qularnaveeqqusiunneqarsimasumik inuussutissarsiornerup tungaatigut ingerlatsinissamut pisariaqartunik piginnaassusilimmik.

§ 673. Qularnaveeqqummik pisassalik piumasaqarsinnaanngilaq illup ilaanik, qularnaveeqqusiisumit taassumaluunniit inoqutaanit najugarineqartumik, piginnittunngortitaanissamik. Eqqartuussutinik naammassinninniaasartulli qularnaveeqqusiisup taassumaluunniit inoqutaasa najugarisaminniiginnarsinnaanerat piumasaqaatitalerlugu taakkua qularnaveeqqummik pisassalimmut aningaasanik akiliuteqartaqqusinnaavai, annertussusissaat piffissarlu akilerneqartarfissaat inissiani taamatulli ittuni attartornermut piumasaqaatit atuuttut tunngavigalugit eqqartuussutinik naammassinninniaasartumit aalajangersarneqartussamik.

Imm. 2. Atortulersuutinut qularnaveeqqusiisarneq pillugu inatsimmi § 2, imm. 2-mi eqqartorneqartunut tunngatillugu § 618 aamma § 622 taamatulli atortuutinneqassapput.

§ 674. Qularnaveeqqummik pisassalik illumik atuigallartilluni piginnaatitaassaaq illup isertittagai pissallugit. Qularnaveeqqummik pisassalik piginnaatitaassaaq atortulersuutinik qularnaveeqqusiisarnermik inatsimmi § 2, imm. 2-mi eqqartorneqartunik tunisaqarnissamut allatigullu illumut tunngatillugu iliuseqarnissamut, tamanna illumik ingerlatsinerup ilaatut aalajangersimasumik pisartutut naatsorsuunneqarsinnaasutut isigineqarsinnaappat.

Imm. 2. Qularnaveeqqummik pisassallip pisussaaffigaa illumik atortulersuutaanillu isumannaatsuutitsinissaq aammalu naleqquttumik sillimasiinissaq kiisalu illumut tunngasutut akileraarutininik akitsuusiusanillu, illup atorneqarnerani akiligassanngortartussamik, akiliisarnissaq. Qularnaveeqqummik pisassallip pisussaaffigaa illup sarfamik, gassimik, imermik, kiassarnermik assigisaannillu pilersugaaneranut akiliisarnissaq, qularnaveeqqummik atuisinnaatitaaneq atuutsillugu. Qaammammi qaangiuttumi illumik ingerlatsinikkut angusat qaammatip naaneraniit ullut 14-it qaangiutsinnagit qularnaveeqqummik pisassallip eqqartuussutinik naammassinninniaasartumut qularnaveeqqusiisumullu ilisimatitsissutigisassavai.

Imm. 3. Illu qularnaveeqqusiisaaq attartortinneqarpat qularnaveeqqummik pisassalik, qularnaveeqqummik atuisinnaatitaanermi pissutsit atuukkallartillugit, attartortitsisutut piginnaatitaaffeqalissaaq pisussaaffeqalissallunilu attartornermik inatsimmut naapertuuttumik..

Imm. 4. Qularnaveeqqummik atuisinnaatitaanermi pissutsit atuukkallartillugit qularnaveeqqummik pisassalittut atuisinnaatitaasup pisussaaffigaa pisortaniit illumut tunngatillugu peqqussutaasunik illumik piginnittuusup peqquneqarneratulli malinninnissaq.

§ 675. Qularnaveeqqummik pisassallip illumik atuisinnaatitaanera atorunnaartassaaq qularnaveeqqusiisup sumiginnaanera atuukkunnaaraangat, qularnaveeqqummik pisassalik salliutitaanerususaaq imaluunniit naligisatut salliutitassaaq illumik atuilernissamik noqqaassuteqaraangat, imaluunniit qularnaveeqqusiisumit allamilluunniit illumik pisassalimmit uppersarsarneqaraneqaraangat qularnaveeqqummik pisassalik § 674 malillugu pisussaaffimminik sumiginnaasoq.

Imm. 2. Qularnaveeqqummik pisassalik piginnaatitaassaaq pisassalinnut salliutitaanerususanut imaluunniit naligiimmik salliutitassanut aningaasanik akilerneqartussanngorsimasunik akiliinissamut.

Imm. 3. Qularnaveeqqummik pisassaqtitaaneq atorunnaassaaq illu pinngitsaaliinikkut tunineqarpat imaluunniit piginnittuusooq akiliisinnaajunnaartutut nalunaarutigineqarpat, imaluunniit piginnittuusup toquneratigut pigisai akiitsunik akuerinnikkumannginnertut pisortatigoortumik suliarineqartussanngorpata.

§ 676. Qularnaveeqqummik pisassalittut atuisinnaatitaanermut tunngasut atuukkunnaarpata imaluunniit atorunnaarpata qularnaveeqqummik pisassalik qularnaveeqqummik atuinini pillugu naatsorsuutiniq eqqartuussutiniq naammassinninniaasartumut, qularnaveeqqusiisumut aammalu illumik qularnaveeqqummik pisassalinnut tamanut piaarnerpaamik saqqummiussissaaq. Qularnaveeqqummik atuisinnaatitaanermut tunngasut akiliisinnaajunnaarnerup imaluunniit piginnittuusup toquneratigut pigisaasa akiitsunik akuerinnikkumannginnertut suliarineqarnerisa nassatarisaattut atorunnaarpata, naatsorsuutit pigisanik agguaaassisarnermut eqqartuussivimmut saqqummiunneqassapput. Naatsorsuutit kingusinnerpaamik saqqummiunneqassapput pinngitsaaliinikkut tuniniaanissaaq ilisimatitsissutigineqaraangat.

Imm. 2. Naatsorsuutit qularnaveeqqummik pisassallip atuisinnaatitaasup isertitai aningaasartuutaalu tamaasa pillugit paasissutissanik imaqassapput. Aningaasartuutit, tamakkiisumik ilisimatitsissutaasinnaanngitsut, aatsaat ilanngunneqarsinnaapput suussusaat missangikkatullu annertussusaat naatsorsuutiniq saqqummiussinermi ilisimatitsissutigineqaraangata.

Imm. 3. Qularnaveeqqummik pisassalittut atuisinnaatitaasooq nammineq sulisorisamilu illumik ingerlatsinermut atatillugu sulinerminnut akissarsiaasaannik naleqquttunik naatsorsuisinnaavoq.

Imm. 4. Qularnaveeqqummik pisassalittut atuisinnaatitaaneq pinngitsaaliinikkut akitsorterussinerup nassatarisaatut atorunnaassappat aammalu qularnaveeqqummik atuisinnaatitaasup naatsorsuutai sinneqartooruteqarfiussappata, qularnaveeqqummik pisassallip taakku qularnaveeqqusiisumut taassumaluunniit pigisaanik pisassalimmut akilissavai.

Imm. 5. Naatsorsuutit pillugit isumaqatigiinngissuteqarneq eqqartuussutiniq naammassinninniaasartumit aalajangiiffigineqassaaq, tunngavilersorneqartussamik.

§ 677. §§ 670-676 aamma atortuutinneqassapput aalisarsinnaatitsissutinut, umiarsuarnut silaannakkoortaatinullu nalunaarsukkanut qularnaveeqqusiunneqarsimasunut.

Kapitali 50

Pigisanik arsaarinnikallartarneq

§ 678. Eqqartuussutiniq naammassinninniaasartooq aningaasatigut piumasagaatinut qularnaveeqqutissatut pigisanik arsaarinnikkallarsinnaavoq,

- 1) piumasagaammut qularnaveeqqutitut sillimmasiussisoqarsinnaanngippat aamma
- 2) isumaqartoqartariaqarpat kingusinnerusukkat matussusiivigineqarsinnaaneq assut ajorseriassasoq.

Imm. 2. Pigisanik arsaarinnikkallartoqarsinnaanngilaq piumasaqaat tunngavissaqanngitsutut isumaqarfigineqarpat.

Imm. 3. Silaannakoortaatini, naalagaaffiit takornartat umiarsuaannik umiarsuillu usiinik naalagaaffinnit takornartanit pigineqartunik aatsaat arsaarinnikkallartoqarsinnaavoq inatsisini allani tamanna pillugu malittarisassat malillugit.

Imm. 4. Imaatigut angallannermi inatsisitigut piginnaatitaaneq tunngavigalugu piumasaqaatit isumannaarneqarnissaat siunertaralugu umiarsuarmik arsaarinnikkallartarneq pillugu suliaassat umiarsuup aallarnissaanik inerteqqutitalit imarsiorneq pillugu inatsimmi kapitali 4 malillugu suliarineqartassapput.

§ 679. Pigisanik arsaarinnikkallarnissaq sulissutigineqalersinnagu imaluunniit arsaarinnikkallarnissaq sioqqullugu eqqartuussutini naammassinninniaasartup aalajangersinnaavaa akiligassaqarfigisaq arsaarinnikkallarnermut piumasaqaatit akiitsullip arsaarinnikkallarnermi ajoquserneqarnissaanut akornuserneqarnissaanullu qularnaveeqqusiissasoq. Eqqartuussutini naammassinninniaasartup qularnaveeqqusiissutissat suunissaat annertussusissaallu aalajangiiffigissavaa.

§ 680. Pigisanik arsaarinnikkallarnissaq pinngitsoortinneqarsinnaavoq imaluunniit atorunnaarsinneqarsinnaavoq akiitsulik eqqartuussutini naammassinninniaasartup isumaa malillugu akiligassaqarfigisap piumasaanut naammaginartunik qularnaveeqqusiippat, ernianik ernialiussaareersunik ernialiussassatullu missangikkanik kiisalu arsaarinnikkallarnermik, suliaassap sulissutigineranut, piumasaqaatillu pillugit suliaassap suliarineranut atasumik aningaasartuutissatut ilimagisanik ilasanik.

§ 681. Pigisanik arsaarinnikkallarnissamik noqqaassut allakkatigut Kalaallit Nunaanni Eqqartuussivimmut tunniunneqartassaaq. Noqqaassut paasissutissartaqassaaq pissusiviusunik, akiligassaqarfigisap patsisiginiagaanik, aammalu paasissutissanik suliaassap suliarinissaani pisariaqartunik. Noqqaassummut ilanngunneqassapput allakkiatigut uppernarsaatissat patsisiginiarneqartut. Eqqartuussisut paasissutissanik allakkiatigullu uppernarsaatissanik pissarsiniarnissamut piffissaliisinnaapput.

Imm. 2. Suliassamik suliarinninneq pillugu taamatulli atortuutinneqassapput pinngitsaaliinikkut naammassinninniaasarneq pillugu malittarisassat suliaassat assigiinngissutaasa nassatarisaannik allannguutitalerlugit.

§ 682. Eqqartuussutini naammassinninniaasartup pigisat nalillit arsaarinnissutaagallartut uppernarsarlugit akiitsulimmut nalunaarutigissavai taannalu ilitsersussavaa arsaarinnikkallarnernup inatsisitigut kingunerisassaani, matumunnga ilanngullugu akiligassaqarfigisap piginnaatitaaffiinut akerliusumik pigisanik nalilinnik atuinissap pinerluttulerinermi inatsit malillugu akisussaatinneqarnermik nassataqarsinnaanerani.

Imm. 2. Eqqartuussutini naammassinninniaasartup aalajangersinnaavaa akiitsulik pigisanik nuunneqarsinnaasunik arsaarinnissutigineqarallarsimasunik arsaarneqassasoq, ilimagineqartariaqarpat taamaaliunngikkaanni piumasaqaatit matussuserneqarnissaat ajornarnerulissasoq. Pigisat nuunneqarsinnaasut eqqartuussutini naammassinninniaasartumit imaluunniit allamit taassuma tamatumunnga piginnaatitaanit toqqortarineqassapput, akiligassaqarfigisap akiligasaanik. Aningaasaannarnik aammalu pigisat nuunneqarsinnaasut akiitsoqarfiginerinut allagartanik arsaarinnittoqarallarnerni aningaasat akiitsulluunniit allagartaat eqqartuussutini naammassinninniaasartumit paarineqassapput. Aningaasatigut pisassanik arsaarinnittoqarallanermi pisassat eqqartuussutini naammassinninniaasartumut akilerneqassapput.

§ 683. Akiligassaqarfigisaq arsaarinnittoqarallarnerniit sapaatip akunnera ataaseq qaangiutsinnagu eqqartuussisunut suliaassiissuteqassaaq piumasaqaatit arsaarinnissutigineqarallartussanngortinneqartut

pillugit, akiitsulik arsaarinnittoqarallernerani imaluunniit tamatuma kingorna malersugassajunnaarsitsisimanngippat. Suliassap tamatuma suliarinerani akiligassa qarfigisaq aammattaaq immikkoortumik piumasaqarsinnaavoq arsaarinnikkallarnissap atortuulersinneqarnissaa pillugu.

Imm. 2. Piumasaqaatit pineqartut pillugit eqqartuussitugut suliassiissut siullermeeriffiusumik eqqartuussinermi ingerlanneqarpat akiligassa qarfigisaq arsaarinnikkallartussanngortitsinermit sapaatip akunnera ataaseq qaangiutsinnagu piumasaqaatimi unitsinneqarnissaannik aamma eqqartuussivimmu tassunga suliassiissuteqassaaq.

Imm. 3. Piumasaqaatit pineqartut pillugit siullermeeriffiusumik eqqartuussinermi eqqartuussuteqartoqarsimappat arsaarinnikkallarnissamik suliassaq eqqartuussivimmu eqqartuussuteqarsimasumut suliassiissutigineqassaaq. Eqqartuussit suliareqqitassanngortitsisoqartillugu arsaarinnikkallarneq pillugu suliassap suliarineqarnissaanik tamakkiisumik ilaannaakuusumilluunniit kinguartitsigallarsinnaapput.

Imm. 4. Piumasaqaatit arsaarinnikkallarnissamut tunngassutillit pillugit eqqartuussisulersuussinissaq nunani allani eqartuussivikkut suliassiissutaassappat suliassaq arsaarinnikkallagassanngortitsinermit sapaatit akunneri marluk qaangiutsinnagit suliassiissutigineqassaaq. Piffissaliussaq aamma taamatut sivisutigisoq qaangiutsinnagu Kalaallit Nunaanni suliassiisoqartassaaq.

Imm. 5. Piumasaqaat pineqartoq pillugu eqqartuussivikkut suliassamik nunami allami eqqartuussivimmi, aalajangiinissaa Kalaallit Nunaanni pinngitsoorani malitassatut kinguneqartussatut isumaqarfigisariaqartumi, ingerlasoqarpat, imm. 1 malillugu suliassiissutaasup aalajangiiffiginissaa kinguartinneqassaaq nunami allami suliassap inatsisit naapertorlugit malitassatut aalajangiiffigineqarnissaa tikillugu. Taamaattorli eqqartuussit arsaarinnikkallartussanngortitsinerup ilumut atortuulersinneqarsinnaanerani apeqquut aalajangiiffiginnaavaat.

Imm. 6. Imm. 1-5 taamatulli atortuutinneqartassapput arsaarinnikkallartussanngortitsineq qularnaveeqqusiissuteqarnikkut pinngitsoortinneqarsimagaangat.

§ 684. Akiligassa qarfigisap eqqartuussitugut suliassiinissamut pisussaanaera atorunnaassaaq akiitsulik arsaarinnikkallartussanngortitsisoqarnikkut akiliisinnajunnaarpat imaluunniit toquppat, toqusullu pigisai kingornussisussanut akiitsutigut akisussaaffittaqaanngitsumik pisortatigoortumik pigisanik aguaassisartunit suliarineqarpat.

Imm. 2. Akiligassa qarfigisap qularnaveeqqusiussai uninngatinneqarunnaassapput arsaarinnikkallartussanngortitsinermit imaluunniit arsaarinnikkallartussanngortitsineq pillugu suliassap atorunnaareernerani qaammatit pingasut qaangiuppata, pigisallu tunngaanniit taarsiivigineqarnissaq pillugu eqqartuussitugut suliassiisoqanngippat.

§ 685. Pigisanik arsaarinnikkallartussanngortitsineq pillugu suliassap suliarineqarnerani aalajangiiffigineqartassaaq arsaarinnikkallartussanngortitsineq inatsisinut naapertuuttumik pisimanersoq. Akiitsulik arsaarinnikkallartussanngortitsineq pillugu suliassap suliarineqarnerani arsaarinnikkallartussanngortitsinerup inatsisinut naapertuuttuunera pillugu akerliliissutinik tamanik saqqummiussinnaavoq. Piumasaqaat pineqartoq pillugu apeqquut immikkoortillugu suliarineqassappat piumasaqaatip eqqortuuneranut akerliliissutit suliassap tamatuma suliarineqarnerani saqqummiunneqassapput.

§ 686. Arsaarinnikkallartussanngortitsineq atorunnaarsinneqarsinnaavoq arsaarinnikkallartussanngortitsineq pillugu suliassami eqqartuussutikkut imaluunniit piumasaqaatit pillugit eqqartuussutikkut. Arsaarinnikkallartussanngortitsineq atorunnaartassaaq piffissaq suliareqqitassanngortitsivissaq naagaangat, suliareqqitassanngortitsisoqarsimanngippat allatulluunniit aalajangiisoqarsimanngippat.

§ 687. Pigisanik arsaarinnikkallartussanngortitsineq eqqartuussutinik naammassinninnaasartumit atorunnaarseqquneqarsinnaavoq akiligassa qarfigisaq arsaarinnikkallartussanngortitsineq pillugu suliassiissuteqanngippat imaluunniit piumasaqaatinut tunngatillugu piffissaliussat § 683-imi taaneqartut qaangi-

utsinnagit suliassiissuteqanngitsoorpat, imaluunniit suliassat taakkua arlaat itigartitsissutigineqarpat imaluunniit atorunnaarsinneqarpat.

Imm. 2. Pigisanik arsaarinnikkallartussanngortitsineq tamakkiisumik ilaannakuusumilluunniit atorunnaarsinneqarsinnaavoq pissutsit, arsaarinnikkallartussanngortitsinerup kingorna pisut, tunngavigalugit.

Imm. 3. Pigisanik arsaarinnikkallartussanngortitsineq atorunnaarsinneqalersinnagu eqqartuussutiniq naammassinninniaasartup akiligassaqaqfigisaq oqaaseqaateqarnissaanut sapinngisamik periarfississavaa.

§ 688. Eqqartuussutiniq naammassinninniaasartup aalajangiineri tunngavilersugaassapput.

Kapitali 51

Inerteqquteqarneq

§ 689. Kalaallit Nunaanni Eqqartuussivik inerteqquteqarnermigut inuinnaat aamma naalagaaffimmut kommunitullu sinniisuutitat, inuinnaat eqqartuussisulersuussineranni illuatungiliuttuusut, peqqusinnaavai pisassallip piginnaatitaneranut akerliusumik iliuuseqarnaveersaaqqulugit.

Imm. 2. Eqqartuussutiniq naammassinninniaasartup inerteqquteqarnermut atatillugu kinaluunniit inerteqqummi pineqartoq (pisussaaffiligaq) inerteqqutikkut pinaveersaarisussaatinneqarneq qularnaarniarlugu ataasiakkaatigut iliuuseqarniaqqusinnaavaa.

Imm. 3. Silaannakkoortaatit, naalagaaffiit takornartat umiarsuaat umiarsuillu usii, naalagaaffinnit takornartanit pigineqartut, pillugit inerteqqummik aatsaat atuisoqarsinnaavoq inatsisini allani tamatumingna malittarisassat malillugit.

§ 690. Inerteqqut peqqussutigineqarsinnaavoq uppersarsineqarpat imaluunniit ilimanarsisinneqarpat

- 1) iliuutsit inerteqqutigittinniarneqartut pisassallip piginnaatitaaffiit akerliusut,
- 2) pisussaaffiligaq inerteqqutiginiarneqartunik iliuuseqassamaartoq, aamma
- 3) siunertarisat maangaannartussaasut, pisassalik nalinginnaasumik eqqartuussisutigoortitsinikkut piginnaatitaanerinik atuisinniarneqarpat

§ 691. Inerteqquteqarnissaq piumasagaatigineqarsinnaanngilaq nalilerneqarpat pinerluttulerinerimi inatsisitigut akisussaaitaaneq taarsiissuteqartarnerlu pillugit inatsimmi malittarisassat nalinginnaasut immaqalu pisussaaffilikkamit qularnaveeqqusiussassatut neqeroorutit pisassalimmut naammattumik illersuutaassasut.

Imm. 2. Eqqartuussutiniq naammassinninniaasartup inerteqquteqarnissaq itigartitsissutigisinnaavaa, tamanna pisussaaffiligaasumut ajoqusiissappat imaluunniit akornusersuutaassappat, pisassallip inerteqquteqartoqarnissaanik soqutiginninneranut ersarissumik naleqqutinngitsumik.

§ 692. Eqqartuussutiniq naammassinninniaasartup inerteqquteqarnissamut piumasagaatit aalajangersinnaavoq pisassalik pisussaaffillip inerteqqutikkut ajoquserneqarsinnaaneranut akornusersorneqarsinnaaneranullu qularnaveeqqusiissasoq. Eqqartuussutiniq naammassinninniaasartup qularnaveeqqutissat suussusissaat annertussusissaallu aalajangissavaa.

Imm. 2. Eqqartuussutiniq naammassinninniaasartup qularnaveeqquseeqqusiisimappat inerteqqut aatsaat nalunaarutaassaaq piumasarineqartutut qularnaveeqqusiisoqareerpat. Eqqartuussutiniq naammassinninniaasartup illuatungeriit nalunaarfigissavai piffissamik inerteqqutip atuutilerfissaanik, piffissaq taanna eqqartuussinerimi nalunaarutaareersimassanngippat, tak. § 132.

§ 693. Eqqartuussutiniq naammassinninniaasartup noqqaavigineqarnikkut inerteqqutip atuutsinnarneqarnissaanut pisassalik ikiussavaa, matumunnga ilanngullugu inerteqqummik unioqqutitsaaliuinermit kiisalu suulluunniit inerteqqummut akerliusumik iliuusaasut suujunnaarsittarnerisigut.

Imm. 2. Eqqartuussutininik naammassinninniaasartuq sunilluunniit arsaarinnissuteqarsinnaavoq, tamakku atorneqassappata atorneqarsimappataluunniit inerteqqummik unioqquitsinermi imaluunniit aalajangersimasutigut tunngavissaqarpat ilimagissallugu siunertanut taama ittunut atorneqassamaartut.

Imm. 3. Pigisat arsaarinnissutigineqarallartut eqqartuussutininik naammassinninniaasartumit imaluunniit allamit taassuma tamatumunnga piginnaatitaanit toqqortarineqassapput pisassallip akiligaanik.

Imm. 4. Eqqartuussutininik naammassinninniaasartup arsaarinnissuteqarallarnissaq piumasaaqatitalersinnaavaa pisassalik imm. 3-mi taaneqartutut aningaasartuutissanut qularnaveeqqusissasoq. Arsaarinnikkallartussanngortitsineq aamma piumasaaqatitalerneqarsinnaavoq qularnaveeqqusiissutit § 692 naapertorlugu aalajangersakkat qaffanneqassasut.

§ 694. Suliassamik sularinninnermi pinngitsaaliinikkut naammassinninniaasarneq pillugu malit-tarisassat taamatulli atortuutinneqassapput suliassat assigiinnginnerisa nassatarisaannik allannguutitaler-lugit.

§ 695. Eqqartuussutininik naammassinninniaasartup uppersaatissanik saqqummiinissaq, suliassap sukkasuumik sularineqarnissaanut naapertuutinnigitsuosorineqartoq, pinngitsoortissinnaavaa.

Imm. 2. Eqqartuussutininik naammassitsiniaasartup sulissuteqarnerani pisassalik noqqaassumminik tunuartitsippat, imaluunniit inerteqqut atortinniarneqanngitsoorpat, imaluunniit inerteqqut pilersitaq ato-runnaarsinneqarpat noqqaavigineqarneq malillugu suliassamut aningaasartuutit pillugit aalajangiisoqas-saaq. §§ 243-253-imi aalajangersakkat taamatulli atortuutinneqassapput.

§ 696. §§ 683-687 taamatulli atortuutinneqassapput. Taamaattorli Kalaallit Nunaanni eqqartuussivik-kut suliassaq Kalaallit Nunaanni Eqqartuussivimmuut suliassiissutigineqassaaq, aammalu § 683, imm. 1-imi suliassiissuteqarnissamut piffissarititaaq sapaatit akunnerinik marlunnik sivilissuseqassaaq.

Imm. 2. Eqqartuussutininik naammassinninniaasartup pisussaaffiligaq ilitsersuutissavaa inerteqqutip inatsisitigut sunniutai pillugit, matumunnga ilanngullugu ilitsersuutigalugu inerteqqummik unioqquitsi-neq § 699, imm. 1 malillugu pinerluttulerinermi inatsisitigut akisussaatinneqarnermik nassataqarsin-naasoq.

§ 697. Inerteqqut pillugu suliassap eqqartuussutitaani imaluunniit § 699 naapertorlugu suliassiissutip eqqartuussutitaani aalajangersarneqassaaq pigisat arsaarinnissutigineqarallartut pillugit qanoq il-iuuseqartoqassasoq. Taamaattumik § 696, tak. § 687, naapertorlugu inerteqqummik atorunnaarsitsinermi aalajangiinermik taamaattumik aalajangiisoqarsinnaavortaaq. Aalajangiinermi arsaarinnissutaagallarsis-masut pisussaaffilikkamut utertinneqarsinnaapput imaluunniit arsaarinnissutaasinnaapput. Arsaarinnit-toqassappat arsaarinnissutaasut noqqaavigineqarnikkut atorneqassapput pisassallip taarsiivigineqarnis-samik piumasaaqaataanut matusissutitut.

§ 698. Eqqartuussutininik naammassinninniaasartup aalajangiineri tunngavilersugaassapput.

§ 699. Kinaluunniit eqqartuussutininik naammassinninniaasartup inerteqqutaanik piaaraluni unioqquiti-sisoq pisassallip suliassiissutaata sularineqarnerani akiliisitassanngortinneqarsinnaavoq, tamatu-munngalu atatillugu taarsiissutissanik akiliisussanngortitaasinnaalluni.

Imm. 2. Imm. 1 taamatulli atortuutinneqassaaq kimulluunniit eqqartuussutininik naammassinnin-niaasartup inerteqqutaanik unioqquitsiniarnermi pisussaaffilikkamut piaaraluni ikiuuttumut.

Imm. 3. Akiliisitsinissamik imaluunniit taarsiissuteqartitsinissamik apeqqut kinguartikkallarneqarsin-naavoq inerteqqut pillugu suliassap aalajangiiffigineqarnissaanut.

Imm. 4. Ingerlatsiviit il.il. (inuit inatsisitigut pisinnaatitaasut pisussaataasullu) akisussaatinneqarsin-naapput pinerluttulerinermi inatsimmi kapitali 5-imi aalajangersakkat malillugit.

§ 700. Arsaarinnissuteqarallarnissaq pillugu malittarisassat atorneqassapput piumasaqaatit akilerlugit tunniunneqannginnissaannik, umiarsuup aallatsaaliorneqarnissaanik imaluunniit pigisap sulluunniit nuunneqannginnissaanik allatulluunniit pigisamik taassuminnga atuinnginnissamik noqqaassummik saqqummiussisoqarpat, tamatumuunalu siunertarineqarpat aningaasatigut piumasaqaatinik naammassinninnissaq pillugu qularnaariniarneq.

Kapitali 52

Aningaasaanngitsutigut piginnaatitaaffinnik il.il.ajoqusiinerni uppernarsaatissatigut qularnaarisarneq

§ 701. Piginnaatitaaffimmik piginnittumiit imaluunniit allamiit, tigussaannngitsumik piginnaatitaanermik akornuserneqarneq imaluunniit imm. 2-mi taaneqartutut unioqquutitsisoqarnera pillugu unnerluusuteqarnissamut pisinnaatitaasumiit (suliassamik saqqummiussisoq), noqqaavigineqarnikkut Kalaallit Nunaanni Eqqartuussivik ajoqusiinermut imaluunniit unioqquutitsinermut tamatumalu annertussusaanut uppernarsaatissatigut qularnaarinissaq siunertaralugu aalajangiisinnaavoq, allami (suliassami pineqartoq) misissuisoqassasoq,

1) ilimanaateqalersinneqarpat inuk suliassami pineqartoq inuussutissarsiutitit ingerlataqarnerup ilaatut imaluunniit aamma annikigisassaannngitsumik imm. 2-mi taaneqartutut ajoqusiisimasoq imaluunniit unioqquutitsisimasoq, aamma

2) tunngavissaqarpat isumaqassalluni ajoqusiinermut imaluunniit unioqquutitsinermut tamatumalu annertussusaanut uppernarsaatissat inini ujaasiffigeqqusaasuni nassaassaasut.

Imm. 2. Kapitalimi matumani malittarisassat atortuutinneqassapput makku pillugit uppernarsaatissatigut qularnaariniarnermi

1) pilersitseqqartutut pisinnaatitaanermik tamatumunngaluunniit assingusunik pisinnaatitaaffinnik ajoqusiineq, tak. pilersitseqqartutut pisinnaatitaaneq pillugu inatsimmi §§ 2, 3, 45, 46, 48, 49 aamma 55-imi oqaaseqatigiit pingajui,

2) pilersitseqqartutut pisinnaatitaaneq pillugu inatsimmi § 26-mi oqaaseqatigiit aappaannik pingajuiinillu aamma §§ 51-imik aamma 52-imik unioqquutitsineq,

3) ilisserutinik ajoqusiineq,

4) nioqqusiat ilisarnaataannik ilisarnaatinillu kattussanik ajoqusiineq,

5) sulliviit taaguutaannik ajoqusiineq,

6) nutaatut nioqqusianik illersugassanik ajoqusiineq,

7) atuisartunut siunnersuisoqatigiit, tuniniaaneq, nalunaaqutsersuineq, akit aamma tunisassianik unioqquutitsinikkut issuaaniartoqartillugu atuisartut maalaaruteqartarfiat pillugit inatsisartut inatsisaanni § 9-mik unioqquutitsineq.

Imm. 3. Misissuinermit ilanngunneqarsinnaapput atortut tamarmik, imm. 2-mi taaneqartutut ilumut qanorlu annertutigisumik ajoqusiisoqarsimaneranik imaluunniit unioqquutitsisoqarsimaneranik paasisaqarnissamut pingaaruteqartuusorineqartut, misissorneqassallutittaaq sulluunniit tuniniaanermut atugassat, maskiinat tunisassiornermilu atortut allat, naatsorsuuserinermi atortut, tunisatigut akiligassat allassimaffii, inniminnikkat allassimaffii, ussasaarinermit atortut allatigullu allakkiat, qarasaasiatigut paasisutissaatit, qarasaasianiitit aammalu tamakkunatigut toqqorterinermit atortut. Taamaattorli misissuisoqarsinnaanngilaq paasiniarlugu tunisassioriaatsit imaluunniit maskiinat kiisalu tunisassiornermit atortut allat nutaatut nioqqusianik illersugassanik ajoqusiisimanersut.

Imm. 4. Eqqartuussisut misissuisoqarnissaanik noqqaassut tamakkiisumik ilaannakuusumilluunniit itigartitsissutigisassavaat ilimagisariaqarpat misissuineq misissuiffigineqartumut ajoqusiisinnaasoq imaluunniit akornusersuutaalersinnaasoq, misissuinerup ingerlannerani pisassallip soqutigisaanut naleqqutinngitsunik.

Imm. 5. Misissuinermit pineqassanngillat atortut, pissutsinik, misissuiffigeqquneqartup § 142, § 143 imaluunniit § 145 naapertorlugit ilisimannittutut nassuiaateqarfigisinnaanngisaanik, paasisutissartallit.

§ 702. Misissuisoqarnissaanik noqqaassut Kalaallit Nunaanni Eqqartuussivimmuut tunniunneqartassaaq. Noqqaassut allagaassaaq paasissutissartaqassaarlu misissueqqusisup noqqaassummuut tapersiutitut patsisiginiagaanik, aammalu paasissutissanik suliassap suliarinissaani pisariaqartinneqartussanik.

Imm. 2. Eqqartuussisut aalajangissavaat suliassaq qaqugu sumilu ingerlanneqassasoq tamatuminnгалu suliassiissuteqartoq aammalu suliassami sammineqartussaq nalunaarfigalugu. Suliassami sammineqartussaq sioqqutsilluni ilisimatinneqanngitsoorsinnaavoq, aarlerinartortaqarpat ilisimatitsineq atortut, allakkiat, qarasaasiani paasissutissaatit allalluunniit misissuiffigeqquneqartut, piiarneqarnerannik, suujunaarsinneqarnerannik imaluunniit allanngortinneqarnerannik kinguneqassasorineqartariaqartoq.

Imm. 3. Kinaluunniit suliassami sammineqartussaq sioqqutsisumik ilisimatinneqarsimannikkaluarluni piginnaatitaassaaq misissuinissamik noqqaassut eqqartuussisunit aalajangiiffiginarneqalersinnagu oqaaseqaateqarnissamut, taamaattoq tak. imm. 4.

Imm. 4. Misissueqqusineq sulissutigineqalersinnaavoq suliassami sammineqartussaq ornigutinngikkaluartoq imaluunniit naapinneqarsinnaanngikkaluartoq. Taamaassappat eqqartuussisut inunnu allanut, 18-inik ukioqalereersimasunut najuuttunut aammalu misissuiffigineqartussami pissutsinik ilisimaarinnititut isumaqarfigisanut, kajumissaarissapput suliassap ingerlanneqarnerani suliassami pineqartup soqutigisaanik isumaginninniaqqullugit. Suliassami sammineqartussaq misissuisoqarnissaanik sioqqutsilluni ilisimatinneqarsimanngippat, sumiiffimmilu soqutigisaanik isumaginnissinnaasunik najuuttoqanngippat misissuinissaq kinguartinneqassaaq, pissutsinik immikkut ittunik atuuttoqanngippat.

Imm. 5. Suliassami sammineqartussaq misissuisoqarnissaanik sioqqutsilluni ilisimatinneqarsimanngippat taanna allaluunniit taassuma soqutigisaanik isumaginnittussaq, tak. imm. 4, eqqartuussissuserisumik aggersaanissamut piginnaatitaassaaq. Misissuiffigineqartussap taassumaluunniit sinniisaata piginnaatitaanermik tamatuminnга atuinissaq kissaatigippagu, misissuinissaq eqqartuussissuserisup takkunnissaanut kinguartinneqassaaq. Taamaassanngilarli misissuiniarnermik kinguartitsineq pisariaqanngitsumik kinguarsaanerussappat imaluunniit imm. 2-mi oqaaseqatigiit aappaanni taaneqartutut pisoqarnissaa aarleqqutigineqassappat.

Imm. 6. Misissuinerup ingerlanneqarnissaanik aalajangiinissamut piumasagaataavoq misissuinissamik noqqaassuteqartoq misissuiffigineqartup ajoquserneqarsinnaaneranut imaluunniit akornusersorneqarsinnaaneranut qularnaveeqqusiissasoq, eqqartuussisut qaqutigootumik allatut aalajangiinngippata. Eqqartuussisut qularnaveeqqusiussassat suussusissaat annertussusissaallu aalajangissavaat.

Imm. 7. Suliassami sammineqartussaq najuussimanngippat eqqartuussisut pisariaqanngitsumik kinguarsaratik taassumunnga susoqarsimaneramik ilisimatitsissapput. Taamaassappat suliassami sammineqartussaq ilisimatitsissummik tigusaqareernerminiit sapaatip akunnera ataaseq qaangiutsinnagu piumasagaarsinnaavoq suliassamik ingerlatsisimaneq nanginneqaaqqullugu. Misissuinermiit pissarsiat misissueqqusisumut tunniunneqarsinnaassanngillat piffissarititaq taanna qaangiutereertinnagu. Suliassami sammineqartup suliassap nanginneqarnissaa piumasarippagu paasissutissarsiat aatsaat tunniunneqarsinnaalissapput eqqartuussisut suliassami aalajangiiffiginneqareepata.

Imm. 8. Eqqartuussisut aalajangiineri tunngavilersugaassapput.

Imm. 9. Eqqartuussisut uppersaatissanik saqqummiinissamik pinngitsoortitsisinnaapput tamanna suliassanik ingerlatsinissamut naleqqussorinanngippat.

§ 703. Misissuineq eqqartuussisut sulissuteqarneratigut ingerlanneqartassaaq. Uppersaatissanik qularnaarinissaq siunertaralugu eqqartuussisut pigisanik allakkianilluunniit pisariaqarsorisatut annertutigisunik arsaarinnikkallarsinnaapput, soorluttaaq eqqartuussisut allalluunniit, taamaaliornissamut eqqartuussisunit piginnaatitaasut, allakkianik, qarasaasiatigut paasissutissanik, qarasaasianut immiussanik paasissutissanillu allanik assiliisinnaassasut, filmiliarinnissinnaasut kiisalu nuutsitsinnaassasut.

Imm. 2. Eqqartuussisut immikkut paasimasalimmik nakerisarsiortuunngitsumik ataatsimik arlalinnilluunniit toqqaasinnaapput misissuinerup ingerlannerani ikiuuttussanik.

Imm. 3. Inuk, noqqaassummik saqqummiussimasoq, taassumaluunniit sinniisaa piumasagaatit eqqartuussisunit aalajangersarneqarsimasinnaasut tunngavigalugit misissuisoqarnerani najuussinnaatitaavoq, taamaallaalli siunertaralugu paasissutissatigut, tunisassianik assigisaannillu suussusersiniaanermi eqqar-

tuussisunut ikiunnissaq. Taamaattorli eqqartuussisut aalajangersinnaavaat inuk noqqaassummik saqqummiussisimasoq taassumaluunniit sinniisaa najuutissanngitsoq.

Imm. 4. Eqqartuussisut misissuinerit ingerlannerini maluginiakkanik pisariaqarnerattut annertutigisunik eqqartuussisut suliaannik allassimaffimmut allattuisassapput, soorluttaa atortut imaluunniit allakkiat uppersaatissat arsaarinnissutigineqarallarsimasut nuutsitsinerillu il.il. eqqartuussisunit allatorneqartassasut. Atortut tamakku eqqartuussisunit imaluunniit allamit eqqartuussisut taamaasiornissamut piginnaatitaannit toqqortarineqassapput. Eqqartuussisut allatut aalajangiisimatinnagit atortutigut pissarsiat tamakku illuatungeriinnit takuneqarsinnaatitaassapput, eqqartuussisullu pisariaqarnerattut annertutigisunik paasisuttissarsianik tamakkualuunniit nuutsinneqarnerinik illuatungeriinnut tunniussaqaqtarsinnaapput. Immikkut paasisimasalimmik nakerisarsiortuunngitsumik peqataasoqarsimappat, taanna eqqartuussisut piffissaliussaata qaangiutsinnagu misissuineq tamatumani angusat pillugit nassuiaasiussaataq. Nassuiaasiap nuutsinneqarnera eqqartuussisunit illuatungeriinnut nassiunneqassaaq.

Imm. 5. Immikkut paasisimasalimmik ikiorteqarnermi aammalu atortunik il.il. arsaarinnissutaagallartunik toqqortarinninnermi aningaasartuutit kiisalu allatigut immikkut ittumik aningaasartuutit misissuinissamik noqqaassuteqarsimasumit akilernerqarallassapput. Eqqartuussisut aalajangersinnaavaat inuk, noqqaassummik saqqummiussisimasoq, aningaasartuutit akilernissaannut qularnaveeqquusiisasoq.

Imm. 6. Eqqartuussisut misissuiffigineqartup iniutaanut toqqorsiviinullu pisariaqarsorisaminnut misissuinerup ingerlanniernerani isersinnaatitaassapput. Eqqartuussisut tamanna siunertaralugu pissaanermik pisariaqartumik atuisinnaassapput. Politiit noqqaavigineqarnikkut tamatumani eqqartuussisunut ikiut-tassapput.

§ 704. Inuk, noqqaassummik saqqummiussaqaarsimasoq, misissuinerup naammassineranik eqqartuussisut nalunaarutaannik tigusaqareernermit sapaatip akunneri sisamat qaangiutsinnagit ajoqusiinerit imaluunniit unioqquitsinerit misissuueqqusissummi tunngavigineqartut pillugit eqqartuussivimmut suliassiissuteqartassaaq, suliassami sammineqartup malersuinissaq taamaatiinnangippagu. Eqqartuussivikkoortitsineq Kalaallit Nunaanni Eqqartuussivimmut suliassiissutaassaaq. Suliassiissutigineqartup eqqartuussivikkut malersuinissaq taamaatiinnarsimangippagu eqqartuussivikkullu suliassiineq piffissarititaq eqqorlugu pisimangippat, eqqartuussisut noqqaassuteqartullu pigisat tigummissassat arsaarinnissutaagallarsimasut allakkiallu uppersaatissat, nuutsitat allatigullu uppersaatissatut pissarsiat utertillugit tunniutissavaat, misissuisoqarneranilu saqqummersut ajoqusiinermut imaluunniit unioqquitsinernut uppersaatitut atornerqarsinnaassanngillat.

Imm. 2. Misissuinissaq pillugu aalajangiineq misissuereernerup kingorna atorunnaarsinneqarpat imm. 1-imi oqaaseqatigiit pingajui taamatulli atortuutinneqassapput.

Imm. 3. Paasinarsippat noqqaassuteqartup pisassatut patsisiginiagai tunngavissaqanngitsut imaluunniit noqqaassutigisaa atuutsinniarneqarsinnaanngitsoq inuk suliassami pineqartoq annaasaqaatinut narrujuummisitaanermullu taarsiivigineqarsinnaatitaavoq. Aamma taamaassaaq uppersarneqarsinnaanngippat suliassami pineqartoq ajoqusiinernut imaluunniit unioqquitsinernut, misissuinissamik noqqaassummi pineqartunut, pisuusooq.

Imm. 4. Imm. 3 naapertorlugu taarsiivigeeqqusissut illuatungaaniit piumasaqaatitut atuutsinniarneqarsinnaavoq eqqartuussivikkut suliassap, noqqaassuteqartup suliassiissutigisimasaata, sularineqarnerata nalaani imaluunniit nammineerluni immikkut suliassiissuteqarnikkut. Inuk, noqqaassummik saqqummiussisimasoq, imm. 1-imi oqaaseqatigiinnut siullernut naapertuuttumik eqqartuussivikkut suliassiissuteqanngippat suliassami pineqartoq taarsiivigineqarnissaq pillugu immikkoortumik suliassiissuteqassaaq, siulliulluni noqqaassuteqarsimasup suliassiisinaaneranut piffissarititaasup qaangiutereerneraniit qaammatit pingasut qaangiutsinnagit. Misissuinissamik aalajangiineq suliassap nangitinneqarnerata kingorna, tak. § 702, imm. 7, oqaaseqatigiit aappaat, imaluunniit aalajangeqqitassanngortit-sissutip sularineqarnerata nalaani, atorunnaarsinneqarpat tamanna pillugu aalajangiissuteqarnermi inuk, suliassiissutigineqartoq, imm. 3 malillugu taarsiivigineqartussanngortinneqarsinnaavoq.

§ 705. Suliassamik suliaqarneq pillugu §§ 218, 604, imm. 7, 605, imm. 3, 607, imm. 5, aamma 606, imm. 1, nr. 1 aamma 2 taamatulli atortuutinneqassapput.

Kapitali 53

Ingerlatitseqqitassanngortitsineq

§ 706. Pinngitsaaliinikkut naammassinninniaanissaq pillugu aalajangiinerit, eqqartuussivinnit aamma Kalaallit Nunaanni Eqqartuussivimmit aalajangiinerusut, saqitsaanermik suliassamik aalajangeqqitasanngortitsisarneq pillugu malittarisassanut naapertuuttumik Kalaallit Nunaata Eqqartuussisuuneqarfianut aalajangeqqitassanngortinneqarsinnaapput. Malittarisassat taakku aammattaaq atortuutinneqassapput Kalaallit Nunaata Eqqartuussisuuneqarfiata aalajangiinerinik aalajangeqqitassanngortitsinissaq pillugu akuersisitsiniaanermi.

Imm. 2. Aalajangiinernik, akitsorterussinissaq pillugu suliassani akitsorterussinerup naammassinerani aalajangiinerusunik, aalajangeqqitassanngortitsineq kinguartitsigallarnermik sunniuteqartussaavoq. Aalajangiinernik, akitsorterussinerup naammassinnginnerani aalajangiinerusunik, aalajangeqqitassanngortitsinerni kinguartitsigallarnissamik aalajangersagaq piumasaaqatitalerneqarsinnaavoq aalajangeqqitassanngortitsisoq akitsorterusseqqinnissaq pillugu ataatsimiinnermi aningaasartuutissanut qularnaveeqqusiissasoq.

Imm. 3. Pigisanik arsaarinnikkallarnissamik imaluunniit inerteqqummik eqqartuussutinik naammassinninniaasartup atorunnaarsitsinerata atuutilernissaa aalajangeqqitassanngortitsinikkut akornuserneqarsinnaanngilaq.

Immikkoortoq IX

Aalajangersakkat allat

Kapitali 54

Eqqartuussivikkut killisiuisarneq

§ 707. Pisortat oqartussaaitaanit noqqaavigineqarnikkut eqqartuussivikkut killisiuisussanngortitsisoqarsinnaavoq, pissutsinik inatsisitigut pingaarutilinnik misissuinissaq paasissutissarsinissarlu siunertaralugu. Eqqartuussivikkut killisiuineq eqqartuussisooqataasut peqataaffiginngisaannik najukkami eqqartuussisumit ingerlanneqartassaaq.

Immikkoortoq X

Eqqartuussivimmut akitsuut

Kapitali 55

Innuttaasut eqqartuussivikkut suliassiissutaasa siullermeeriffiusumik sularineqarneranni akitsuutit

Innuttaasut eqqartuussivikkut suliassiissutaat

§ 708. Innuttaasut eqqartuussivikkut suliassiissutaannut siullermeeriffiusumik sularineqartunut akitsuutit 500 koruunit akilerneqartassapput.

§ 709. Suliassiissummi piumasaqaatit arlallit, § 708-imi pineqartunut atasut, pineqarpata akitsuut ataa-seq akilerneqartassaaq, aamma suliassamik suliassiissuteqartut arlaliutillugit imaluunniit suliassanngor-titaasut arlaliutillugit.

§ 710. § 189 malillugu suliassiissummi allamik peqataasussanngortitsineq aammalu suliassiissummi akuliuttoqarneq pillugu apeqqutit suliassiissutitut immikkoortutut isigineqassapput. § 192 malillugu suliassani akuliunnernut akitsuutinik akiliisitsisoqassanngilaq.

§ 711. Suliassanngortitap immikkoortitamik eqqartuussuteqartoqarnissaa piumasarippagu, piumasari-saq taama ittoq immikkoortumik suliassiissutitut isigineqassaaq.

Imm. 2. Tamannali atortuutinneqassanngilaq, nioqqusiamik nutaamik illersuiniarneq pillugu akuliun-nermi suliassanngortitaq piumasaqaateqarpat nioqqusiap nutaap illersorneqarnera atuukkunnaartillugu aalajangiisoqassasoq.

§ 712. Eqqartuussisut suliassamik sularinnissinnaannginnerat pissutigalugu suliassaq itigartitsissuti-gineqarpat akitsuutinik akileeqqittoqassanngilaq, suliassaq itigartitsinermit qaammatit pingasut qaan-giutsinnagit suliassiissutigineqaqqissappat. Aamma taamaassaaq tamatuminnngattaq pissuteqartumik imaluunniit suliassami illuatungeriit tamarmik takkutinnngitsoornerat pissutigalugu suliassaq unitsinne-qarpat. Taamaassappat piffissarititaasoq naatsorsorneqassaaq ullormiit suliassap kingullermik piffissa-liivigineqarsimaneraniit aallartittumik.

§ 713. Suliassami nangitassanngortitami akitsuutinik akiliisoqassanngilaq. Aamma taamaassaaq su-liassaq kinguartikkallarneqareerluni aammalu Kalaallit Nunaanni Atuisartunut Maalaaruteqartarfimmu suliassanngortillugu nassiunneqareerluni eqqartuussivimmu saqqummiuteqqinneqarpat.

Imm. 2. Suliassiisup suliassaq maalaaruteqartarfimmu imm. 1-imi oqaaseqatigiit aappaanni taaneqar-tumut nassiunneqareerneragut unitsippagu akitsuutit akilikkat utertillugit akilerneqarnissaat piumasari-neqarsinnaavoq.

§ 714. Suliassaq eqqartuussivimmi alliunerusumi suliareqqinneqartussanngorlugu utertinneqarpat, sularinneqqiinissamut akitsuutinik akiliisoqassanngilaq.

§ 715. Akitsuutinik akiliisussaaneq atuutilertassaaq

- 1) suliassanngortitsissutinut suliassamilu allakkianut allanut akitsuuteqartussanik imaqartunut: tunnius-sisoqarnerani,
- 2) suliassami allakkiaat akitsuuteqartussanik imallit eqqartuussisunut saqqummiunneqartut: saqqum-miunnerini,
- 3) piumasaqaatit akitsuuteqartussanik imallit, eqqartuussivimmi oqaatsitigut saqqummiunneqartut: saq-qummiunneqaraangata.

§ 716. Akitsuuserneqassanngillat suliassat makkununnga tunngasut:

- 1) Folketingimut, Inatsisartunut kommunalbestyrelsinullu kiisalu piffinni kommunit aggornerisa avataa-niittuni innuttaasut siunnersuisoqatigiivinut qinigaasinnaatitaanermu itigartitsinerit,
- 2) qitornavissiararneq,
- 3) aappariinneq imaluunniit angajoqqaatut oqartussaassuseqarneq,
- 4) ataatassarsiineq,
- 5) angajoqqaatut sinniisuutitaaffiit,
- 6) kiffaanngissusiiiaanernik allaffissornikkut aalajangikkanik misiliineq, aamma
- 7) qularnaveeqqutitut arsaarinnikkallarnerit imaluunniit inerteqqutinik atortussanngortitsineq, pingaar-nertut suliassaq suliassiissutaasimatillugu.

§ 717. Akitsuutininik makkua akiliisassanngillat:

- 1) naalagaaffimmi atorfilittut tjenestemandit, peqquneqarnikkut suliassiissuteqartut, aamma
- 2) illuatungiusoq nammineq aningaasartuutiginnngisamik eqqartuussisulersuussisinnaasoq.

Imm. 2. Illuatungiusoq suliassami aningaasartuutininik akileeqquneqarpat imm. 1, nr. 1-imi taaneqartut pisuni akitsuutininik akiliisussanngortitaassaaq malittarisassat siuliini taaneqartut malillugit, taamaasananili pissutsit immikkut ittut tamatumunnga akerliussappata. Akitsuutininik akiliisussaaneq atuutiler-tassaaq eqqartuussisut aalajangiigaangata.

Uppernarsaatissanik ilanngussisarneq il.il.

§ 718. Uppernarsaatissanik ilanngussinermi, matumunnga ilanngullugit misissuinissanik naliliinissanillu ilanngussineq, uppersarsaatissanik ilanngussinissaq Kalaallit Nunaanni imaluunniit nunami allami pissagaluarpalluunniit, akitsuutit 400 koruunit akiliutigineqassapput, tamanna Kalaallit Nunaanni eqqartuussinerup nalaani imaluunniit eqqartuussinermi atugassatut pissanngippat. Akitsuutit aamma taakku akilerneqartassapput isumaqatigiissitsiniaaneq pillugu inatsimmi §§ 3, 4 aamma 6 malillugit noqqaassu-tininik suliaqarnermi.

Imm. 2. Imarsionermi killisiuinerit akitsuuteqassanngillat.

§ 719. §§ 709-717-mi malittarisassat taamatulli atortuutinneqassapput pisariaqarneratut oqilisaatitaler-lugit.

Kapitali 56

Naammassinninniaanernut aamma pinngitsaaliinikkut tuniniaanernut akitsuutit

Naammassinninniaanerit

§ 720. Makkuninnga suliassaqarnermi akitsuutit 300 koruunit akilerneqartassapput:

- 1) qularnaveeqqutissatut arsaarinninnermi,
- 2) usinik arsaarinnikkallarnermi
- 3) akiligassarsilluni pisisarneq pillugu inatsimmi § 27, imm. 3 malillugu qularnaveeqqutit arsaarinnin-nermi, akiligassaqarfigisamit utertitsinissamut atasumik piaarnerpaamik pisussatut noqqaassutigineqar-tuni,
- 4) eqqartuussutininik aningaasanut tunngassuteqanngitsunik naammassinninniaanerni,
- 5) isertertitsinerit anisitsinerillu eqqartuussummik naammassinninnermik ileqquusutut tunngavissaqanngitsut.
- 6) inerteqquteqarnissaq pillugu suliaqarnerit,
- 7) piginnaatitaaffinnik tigussaannngitsunik il.il. ajoqusiinerni uppersarsaatissanik qularnaarinissaq pillu-gu suliaqarnermi,

Imm. 2. Akiligassaqarfigisap akiitsulimmit ataasiusumit piumasaqaatit arlaliusut pillugit qularnaveeq-qusiissutaasumik pisassaqarneq tunngavigalugu qularnaveeqqutit sillimmasiussinissaq noqqaassuti-gippagu akitsuut ataaseq akilerneqassaaq.

Imm. 3. Akiligassaqarfigisap akiitsulinnit arlalinnit piumasaqaatit assigiit pillugit qularnaveeqqutit sillimmasiussinissaq imaluunniit arsaarinnikkallarnissaq noqqaassutigippagu, akiitsullit tamarmik im-mikkut akitsuutininik akiliunneqassapput. Tamannali atuutissanngilaq akiitsullit aappariittut inooqati-giupata imaluunniit noqqaassut illumut, akiitsulinnit peqatigiinnikkut pigineqartumut, tunngasuuppat.

Imm. 4. Akitsuutininik akiliisussaaneq atorunnaassaaq eqqartuussutininik naammassinninniaasartup qu-larnaveeqqutit sillimmasiussinissaq § 603, imm. 1 malillugu itigartitsissutigippagu, imaluunniit sulias-saq akiliisinnaajunnaarneq pillugu inatsimmi §§ 16-16 a, § 31, § 171 aamma § 207, imm. 1 malillugit itigartitsissutigineqarpat.

§ 721. Akitsuutinik akiliisussaataaneq suliassani § 720-mi pineqartuni atuutissaaq, eqqartuussutinik naammassinninniaasartumut piumasaqaat pillugu siullermeersumik noqqaassuteqartoqaraangat.

§ 722. Qularnaveeqqusiussamik pisassaqaarneq tunngavigalugu qularnaveeqqutissatut sillimmasiussinerniit allaanerusumik naammassinninniaanerni akitsuutinik nutaanik akiliisoqartassaaq, taamaattoqasananili akiligassaqaarfigisaq akitsuutinik akiliisussaanerup atuutilereerneraniit qaammatit pingasut sinerlugit qaangiunnerisigut eqqartuussisunut taakkuusunut imaluunniit eqqartuussisoqarfimmi allami eqqartuussisunut piumasaqaatit pillugit noqqaassuteqarpat.

§ 723. Eqqartuussutinik naammassinninniaanerit makku akitsuuserneqartassanngillat

- 1) pinerlunnernik suliassani akiliisitsissutit, naliliutit arsaarinnissutaasimasut suliassamilu aningaasartuutit, pisortanit akilersinniarneqartut,
- 2) akitsuutit aamma suliassami aningaasartuutit, eqqartuussiviit akilersinniaqassaat,
- 3) piumasaqaatit illuatungiusumit, nammineq aningaasartuutiginnigisamik eqqartuussisulersuussisumit, pisassat,
- 4) piumasaqaatit naalagaaffimmi atorfilittut tjenestemandimit peqquneqarnikkut taassuma suliassiisutaata suliarineqarnerani pisassanngortitat,
- 5) innuttaasut piumasaqaataat pinerlunnernik suliassap pisortatigoortumik suliarineqarnerani aalajangerneqartut,
- 6) angajoqqaatut oqartussaassuseqarneq qitornamillu najorteqarsinnaatitaaneq, aamma
- 7) pinngitsaaliinikkut tuniniaanermi piginnittuulersumut allagartaliuussineq.

§ 724. §§ 720-723-mi aalajangersakkat atortuutinneqassanngillat eqqartuussutinik naammassinninniaanernut, politiinit imaluunniit akiliisitsiniaasartunit ingerlanneqartunut, taamaallaat pinnagit isertertitsiniaanerit anisitsiniaanerillu politiinit suliarineqartartut.

Imm. 2. §§ 720-723-mi aalajangersakkat atortuutinneqassanngillat eqqartuussutinik naammassinninniaanerit politiinit imaluunniit akiliisitsiniaasartunit ingerlanneqarsimasut, eqqartuussisunut § 609, imm. 1 malillugu saqqummiunneqarsimasut.

Pinngitsaaliinikkut tuniniaaneq

§ 725. Pinngitsaaliinikkut tuniniaanernut, eqqartuussivimmit ingerlanneqartunut, akitsuutinik akiliisoqartassaaq §§ 726-727-mi aamma § 728-mi malittarisassat naapertorlugit.

§ 726. Illu, umiarsuaq imaluunniit silaannakkoortaat nalunaarsugaq, atortui nuunneqarsinnaasut ilanngullugit, pillugu pinngitsaaliinikkut tuniniaanissamik noqqaassummik suliaqarnermut akitsuutit 500 koruunit akilerneqartassapput. Taamaattorli § 665, imm. 1 naapertorlugu pinngitsaaliinikkut tuniniaaq-qinnissamik noqqaassut pillugu akitsuutinik akiliisoqartassanngilaq.

Imm. 2. Paarsinerlunneq tunngavigalugu pinngitsaaliinikkut tuniniaanerni imm. 1-imi malittarisassat taamatulli atortuutinneqassapput.

§ 727. Piginneqataassutit, akiitsut allagartaat pisassallu allat pillugit pinngitsaaliinikkut tuniniaanissamik noqqaassummik suliaqarnermi akitsuutit 300 koruunit akilerneqartassapput.

§ 728. § 717, imm. 1, nr. 2-mi malittarisassaaq taamatulli atortuutinneqartassaaq akitsuutinut § 726, imm. 1-imi aamma § 727-imi eqqartorneqartunut, pinngitsaaliinikkut tuniniaanissamut nammineq aningaasartuutiginnigisamik eqqartuussisulersuussinissaq akuerineqarsimatillugu.

Ingerlatitseqqittassanngartitsinermut akitsuutit

Sulieqqitassanngartitsineq

§ 729. Inuttaasunik eqqartuussisarnertut ilusilimmik nunatta eqqartuussisuuneqarfianut sulieqqitassanngartitsinermi akitsuutit 750 koruunit akilerneqartassapput. Eqqartuussiviit Qullersaannut sulieqqitassanngartitsinerni akitsuutit 1.500 koruunit akilerneqartassapput.

§730. Suliassanik § 716, imm. 1, nr. 1-6-imi eqqartorneqartunik sulieqqitassanngartitsinermi akitsuutisunik akiliisoqartassannqilaq.

Imm. 2. § 717-mi malittarisassat atortuutinneqassapput imm. 1, nr. 2-mi pineqartunik sulieqqitassanngartitsinerni, aatsaalli illuatungiusoq sulieqqitassanngartitsinikkut suliassami nammineq aningaasartuutiginngisaminik eqqartuussisulersuussisinnaatitaappat.

Aalajangeqqitassanngartitsineq

§ 731. Nunatta Eqqartuussisuuneqarfianut aalajangeqqitassanngartitsinermi akitsuutit 400 koruunit akilerneqartassapput, aammalu Eqqartuussiviit Qullersaannut aalajangeqqitassanngartitsinermi akitsuutit 750 koruunit akilerneqartassallutik.

§ 732. Aalajangeqqitassanngartitsineq ukunannga aallarnerneqartoq akitsuuserneqartassannqilaq
1) suliassami § 716, nr. 1-6 naapertorlugit akitsuuserneqartussaannqitsumi illuatungeriinnit,
2) illuatungeriinnit, § 717, imm. 1, naapertorlugu akitsuutinik akiliisussaataannqitsunit,
3) pineqaatissiissuteqartitsilluni suliassani pisortatigoortuni unnerluussisussaataasumit aamma pasisamit,
4) illersuisunit aamma eqqartuussisuserisunit ivertinneqarsimasunit, akissarsiasat pillugit apeqqummut tunngatillugu.

§ 733. Eqqartuussiviup pineqartup aalajangiineq aalajangeqqitassanngartitaq allanngartippagu, aalajangeqqitassanngartitsinermi akitsuutit akilerneqartut utertillugit akilerneqassapput. Aalajangeqqitassanngartitsissutip aalajangiiffigineqarnerani suliassiissuteqartoq tamakkiisumik ilaannakuusumilluunniit isumaqatigineqarpat aalajangeqqitassanngartitsinermi akitsuutit akilikkat taamatuttaaq utertillugit akilerneqassapput.

Aammaarlugu suliarinninneq aamma immikkut ittumik sulieqqitassanngartitsineq

§ 734. Suliassap aammaarlugu suliarineqarnissaanik imaluunniit eqqartuussisarnermik inatsimmi §§ 528 aamma 532 naapertorlugit eqqartuussummik immikkut ittumik sulieqqitassanngartitsinissamik qinnuteqaatinik suliaqarnermi akitsuutit 1.500 koruunit akilerneqartassapput. Taamaattorli akitsuutit akilerneqassannqilat illuatungiusoq nangitsinissamik qinnuteqaammik saqqummiussinissamut nammineq aningaasartuutiginngisamik eqqartuussisulersuussisinnaatitaappat. Akitsuutit utertillugit akilerneqassapput qinnuteqaat malitassanngartitaappat. Suliassap aammaarlugu suliarinissaani imaluunniit naammagittaalliuutaanerani akitsuutinik akiliisoqartassannqilaq.

Kapitali 58

Akitsuutit pillugit aalajangersakkat nalinginnaat

Akitsuutit aalajangersarneqarneri akilerneqartarnerilu il.il.

§ 735. Kalaallit Nunaanni Eqqartuussivik akitsuutinik aalajangersaallunilu tigusaqarsinnaatitaavoq. Taamaattorli Kalaallit Nunaanni politimesteri isertertitsinissanik anisitsinissanillu naammassinninnaanerni, politiinit § 724, imm. 1, malillugu ingerlanneqartussani, akitsuutinik aalajangersaallunilu tigusaqarsinnaatitaavoq.

§ 736. Akitsuutinik akiliisussaataaneq atuutilersinneqartassaaq, allatut aalajangiisoqarsimatinnagu, eqqartuussisutigoortitsinissamik noqqaassummik saqqummiussisoqaraangat.

Imm. 2. Allatut aalajangiisoqarsimatinnagu akitsuutinik akiliisussaq tassaassaaq noqqaassummik saqqummiussisoq. Piginnaatitsissut naapertorlugu noqqaassut saqqummiunneqarpat aamma piginnaatitaasoq akitsuutinik akiliisussanngussaaq, taakku noqqaassutip saqqummiunneqarnerani aalajangersarneqassappata.

§ 737. Eqqartuussisulersuussinermut akitsuut eqqartuussisulersuussinissamik noqqaassutip saqqummiunneqarnerani aalajangersarneqarsinnaappat akitsuutit noqqaassuteqarnermut peqatigitillugit akileqquneqarsinnaapput. Piumasaasut malillugit akitsuutit akilerneranngippata eqqartuussisut akitsuutinik akiliinissamat piffissaliisinnaapput. Piffissaliussaq qaangiutsinnagu akiliisoqanngippat noqqaassut atorunnaartutut naatsorsuunneqassaaq. Taamaassappat aamma akitsuutit atorunnaassapput.

Imm. 2. Noqqaassutip saqqummiunneqarnerani akitsuutit aalajangersarneqarsinnaanngippata piumasaqaateqarnerup kingorna akitsuutit akilernerneqassapput. Noqqaassutip saqqummiunneqarnerani akitsuutit akilernissaannut qularnaveeqqusiinissaq piumasarineqarsinnaavoq, eqqartuussisut namminneerlutik eqqartuussisulersuussinngippata. Tamatumani imm. 1-imi oqaaseqatigiit aappaanniit sisamaannut aalajangersakkat taamatulli atortuutinneqassapput.

§ 738. Immikkoortoq taanna malillugu akitsuutit naalagaaffiup karsiata pisassarissavai.

Akitsuutinik aalajangersaanermik maalaaruteqarneq

§ 739. Akitsuutinik akiliisussamiit akitsuutinik naatsorsuineq pillugu akerliliissuteqarneq pisassaaq maalaarummik Kalaallit Nunaanni Eqqartuussivimmut tunniussaqarnikkut. Maalaarut akitsuutinik akiliisussap aalajangersaanermik ilisimannilerneraniit kingusinnerpaamik sapaatit akunneri arfinillit qaangiutsinnagit tunniunneqartassaaq.

Imm. 2. Kalaallit Nunaanni Eqqartuussiviup qaammatinik arfinilinnik piffissarititamik qaangiinissaq naatsorsuutiginnitsoorsinnaavaa qaangiineq pissutsinik immikkut ittunik utoqqatsissutissaqarpat.

Imm. 3. Maalaarut taparserneqarpat akitsuutinik tamatumunnga naapertuuttumik aalajangersaasoqassaaq.

Imm. 4. Akitsuutinik aalajangersaaneq imm. 3 naapertorlugu allanngortinneqassanngippat tunngavilersukkamik aalajangiisoqassaaq. Aalajangiineq Kalaallit Nunaanni Eqqartuussiviup aalajangiinerissavaa.

Imm. 5. Eqqartuussisut namminneerlutik naliliinertik malillugu maalaaruteqartumiit paasisutissarsiniarsinnaapput imaluunniit uppersaatsarsiorsinnaallutik. Aalajangiinerup akitsuutinik aalajangersaaneq atortussanngortissinnaavaa imaluunniit allanngortissinnaallugu iluaqusiisumik imaluunniit ajoqutaasumik.

Imm. 6. Aalajangiineq sapaatit akunneri marluk qaangiutsinnagit saqitsaannernik eqqartuussisulersuussisarnertut ilusilimmik aalajangeqqitassanngortinneqarsinnaavoq. Imm. 5-imi aalajangersagaq taamatulli atortuutinneqassaaq.

§ 740. Kalaallit Nunaanni Eqqartuussivik nammineerluni aalajangersaanermik allannguuteqartitsinnaavoq akitsuutinik akiliisussamat iluaqusiisussamik.

Imm. 2. § 739, imm. 5-imi aamma 6-imi eqqartorneqartutut pisut eqqaassanngikkaanni akitsuutitut ikinaarlugit aalajangersakkanut ilassutissanik akiliinissaq piumasarineqarsinnaanngilaq, akitsuutitik akiliisussaasup aalajangersaanermik ilisimannilerneraniit sapaatit akunneri arfinillit qaangiutereersimappata.

Imm. 3. Taamaattorli ilassutitut akiliutissat akileqquneqarsinnaapput aalajangersaaneq akitsuutitik akiliisussap imaluunniit taassuma piginnaatitaata eqqunngitsumik, amigartumik imaluunniit allatut iliorluni paatsiveerussaataasumik paasissutissiineranik tunngaveqarpat. Ilassutitut akileqqusineq pillugu maalaaruteqartoqarnerani § 739-mi malittarisassat taamatulli atortuutinneqassapput.

Kapitali 59

Akitsuutitik atulersitsineq pillugu aalangersakkat nalinginnaat

§ 741. Inatsiseqarnermut ministeri illugiilluni pissuseqarnissaq naatsorsuutigalugu piginnaatitaavoq uppersaatissanik ilanngussinermut akitsuusiinnginnissamut, nunani allani pisortatut oqartussaasut noqqaassuteqarsimatillugit.

Imm. 2. Naalagaaffinnut takornartanut isumaqatigiissutini aalajangersaasoqarsinnaavoq immikkoortumi matumani aalajangersakkat naapertorlugit akitsuusiisoqassanngitsoq.

Immikkoortoq XI

Isumalioqatigiissitat

Kapitali 60

Kalaallit Nunaanni Eqqartuussiveqarneq pillugu Isumalioqatigiissitat

§ 742. Pilersinneqassapput Kalaallit Nunaanni Eqqartuussiveqarneq pillugu Isumalioqatigiissitat, Kalaallit Nunaanni Namminersornerullutik Oqartussat naalagaaffimmilu oqartussaatait akornanni pinerluttulerinermi- aamma eqqartuussisarnermik inatsisit pillugit ataqatigiissarnermik suliaqartussat, ilanngullugit suliarissallugit inatsisitigut tunngavissanik tamakkunatigut siuarsaaneq, tamatumunnga atasumik ilisimatusarnermik aallarnisaaneq kiisalu eqqartuussivinni oqartussaataitaasut ataasiakkaat sulinerinik aamma ilinniagaqarnissamik pisariaqartitsinerinik malinnaaviginninneq.

§ 743. Kalaallit Nunaanni Eqqartuussiveqarneq pillugu Isumalioqatigiissitat 13-inik ilaasortaqaassapput, tassaasunik Kalaallit Nunaanni eqqartuussisuuneq, Kalaallit Nunaanni Eqqartuussivimmi eqqartuussisoq, Kalaallit Nunaanni politimesteri, Kalaallit Nunaanni Pinerluuteqarsimasunik Isumaginnittoqarfimmi pisortaq, Kanukoka, eqqartuussissuserisoq ataaseq, illersuisoq ataaseq, ilisimatusarfimmi ilinniartitsisoq ataaseq, Kalaallit Nunaanni Namminersornerullutik Oqartussaniit sinnisuutitat marluk kiisalu Inatsiseqarnermut Ministereqarfimmiit, Domstolsstyrelsimiit aamma Pinerluuteqarsimasunik Isumaginnittoqarfimmut Pisortaqarfimmiit sinnisuutitat.

Imm. 2. Eqqartuussissuserisoq inatsiseqarnermut ministerimit toqqarneqassaaq Eqqartuussissuserisut Isumalioqatigiissitat innersuussutaat malillugu, illersuisorlu toqqarneqassaaq Kalaallit Nunaanni Illersuisut Peqatigiiffiata innersuussutaa naapertorlugu. Ilisimatusarfimmi ilinniartitsisoq Inatsiseqarnermut ministerimit toqqarneqassaaq.

Imm. 3. Inatsiseqarnermut ministeri aamma Namminersornerullutik Oqartussat peqatigiinnikkut siulittaasussamik, isumalioqatigiissitani ilaasortaasinnaasumik, toqqaassapput.

Imm. 4. Inatsiseqarnermut ministerip Namminersornerullutik Oqartussat isumasioqatigereerlugit aalajangersassavai isumalioqatigiissitat sulinissaannut malittarisassat erseqqinnerusut, aamma isumalioqatigiissitat allattoqarfeqarnissaasa isumaginissaa.

Kapitali 61

Kalaallit Nunaanni Pilerluttaalisitsiniarneq pillugu Isumalioqatigiissitat

§ 744. Pilersinneqassapput Kalaallit Nunaanni Pinerluttaalisitsiniarneq pillugu Isumalioqatigiissitat, inatsisit atuuttut naapertorlugit pinerluttaalisitsiniartartussat, ilanngullugit suliarisassallugit isumannaatsuutitsinissap tungaatigut siuarsaaniutit, qaammarsaanerit aamma misilittakkatigut paarlaaqatigiittisineq kiisalu najugarisami SSPK-ip ataatsimiititaliaanik siunnersuineq.

§ 745. Kalaallit Nunaanni Pinerluttaalisitsiniarneq pillugu Isumalioqatigiissitat arfineq-pingasunik ilaasortaqaassapput tassaasunik Kalaallit Nunaanni politimesterimiit, Kalaallit Nunaanni Pinerluuteqarsimasunik Isumaginnittoqarfimmiit, Isumaginninnermut Pisortaqaarfimmiit, Peqqissutsimut Pisortaqaarfimmiit, Kanukokamiit kiisalu Kalaallit Nunaanni nammineq kajumissutsimik suliniaqatigiiffinniit, sulisitsisut kattuffiiniit aamma sulisartut kattuffiiniit sinniisuutit. Nammineq kajumissutsimik suliniaqatigiiffinniit kiisalu sulisitsisut sulisartullu kattuffiiniit sinniisuutitassat inatsiseqarnermut ministerimit toqqaarneqassapput Kultureqarnermut Pisortaqaarfimmiit, Kalaallit Nunaanni Sulisitsisut Peqatigiiffianniit kiisalu Sulinermik Inuussutissarsiuteqartut Kattuffianniit (SIK) innersuussutit malillugit.

Imm. 2. Inatsiseqarnermut ministerip Namminersornerullutik Oqartussat isumasioqatigereerlugit aalajangersassavai isumalioqatigiissitat sulinissaannut malittarisassat erseqqinnerusut, siulittaasussamik qinersinissaq ilanngullugu. Isumalioqatigiissitat allatseqarnikkut suliassat Kalaallit Nunaanni politimesterimit isumagineqassapput.

Immikkoortoq XII

Atortuulersitsissutitut aalajangersakkat

§ 746. Inatsit atortuulersinneqarpoq ulloq 1. januar 2010.

Imm. 2. Taamaattorli §§ 742-745 ulloq 1. juli 2008 attortuulissapput.

Immikkoortoq XIII

Ikaarsaariarnermi aalajangersakkat

§ 747. Inuit, najukkami eqqartuussisutut maannamut sulisimasut, aammalu § 12, imm. 1-imi piumasqaatinik naammassinnittut, Kalaallit Nunaanni Eqqartuussivimmi eqqartuussisumit inatsisip atortuulersinneqarneraniit ukiut pingasut tikillugit najukkami eqqartuussisuugallartussat ivertinneqarsinnaapput.

Imm. 2. Ivertitsigallarneq atorunnaassaaq najukkami eqqartuussisoq § 12 malillugu aalajangersimasumik atorfinitsinneqarpat imaluunniit najukkami eqqartuussisutut piukkussaq atorfimmi § 16, imm. 3 malillugu ivertinneqarpat. Taamaattorli Kalaallit Nunaanni Eqqartuussivimmi eqqartuussisoq ivertitsinerminik siusinnerusukkut tunuartitsisinnaavoq.

§ 748. Inuit, maannamut pinerlunnernik suliassani illersuisutut sulisimasut, aammalu § 66, imm. 1-imi piumasqaatinik naammassinnittut, Kalaallit Nunaanni Eqqartuussivimmi eqqartuussisumit inatsisip atortuulersinneqarneraniit ukiuni pingasuni piffissalernerqarsinnaapput § 67, imm. 2 malillugu illersuisutut ilinniagaqarnissamut. Piffissami tassani § 66, imm. 2 taamatulli atortuutinneqassaaq.

§ 749. Suliassat, inatsisip atortuulersinneqarnerani Kalaallit Nunaata Eqqartuussisuuneqarfianut suli saqqummiunneqarsimanngitsut aammalu inatsit imaluunniit Inatsisartut peqqussutaat imaluunniit malittarisassat inatsit imaluunniit Inatsisartut peqqussutaat naapertorlugu suliassat naapertorlugit Kalaallit Nunaata Eqqartuussisuuneqarfiani siullermeeriffiusumik suliarisassatut uninngasut, Kalaallit Nunaanni Eqqartuussivimmut siullermeeriffiusumik suliarisassatut suliassanngortinneqassapput.

Christiansborgimi tunniunneqarpoq, ulloq 30. april 2008

Kunngiussutsitsinnik atsiorpugut naqissusiillutalu

MARGRETHE R.

/Lene Espersen